

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR ELEVENTH SITTING ON WEDNESDAY, THE 22nd FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

LAYING OF PAPER

2. **PU R. LALZIRLIANA**, Minister to lay on the Table of the House a copy of Notification No. A. 43016/3/2018-DC&MA (C)/232 of 16th December, 2022 on the assumption by the Governor of Mizoram of all function or powers vested in or exercisable by the Chakma Autonomous District Council as per Para 16(2) of the Sixth Schedule to the Constitution of India.

FINANCIAL BUSINESS

DISCUSSION AND VOTING ON DEMANDS

3. **ER. LALRINAWMA**, Minister to submit to the vote of the House various Demands under his charge.
4. **PU LALCHHANDAMA RALTE**, Minister to submit to the vote of the House various Demands under his charge.
5. **PU K. LALRINLIANA**, Minister to submit to the vote of the House various Demands under his charge.

LALHMAHRUAIA ZOTE
Commissioner & Secretary

* Please see Bulletin Part-II No. 288, dated the 15th February 2023 for Demands to be moved by Ministers.

SPEAKER : *Thinrim ula, sual erawh chu sual suh u; in thinur chu niin tlakpui suh se; Diabola chu hmun kian hek suh u.* - Ephesi 4:26-27

QUESTIONS & ANSWERS

Aw le, *Zawhna & Chhanna*-ah kan kal nghal ang a. Tunah *Starred Question* No. 161 - zawt turin member zahawm tak Pu Lalrintluanga Sailo ka sawm e.

PU LALRINTLUANGA SAILO : Pu Speaker, ka lawm e. Local Administration Department Minister zahawm tak chhan atan ka zawhna chu hengte hi a ni –

- a) Englai maha Mizoram chhunga rinluh ni ngai lo tun sorkarin Mizoram chhunga a rinluh tak Zampui tlangdung-a Phuldungsei khua hi sorkarin eng angin nge a enkawl zui zel?
- b) Zampui tlangdung Phuldungsei tlawhpawhna tur hian sorkarin kawng buatsaih a tum em? Tum ni se, engtikah nge hna tan a nih ang?

SPEAKER : Chhang turin a changtu Minister zahawm tak Pu K. Lalrinliana ka sawm e.

PU K. LALRINLIANA, MINISTER: Pu Speaker, Member zahawm tak Pu Lalrintluanga Sailo zawhna chhanna chu –

- a) Mizoram sorkar chuan Jampui tlangdung Phuldungsei khua chu ‘Phuldungsei-Zampui’ tih hming pein Village Council a pe a. Ni 27. 8. 2020 VC inthlanpui neih a nih khan intthlanna buatsaih a ni. LAD chuan 15th Finance Commission Grant a pe a, an dawn tawh zat chu –

Kum	Untied	Tied	Total
2020-21	₹91,000	₹91,000	₹182,000
2021-22	₹60,000	₹87,000	₹147,000

Kum 2021-2022 chhungin LAD chuan RGSA Scheme hnuaiiah Panchayat Bhawan (VC House) sakna atan ₹20 lakh a pe bawk a ni. Tin, hemi bakah hian RD lam atangin *Ni 100-inhlawhna* te pawh pek a ni a. Tin, supply buhfai te pawh pek a ni bawk a ni. Thildang dang pawh sawi tur a awm awm e, Pu Speaker.

- b) Zampui tlangdung Phuldungsei tlawhpawhna tur hian LAD atang hi chuan ruahmanna kan nei rih lo.

SPEAKER : Awle, *Zawhbelhna* zawt turin a zawhna neitu hi a tawp berah ka sawm teh ang; Member zahawm tak Pu Lalduhoma ka sawm e.

PU LALDUHOMA : Pu Speaker, pakhatna a ka zawhbelh duh chu –

Finance Commission atang hian Local Council te, Village Council te sum tur hi kan dawng thin a. Hemi lo sem sawm leha hi Mizoram Finance Department hian nge tia, Mizoram Finance Commission? ‘A tu zawkin nge ti’ tih kha kan hre duh a.

Pahnihna-ah chuan – Kan Village Council te sum tur hi a hun takah department hian a pe thei thin lova. Nikumah khan an transfer tlai avanga hremna cheng nuai 282 lai mai kha chawitir kan ni a, Supplementary Demand-ah khan an rawn dil belh ta ringawt mai a. Hei hi eng harsatna nge department hian a neih? A hun taka release/transfer theih loh a nihna chhan hi eng nge ni? Penal interest han chawi teuh-teuh hi pawisa neih loh nak a laiin a uihawm si a. Eng harsatna nge awm kan hre duh a ni e.

SPEAKER : *Zawhbelhna* - Dr. K. Pachhunga, Member zahawm tak ka sawm e.

DR. K. PACHHUNGA : Pu Speaker, ka lawm e.

Ka zawhbelhna chu – “VC te hnenah computer engzat nge pek anih tawh? Pek zel tumna a awm em?” tih a ni e.

SPEAKER : *Zawhbelhna* - Pu Lalrintluanga Sailo.

PU LALRINTLUANGA SAILO: Pu Speaker, ka zawhnaa ka tarlan ang hian Phuldungsei hi ka bialah khuan a awm a. Tin, Zampui tlangdung tunhmaa ‘Tripura’ kan tihah khuan tunhma atanga Mizo fate’n an luah thin a ni a. Kum 2019 December thla khan kan Chief Minister leh LAD Minister zahawm tak te nen kan zin a. Chutah chuan an dil angin Mizoram-ah rin lutin Village Council te pek an ni a. Development sum hrang hrangte pawh LAD bakah Rural Development pawhin a pe a tih kan hria a, a lawmawm hle a.

Chuta ka zawhbelh duh lai a chu - hemi kawng pawhna hi buatsaih niin ka hria a, LAD atang hian a ni chiah lo a nih pawhin PWD atangin nge, hei hi buatsaih niin ka hria a, chu chu ka han tarlang duh a.

Chutih rual chuan, “LAD hian kum 2019-23 chhung hian VC House engzat nge ramchhungah a sak tawh? Sak belh tumna a nei em? Tin, 2019 - 2020 chho-ah khan Village Council House sak anih khan cheng nuai 20 deuh zel khaw tinah pek a ni thin a. 2020 – 2022 chho-ah hian cheng nuai 10 pek niin, a chanveah a rawn tla thla daih mai a. Kuminah hian cheng nuai 20 ah a lo lut chho leh a, hei hi eng vang nge? Engatinge Village Council House sak ni si, kum kar lakah harsatna a awm nge, a chanvea cut hi engne ni a chhan?”

SPEAKER : Awle, a inkarkik viau nain a theih ang-ang chhang turin Minister zahawm tak Pu K. Lalrinliana ka sawm e.

PU K. LALRINLIANA, MINISTER : Pu Speaker, ka lawm e.

Member zahawm tak Pu Lalduhoma zawhna – “Finance Commission sum sem dan hi eng tia bithliah nge?” tih khan, 2015 baseline survey denchhana Finance Department-in population-base a pek dan tur a rawn ruahman angin pek thin a ni. An population tlem leh tam dan a zira pek a ni.

Tin, VC sum - Finance Commission sum etc. a hun taka pek a nih loh chhan hi tam tak a awm thei a. Finance atanga a hun taka pek anih loh thin avangin penal interest hi a awm thin a ni; Supplementary Demand-a lo langah pawh khan chumi tur chu a awm. Kawng lehlamah khang penal interest atang khan VC thuamthatna atan kan hmang leh tho thin bawh a. Amaherawhchu, tunah hian *Dan* thar a awm a, ‘ni 20 chhunga pek vek tur’ tih a ni tawh a, chumi avang pawh chuan tunah hi chuan harsatna tawh lovin kan kal mek a ni.

Tin, Dr. K. Pachhunga zawhna – “VC te computer engzat nge pek annih?” tih kha, computer hi VC 243-ah pek a ni tawh a, an hmang tangkai hle a. Tin, a baka pawh hi sem leh turin ruahmanna kan kalpui mek a ni.

Tin, Question neitu member zahawm tak Pu Lalrintluanga Sailo zawhna – “VC-House eng zat nge pek a nih tawh?” tih kha, Pu Speaker, VC-House repair na hi VC 98 hnenah pek a ni tawh a, tin, VC 150 hnenah VC-House thar hlak pek a ni tawh bawh a. “Sak belh leh tum a ni em?” tih zawhna kha – VC-House 23 tunah hian sak belh tum hma kan la mek a ni.

Tin, “VC-House thar sakna a tan cheng nuai 20 a changa pek a ni a, a changin cheng nuai 10 pek a ni hi engnge a chhan?” tih kha - Central lamin tun covid harsat lai khan a zatvein an rawn titem a, chuang chuan central sawrkar atanga sanction kan hmuh *Panchayat Bhavan India* ram pumpuiah ₹20 lakh pek thina kha, ₹10 lakh-ah an rawn titla a. Tunah hi chuan covid a lo ziaawm leh tak avangin ₹20 lakh-ah an rawn san leh tawh a. Tuna a thar 23 pek belh leh tura kan inruahhman mek pawh hi ₹20 lakh a pek leh tawh tur a ni dawn e. Ka lawm e.

SPEAKER : *Starred Question* No. 162 - Zawt turin Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, RD Department Minister zahawm tak chhan atan –

“Pradhan Mantri Awas Yojana (PMAY) rural area a in sak-tanpuina 1st Installment dawng tawh in sa mek te hi engtikah nge pek chhonzawn an nih dawn?” tih a ni e.

SPEAKER : Chhang turin RD Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, member zahawm tak Pu Zodintluanga Ralte zawhna chhanna chu –

“Pradhan Mantri Awas Yojana (PMAY) Gramin hnuiaia insak tanpuina 1st Installment dawng tawhte hi central atanga sum dawn belh leh state treasury-in sum a release ang zelin pek chhonzawm a ni ang” tih a ni e.

SPEAKER : *Zawhbelhna* - Pu Zodintluanga Ralte.

PU ZODINTLUANGA RALTE: Pu Speaker, ka lawm e.

Kan Minister sawi ang khan PMAY-ah hian State sorkar hian tih theih a nei tlem hle a. State atanga select tawhte chu central ina sum min rawn pek ang zela pek kha ni a, central in min rawn pek tlai deuh leh kan dawng tlai deuh a. State sorkar hian kan tihtheih chu helaia lo pek chhawn kha a ni mai a.

Ka *Zawhbelhna* chu – Hei, thingtlangah, a bik takin minority area-a awmte an account number leh adhaar number inmil lo hi a awm ve duh khawp mai a. Lekhathiamlo te an nihah chuan, central atanga sum lo kal an account-a a lo luh hian, village council sual deuh te chuan an pawisa dawn turah, ‘i hming a ni lo’ ti tea lo in laksak kha a awm thin a. Chuvangin, kan Minister zahawm tak hian min tiam thei se ka duh chu - Hetianga installment thar a lo thlen hian, a area a tlem thin bawk a, a bik takin minority area-ah hi chuan kan BDO te hian heng beneficiaries te hi a hmunah zuk kala, khatiang technical-a harsatna an neih te kha zuk confirm-a zuk tih fel sak mai khan hun a duh rei lo bawk si a. Khatiang installment a lo thlen apiang khan BDO emaw, VLA emaw te a hmuna zuk tih fel zat-zat theih turin hma min laksak thei em?

SPEAKER : *Zawhbelhna* - Pu Zothantluanga.

PU ZOTHANTLUANGA : Pu Speaker, ka zawhbelhna chu –

Ka bial Sairang-ah hian chhiat tawh a thleng zing khawp mai a, Aizawl-a mi emaw, hmun danga mi emaw te tui an tlak hian Sairang khu a buaipuitu ber kan ni thin a. Tichuan, chhiat tawh hi a tlangpuiin fur lai a nih thin avangin, tlawmngai kalkhawmte tana shelter hi kan mamawh hle mai a; chumi hria chuan kan Minister zahawmtak RD Minister hian Sihhmui-ah community hall min sak sak mek a, kan zo tep a, reilote-ah

hawn theih a nih kan beisei a. Chutiang bawk chuan Sairang-ah hma min laksak mek bawk a, hei pawh hi hun reiloteah hawn theih a nih kan beisei a.

Tichuan, Sairang-Dinthar ah khuan hall kan nei chhe em-em mai a, thingtlang khuaa hall sak hi a pawimawh em-em rualin, keini a bikin Sairang-Sihhmui, Sairang-Dinthar te village council hrang theuh an nih vangin a zawnaah pawh hian base-camp hrang theuh nei kan ni thin a; khutah khuan min sak sak leh thei ang em? Ka lawm e.

SPEAKER : *Zawhbelhna* - Dr. ZR Thiamsanga.

DR. ZR. THIAM SANGA : Pu Speaker ka lawm e. Ka zawhbelhna *Pakhatna* chu – “Tun sorkarah hian *Ni 100-Inhlawhna* hi ni eng zah nge ruah hman a nih?” tih leh; Pu Speaker, ‘pahnih bak zawh loh ni se’ i tih avangin *Pahnihna* (a) chu – “Kuminah hian engnge kan dinhmun ni dawn” tih a ni a; *Pahnihna* (b) chu – “PMAY Gramin hi engtikah nge thlan that theih a nih dawn?” tih te a ni e, Pu Speaker.

SPEAKER : Chhang turin Minister zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, ka lawm e.

Kan hriat angin PMAY – ‘*Housing for All*’ te pawh an ti a, then chuan; hei hi khawpui leh thingtlangah an then a. Chutah chuan khawpui hi ‘PMAY-Urban’ a ni a, UD & PA Department enkawl a ni a, tin, thingtlang lam hi ‘PMAY-Gramin’ an ti a. Chutah chuan, PMAY-Gramin ah hianin ₹1,30,000/- zel beneficiaries ten an dawn tur a ni.

Hei hi Pu Speaker, hei hi hriat chian a tul avangin han sawi zau deuh hlek kan duh a. Kan bialah an awm deuh vek a, heng ang beneficiaries te hi. Chutiang chuan ₹1,30,000/- PMAY-Gramin a beneficiaries te hian 30% zelin vawi 4 installment an dawng a - 1st, 2nd leh 3rd Installment-in a lo kal a, a tawpah 10% final installment-ah kan pe a. Helaiah hian harsatna lian tak mai kan nei a; socio-economic census, SECC, 2011 data hmangin beneficiaries te kan thlang a, chutah chuan Ministry of Rural Development hian 3rd party an rawih avangin khaw thenkhat - Lungtian leh Sangau-III te kha thlan loh zingah telin, a khua-khuaa paih hlawk-hlawk te a awm a. Chutiang chuan Mauchar te pawhin harsatna an tawk a ni.

Tichuan, SECC data ah khan thil fel lo tak mai - in leh lo tha tak-tak nei te pawh kha an lo awm nawlh-nawlh mai a. Chungte a nih avangin, ‘Awaasoft’ kan ti a, computer ah kan upload vek a, Ministry lamin, an lo theh lut tawh a. Chumi hnu ah chuan, ‘a dik lo; thlan that a ngai e’ tiin 2017-18 khan ngenna an zuk siam a. ‘Awaas Plus’ an ti leh a, chu chu February 2019 khan final a ni a. Chutiang chuan a thlangtute

tena target kan neih zawng-zawng chu 20,512 lai mai a ni a, chutah chuan 1st installment dawng tawh hi mi 14,862 an ni a, 2nd installment - 7,966; 3rd installment – 6,493 leh 4th installment – 6,069 an ni. Chuti anih chuan - mi 14,443 chu in sak lai mek an ni a, insak la tan lo (la dawng ve lo) hi mi 5,650 zet kan nei a ni. Pu Speaker, a chhang a khat em em a, Mizopa chuan in kan han puah a, tual-pukah te kan han khawsa a, thenawm khawveng ten tlawmngaiin min han pui a, thla hnih-thum hnuah te kan zo mai thin a ni, in lian vak lo ah chuan.

Kan ngaihthlak tak ang khan, a installment hi a chhang khat em-em a, thingzai thenkhat te pawh a lo mawih hman a; fur-thal lo tuar hman te an ni a, harsatna kan tawk nasa khawp mai a. Chutiang a nih avang chuan heng harsatna sukiang tur hian theihtawp kan chhuah a; regional Workshop Aizawl-ah pawh anrawn nei a. Chutiang karah chuan tih danglam/thlak danglam kan han dil pawhin a harsa a, ‘All India-ah hetiang hi a tam a ni’ an ti a. Chung chu kan nih avangin he PMAY-Gramin hi a harsa takzet a ni.

Member zahawm tak zawhna neitu, Pu Zodintluanga zawhna - Bial tam tak a bikin *minority area*-ah, ‘aadhar account inmil lo avangin harsatna kan tawk’ a tih kha a dik khawp mai a. Aadhar settlings kha kan ti vek a, amaherawhchu, number digit kha a lo tam si a, chung ang pakhat lek tihsual pawhin a kalsual duai-duai mai si a. Chungtiang te anih avang chuan kan BDO te ‘uluk leh zualin lo en teh u’ kan ti a; dik takin a dawngtu turte’n an dawn theihna turin ruahmanna kan siam a, chutiang chuan an account leh aadhar link vekin kan ti a.

Chulaia harsatna la awm chu - aadhar neitu kha beneficiary a lo ni a, account neitu kha pa ber emaw te an lo ni a; chhungkaw kima account lo hawn vek theih kha a ni baw si lova, a harsa ve duh khawp mai a; chungte chu ‘link tha leh vek rawh u’ kan han ti a. Kan official te pawh kan lo hrilh ang a, uluk leh zuala tan la sauh sauh turin kan lo infuih dawn nia.

Tin, Member zahawm tak Pu Zothantluanga, Aizawl West-I bialtu zahawm tak zawhna, “Sairang/Dinthar-ah hian hall emaw, shelter emaw min sak sak thei em?” tih kha - Khawtin hian community hall kan mamawh a, amaherawhchu, community hall sakna tur fund a hranpaa allocate a ni lova, churang chuan, a har khawp mai a. Kan hall te hi ‘kumkhatah wawi sawmhnih pawh kan hmang meuh awm lo e’ tih a nih lain, khawtinin kan mamawh em em a ni a. Chutiang chuan, a theih ang angin pawisa awm remchang te pawtkhawmin kan han sak sak thin a, a thawm that te pawh kan han ti bawk a. Sairang/Dinthar hall pawh hi kan lo enzui ang a, tih dan kawng kan lo dap dawn nia. Pu Speaker, I bialah ngei pawh mamawh I nei teuh a, ‘ruahmanna kan siam mek’ tih kha he House kaltlang hian ka sawi duh a ni.

Member zahawm tak Dr. ZR. Thiamsanga, Champhai North bialtu zawhna “Ni 100-inhlawhna hi he sorkarah hian engnge kan dinhmun; ni engzatnge inhlawhna

ruahman thin a nih?” tih kha - Pathian leh mipui zarah sorkarna kan han chang a, malsawmna pawh kan dawngin kan hria. Covid hripui leng karah ni 100-ah ni 100 kan la inhlawh thei a. Kuminah hian kan labour budget hi ‘200 lakhs person’s day’ kan dawn thin kha, ‘175 lakhs person’s day’ hi labour budget sawihonaah min phalsak a, amaherawhchu, committee sangah min ensak leh a, labour budget min approve sak tawh kha; Chutah chuan ‘additional-10 lakhs person’s day’ min phalsak leh a. Chutiang chuan approval kan neih tawh hi ‘185 lakhs person’s day’ a lo ni ta a. A vaia ni 100-ah ni 100 kan inhlawh tir theih dawn chuan ‘201 lakhs person’s day’ kha kan mamawh a ni. Ministry lamah tunah hian kan official te an thang mek a. Anni pawhin, ‘ruahmanna rawn siam zung zung ula, tihdan tur kan ngaihtuah dawn nia’ an ti a. Thingtlang mipuite tan an *chawbel*, an *buhzem* a ni a, a tangkai em em a. Theihtawp chhuaha thawktute leh ministry te, a doletna tur Finance Department lam thahnemngaihna avangin kan target kan tlin leh ngei ang tih kan beisei tlat a ni.

PMAY-Grammin nichinah khan ka sawi tawh a; “engtikah nge kan thlan that theih ang?” tih kha - Tunah hian sak zawh tawh 6,069 kan nei a. 14,443 sak mek niin, kan la sak hmabak (installment la dawng lo) 5,650 zet mai kan la nei a. Khang mite a kal zawh hma loh kha chuan; ministry lamah vawi-duailo kan zuk dawr a, kan han ngen a, theihtawp kan chhuah a, mahse, ‘target in neih ang te hi zo phawt ula’ an ti a. Chumi kan zawh hunah chuan kan thlang tha leh thei turah kan ngai a. Mamawhna a sang a, dawng-awm tak-tak dawng lo mi tam tak an awm tih kan hria a, chung mite tan chuan he sorkar hian theihtawpin hma a la mek zel a ni.

SPEAKER : *Starred Question* No. 163 - zawt turin Member zahawm tak Dr. K. Pachhunga ka sawm e.

DR. K. PACHHUNGA : Pu Speaker, ka lawm e. Hon. Minister for Land Resources, Soil & Water Conservation Department changtu Minister zahawm tak chhan atana ka zawhna chu –

Pu Speaker, tlemin ka han sawifiah lawk ang a. Nghasih catchment area hi khawpui daifem - Hrangchalkawn te, Theiriat te, Sethlun te, Lunglawn te, Ramthar te leh Chanmari te hi Nghasih Zau hnar lamah awm an ni a. Chungah chuan soil erosion venna tur te, water recharge leh check-dam siam leh hmalaknate a awm em? A awm chuan, engte nge min hrilh thei em? Ka lawm e.

SPEAKER : Chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, Member zahawm tak Dr. K. Pachhunga zawhna - “Nghasih catchment area, Lunglei a soil erosion venna tura check

dam siam leh hmalaknate a awm em?” tih kha, Nghasih catchment area, Lunglei-a soil erosion venna tur check dam siam leh hmalakna a awm a, chungte chu -

Sl. No	Item of Works	Quantity
1.	Check dam at upper, middle & lower reaches	60 nos.
2.	Spur for WRC land protection at lower reaches	25 nos.
3.	Bench terrace at lower and middle reaches	100 Ha.
4.	Contour trench for moisture conservation at upper reaches	50 Ha.
5.	Farm pond (non-lined) at lower reaches	15 nos.

SPEAKER : *Zawhbelhna* - Pu C. Lalsawivunga.

PU C. LALSAWIVUNGA: Pu Speaker, Land Resources, Soil & Water Conservation Department changtu Minister zahawm tak chhan atana ka zawhbelhna te chu:

- i) Lo/huan neitu chhungkuate hman tur rainwater harvesting hmun engzatah nge kum hnih chhung hian siam a nih?
- ii) Kum 2020-2022 chhunga tanky siamna tur pawisa engzat nge awm? Hman a ni tawh em? tih a ni e.

SPEAKER : *Zawhbelhna* - Pu Nihar Kanti Chakma.

PU NIHAR KANTI CHAKMA: Pu Speaker, ka lawm e.

Ka bial khua a tam zawk hi chu lui kama awm an ni a, fur laiin kumtin hian soil erosion a awm thin a. Hengah hian sorkar hmalakna a awm em, a bikin ka bialah hian? *Entirnan:* Ka in kawt lawka in panga lai ding thin kha soil erosion avangin tunah chuan an awm ta lova. Chuvangin, “sorkar atangin check dam emaw soil erosion venna tura hmalakna a awm thei em?” tih hi ka zawhna a ni e. Ka lawm e.

SPEAKER : Chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, zawhna zawttu member zahawm tak Pu C. Lalsawivunga khan eng chungchang emaw ni kha a zawt a, ka hmu zo tawh si lova, ka chhang mai thei lova kha kha chu. A chhanna a awm kha hetah hian a tel lo maithei a, a dangah khan ka hmu thin a; a la chhuak mai ang chu maw.

Pu Nihar-a khan, “ka bialah hian soil erosion venna tur check dam emaw a siam theih em?” tih a zawhna kha - Siam theih a ni ang; kuminah hian hetiang lam siamna kan neih dawn chuan, kan lo hria ang e.

SPEAKER : Pu Sawivunga zawhna tanky chungchang kha i chhang thei em?

PU R. LALZIRLIANA, MINISTER: Rain-water harvesting tanky hi hmun eng emaw zatah kan siam a. Tuna member zahawm tak Dr. K. Pachhunga zawhna ang deuh khan, hetiang chia siam tam tak kan nei a, a zat chiah tunah hian ka sawi mai thei lo a ni.

SPEAKER : *Starred Question* No. 164 – Zawt turin Member zahawm tak Pu Lawmawma Tochwawng ka sawm e.

PU LAWMAWMA TOCHHAWNG: Pu Speaker, ka zawhna hi tuna zawhna leh chhanna nen khan a inzul hle a. Tui lampang ve thung, kan Minister zahawm takin a chhan a tan -

- a) Land Resources, Soil & Water Conservation Department hian rampum huapa tui-hna humhalh lam kawngah hian eng ang hmalakna te nge a neih?
- b) Khawi hmunahte nge hna thawh a nih? tih a ni e.

SPEAKER : Chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, Member zahawm tak Pu Lawmawma Tochwawng zawhna chhanna chu -

- a) Land Resources, Soil & Water Conservation Department chuan NABARD-WDF hnuai hmun hrang hrangah Springshed-Based Watershed Development Project a kalpui mek a, he project-in a tum ber chu, tuihna tihpun a ni a, 100% grant a thawh a ni.
- b) Heng hmunah te hian hna hi thawh mek a ni -
 1. Lungtian Zau, Aibawk
 2. Vaipuanpho, Ailawng
 3. Khawhnuai Tuikhur, Bawngthah
 4. Upper Chitelui, Haulawng

SPEAKER : *Zawhbelhna* - Pu Lawmawma Tochwawng.

PU LAWMAWMA TOCHHAWNG: Pu Speaker, ka *Zawhbelhna* te chu –

- i) Lunglei lamah tuihna humhalh lamah khan nasa zawkin minrawn thawhsak ve thei ang em? Tunah khan Haulawng chiah kha a lang a.
- ii) Sawhthing chingtuten sawhthing an chawh-phutna te leh kangvar thlai chi kan han thlak zo chiah a lo neitute'n, chumi zawh chuan to a lo haw thin a; hetiang huna ruah a lo sur hian lei chung lang, lei hang tha hi fur tui hian a len bo nasa mai thin a. Hemi venna - leilung luang ral tam lutuk tur venna atan hian

Changkham - contour trench leh gabion structure te ang hian hma a lak theih ang em? tih a ni e.

SPEAKER : Awle, chhang turin a changtu Minister zahawm tak Pu R. Lalzirliana ka sawm e.

PU R. LALZIRLIANA, MINISTER: Pu Speaker, Lunglei lam Pu K. Pachhunga bialah khan tlem chu kan va thawk ve a. Hmun dangah pawh hian thawh vat kan duh a, amaherawhchu, NABARD lam atanga pawisa kan hmuh dan azir leh he laia kan Finance Minister Chief Minister in ‘heti zat hi chang rawh se’ tia a tih tam deuh chuan a ram pum huap hian district tinah kan thawk thei ang. Anmahni lamah pawh khan, ‘kan thawk thei ang’ tih kha ka han sawi duh a ni e.

SPEAKER : *Starred Question* No. 165 - Zawt turin Member zahawm tak Pu K. Laldawngliana ka sawm e.

PU K. LALDAWNGLIANA: Pu Speaker, Irrigation & Water Resources Department changtu Minister zahawm tak chhan turin ka zawhnate chu-

- a) Tuirial bial chhungah kum 2022-2023 chhungin Irrigation & Water Resources Department hmalakna hrang hrang engte nge?
- b) Khawi khuaah te nge hmalak a nih?

SPEAKER : Chhang turin a changtu Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker, ka lawm e. Member zahawm tak Tuirial bialtu Pu K. Laldawngliana zawhna chhanna chu –

- a) Kum 2022-2023 chhunga Tuirial Bial-a Irrigation & Water Resources Department hmalakna te chu -
 1. Dilzau MI Project, Hortoki -
 - i) Renovation of Water Harvesting Pond at Zahawma’s area;
 - ii) Construction of Water Harvesting Pond at Thangchhingpuia’s area;
 - iii) Improvement of Water Harvesting Pond at Vanlalduha’s area;
 - iv) Construction of farm road and approach road;
 - v) Laying of GI Pipe at Tumtlang, Bualpui.
 2. Dilzau, Hortoki.
- b) Tumtlang, Bualpui.

SPEAKER : *Zawhbelhna* - Zawhna neitu Member zahawm tak Pu K. Laldawngliana.

PU K. LALDAWNGLIANA: Pu Speaker, ka *Zawhbelhna* chu –

“Tuirial Bial chhungah hmalak tumna a awm chhunzawm em?” tih a ni a. Tin, Hma min laksak tawhna zawng zawngah lawmthu ka sawi nghal baw k e.

SPEAKER : A va tawi ve. Chhang turin Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Speaker, Member zahawm tak Pu K. Laldawngliana biala hmalakna kan neih hi a la tawngchham ang reng viau mai a. Amaherawhchu, potential area hmun hrang hrangah a neihte kan identify a, a zat chiah erawh chuan ka sawi mai thei lova. “Theihtawp chhuahin Tuirial Bial hi hmalak sak kan tum a ni” tih kha ka chhanna ni se. Ka lawm e.

SPEAKER : *Starred Question* No. 166 - Zawt turin Member zahawm tak Pu C. Lalsawivunga ka sawm e.

PU C. LALSAWIVUNGA: Pu Speaker, Starred Question No. 166, Commerce & Industries Department changtu Minister zahawm tak chhan atan ka zawhna chu –
“Mizoram-a kan thlaitharte awmze nei zawka vawnthat leh sawngbawl lam buaipui turin ‘Foods/Fruits Processing Wing’ siam a ni tawh em?” tih a ni e.

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker, Member zahawm tak Pu C. Lalsawivunga zawhna hetiang hian kan chhang e –
“Mizoram-a kan thlaitharte awmze nei zawka vawn that leh sawngbawl lam buaipui turin Foods/Fruits Processing Wing tak hi chu siam a la ni lo”.

SPEAKER : *Zawhbelhna* - Dr. Vanlalthlana.

DR. VANLALTHLANA : Pu Speaker, *Zawhbelhna* kha ‘pahnih chauh ni se’ kha i ti a, vawiin chu kan kal deuh ngat ngatin ka hria a. Zawhna 6-na kan lut a, a lawmawm khawp mai. Keipawhin zawhna pahnih ka han nei ang e, a te lam nei lovin.

“Means of doing business” kan website-ah khan Mizoram Industrial and Investment Policy, 2021 kha a draft policy hmuh a ni a, session hmasaah pawh industrial policy hi ‘a thar neih tuma buaipui mek a ni’ tih te kan lo hre tawh a. “Hei hi eng anga kalpui nge a nih? Mizoram hian kumin chhungin industrial policy thar kan nei dawn em?” tih kha ka zawhna *pakhatna* a ni a.

Tin, Trade & Commerce - Allocation of Business Rules, 2019 hnuaiah khan ‘competition commission’ kha a rawn dah a. “Department hian sumdawnaah te,

consultancy - public procurement ang chi ah khan hmalakna a nei em? Engtingge competition commission allocation, keimahni hnuai a awm ve siah hian hma kan lak?" tih te a ni e.

SPEAKER : *Zawhbelhna* - Dr. Vanlaltanpuia.

DR. VANLALTANPUIA : Pu Speaker, ka *Zawhbelhna* chu –

- i) Ka biala Serkawn Bazar shed chhe tak mai siamthatna tur DPR kan thehluk kha engnge a thlen tawh? Engtia hmalak tum nge a nih?
- ii) Pu Speaker, i phalnain - Khawpui lo thang zelah Serkawn-a kan bazar shed hi a manganthlak viau mai a, an bawr tam si a, a chhuat vel te a chhe em-em tawh mai si a, ‘chhiatna nasa zawk a thlen a hlauhawm hle a ni’ tih he House-ah hian ka sawi leh duh a. Chuvang chuan “kan Minister zahawm takin kuminah hian min ngaihsak thei ang em?” tih ka zawt a.
- iii) Ka bial tho Mualthuam North-ah hian handloom/puantah hote tan ‘Handloom Park’ din tumna proposal kan nei a, Central Ministry-ah pawh project proposal thehluk a ni tawh a, a final stage kan thleng mek tawh niin ka hria a tunah hian. ‘Engnge kan thlen tawh’ tih min hrilh thei em? Ka lawm e.

SPEAKER : *Zawhbelhna* - Pu C. Lalsawivunga.

PU C. LALSAWIVUNGA: Pu Speaker, kut-hnathawktu tena an thawhchhuah, an thawhrah, sawhthing a ni emaw, aieng a ni emaw, serthlum a ni emaw, lakhuihthei a ni emaw vawiin thleng hian harsatna an tawk nasa em em a; a hralh thua te, a vawnthat leh a enkawl thua te awmze neiin sorkar hian kut hnathawktute hi ke a la penpui thei lova. Hemi chungchang hi SEDP Bu B-3.1 (iv)-ah kha chiang takin a inziak a, ka chhiar thin a, a lawmawm ka ti a.

Amaherawhchu, hei, kum 5 kan hmang chho dawn a, kut hnathawktute tana hmalakna tha ziaka dah a nih laiin, bawhzui emaw, tihhlawhtlin emaw a la awm lo hi a paw hlein ka hria a. Budget-ah ‘food processing atan awmze nei tham sum a hranpaa dah a ni ang’ tiin SEDP buah khan chiang taka ziaa a ni nghe nghe a ni. Chutianga hmalak a la nih loh chhan hi kan Minister zahawm tak khan chiang takin min hrilh se tih ka ngen a, ka rawn zawhbelhna a ni a.

Tin, heng kan thlai thar te dahthat leh vawnthatna kan lo neih tawh ang ang hi changtlung zawk a enkawl leh thuam that ngai te thuam that a ni em? Heta tan hian kumthar pawisa lo awm tur budget-ah pawisa dah a ni em? Engtia hmalak nge tum a nih? tih te kha ka zawh belh a ni e.

SPEAKER : Chhang turin a changtu Minister zahawm tak Dr. R. Lalthangliana ka sawm e.

DR. R. LALTHANGLIANA, MINISTER: Pu Speaker Dr. Vanlathlana zawhna chungchang kha heti zawng hian ka han chhang ang a –

Industrial policy hi kan bei ngawrh ve khawp mai a, amaherawhchu uluk deuh hleka ngaihtuah ngai a ni a, thluak hman a ngai khawp mai a. Stake-holders te nen tunah hian kan sawiho leh dawn a, “chutah chuan final hman kan in beisei” tih kha ka chhanna ni sela, kumin chhung hi chuan beisei turah ngai ila a tha awm e.

Pahnihnaah chuan, competition commission chungchang kha kan hotute nen (midangte pawnrawn tlangin) meeting kan nei a, ngaihtuahna kan seng chho mek a, kan la thlang fel thei chiah lova. Hei pawh hi “chak takin hma kan la mek e” tih kha ka chhanna ni sela.

Dr. Vanlaltanpuia zawhna - Serkawn market kha tlemin a kahpah deuh a, food processing nen khan. Mahse, a vei khawp mai a, kei pawh ka bial hlui a ni a; an building saw a chim a hlauhawm angreng khawp mai. Theihtawp kan chhuah a, nikum hmasa atang khan. Covid hian tlemin funding source kan zawhna lamah NEC hian harsat an tawk niin a lang a. DPR cheng nuai 300 kan thehltut daih tawh a, amaherawhchu, NEC hian sum an neilo niin ka hria a, tlemin a hlawhtlinna kan hmu thei dawn lova kan hriat avang khan, NEC lam hi kei pawhin tawngkamin an Secretary te ka zuk bia a. Chutah chuan, “lianpui lo deuh hlekin eng emaw han siam leh ta ula” an rawn ti leh a. Mizoram hmun 10 chuang niin ka hria a, market rang taka han sak zung zung theih tur ang chiah ruahmanna kan nei a, chu chu kan thehltut leh a, a pipeline-ah a la awm a. “Min pe thei ang em tih ka la sawi thei chiah lo” tih kha ka chhanna ni se. Serkawn kha chu ‘a pawimawh berte zingah khan kan dah a ni’ tih kha Member zahawm tak khan min lo hriat sak sela.

Tin, handloom park kha Haulawng thlen hma ‘Mualthuam-ah sawn din ni se’ tih kha a bialtu hian a vei khawp mai a. Amah mimal pawh hian theihtawp a chhuah vein ka hria a. Delhi-ah te pawh a zuk bawhzui a, keini a department lampang te pawhin kan sawipui a, kan bawhzui a. Tin, keipawhin DO letter kha a concerned ministry-ah te kan thawn thla thin a, kan han sawi ho kan han sawi ho a. Engpawh ni sela, hei hi tun dinhmuna final theih a la ni chiah lova. Thenzawl hi kan hriat angin handloom beih nasat berna khua te a lo ni bawh a, heta tang paw hian a hla lutuk lova. Helaiyah hian query/zawhna chi hrang hrang min zawt a, kan han chhang chho ve zel bawh a. Ministry of Textiles-in min rawn hriat tir tawh ang chi tunah hian ngaihtuah zui turin thil a kal mek a ni. A project hi a te lo angreng a, nuai 500 bawr vel niin ka hria a. A lian viau mai a, a hlawhtlin theih chuan a lawmawm ngawtin ka ring a. Amaherawhchu, khu lampang atanga pawisa beisei kan nih avang khan ‘a chhanna kan la hmu thei chiah lo’ tih kha ka sawi duh a ni.

Zawhna neitu zawhna kha - Ni e, ‘SEDP-ah kan dah a ni’ tih kha a dik a. Tin, SEDP-ah hian Pu Speaker, Commerce & Industries hi a chang tam pawl tak kan ni a, tuna beneficiaries kan thlan neuh neuhah pawh hian hetiang hawi zawng hi kan thlang ve teuh mai. Chuvang chuan SEDP, tun financial year kal mekah pawh hian eng emaw chen kan CM leh Finance Minister ni bawh pawhin a ngai pawimawh a, kan lawm viau a. Eng emaw chen chu kuminah hian kan dah a, kum tharah pawh hian kut-hnathawktute kan nei leh dawnin ka ring.

Amaherawhchu, helaia zawhna, ‘Food Processing Wing’ tih lai tak hi sawifiah a ngai a. Pu Speaker, hei, Mizoram thlaitharte awmze nei zawka sawngbawlina tur kha Mizoram sorkar khan Ni 19 December, 1989 daih tawh khan ‘Commerce & Industries Department’ kan tih hnuaiah hian MIFCO kha a din a. Tichuan Ni 19 May, 1998 khan Chhingchhip-ah *Fruit-Juice Concentration Plant* dinin hma a la a. He khawl hian sapthei, lalkhuhthei leh serthlumte a sawngbawl thin a, hei hian. cold storage a keng tel a ni. Chutah chuan thei leh thlai metric ton 677 bawh vel dah theih tur a duan a ni a. Tin, warehouse pawh metric ton 1000 capacity hetah hian a awm bawh a ni.

Amaherawhchu, (heti zawng hian han sawi ta ila) sorkar hmasaah khan Council of Ministers meeting an nei a, Ni 7 April, 2016 khan ‘MIFCO hi privatized ni se’ ti a rel ta a. Chutah chuan a thawktu tam tak 100 chuang zet an awm lai khan mi 55 chu *Early Retirement Rules, 2015* hnuaiah khan pension tura tih an ni a, an la ta a. A bang thawktu hi an tlem khawp mai a, mi 26 chiah tunah hian la awmin, food processing lamah hmasawna chak zawk a thlen theihna tur atan a buaithlak khawp mai a, thawktu an kg zo deuh vek tawh si a.

Chutih mek lai chuan, uluk takin tun sorkar hian ngaituahna a seng a, “MIFCO hi heti zawng hian kalpui ta ila, facilitating agency atan a hman ni se” tiin. Kut-hnathawktute’n an thlai tharchhuahte hrallhna lamah harsatna an tawh chung pawhin ‘surplus product’ kan ti mai a, khang te pawh kha lei sakin, theih tawp chhuahin a buaipui thin a. Tun hnai, nikum pawh khan kan Dy. Chief Minister biala thil an tharchhuah buaipuina kawngah pawh anni pawhin an ran sawm niin ka hria a, chutiang chuan theihtawpin tan kan la ve a ni.

Chuvang chuan, tunah hian food processing lamah central sorkar hnuaia programme pawimawh tak mai ‘Prime Minister’s Formalization of Micro Enterprises Scheme’ hi mipute’n kan chhawr tangkai theihna tura Commerce & Industries Deptt. tihchakna tur atan Project Management Unit kan din ta a. Kan din dan kha ‘a wing’ ni lovin, kawng hrang hranga thlaithar leh thei lam tharna kawnga chak zawka hma kan lak theihna tur agency ang khan tunah hian kan thawk ta ringawt mai a ni.

Hei hi kan ngai pawimawh khawp mai a, mahse tunhmaa lianpui ang khan din a nih tak loh avangin, hmalakna hi duh angin a kal chak thei chiah lova. Budget tharah

pawh hemi bikah hian pawisa a awm leh awm loh kha chu thudang ni se, kan SEDP bu keua i zawhnaah kha – ‘eng emaw chen chu helaiah hian sum kan nei leh ka ring’ tih kha ka chhanna a ni e.

SPEAKER : *Starred Question* No. 167 - zawt turin Member zahawm tak Pu C. Lalmuanpuia ka sawm e.

PU C. LALMUANPUIA : Pu Speaker, I & CT Department Minister zahawm tak chhan atan ka zawhna -

- a) I & CT Department-in IT Skill Development & Training Centre engzat nge din a tum?
- b) Khawi hmunah te nge?
- c) Engnge a tangkaina tur te ni ang?
- d) I & CT Department-ah hian hnathawk nghet (permanent employees) leh a nghet lo (temporary) a thawk lai engzat nge awm mek?
- e) I & CT Department hian District Office din belh tumna a nei em?

SPEAKER : Chhang turin a changtu Minister zahawm tak Pu Robert Romawia Royte ka sawm e.

PU ROBERT ROMAWIA ROYTE, MINISTER: Pu Speaker, ka lawm e. Aizawl North -III bialtu MLA zahawm tak Pu C. Lalmuanpuia zawhna chhanna te chu -

- a) ICT Department hian IT-Skill Development & Training Centre hi hmun 7 (sarih) ah din a tum a ni.
- b) A din tumna hmunte chu:
 - 1) Chawngte Block;
 - 2) Lawngtlai Block;
 - 3) Bungtlang ‘S’ Block;
 - 4) Zawlnuam Block.
 - 5) West Phaileng Block;
 - 6) Lungsen Block;
 - 7) West Bunghmun Block te an ni.
- c) A tangkaina hrang hrang awm zinga thenkhatte chu -
Pakhatna - Mizoram chhunga Minority Concentration area awmna Block tinah hian IT-Skill Development & Training Centre dah tum a ni a. Heng centre-ah hian computer set kim 50 (sawmnga) theuh dah tum niin, zirtirtu leh zirlaiten Information Technology (IT) zirna kawnga hmasawna an neih lehzual theih nan tangkai taka an hman theih beisei a ni.
Pahnihna - He project hi NIELIT nen tangdun tura hmalak a ni a, anni hian course tam tak an pe thei dawn a. Block chhunga mipuite’n hei hi nasa takin IT zirna kawngah leh thiamna neih kawngah an chhawr tangkai thei dawn a ni.

Pathumna - Hmun kilkhawr zawk a awmte pawhin anmahni kawtchhuah ngeiah IT training centre an nei thei dawn a, hei hian zirna mai bakah khawtlang hmasawna hrang hrang atan leh eizawna kawnga hmasawna thlengin mipui nawlpuiin an hmang tangkai thei dawn a ni.

Palina - He centre-ah hian a zirna ringawt nilo facilitation centre-te pawh a tel dawn a, common service centre ang te pawhin hman tangkai a ni dawn a. A running course leh mihring awm turte NIELIT lamin an rawn tum dawn a ni.

- d) I & CT Department-ah hian hnathawk nghet (permanent employees) mi 32 leh hnathawk nghet lo thawklai mi 7 an awm mek.
- e) I & CT Department hian district offices din belh tumna a nei lo.

SPEAKER : *Zawhbelhna* - Pu C. Lalmuanpuia.

PU C. LALMUANPUIA : Pu Speaker, IT tangkai zia kan hria a, ka zawhbelhna chu hei hi a ni e –

Kan CM zahawm tak hovin tunhnaiah Airtel-in 5G a launched tih kan hria a. Hei hu a pawimawh hle mai a, kan zirlaite leh mi tam tak tana thil tangkai a ni a. Mizoram-a service provider dangte hi 5G launch tumna emaw, tih belh tumna a awm em?

SPEAKER : *Zawhbelhna* - Pu L. Thangmawia.

PU L. THANGMAWIA : Pu Speaker, ka lawm e.

Thingtlang lam bialtu kan ni a, internet signal that lohna a la awm nual mai a. Ka bialah pawh khaw thum - Kawlbem, Khawkawn leh Chiahpui te. A buaithlakna em em chu, *Ni 100-inhlawhna* te leh thil dang upload nghal zel tur a awm a, ICT Deptt-in direct-a a khawih ni lo mahse, Mizoram pum leh central sorkar te pawh internet tel lovin hnathawh theih loh a ni chho tan dawn tawh si a, hei hi tih that theih dan a awm em?

Pahnihna-ah chuan, tuna service provider hrang hranga call leh internet rate an siamah hian Mizoram sorkar hian rawtna a nei thei em? “Nge ni, an rate ang kha lo pawm tawp tur?” tih ka zawt e.

SPEAKER : *Zawhbelhna* - Pu C. Lalsawivunga.

PU C. LALSAWIVUNGA: Pu Speaker, a next chiahah khan ka zawhna a awm a, *Starred Question* No. 168 kha ka zawh belh e.

SPEAKER : Aw le. Chhang turin a changtu Minister zahawm tak Pu Robert Romawia Royte ka sawm e.

PU ROBERT ROMAWIA ROYTE, MINISTER: Pu Speaker, ka lawm e.

SPEAKER : Ngawi lawk rawh aw. Kan *Zawhna & Chhanna* hun a tawp a. Kan chhan zawh tir dawn em? (*Memberte'n an remti a*) Anih chuan, chhang zo law law rawh le.

PU ROBERT ROMAWIA ROYTE, MINISTER: Pu Speaker, ka lawm e.

“5G service tun hnaiah Airtel hovin an launch a, Service providers dangte hian tih ve tumna an nei em?” tih kha - Jio hian 5G services hi a hmain North-East huapin a launch tawh a, Airtel pawh hian North-East huapin tun hmain a launch tawh nge ka hre chiah lova. Tunah hian he Company pahnihte hian 5G service an launch a. Aizawl-ah hian kan beisei aia hmain an launch thei ve ve ta a. Nikum kum tawp lam te kha a ni hial lo maw, meeting te kan han nei a. A hminga ICT Minister han nih ve chuan State dang te chet ruala chet ve ngai a. Kan tur viau a; “Krismas present ang te hian tih dan a awm em? Kumthar present-ah tal emaw”, kei phei chuan ka ti a. Mahse tihngaihna ngang a awm lo a ni e.

Tin, Aizawl hi a kal fal thei bik lova, “North-East khawpui dangte nena tih rual theih chu kan beisei e” an ti a. March thla kha Airtel te leh Jio tena an tih theih hun tur tentative-a an ngaih a ni a. Mahse, theihtawp an chhuah a, hmun dangah te pawh chak takin 5G operation leh 5G service chungchangah hian India sorkar pawhin hma a la a. Tichuan, March thla target khan February-ah a takin Jio leh Airtel chuan 5G services Aizawl-ah a han ti phawt a. Lunglei leh khawpui dangah te hma tiam leh target fel tak neia ti mek an ni a; harsatna erawh chu an nei a. Tower te pawh hi a ngaih belh tam khawp mai a. 5G service hian a tower atanga a man theih zawngte hi ‘interval zing zawk a ngai’ te an ti a. Mizote hi huai angreng tak, hlauh ngah angreng tak kan ni a. ‘A radiation a hlauhawm’ ti tawk te leh eng eng emaw a awm a. AMC Building Regulation chu kan sorkar hlim 2019 khan Council of Ministers in tower phun chungchanga thenawmte phalna ngai thin kha ‘min daltu a ni e’ kan ti a. ICT lam atangin Cabinet-ah kan thlen a. Council of Ministers-in thenawmte phalna “Neighbourhood NoC” ngai thin kha ngai lovin Aizawl Municipal Corporation Building Regulation pawh tih danglam a ni a. Chu chuan nasa takin connectivity-ah leh tower phun belh chungchangah min pui a.

Tin, Mizoram IT Infrastructure Policy, Central sorkar duh dan te kan han siam hnu khan, Central sorkar leh Private Service Providers lam te pawhin kha kha hmang tangkaiin ruahmanna tam tak an siam ve thei ta a. Chuvang chuan, tower tam zawk Aizawl-ah a awm na chungin, 5G a tan hian kan duh belh teuh a ni an ti a. A number zat ka hre chiah lova. Khawpui dangah pawh rei lo te chhungin 5G service hi kan chhawr tangkai chho zel turah kan beisei a ni.

Tin, Dr. L. Thangmawia, Lengteng Bialtu zahawm tak zawhbelhna kha, High-tech - IT khawvelah kan awm tawh kan tih laiin Mizoram-ah hian ka information neih

hnuhnung berah chuan, ‘thlawh bawk’ kan tih ang chi, bawk te leh khaw te zual te, ‘habitation’ kan tih ang chi village council pawh nei lo khaw te zual thlenga chhiar hian, (Mizo tawng chuan, ‘khua’ a tih ve loh theih lova) khaw 70 mobile connectivity signal la that tawk lohna kan la nei niin ka hria a. Chu chu information ka neih hnuhnun ber a ni a.

Tin, 2019-a ‘IT-Ministry’ ti mai ila, DoT te, ka minister ve hlima MEITY Ministry officials te nen meeting kan neih a, mi la tih ngailoh mah ni se, ‘meeting ka neihpui teh ang’ ka ti a. Central sorkar atang pawhin a rawn kal awm chi chu an rawn kal kim viau a. Chutah chuan khaw 400 vel connectivity nei lo kha an la awm a, a bik takin chhim lam leh khawthlang kilkhawr deuh lamah te connectivity kha a lo chau viau a. Theihtawpin central sorkar atang te, PSU-a rawih te leh Private Service Providers te pawhin tan an la a. Tin, ICT Department atang te pawh hian a zawng a zaa control tu ni lo mah ila theihtawpin a co-ordination leh puih ngai zawng zawngah te puiin tan kan la a. Signal leh connectivity neih lohna khua hi tlem te a ni tawh a, hei hi chu universalize vat kan tum a ni.

Covid khan nasa takin harsatna kan Service Providers-ah te pawh khan a thlen a. A chhan chu mahni khuaa luh phal lo kha kan ni deuh vek a. Thenkhat chuan an lo chawitir a, thenkhat chuan an lo man a. Connectivity a awm loh chuan phunchiar angreng tak, diesel va pek dawna an khuaa luh phal leh si lo khuate pawh an awm a, he House-ah chuan sawi lan chi a ni lova, khang khuate kha kan chhianchhiah nual nghe nghe a. Chutiang harsatna tawk chung chuan theih ang angin tan kan la ve a ni.

Tin, call rate leh internet rate pawh hi kan lo hre lo te pawh a ni maithei a. Mizoram sorkar angin a rate ti danglam tur zawng emaw, a rate thar siam tur zawng emaw hmalakna kan nei lovin ka hria a.

Pu Speaker, zawhbelhna angreng deuh khan ‘a next kha ka zawt e’ Pu C. Lalsawivunga, Aizawl South I bialtu zahawm takin a rawn tih kha zawhna a ngaiin ka chhang zel mai dawn em ni? (**Speaker:** A rawn zawt hman tlat a lawm.) Aw le, Pu Speaker ka lawm e. A zawt thiam khawp mai. A chhanna chu –

- a) State Budget pangngai ni lo, I&CT Department hian kum 2021-2022 leh 2022-2023 hian Central Sorkar atangin hmasawanna hna thawhna tur sum ₹7561.85 lakh dawn a ni a, heng pawisa atanga ₹7250.00 lakh hi State Budget pawn atanga hmuh ni mah se, Finance Department kal tlanga hnathawh tur a nih avangin State Budget-ah khung luh a ni.

Kan hriat angin Supplementary Demand lamah a rawn lang ang a. Sum dil belh emaw kha min tih leh palh kha a hlauhawm a. Hei hi sum dil belh ni lovin, sum hmuh belh a ni.

b) (i) PMJVK Scheme hnuai project “Establishment of IT Skill Development & Training Centre” atan ₹311.85 lakh, hei hi first instalment a la ni rih a. Second instalment nen a nih chuan a sanction zat chu ₹622 lakh bawr vel a ni dawn tihna a nih chu. State Nodal Agency (SNA) chu District Council & Minority Affairs (DC&MA) kal tlangin Ni 22.09.2022 khan expenditure sanction kan dawng.

(ii) SASCI Scheme hnuai project 1 - “*Establishment of OPGW and ADSS for Backbone Connectivity of Districts and Blocks in Mizoram*” atan ₹5,000.00 lakh sanction kan dawng a ni.

Hei hi ka han sawi thui hret ang a. SASCI hi chi hrang hrang a tam khawp mai a. SASCI Part-I tih hi an hre lar a. SASCI Part I-ah Mizoram pum tuamin cheng nuai 40,000 (400 crore) Mizoram-in kan dawng a. A tangkai mek a, a tangkai dawn hlein ka hria a. SASCI Part-II bakah SASCI Part-III, SASCI Part-IV, SASCI Part-V a la awm a, tuna ka sawi hi SASCI Part V a ni. Hei hian SASCI Part-1 general infrastructure-a kan thun kha a tibuai lova. SASCI Part-V-a IT kaihnhawih project siam theih a ni. Pathian leh kan hotute zarah leh ka department te zarah project siam thei tur illegible te zingah Mizoram kan tel thei a, kan lawm khawp a. Kan IT Department thawktute pawh an fakawmin ka hria a, chung zarah chuan cheng nuai 5,000/- SASCI Part -V hnuai a kan dawng a ni.

A dawt lehah chuan, “*Mizoram e-Service Portal & Upgradation Mizoram Data Centre Enclosed Immovable*” atan cheng nuai 2250/- (hei hi SASCI Part-IV a ni ve thung a) kan dawng ve hlauh a, kan dawn ni hi Ni 18.1.2023 a ni a. Budget allocation pawh Finance Department atangin kan dawng tawh a ni.

c) “Chung atanga project hnathawh mek la thawh zawh loh te, min hrilh theih em?” tih chhanna chu - IT Development Centre chungchangah chuan tunah tender tih mek a ni a.

Hemi SASCI Part-IV leh Part-V hi a technical angreng a, tin, illegible criteria te pawh a buaithlak khawp mai a. Mizoram atangin implement thei tur pawh ZENICS chiahi License nei thei leh nei kha a ni a. Chuvang chuan, ZENICS hi function tha lutuk lovin a lo awm leh hman deuh nen tunah hian kan han revive chho leh mek a, kan Chief Minister zahawm tak pawhin min approved sak tawh a. State dang Agency emaw, Central Agency emaw hman ngai lova ZENICS hman theih dan tur te rilruah a awm ve avangin hetiang hian hma kan la a ni. Pu Speaker, ka lawm e.

SPEAKER : Tuna zawhna kha duh chuan a admit loh theih a, a admit theih baw a; transition time-ah a awm a ni.

Zawhna & Chhanna hun a tawp a. A danga kan kal leh hmain -Niminah Member zahawm takte House-a inhnialna thelh hleih theih lovin an awm a. Minister zahawm tak

Pu Robert Romawia Royte leh Member zahawm tak Pu Lalduhoma te, direct-in, *Chair* pawh address tawh lovin, ‘in, in, in’ an ti a, an inchhang tawn tawh si a. ‘E khai’ kan ti a, House zahawm nan te leh min lo thlirtu Mizo mipuite pawh rilruah a awm a.

Tin, he House-ah hian thahnemngaihna avangin Opposition ten, “Sorkar thiltih dan hi a dik lo a ni; he hna hi a tha lo a ni” an ti a, Ruling lamin, “A tha a ni” an ti bawk a. Kha kha chu House pawn lam thute a ni a. House chhung leh chhungah ‘i sawi’, ‘i ti’, ‘in’ ti te khan an inhnial a. Tichuan “proceedings kan en ang a, a dik lo zawkin ngaihdam in dil ang” kan ti a. Tichuan, kan Assembly-a kan officer ten an han en ta a, nimirah khan, Pu Robert Romawia Royte’n footballer Miriam Lalnunsiami chungchang a sawi kan han en a, Ni 10.2.2023 Proceedings-a lan dan leh kan officers te hmuh danah chuan Pu Robert Romawia hian thudik a sawi zawk a ni. Tin, House pawhin kan hre lova, kei leh Assembly Secretariat hi chuan House chhung leh keini official-te chauh kan thlir a ni. Tichuan, Member zahawm tak Pu Duha chu a dik lo zawk a nih avangin ngaihdam a dil dawn em? hriatsual palh te awm ve thei tho a nia.

PU LALDUHOMA : Pu Speaker, hmanni khan Miriam Lalnunsiami a dam lova, an inkhul chhuah dawna an buaizia te leh thiante zara khulchhuah anih tak thu kha kan sawi a, a zan lamah khan inhnialna a chawkhhuak ta a, social media-ah an inhnial ta chiam mai a. Khalai social media thu leh hla leng vel leh helai House chhunga kan thusawi kha ka lo ngaih fin pek a, a paw ka tikhawp mai a. Chuvang chuan, hre reng chung a tvisual ka ni lova, ka hriatsual palh liau liau a nih avangin kan Minister zahawm tak ngaihdam ka dil a. Tin, Pu Speaker, nangmah leh kan Member zahawm tak tak bakah mipuite ngaihdamna pawh tih takzetin ka dil a ni.

Tin, nimirah kan Minister zahawm tak khan, “Miriami nen kan inbe lo” tih kha uar takin a sawi a. Amaherawhchu, social media lamah an inbiak zia te a lo viral nasa ta em em a, a ni pawh a tawng sual palh niin ka hria a. A hriatsual palhah ngaih sak ila, ngaidam ve tho ila ka duh a. Tun Session-ah hian thil hi Pu Speaker, hriatsual te, sawisual te hi a awm a. Member zahawm tak pakhat pawh khan Joshua kha a sang a sang tel a han thah tir ve bawk a. Mihringte famkim lo kan ni a, chuvang chuan, tun tum kan session-ah hian kan thu khel hi a nawi mah mah a, mipuite pawh an zahawm a, insiamthat nan hmang ila. A chapter hi close tawh ila, in ngaihdam tawn ila a tha hlein ka hria. Ka lawm e.

SPEAKER : Awle, heng hi thahnemngaihna vanga sawi a ni a; hriatsual palh te a awm thin a ni.

LAYING OF PAPERS

Tunah chuan business dang *Paper Lay-* ah kan kal ang a. Minister zahawm tak Pu R. Lalzirliana’n, “A copy of Notification No. A 43016/3/2018-DC&MA(C)/232 of 16th December, 2022 on the assumption by the Governor of Mizoram of all function or

powers vested in or exercisable by the Chakma Autonomous District Council as per Para 16(2) of the Sixth Schedule to the Constitution of India” hi House dawhkanah rawn lay turin ka sawm e.

PU R. LALZIRLIANA, MINISTER : Pu Speaker, ka lawm e.

Pu Speaker, “Notification No. A. 43016/3/2018-DC&MA(C)/232 of 16th December, 2022 on the assumption by the Governor of Mizoram of all function or powers vested in or exercisable by the Chakma Autonomous District Council as per Para 16(2) of the Sixth Schedule to the Constitution of India” hi he House zahawm tak dawhkanah ka rawn lay e.

FINANCIAL BUSINESS

SPEAKER : A copy kha han lay ula (*A copy sem a ni a.*) Kan chang kim em? Kan chan kim chuan, a dawt leh *Financial Business*-ah kan kal ang a.

Vawiin hian Minister zahawm tak tak pathum – Er. Lalrinawma te, Pu Lalchhandama Ralte leh Pu K. Lalrinliana te Demand kan sawi ho ang a, vawiin hian pass nghal kan tum dawn a ni. Hun kal ta, a hmasa lama kan tih angin kan Minister zahawm tak takte demand hi a rualin kan la ang a. Tunah Minister zahawm tak Er. Lalrinawma ka sawm ang a, House dawhkanah a Demand te -

- Demand No. 7 - Excise and Narcotics Department;
- Demand No. 29 - Social Welfare Department;
- Demand No. 34 - Animal Husbandry & Veterinary Department;
- Demand No. 41 - Sericulture Department te

House-ah submit turin ka sawm e.

ER. LALRINAWMA, MINISTER: Pu Speaker, ka lawm e. Pu Speaker, Governor of Mizoram recommend-na leh i phalnain, he House zahawm takah hian a hnuaiia ka Demand-te hi he House zahawm takah hian min ngaihtuah sak turin ka rawn submit e -

Demand No.	Purpose	Amount (in ₹)
7	Excise & Narcotics	49,65,81,000.00
20	Social Welfare	1,75,25,12,000.00
34	Animal Husbandry & Veterinary	69,11,70,000
41	Sericulture	17,35,79,000.00
TOTAL		3,11,38,42,000.00

Ka lawm e.

SPEAKER : A dawt leh atan Minister zahawm tak Pu Lalchhandama Ralte kan sawm ang a, House dawhkanah hian a Demand-te:-

Demand No. 18 - Printing & Stationery,

Demand No. 20 - School Education,

Demand No. 28 - Labour, Employment, Skill Development & Entrepreneurship Department-te

House-ah rawn submit se.

PU LALCHHANDAMA RALTE, MINISTER: Mr. Speaker, Sir, on the recommendation of Governor of Mizoram and with your permission, Sir, I move Demand Nos. -18, 20 and 28 for ₹16,08,11,33,000/- only for meeting expenses during 2023-2024 in respect of the following Departments –

Demand No.	Purpose	Amount (in ₹)
18	Printing & Stationery	12,86,60,000.00
20	Labour, Employment, Skill Development & Entrepreneurship	31,93,07,000.00
28	School Education Department	15,63,31,66,000.00
TOTAL		16,08,11,33,000.00

Thank you, Sir.

SPEAKER : A dawt leha tan Minister zahawm tak Pu K. Lalrinliana, Minister zahawm tak kan sawm ang a. House dawhkanah hian a Demand te -

Demand No. 17 - Food, Civil Supplies & Consumer Affairs Department;

Demand No. 19 - Local Administration,

Demand No. 35 - Fisheries Department-te

House Dawhkanah rawn submit se, ka sawm e.

PU K. LALRINLIANA, MINISTER: Mr. Speaker, Sir, on the recommendations of the Governor of Mizoram and with your permission, I move the Demand Nos. 17,19, & 35 for Rs. 4,62,81,11,000/- only for meeting expenses during 2023 - 2024 in respects of the following Departments –

Demand No.	Purpose	Amount (in ₹)
17	Food Civil Supplies & Consumer Affairs	2,70,20,65,000.00
19	Local Administration	1,82,04,87,000.00
35	Fisheries	10,55,59,000.00
TOTAL		4,62,81,11,000.00

Thank you, Sir.

SPEAKER : Awle, Minister zahawm tak tak ten an department enkawlte tan Demand an rawn submit ta a. Mi pakhat tan minute engzat nge kan inpek tak ang le? Awle, minute 10 hi kan ti thin a. Opposition group leader-te kha chu minute 5-in kan titam bik thin a ni.

Awle, tunah sawihona kan tan ang a; tunge han sawi hmasa ber ang? Zan rei lutuk tum lo ila. Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e.

I thu awiha ding hmasa ber ka ni bawk a, Pu Speaker, hun min pek belh turah ka han ngai deuh a ni.

Demand No. 20-na hi sawi hmasak ber ka duh a. Kan Education Minister hmalakna leh thei tawp chhuaha Mizoram zirna siam that a han ni chho te, tin, Govt. School (sorkar enkawl sikul) a zirlai kan han tam chho ta te, zirtirtu indaih lo tam tak kan neih laia Education Deptt. in mut-mawh, hnar-mawha an han nei a, kan minister ten ruahmanna an han siam a, zirtirtu 2000 chuang kan han nei thei te hi a lawmawm hlein ka hria a. A bik takin keini thingtlang bialah phei chuan heng hi kan chhawr tangkai hle a ni tih kha ka han sawi duh a ni.

Tin, sikul tam tak sak that a ni a, zirna in tlabal tak takte siam thar a han ni hi lawmawm hlein ka hria a. Kan bialah pawh kan chhawr khawp mai a, a lawmawm takzet a ni tih kha ka han sawi duh a ni. Tin, Saiphai leh Saipum-ah matric exam centre min han pe a, kan lawm takzet a. Khulai hmar tlangdung khu zirnaah hian kan tlahniam hle mai a, hengte pawh hi kan minister chak takin hma min lak sakna a zarah tunah chuan sikul building thate, zirtirtu indaih chho tein kan han awm thei te hi kan lawm takzet a ni tih kha ka han sawi duh bawk a ni.

Saiphai-ah hian high school building thar kan han nei a, Saipum-ah exam centre kan nei bawk a. Tin, Primary School-1 building sak thar tumna te a awmin ka hria a, kan lawm takzet a ni tih kha ka sawi duh bawk a.

Tin, SEDP teacher hi tuna kan neih aia tam hi sorkar kumtharah chuan kan neih a tul hlein ka hria a. SEDP teacher kan lak avang hian tunah hian sikul tam takah harsatna kan tawh loh phah a. Zirtirtu pension leh boral an awm chho reng a, tun dinhmuna pawh hian SEDP teacher kan bial bika kan neihte kan indaih tawh lo hle a, sorkar kumtharah chuan ngaihtuahna min sen belh sak ka duh a.

Tin, Samagra zirtirtute an tel lovin kan awm thei tawh lova. Samagra zirtirtute hi awm lo ta se Mizoram sikul a chanve deuh thuk hi chu kan kal hlei thei tawh lovin ka ring a. Chuvang chuan, Samagra zirtirtute tan he sorkarin kan minister ruahmannaah

nasa taka duhsakna a han tilang chhoa an hlawh an han tipung te hi a ropui ka ti takzet a. Heng mai ni lo, Samagra zirtirtute tan hian tun aia tha ruahmanna sorkar hian nei ila thain ka hria a. Zirturtu lak thar tur a awmin emaw, a ngheta lak tur kan neih emaw pawhin an tan hian percent eng emaw zat, a seniority-a an luh theihna turin kawng hawn sak a tha hlein ka hria. Chuvang chuan, kan minister-in ruahmanna han nei thei zel se ka duh a.

Tin, school upgradation hi kan tih ngei ngei ngai niin ka hria a. Ka bialah khuan khawtlangina an enkawl sikul naupang pawh 200 chuang awmna harsa em em mai kan nei nual a. Vairengte higher secondary school leh Rengtekawn high school te lump-sum atanga adhoc-a dah ngei ngei ngai kan nei a. Tin, Bilkhawthlir leh Saipum high school te, Vairengte high school te upgrade ngei ngei ngai kan nei bawk a ni. Hengte hi kan minister hian min chhianchhiah sak se, ‘duhsakna min hlan thei se kan lawm hle ang’ tih kha ka sawi duh bawk a ni.

Tin, Demand No. 28 - LESDE hi han sawi leh zawk ka duh a. Skill Development-ah nasa takin hma kan sawn a, a ropui hlein ka hria a. Tun hnaiah India ram atanga Japan a nurse thawktu tur mi 50 thlanchhuah lak turah khan Mizoram atangin mi 20 thlanchhuah an han ni te kha ropui ka ti a. He department, langsar lo tak thin changtu kan Minister kaihhruaina hnuaiyah hian department langsar tak a rawn ni chho hi lawmawm ka ti takzet a. Tin, covid hunlai khan an contribution a nasa em em tih kan hriat theuh kha. Tin, ‘Labour Welfare Board’ kan ti mai a, keini bial thinglang lamah chuan hmalakna a thain ka hria a. Kut-hnathawktute tana hei aia nasa lehzuala hamthatna an hmuh theihna turin awareness han nei that deuh emaw, tun aia chak lehzuala hna an thawh kan beisei takzet a.

Tin, Pu Speaker, Demand No. 18 - Printing & Stationery Department hi department langsar lo tak, mahse department pawimawh tak si a ni a, sorkar lehkha pawimawh leh sorkar thil pawimawhte khawihtu anni a. An khawl hi a hlui tawh viau hlawmin ka hria a, chuvang chuan khawl thar an neih dan te hi ngaihtuah sak theih ni se. Tin, thawktu indaihlohna a nasa hle a, he kan department pawimawh takin sorkara revenue tam tak an chhunluh theihna tur hian hmanraw thar leh thawktute indaih zawka kan neih theihna turin sorkar hian ngaihsak deuh se a thain ka ring a.

Tin, Budget Session apiangin kan sawi thin a, Printing & Stationery Department hi dawr tura beisei anni a, vawiinah hian a dawr lo department hi kan awm leh thup tawhin ka ring a. Chuvang chuan, nakin zelah Mizoram calendar te pawh hi an chhu thei a nih chuan, an chhut theih dan tur ruahmanna te siama department zawng zawngin a nihna tur anga an hman tangkai theihna turin khawl thar leh thawktuah hian thahnem kan ngaih pui a ngai takzetin ka hria.

Demand No. 17 - Food, Civil Supplies & Consumer Affairs hi han sawi leh ka duh a. Kan Minister hmalakna hi a ropui hlein ka hria a. Tun sorkarah gas, buhfai, POL chihrang hrangah hian kan thawk tha hlein ka hria a, mipuiharsatna kan tawklo viauin a lang a. Kan Minister pawhin a sawi tawh a, thahnem a ngaihna a zarah company lam dawrin term hmasa - sorkar hmasaa kan gas dawn trip aia tam fe mai tun sorkarah hian thlatin kan han dawng chho thei te hi lawmawm hlein ka hria.

Tin, ramri buai nikum lawkah kan nei a, state-in kan chaw lakluhna ber kawng danchah a nih pawhin kan minister te ruahmanna leh kan department te taimakna a zarah Tripura leh Manipur atang tein mipui mamawh chawkluh a ni a. Khatianga ruahmanna tha leh fel an nei kha, he department hi lawmthu ka hrih duh a ni.

Tin, go-down thar tam tak he sorkarah hian sak a ni hi lawmawm ka ti a, go-down hlui tawh tak tak buhfai chhek-khawlna atan pawha lak tlak tawh loh tam tak kan neihte thlak a ni hi lawmawm hlein ka hria a. Chung zingah chuan ka bial North Hlimen-ah sak thar a ni ve a, tunah hian Assam lama kan ramri hnai bera Saiphai go-down khu a fuh tawh vak lova, a lian vaklo khawp mai a. Khulai tlangdunga hmun pawimawh ber a ni si a. chuvangin, Saiphai go-down hi sak thar leh dan a awm se tih kha kan sawi duh a ni.

Tin, Demand No. 19 - LAD-ah hian, VC House tam tak kan han sa thar ta a, lawmawm hlein ka hria. VC hi local body inrelbawlina, khawtlang enkawltu ber anni a, an zahawm hi a ngai tel a. VC House pawh nei mumal mang lo khaw tam tak ka bialah phei chuan an awm a. Tun sorkarah hian ka bial - Thingthelh te, North Hlimen te, Saipum te, Saiphai te, Saihapui-V te, Vairengte V/C-I leh Vairengte V/C-IV te; tin, Bilkhawthlir North te, Rengtekawn te leh Builum te pek kan ni hi kan lawm tak zet a. Tin, repair-na Bilkhawthlir South-ah te, Gosen Veng-ah te, Saihapui 'K' ah te kan nei hi kan lawm takzet a ni. Chutilaiin Bukvannei-ah hian VC House kan la nei lova, hei hi tih theih a awm chuan Minister-in min chhinchhiah sak se a lawmawm ngawt ang.

Tin, Bilkhawthlir-ah khuan LAD hmalaknain kuhva kawr atanga plate chihrang hrang siamna min din sak a. A building khu sak zawh a ni a, khawl min pe bawk a, kan lawm takzet a. hei hi kan bial mamawh chauh ni lovin, Zoram mipui mamawh a ni a. Plastic atanga siam thil tam tak leilungin a ngeih loh te thlakna tur LAD-in hma min lak sak hi kan lawm takzet a. Hei hi kan Minister zahawm tak hian min hawn sak ngei se tih kha, a khawchhung VC te duhdan a ni a, hun remchang min pe thei se kan lawm ngawt ang.

Tin, Demand No. 35 - Fisheries hi han sawi ka duh chu, kan bial chhung khu sangha dil leh kuhva hmunpui bakah buh chinna a ni mai a, thildang vakah a hman theih lova. Chuvang chuan, hengte hi thei-sem vak ai chuan a potential area-ah hian sangha chungchangah pawh hian min han duhsak thei deuh se a lawmawm ngawtin ka ring.

Tin, Demand No. 29 - Social Welfare Department hi han sawi ka duh bawk a. Ka lo hriat danin kan minister hian theihtawp a chhuah a, 'tar-pension' kan tih mai kha nimin piah lawkah a umchhuak niin ka hria a, a lawmawm hlein ka hria a. Heng tar-pension hi rang taka an lak theihna turin he sorkar hian hma la ila, kan minister ten theihtawp chhuah chhunzawm zel se thain ka ring a.

Tin, Article 275 atanga development lo kal thin hi constituency-wise hian kal thei tawh se a lawmawm hle ang a. Pu Speaker, keini bial thingtlangah nuai 30-40 development a lo luh pawh hian, bialchhung hmasawmna ropui tak thlen thei anih avangin article 275 hi constituency-wise development a kal theihna turin ruahmanna kan minister hian nei thei se a lawmawm hlein ka ring.

Tin, Demand No. 34 - Animal Husbandry & Veterinary hi han sawi leh lawk ka duh a. Serlui Bial hi ranvulhna hmunpui a ni a, bawng, kel, vawk leh ar tan hmun tha zet mai anih avangin AH & Vety Department hian min rawn en bik thei deuh se thain ka ring a, 'ranvulhna hmunpui ber kan ni' tih lai hi min hriatsak ta se. Tin, tunhnaiah MVU (Mobile-Van Unit) RD Block-wise a an sem hi ropui ka ti a, Bilkhawthlir RD Block hnuaiyah min dah sak a. Bilkhawthlir-a RAHC kha Dispensary-ah min hlankai sakin, Bairabi vety doctor-in min awi thin a. Tunah chuan MVU hian doctor, VFA leh driver a keng a, kan dispensary-ah thutchilhin Bilkhawthlir RD Block hnuaiyah khaw hrang hrangte min vil a. Hei hi 'Damdawi-In kal thei' a ni mai a, tangkai takin kan hmang ngei ang tih kha ka ring a, lawmthu ka sawi duh a ni.

A tawp berah chuan Pu Speaker, North Hlimes-ah hian RAHC building min sak sak dawn niin ka hria a, kan lawm takzet a, VFA thawktu tur hi min dahsak ngei turin ka ngen bawk a ni.

Chuti chuan Pu Speaker, Er. Lalrinawma, Pu Lalchhandama Ralte leh Pu K. Lalrinlana demand-te hi tha ka ti a, ka support e. Ka lawm e.

SPEAKER : Member zahawm tak Pu VL Zaithanzama ka sawm e.

PU VL. ZAITHANZAMA: Pu Speaker, ka lawm e.

Demand No. 20 - School Education-ah hian ka han lut ang a. School Education hi department pawimawh tak a ni a, kan budget pumpui atanga 11% zet a chang a, sawi pawh hi a hlawh viau thin a. Kum dangah ka sawi lova ka han luhchilh ve ang e.

School Education Department chhungah hian a mainstream bakah wing pathum - Physical Education, Adult Education leh Hindi Wing te a awm a. Heng zingah hian physical education wing chungchang hi ka sawiduh lai chu a ni. Physical education

wing hian school naupangte physical education leh sports lam kaihhnawih a buaipui a. Chung zingah chuan hlawm lian tak tak – 1) Zonal Sports Middle School leh Primary School 2) District High School Sports leh 3) Mizoram Secondary School Games leh Mizoram Higher Secondary School Games te, National School Games te he Wing hian a buaipui avangin hna hi an ngah hle mai a. Tin, heng bakah hian central sorkar policy ‘Fit India School’ programme a kalpui mek baw a.

Hetianga hna tam, programme lian pui-pui enkawl tur hian tunah hian thawktu Circle Physical Officer pali chia an awm a, Pu Speaker, an khawngaihthlak tak zet a ni. Education hnuaiah hian physical education hi kan kalpui zel dawn a nih chuan ngaihtuahna kan sen a ngai viauin ka hria. Department lamin post ruak hnawhkhah te pawh an han dil thin a, mahse tihhleitheih a ni lova, vawiin thleng hian phalsak an la ni lova. Mi pali chauh ina state level leh national level school naupangte tan sports buatsaih thin chu thil kalpui harsatak a ni. Sport lam kan uar ta baw a, helamah hian kan hotute hian ngaihtuahna seng turin kan ngen a ni. Physical Education Officer post ruak pali an nei a, Physical Education Teacher post ruak pathum awmte hi hnawhkhaha, hnathawk theia siam ka rawn dilpui a ni e.

Nikumah khan school naupang sports buaipui nan khan 42.05 lakhs chauh dah a ni a, chumi hmang chuan district hrang hrangah Mizoram Higher Secondary School Games te, Mizoram High School Games te an nei a. Chu pawh chu thilan sang zel avangin an tan thiltih a harsa em em a, sum te engtin tin emawa dil belhin an tlingtla hram a ni. Tunah hian hriin kan ram min lo kalsan takah chuan National School Games te pawh pang ngai takin neih theih beisei a ni a, chuvangin, Physical Education Wing ah hian pawisa tam deuh a ngai hle mai. Naupangte sports lama hma kan sawn zel theihnan Physical Education Wing hi thuam chak a ngai a ni.

Khami piah lamah khan Pu Speaker, *National Education Policy, 2020*, (4.8) kan en chuan, physical education hi school curriculum-ah telh tur niin a lang a; school curriculum-a telh tur hian hmalakna kan la nei lovin a lang a. State danga an tih ang hian zirna School tinah physical education teacher pakhat tal dah tur hian hma kan la ve thei ang em aw tih ka ngaihtuah a ni.

Ka bial chhung - Aizawl West III huamchhunga school te theih ang angin kan tlawhkual a, an dinhmun a tha lo hle a; hmanrua te an nei tha lova. Tui thianghlim in tur an nei tha lo te, an school renovate ngai ngawih ngawih te kan theih angin kan han pui ve a. Ka bial chhunga school te saw kan kan kual a ngaihsak an ngai hle a. Ka hma a member zahawm tak Serlui bialtu-in lawmna sawi tur tam tak a neih lai khan, sawlamah sawn kan hotute’n hma rawn la ve turin ka duh a ni.

Demand No. 29-na Social Welfare ah hian kan lut ve ang e. Ram hnuk khawih Department kan ti deuh a, kan luhkhung hian. Social Welfare hian duhsak an phu hle

mai a, an mamawh bawk a, an enkawlte hi miharsa tak takte an ni a, Rualbanlo te, Hmeithai tanpui ngai te, Tar Pension te, Children Home hrang hrangte leh chhungkaw pangngai lo, enkawltu neilo tam tak te enkawltu an nih a vang hian duhsak an ngai tak meuh meuh a ni.

Serlui bialtu zahawm tak Pu Rinsanga Ralte khan tar-pension te, tunhnai, nimin piah maiah khan pek a nih thu a sawi a, an lo pe a nih chuan a lawmawm hle mai. Rualbanlo te tana sum tlemte ₹400 lek thla 3-4 dana an pek thin te hi an pe ta em ka hre lova, ka hriatchinah chuan hunrei tak pek anni tawh lova. Hmeithaite pawh chutiang bawk chuan tar-pension te pawh kha rei tak pending a ni a. Hei hi ka ngaihtuah hian Social Welfare hian central a tanga pawisa dawn nghaka thla 3-4, a chang chuan kumkhat danah te ₹330-400 lek belkhawm lo dawn thlahlel em em te kan pe thin hi, hei aia tha a kan pek theihna turin, ‘*revolving fund*’ te an mamawh mang e’ ka ti a. Central atanga a lo thlen hma hian heng rualbanlo leh hmeithaite hi lo pek mai theih dan a awm em tih te ka rawn zawt nghal a ni.

Tin, Children Home, Child-care Institution hi Mizoram-ah hian 50 lai a awm a, sorkar enkawl lai 18 leh NGO enkawl lai 32 te, enkawltu neilo naupang khawngaihthlak tak takte heng hmunah hian an khawsa a ni. Naupang pakhat tan ₹3,000/- thlakhatah pek a ni thin a, enkawltu fel tak tak ten an enkawl laiin, hengho tan hian pawisa funding hi a tang rei em em mai thin a, tunah pawh hian a kuma kum a tang niin ka lo hria a; hengte hi a van pawl tehlu em! Kan enkawla te hi enkawltu nei lo, chhungkaw harsa tak takte an ni leh nghal a. ‘Chhungkaw harsa’ kan ti a, ka sawi sual a, Chhungkua pawh nei lo, chhungkaw enkawltu pawh nei lo, miharsa tak takte Mizoram hmun hrang hranga Children Home 50 laiah hian an awm a ni a. Naupang pakhat enkawl nan hian ₹3,000/- vel an hmu ve a, chu chu tunah pawh hian July 2022 hnulam khan heng enkawl na hi hmuh mumal a awm ta lova, mi-thahnemngaithe thawhkhawmin an nung hram hram a ni.

Chuvangin, he department hi ngaihsak a va ngai tehlu em! An Budget te pawh hi a bik takin tihpuna, nichina ka sawi ang khan central lam a tanga pawisa a rawn kal hma pawha heng mi-harsa zualte dawmkanna tur hi chu nei thei tura he department hi tihlen a tul ka ti hle a ni.

Tichuan, Creche Centre (*Hon. Dy. Speaker-in Chair a la a.*)

DEPUTY SPEAKER : Sawi chhonzawm rawh le.

PU V.L. ZAITHANZAMA: Creche Centre hi Aganwadi hnuaiah hian veng hrang hrangah a awm thin a. Kan veng Khatla-ah pawh tunhma chuan tha tak mai hmuh tur a awm a, tunah kan nei mumal ta lova. Henghi MHIP ten an enkawl tlangpui a, a enkawl na sum hi kum khat-hnih danah te tunhnaiah chuan hmuh a nih tak thin avangin harsatna

an tawh nasa em em mai a, hengte pawh hi ngaihven a va han ngai tehlu em! ‘Naupang khawngaihthlak tak takte enkawltu anni’ tih kha kan sawisak leh bawh a ni. Pu Majumdara te bill a tan loh laiin, fahrah enkawlina tur sum erawh rei tak tak a tang thin hi, ‘ngaihtuah tlang ang u’ tiin kan sawi a ni e.

Demand No. 7 - Excise & Narcotics Department-ah lut ila. Tunlai hian ruang chhar a awm ta fo mai a, ruihhlo vang anga thi kan pung zel bawh a. Kum 2022 ah mi 43 lai damdawi hmansual vangin kan thi a ni. Ruihhlo Mizoram-ah a rawn lut nasa hle mai a, ‘Bi-i’ an tih phe chu 2020-a litre 1.1 rawn lut kha, 2022-ah chuan litre 2000 chuang zet mai kan man ta a ni kha. Hetiang taka ruihhlo lo pung zel enkawltu hi an nih a vangin, hnathawktu pawh an pung chho a. Amaherawhchu an budget han en khan, hlawh ah 95.7 zet mai a kal ral dawn a, ‘hnathawhna tur an nei tlem hle’ tih kha kan sawi ri hram a ni.

A tawpnan, Demand No. 17 - Supply Department hi tawite Pu Deputy Speaker, kan sawi ve leh hram ang; cooking gas chungchang hi sawi ka duh a. A buk tlinglo, khawih chingpen hi vawiin Ni 3 February, 2023 pawh khan man a la ni ta fo mai hi, ‘tihtawp theih a awm em’ tih ka ngaihtuah a ni. Kan man thin a, a tlin lohna kan chawitir a, a bak hremna kan pe lo nge, sim phah an awm lova, tun thlengin a la awm reng. *Mipuite rawk* kan la ni reng mai hi tihtawp dan a awm lawm ni? “Gas bur ti chingpentute hi pakhat tal hrem an ni tawh em?” tih kha ka zawt nghal bawh a ni.

Chutiingin petrol tih chingpen pawh a tam em em thin a, petrol erawh chu tunah hian a ziaawm ta hle a. A ziaawmna chhan hi ‘kan ven hneh lam’ ni lovin, khawnvartui a pawlh dalnaa hman thin kha a man a to ta a, pawlh-dalna tur a awm tak loh avang a ni. Tunhmain Bangladesh-ah chuan *flat rate* an kalpui a, churang chuan an petrol te, khawnvartui te a thianghlim tha em em a, hetiang hi tunah hian kan tawng chho ve ta a. Khawnvartui man a to avangin petrol pawlh-dal hi a tlem ta hle a, petrol ven a ngaih tak vak lohah hi chuan, cooking gas tih-chingpen erawh hi chu ‘ven hneh hram a tha’ tih ka rawn sawi a ni e. Ka lawm e.

DEPUTY SPEAKER : Member zahawm tak Pu Ramthanmawia ka sawm e.

PU RAMTHANMAWIA : Pu Dy. Speaker, ka lawm e. Vawiina Minister zahawm tak tak 3 Demand sawiho tur hi phurhawm hlein ka hria a, a chhan chu nikum aiin kumina budget-ah hian a tamna hi vaibelchhe telin a pung a, a demand ah hian lawmawm ka ti a. A hmasa berin Minister zahawm tak Pu Lalchandama Ralte Demand No. 20 hi han sawi ila.

Kan sawi tak ang khan cheng vaibelchhe 69 zetin a pung a, nikum aiin, hei hian beiseina sang tak zirna kawngah min pein ka hria a, a lawmawm ka ti a. Kum 2018 a sorkarna kan chan phat khan Mizoram school tam zawk te chu zirtirtu indaih lo deuh

vek kan ni tih kha kan hria a, a bik takin thingtlang lam a ni lehzual a, zirtirtu pahnih khat lek awmna school pawh a awm nual a ni. Zirna pawhin a tuar nasa a, sorkar school ten naupang pawh an nei tlem hle tih kha a ri nasa a, khar ngai lek lek te pawh a awm anih kha. Vawiinah chuan kan sorkar leh Education Minister chak tak hmalakna zarah tunah chuan kan dinhmun a ziaawm chho ta zel a, zirtirtu indaihloh zual phuhruk nan zirtirtu thahnem tak lak a ni a, MR teacher 868 leh SEDP teacher 701 te chhawr mek niin, chu bakah Hindi Teacher pawh 1000 dawn lai lak thar a lo ni ta a. Zirna pawhin hma a sawnin English Medium private school a lut thin tam takin sorkar school rawn pan lehin, sorkar schoolah naupangte pawh an pung leh ta thur thur a ni.

Ka bial Higher School zirnaah hian Science subject lakna kan lo nei ngai lova, amaherawhchu kan Minister zahawm tak Pu Chhantea'n min ngai pawimawhin a hnena kan sawite tun session thar atangin Farkawn leh Khawbung-ah Science zirna kan nei ve thei dawn ta a, kan lawm takzet a ni.

Ka bial chhungah HSLC exam centre 4 - Bungzung, Khawbung, Farkawn leh Khuangleng-ah kan nei a, chhungah te chuan hun rei tawh tak atangin LDC kan nei ngai lova, hengah te hian SEDP-LDC tha tak mai min dah sak a, lawmthu kan sawi a. Tin, kan sorkar hian zirnain hma a sawn theih nan theih tawp a chhuah mek a, chhuah zel tur pawhin ruahmanna a siam a. Chutih lai mekin zirna hian ngaihthah a lo hlawh rei deuh tawh nge, mamawh hi a la tam em em a, a langsar zualte han tarlang ila –

Ka biala High School 5, Middle School 17 leh Primary School 24 in headmaster an nei lo mek a ni. Tin, school repair ngai te, toilet siam ngai te, fencing siam ngai leh new-construction ngai a la awm nual baw. Zirtirtu MR teacher, SEDP teacher leh Hindi teacher 130 chuang kan bialah dah thar a ni chungin, kan indaih tawh emaw kan tih lai khan an lo pension ve zel baw a, min lo boral san baw a; zirtirtu indaih tak tak hi a lo awm thei lova. Tun dinhmunah hian MLA fund-in zirtirtu 5 kan ruai mek a, chuti chung chuan school 5 velah zirtirtu kan la indaih thei lo cheu a ni.

Pu Dy. Speaker, Leithum Primary School-ah zirtirtu tunah hian 3 an awm a, Dungleang Primary School-ah tunhnaiah zirtirtu 1 pension avang leh zirtirtu 1 a boral avangin zirtirtu 2 chiah an awm mek a ni. Vangchhia Middle School-ah hindi teacher tha deuh mai min han pe a, kan lawm khawp a. Amaherawhchu vanduaithlak takin a cancer hlauh mai a, school a rawn kal mumal thei lova, harsatna kan tawk mek a. Tin, Leithum Primary School-ah hian regular teacher 4 awm mahse, an head in-charge bakah midang hi hrisellohna avanga enkawl ngai vek an ni a, zirtirna chungchangah harsatna kan tawk nasa hle a, hei hi kan Minister zahawm tak hian min lo hriat sak baw se la. Tin, Zawngtetui Primary School-ah zirtirtu 3 tunah hian kan awm dawn ta a, pakhat lakchhuah anih avangin hengte hi min lo hriat sak baw se la.

Tin, ka biala Khawbung Higher Secondary School leh Farkawn hi lumpsum grant-in-aid in a lo kal ve tauh tauh a, mipui pawh an hah em em a, an hah rei tawh khawp mai a. Tun sorkar kumtharah hian anni hi min upgrade sak ngei turin kan Minister zahawm tak hi ka han ngen nawn leh a ni.

Tin, ka bialah hian High School 8 leh Middle School 1 Adhoc grant-in-aid an la awm a, anni pawh hi provincialized an mamawh tawh khawp mai a. Heng school-te hi 2008, kum 15 kal taa Adhoc grant-in-aid a awm an ni. Tin, kan bial ang, bial kilkhawr leh hmasawna mamawh bial min ngaih pawimawh thin avangin kan lawm hle a, kan mamawhte a tam avangin min ngai pawimawh chhonzawm zel turin Minister zahawm tak hi ka han ngen bawk a ni.

Minister zahawm tak Er. Lalrinawma Demand No. 34 hi han sawi leh ta ila.

Kan ngaihthlak tak leh kan hriat tak ang khan February Ni 1 (Nilaini) khan, khelmualah kan Chief Minister zahawm takin College of Veterinary Science hmunah RD Block hrang hrang dah tur mobile veterinary unit 26 kha a vai liam tih kan hria a, keini pawh Khawbung RD Block a dah tur min pe tel ve a kan lawm khawp mai a. vety doctor te kan han nei thar a, para-veterinarian min dah sak bawk a, hei hian kan bial chhunga ran enkawlna kawngah hma nasa takin an la thei dawn a, kan thlamuan pui hle a ni. Hetih mek lai hian Vaphai dispensary-ah te vety doctor kan neih lohna a rei tawh a, Khuangleng-ah te vety doctor kan nei lova, kan hriat angin Khuangleng phei chu sial-vulhna hmunpui a ni a, satellite a ni a, a chheh velah ranvulh an tam avangin doctor mamawhna a sang em em a, Vaphai leh a chheh velah pawh chutiang bawk chu a ni a. Vawk-vulh te an thahnem a, hengah te hian vety doctor kan mamawh em em a ni tih kha kan Minister zahawm tak hian min lo chhinchhiah sak se.

Tin, kan bial chhunga dispensary a thawkte quarters repair ngai khi a tam khawp mai a, khingte pawh khi min hriat sak se la. Farkawn hi vawk-vulhna hmunpui kha a ni a, vety lama mithiam an mamawh hle a, FOCUS hnuai VFA-1 dah a ni a, a indaih lo khawp mai a, vety hnuai atangin VFA-1 min dah belh sak thei se kan lawm khawp ang.

Demand No. 29 - Women & Child Development Department-ah hian Project Circle Officer Khawbung ICDS hi a pension mai dawn a, kan buai khawp mai dawn a. Khawbung project-ah hian thawktu an indaih lo em em nghal dawn a, CDPO kan nei bawk si lova. CO a pension phei chuan LDC leh Peon chiahin office an nghak dawn a ni tih hi kan Minister zahawm takin min lo hriat sak se la. Tin, Khawbung ICDS Project Office building CO quarter bakah IV-Grade quarters leh godown te sak that a ngai hle a ni tih kha ka sawi tel duh bawk a. Tin, Anganwadi repair leh sak that ngai kan la nei nual a, hengte hi min lo chhinchhiah sak se ka duh khawp mai. Tin, Anganwadi helper leh worker-te hlauh pek mek niin kan lo hria a. Anni hi an tangkai a, a lawmawm ka ti hle a. Ka bial chhunga awmte hi chu a theih hram chuan ka tlawh ve zel a, a hmunah an

dinhmun ka hmuhpui a, tih theih neilo mah ila, a hmuna kan hmuhpui hian an lawm em em a. Ka bial chhunga Anganwadi Centre hi ka tlawh chhuak deuh vekin ka hria a. Chuvang chuan, kan Minister te hian tun hnaiah 'an lawmman te kan pe' an ti kha ka lawm hle a, lawmthu ka sawi bawk a ni.

Minister zahawm tak Pu K. Lalrinliana Demand No. 17 ah hian nikum budget ₹71,88,44,000/- laiin kan khum a, a lawmawm hlein ka hria a. Hei hi department pawimawh a nihna a chiang hle a, ei leh barah Mizo mipui ten vawiin thlengin harsatna nei lovin kan awm a, supply department changtu minister hian fak a phu tak zet a ni. Tun sorkarah hian godown 31 lai sak zawh tawh a ni a, 24 sak tura ruahman leh mek niin ka lo hria a sorkar hmalakna a fakawm ka ti a. Ka bial Khawbung leh Khuangleng-ah pawh sak zawh tawh a ni a, Khawbung godown hi amah kan Minister ngei pawh khan min hmuhpui a, a estimate a lo te deuh a, min extend sak turin kan ngen a, min lo note sak sela. Godown tha tak mai kan nei a, kan lawm a. Kan hmabak - Dungtlang leh Farkawn te kan la nei a, chungte chu min lo chhinchhiah sak bawk se.

Tin, store-keeper hi kan indaih lo khawp mai a, Vaphai leh Bungzung-ah hian store-keeper kan nei lova, hmun dang atanga hmui a ni a, store-keeper thar lak hunah min lo chhinchhiah sak se kan duh hle mai. Chutiang bawkin Khuangleng-ah pawh store-keeper nei lovin midangin min hmui a, a hmuitu pawh hi kuminah a pension leh dawn a. Khuangleng centre-ah hian store-keeper kan mamawh leh dawn a ni. Tin, Khuangleng centre hi centre lian a ni a, a dawrtu mipui an tam thin avangin IV-grade PE pakhat awmsa hi a indaih lo hle a. Chutiang bawkin Farkawn-a PE pahnih awm thin kha pakhat zawk a pension avangin a indaih lo hle bawk a; Khawbung centre-ah pawh chutiang bawk chu a ni a, PE pakhat chiah kan nei a ni. Heng centre pathumah hian kan Minister hian PE lak thar turte hi min dah sak theih chuan kan lawm khawp ang. Kan Minister hian min lo chhinchhiah sak se a lawmawm khawp ang. (Pu Dy. Speaker, ka zo tep tawh a.)

Hei, Mizoram pumah RGSA scheme atangin VC House 150 lai sak zawh tawh a ni a, 98 lai repair a ni bawk a, sorkar hmalakna a fakawm hle a. VC House nei ngailo ten a thar tha tak tak an nei mek a, ka bial khaw 10-ah pawh a thar kan nei a, a bak khaw 15 hmabak kan la nei a, hengte hi min hriat sak se. Tin, VC 243 hnenah 'computer set pek a ni tawh' tih kan lo hria a. Tunlai khawvel changkang zelah computer hi a pawimawh em em tawh si a, a tel lo chuan VC tan pawh hna thawh theih a ni tawh lova. Chutih mek laiin VC 243 laiin computer an dawng hi a lawmawm kan ti a. Kan bialah hian VC 8 in computer an dawng tawh a, la dawng lo VC 17 lai an la awm a, hei hi kan Minister zahawm takin min lo hriat sak se.

Tichuan, heng Minsiter pathumte, Pu K. Lalrinliana - Demand No.17, 19, 35 te leh Er. Lalrinawma - Demand No. 7, 29, 34, 41 leh Pu Lalchhandama Ralte - Demand

No. 18, 20, 28 te hi, he House zahawm takah hian ka support a, ka pawmpui a ni e. Ka lawm e.

DEPUTY SPEAKER : Member zahawm tak Dr. K. Pachhunga, ka sawm e.

DR. K. PACHHUNGA : Pu Dy. Speaker, ka lawm e.

Hei, hon. Minister zahawm tak pathumte – Er. Lalrinawma, Pu Lalchhandama Ralte leh Pu K. Lalrinliana te demand hi, a hmasa berah Excise & Narcotics Deptt. sawi ka duh a.

Kan sorkarin kuthnathawktute hamthatna leh hma an sawn zel theih nan grape-wine rules te kan siam a, a lawmawm ka ti a, social media leh mi zawng zawng deuh thawin kan buaipui luai luai a. Hei hi a tha em em a, grape-wine chauh ni lo, kan fruit product hrim hrim hi wine-a siam theihna dan pawh la siam leh ta ila. *Entirnan* – dragon-fruit atanga wine an siam te, pine-apple te pawh a ni ang a. Mi tamtakin ka hriat thiamloh chu - wine alcohol percent hi 11-15% a tlangpuiin a ni thin a. Hei pawh hi kan pawm ve deuh a ngai a. Alcohol tel lo wine te pawh a awm tho a, khang te kha chu a technology a zirin a develop theih a. Tuna ka sawi duh ber chu - kan kut-hnathawktute fruit hrang hrang atanga wine siam hi ‘kan sorkar leh Mizoram pawh hian pawm ve ta ila’ tih hi.

‘Sorkar Excise-in ruihhlo dona kawngah nasa takin hma a la a ni’ tih a lanna chu - social media-ah chauh ni lovin tv news-ah drugs an man te kan hmu thin a. Chuvang chuan, Excise & Narcotic Department hian ruih hlo lamah pawh nasa takin hna an thawk a ni. Drugs dan hi a har em em a, central YMA hmalakna pawh a lawmawm a, he social evil hi khawvel awm chhung chu a reh dawn lova. Mahse, a zual-zapui leh kan thalai boral turte hi chu tu pawh sorkar se, ‘kan mutmawh hnarmawh a ni’ tih ka sawi duh a ni.

Tin, Social Welfare hnuai Tribal Girls Hostel te pawh ka bialah a awm ve a, kan lawm a. Thingtlang harsa zawk awmna neilo ten lehkha an zir ve theih nan hengte hi a tamzawk kan mamawh a. A bikin ka bial Chhungte-tlangdung Lungrang-ah te pawh kan mamawh em em a, min chhinchhiah sak sela ka duh a ni.

Tin, Anganwadi pawh kan mamawh a, an function leh power bakah an activities pawh a tha a. Mahse a building te a chhe tlangpui a, ‘a repair-na te awm thei sela’ tih kha min chhinchhiah sak sela ka duh tak zet a ni.

Tin, AH & Vety Department-ah hian, kan hriat angin ran vulh kan uar a, Mizo te culture-a bet tlat chu vawk leh ar vulh hi a ni a, technology thar a awm hma pawhin kan vulh a. Mahse, vawiinah technology thar doctor thiam zawkte nen hma kan la a, arsa

leh vawksa pawh kan intodelh tan a. Mahse, vanduai thlak takin a pul hri a lo leng a, kan indem luai luai a, mahse heng hri te hi chu *khuaarel-chhiatna* a ni a, sorkar puh em em tur pawh a ni lova. Tute emaw an sorkar avangin lir a nghing lova, hri a leng lova, vawk-pul hri pawh a awm lova. Kan za vaia kan van duaina a ni a, heta sorkar action pawh hi a lawmawm ka ti a. Mahse, sawi tel ka duh chu - thawktu awmlah avang emawa vawk pul kan lo report loh tam tam ka bialah pawh 38 lai chan te an awm a. Hengte hi an khawngaih thlak a, puih leh dan awm se thain ka hria a.

Tin, ka bial Tawipui South vety clinic a building a chhia a, sak thar kan mamawh a, Lungrang South-ah te pawh. Tin, Sethlun-ah clinic min pe dawnin ka hria a, 'kan lawm advance a ni' tih pawh ka sawi tel duh a.

Tin, Sericulture *Muga* kan hre em em a, khawvelah mi hausate thawmhnaw a ni a, kan ram hi muga thatna a ni a, tested a ni. Hma pawh kan la a, tunah kan bial bikah *Eri* te pawh Tawipui N-II ah leh Thualthu-ah te taima takin an ti a. Hei hi a min chhinchhiah sak ula, puih tlak an ni a. Tin, SEDP trade atan hmun hrang hrangah an thlang a, 'min enpui ula' tih kha kan sawi duh a ni.

Tin, Education sawi-luh ka duh a. Education-ah kan sorkarin zirtirtute indaihloh zia leh 'thingtlang education a ngai pawimawh a ni' tih a lanna chu - SEDP teacher leh MR teacher 2500 dawn kan han la te hi a lawmawm takzet a. Nimahsela, MLA ten harsatna kan tawha chu - thingtlang atangin khawpuiah in transfer an tum vek a, an dil nasa a, hei hi chu a fuh lo a ni. Interview laiin, 'kan awm duh' an ti vek a, a kar leh lawkah transfer anrawn dil sup sup a. A hrehawm lutuk a, kan tan pawh; hei hi chu sim hram hram ila, 'hlawh kan duh chuan khawiah pawh thawh hi hreh lo ila' tih hi Mizo mipuite hian kan hriat nawn leh pawh a ngai a.

Tin, zirtirtu hnalak hi tuten emaw an han sawi a, 'a fair lo' an ti a, a fair lutuk a, kan hria a. Party-in kan la lo a, party zawng zawng leh MZP leh zirlai te pawhin lawmthu an sawi a, thuchhuah pawh an nei a ni. Tin, qualified lo kan la reng reng lo bawk tih te kha kan sawi tel duh a, a Minister chungah pawh lawmthu ka sawi a ni. Tin, school - *private* leh *ad hoc* status upgradation hi sorkar hian min ennawn sak leh se la. Ka bial Thualthu-ah te pawh NREGS te nen tangkawpin private school kan din a, kan harsatpui em em a, *ad hoc* emaw, *lump-sum* emawa dah dan te awm se tih kha min chhinchhiah sak ula ka duh tak zet a ni.

Tin, vawi eng emaw zat ka biala school building chhe lutuk te ka sawi thin a, tunah eng emaw zat chu kan ti ve a. School building chhe zual bik - Chawngte L M/S te pawh a ngaihna a awm lova, chung pawh a nei tawh mang lova. Chutiang chuan Buknuam school te pawhin bang a nei lova, social media-ah anrawn tilang a. Chutiang chiah chuan Vaisam leh Chithar- school te social media a an tihlan a ni a, bang pawh nei mang lo khawpin ka biala school building-te a chhia a ni. Tin, Upper P/S 1972-a din

te phei chuan bang te pawh a nei tawh lova. Tin, Lungrang P/S te pawh ‘a tlu mai ang’ tih hlauhawm khawpin vawiinah a awm a. MLA fund te pawhin kan ti a, tin, Education Deptt. leh NABARD atang te pawhin kan ti a, kan la ti seng ngang lova, 50% vel hi chu ‘a hmuh tlak ve deuh tawh e’ tih chauh a ni. Chuvang chuan, min lo chhinchhiah sak ula tih kha kan sawi duh a. Tin, Samagra teacher, an society member pawh an tam a. An demand leh duh zawng zawng chu ti lo mah ila, he sorkar hian dinhmun tha takah a hlangchho te pawh hi a lawmawm ka ti a, a chhinchhiah tlak ka ti a ni.

Tin, Pu Rintea department chan Food & Civil Supplies kan hria a. Fak ngai lo khawpin hei Zoram puma hei leh barah kan harsa lova. Covid vanglai te leh ramri buaiah te khan ‘chaw kan nghei mai ang’ ti khawpa kan awm lai pawhin harsatna nei miah lovin buhfai leh gas-ah Mizoram mipui min han vil te hi, kan Chief Minister leh kan Supply Minister chungah hian lawmthu a sawiloh theihloh a. Chutiangan, LAD-ah VC House eng emaw zat hma an la a. VC House te hi, mi chuan tul an ti lo maithei a, mahse kan lo duh khawp mai. Bial kan han fang a, kan mipui ten min dil hnem ber chu – MHIP-in house an duh; MUP-in an duh; chutiangan YMA-in an duh a; VC-in an duh a. ‘Ei leh barah kan intodelh si lova’ tia eng emaw ti zawnga sawi kha chuan, No. 1-a kan ngaih loh hi kan lo No. 1 a. Hengah te pawh hma min lak sak a, kan lawm takzet a. Min pek belh zel ula, a theih phei chuan.

Tin, kan mamawh em em mithi-in or thlanmual-in kan nei lova, sorkar atang hian fund a lo theihloh nge, ka hre lova. Khaw tinin thlanmual-in hi kan mamawh a, MLA fund atang pawhin kan han ti nawk nawk a, khatiang khan eng emaw tih dan awm se la. Tin, kudam eng emaw zat - Chawngte leh Tawipui S-ah te kudam lian min sak sak a, kan lawm a, lawmthu ka sawi a. Tin, thingtlang bik, monsoon-stock ngai chinah hian nuai 10 - 15 vela sak tur kudam te hi ruahmanna awm se la tih kha min chhinchhiah sak ka duh a ni.

Tin, a tawp berah Pu Dy. Speaker, Fisheries Department-ah hian inhnialna nasa tak chhuak Mizoram-ah hian a awm a, chu chu, ‘chakai farm’ a ni. Chakai chu kan ramah kan hria a, tuman chakai kan khawi lova, a thlawnin luih kan zuk man a. Tunlaiah chuan bazaar-ah kan lei ta a, tunhma phei chuan kan lei lo reng reng a ni. Chuvang chuan, *chakai farm* vawiinniah research/trial a ni a. Chuan le, mitam tak in sawichhiat nan, “chakai pakhat man chuti, khati” kan ti a, nasa takin kan sawichhia a. Nimahsela research awmzia Mizo mipuite’n kan la man chiah lova. Satellite pakhat kg 150 kapchhuak tur hian India-in cheng nuai vaibelchhe 800 deuh thaw a seng a, mahsela, minute khat lekah a tla ve leh mai bawk a. Chutiang chuan, Cheetah - sakei tlan chak ber chi a nu 6 leh a pa 3 relocation atan India-in vaibelchhe 90 a seng a ni. Chutiangan, Ph. D pakhat produce turin India University hian Science-ah te, Chemistry-ah te cheng tam tak a seng a. Research hi a to a, mahse a hlawhtlin chuan, khawvel kan awm chhunga hlawkna a ni. Tunah chakai pawh research angin trial a ni a, sumdawn nan bazaar-ah an la hralh lova. Tuna chakai research/trial hi a hlawhtlin chuan nakinah

tute emaw chhungkaw tam takin eizawn nan an hmang ang a. Tuna an expenditure let eng emaw zat arawn lut dawn a ni. *Research and trial* hi mipuiin kan hrethiam lova, sorkar dem nan leh a changtu minister/department dem nan kan hmang hi a dik lova, mipuite'n kan hriatchian a ngai a. Sakei te chi relocation atan pawh vaibelchhe 90 India in a seng a ni; rocket pawh an kapchhuak a, vaibelchhe sang tel an seng a, a tlawlh a, a tla ve leh mai bawk a. Mahse heng research te avangin vawiinah current kan nei a, kan living condition development ropui tak hi 'laboratory research vek a ni' tih hi ka sawi tel duh a ni.

Tichuan, Pu Dy. Speaker, he demand, kan Minister pathum te chanpual hi, tha ka ti a, Zoram hmasawn nan mitinte tan malsawmna ni se, kan ram hi thang zel se tiin ka rawn support a, pass ngei ni se. Ka lawm e.

DEPUTY SPEAKER : Member zahawm tak Pu Nihar Kanti Chakma kan sawm e.

PU NIHAR KANTI CHAKMA: Pu Dy. Speaker, ka lawm e.

Vawiinah Minister zahawm tak pathumte demand kan sawiho mek a ni a. A hmasa berah chuan Demand No. 20 – Education chungchang tawi tea ka sawi lan duh chu - kan bial hi, bial context ang zawngin sawi ta ila, Mizoram-a bial backward, *educationally backward region* a ni a. Demand kan sawi lain a hmasa bera ka sawi duh chu - Minister zahawm takin ka bialah 10+2 science stream min dah sak hi a lawmawm ka ti a. Tlabung mipui aiawhin lawmthu kan sawi hmasa a ni. Chu mai ni lovin, a ruka min hrilh dan chuan, commerce te pawh min pek tumna an nei a, a lawmawm ka ti khawp mai a. Ka bial hian harsatna hrang hrang kan nei a, a hmain session-ah te ka sawi lang tawh a. Ka bialah hian metric exam centre pakhat chiah kan nei a, school te kum tina a pun chhoh zel avangin centre pakhat maiah an leng tawh lova. Chuvangin, Govt. high school-ah centre pakhat kan dil belh a, kha kha engtingge ni zel, kan Minister zahawm takin min sawifiah sak thei se ka lawm khawp ang.

Pu Dy. Speaker, ka hmaa member zahawm takte sawi ang khan, kan bialah zirtirtu an indaih lo nasa khawp mai a, a bikin primary level hi thum that ngai a ni. *Entirnan:* Ka biala zirtirtu khawpuiah an transfer zel a, kan transfer anih pawhin, an aiawh min dahsak se ka duh a ni. Chuti lo chuan ka bial education-in nasa takin a tuar tih hi ka sawi duh a ni. Member zahawm tak Pu Pachhunga bial Gulsil-ah Primary School zirtirtu an dah a, Gulsil ah hian zirtirtu regular pahnih leh MR pakhat an awm a, tin, SSA teacher pakhat a awm bawk a, heath hian naupang zirlai 25 chiah an nei a ni. Pu Dy. Speaker, zirtirtu kan neih dan hi a rual lo a ni. Hetianga kan kal zel chuan engtingge education ah hian hma kan sawn theih ang? Quality improve ngaihna a awm lo a ni. Chuvangin, education, a bikin primary level atanga kan siam that a hun tawh.

Hei, policy hrang hrang kan nei chho zel a, tun sorkar hian ‘*Look-35 West Tuipui Constituency*’ policy a neih a ngai tawh a ni. Ka bial hi tun thlengin infrastructure sports lamah a ni emaw, education-ah a ni emaw, hei Tlabung kum 50-na, Mizoram-ah pawh khaw upa ber a ni a, chuvangin, “*Look-35 West Tuipui Constituency*” policy neih hi a hun takzet tawh a ni.

Tin, problem hrang hrang hi kan nei ve thin a. Tuichawng Chhuah-ah khuan MLA fund atangin school kan din ve a, a tha khawp mai a. Zirtirtu pahnih an awm a, pakhat chu hmun dangah an transfer daih a, tunah pakhat chiaah a awm a, naupang erawh chu 100 aiin an tam a. Ngaihtuah ula, zirtirtu pakhatin engtin nge a enkawl theih ang? Chu pawh primary school a la ni zui a; a ngaihna a awm lo a ni. Ecomonic survey a lan danah chuan teacher:pupil ratio chu 1:9 a ni si a, a pawl ka ti hle mai. Kan hria a, education tel lo chuan khawvelah changkanna a awm thei lova. Chuvangin, kan Minister zahawm tak hian hei hi min chhinchhiaah sak thei se chu ka duh khawp mai. Hun remchang a piangah ka sawi thin a; keini lam hian MIL teacher kan mamawh takzet a; Mizo tawng thiam kan duh ve a, kei ngei pawh hi helaiah harsa ti takin mizo tawngin thu ka sawi ve hram hram thin a ni. Primary level atangin Mizo subject hi zir ila chuan hei ai hian kan thiam zawk ka ring a. Tin, tawng chi hrang hrang kan thiam ve pawh hi a tha hrim hrim a ni. Chutiang chuan school tinah hian Mizo language teacher te hi dah theih i la kan duh khawp mai.

Pu Dy. Speaker, Excise & Nartcotic, Demand No. 7 hi a pawimawh khawp mai a. Ka hmaa member zahawm takte khan an sawi nual tawh a. Vawiina kan sawi duh chu ruihhlo do chungchang hi a ni a. Hei, kartin deuhthaw news-ah kan hmu thin a, Governor speech-ah te pawh sawilan a ni bawk a. Drugs hi Mizoram-ah hian *alarming position* a thleng tawh a ni. Chuvangin, he department hi nasa taka a thawh a ngai a. Chuti rual chuan, engtinngae a ven dan tur tih pawh ngaihtuah tel a ngai a ni. hi kan ngaihtuah a ngai a ni. News atang hian ruihhlo man chanchin chauh kan hria a, mahse nitin engzat nge lut tih lam kan hre lova, chuvangin, hemi dona tur atan department lam manpower hi increase a ngai a ni.

Kan hria a, ruihhlo vanga thihna tam tak a thleng a, kumin hi February thla pawh a la ral lova, mi 19 lai an thi tawh a ni. A pawl khawp mai. Mizoram-ah mihring kan tam lo, chutih laiin hmun hrang hrang atangin drugs in min attack zel a, department ma atangin hian min attack tu hi engtin nge kan ven ang tih hi ngaihtuah a ngai a ni. Hei Excise & Narcotics Department mawhpurhna a ni a, nasa takin an thawh a ngai a ni.

Awle, Pu Dy. Speaker a tawp berah chuan Demand No. 19 - Local Administrative Department hi sawi ka duh a. Ka biala Dinthar hi Bru khua a ni a, Tripura atanga an rawn kir khan Dinthar-ah hian khua an din chho a. Tunah hian basic facilities - tui te, electricity te, school te an mamawh em em a, school phe chu a ding ve tawh hial a.

Tunah hian Tlabung village council hnuai a, theih se chuan sub-village-ah tal dah ni se a tha lo maw ka ti a ni.

A tawpna tak tak atana ka sawi duh chu - Fisheries Department chungchang hi a ni a. Ka bialah hi fisheries potential a ni a, economic survey-a a lan dan chuan, sanghaah kan intodelh nasa khawp mai a. Chuvangin, he department hi Tlabung lam hawi zawngin a kal ve angai a ni. 'Look-35 West Tuipui Constituency' tih ka han sawina chhan pawh, potential kan nei a ni. Hmun hrang hrangah department-in nasa takin hma a la a, mahse engatinge ka bial potential nei tha em emah hian department hian hma a lak ve loh ka ti a ni. Chuvangin, *Look-35 West Tuipui* hi a hun ve tawh a ni. Pu Dy. Speaker, ka lawm e.

DEPUTY SPEAKER : Awle, minute khat a la awm a. Kan chawlh hun dar khat a ni a, kan chawl tawh ang a, dar 2:00 PM ah sitting kan chhonzawm leh dawn nia.

2:00 PM

DEPUTY SPEAKER : Sawihona kan chhonzawm leh ang a. Dr. L. Thangmawia, Member zahawm tak ka sawm e.

PU L. THANGMAWIA : Pu Dy. Speaker, ka lawm e. Vawinah hian demand pawimawh tak tak, kan Minister zahawm tak pathumte demand kan sawi hova, a phurawm hlein ka hria a. A hmasa berin Er. Lalrinawma chan demand te hi ka han sawi hmasa ang a.

Hei, MNF party hian sorkarna a chan hma atangin zu zawrh tihtawp policy-ah neiin manifesto-ah te a dah a. A policy leh manifesto hre reingin sorkarna a chan atanga kumkhat ral hma 2019 khan *Mizoram Liquor Prohibition Act, 2019* (Act No. 8 of 2019) chu he House zahawm takah kan pass anih kha, Pu Dy. Speaker. Sorkar hmasa a zu chhiah atanga an sum hmuh te RTI hmangin kan han dil chhuak a. RTI chhannaah chuan, nuai hlir nuai 26,361 lai bakah cheng 58,398 kha an hmu chhuak a. Heng zawng zawng chan ngam hian kan kohhrante, NGO leh mipuite duhdanin tihtawp a ni a, a lawmawm khawpin ka hria a.

Tin, Demand No. 29 kaihnhawihah hian ka bialah pawh Youth Development Centre, Ngopa-ah min sak sak a. Tin, sorkar hmasain bul a lo tan Eklavya Model Residential School, Ngopa ami te pawh sorkar hmasa thiltih tha tak he sorkarin chhonzawmin hmanni lawk khan kan han hawng a ni.

Tin, Demand No. 34-ah hian, Kawlkulh-ah hian kan Vety office leh quarter a chhe em em a. Hei hi kan department lam hotuten min ngaihtuah sak in tunah hian Vety office leh quarter, ka bialah chuan a tha ber ni thei tur min han tihsak dawn a. He House

zahawm tak kaltlang hian department chungah leh a changtu Minister chungah lawmthu ka sawi duh a.

Tin, Demand No. 20 - Education, Pu Lalchhandama Ralte kan Minister zahawm tak chanah hian kal ila. Hei, kan manifesto-ah tho *school-timing* sawn kha kan ti a. Sawn-hma kha chuan keimahni observation ah kha chuan zirlai tam tak school-ah chaw ei lovin an kal a, an pum te pawh a that loh phah niin kan hria a. Ram pum dinhmun chu kan zir hman lova. Kan thenawm hnai leh kan hmuh phaka nu leh pa tam takin an sawi a ni a. Chuvangin Mizo chaw-ei dan mumal pangngaia kaltheih turin *school-timing* kha kan manifesto angin kan han sawn ta a, a lawmawm khawp mai a.

Tin, sorkar hmasa khan inthlan dawn hnaih te, thla khat pawh inthlan puan hun a awm tawh lo tihah khan mumal lo takin Sub-Divisional Education Office, Ngopa-ah, ‘a kalh kim lovin’ ti mai ang, thla kim lovin a piantir a. Engpawh ni se, piantir loh ai chuan Pu Dy. Speaker, a lawmawm tho tho mai a, hei hi a sawisel zawnga ka tih pawh a ni lova. Amaherawhchu, GAD approval pawh a lo awm lo a ni. Hma han la chho vin kan lo tlin ve takah chuan theihtawp chhuahin kan hotute hnenah ka han tlan kual a, mahse GAD approval pawh a lo awm silo a.

Tikhan theihtawp kan chhuahna zarah leh kan Education Minister zahawm takin theihtawp min chhuahpuina zarah GAD atangin *ex-post facto* approval kha nikum 2022 June, 27-ah kan hmu ve ta a, ka thawhuai a ni. A hma kha chuan thlakim lova naupiang kha chu a hlamzuih mai kha hlauhawm deuh a. Tunah erawh chuan hei *ex-post facto* approval ah hian Changzawl, Chiahpui, Ngopa, Hliappui, Hrianghmun, Kawlbem, Khawkawn, Lamzawl, Mimbung, NE Khawdungsei, Pawlrang, Saichal leh Teikhang te huam turin GAD-in min tihsak ta a. Kan Minister zahawm tak leh department ka ngenna pawh a rang thei anga SDEO min dah saka, min thum-chak sak turin ka ngen a.

Tin, lawmawm em em chu - sum remchang awm apiang te pawt khawmin SDEO office pawh hi sakna tur min ruahman sak a, an sa zo tep tawh a. Remchangah kan Education Minister zahawm tak hian kuminah min hawnsak turin ka sawm nghal ni ta sela.

Tin, Education Department atang bawh hian Mizo tawng vawngghima chawinungtu tur *Mizo Language Development Board*-ah khan hmalak a ni a, din a nih theih nan, March Ni 10, 2022 (nikum) khan he House zahawm takah lungrual takin i veilam leh dinglama thute khan kan pass thei a. Kan zavaiin member zawng zawngte chungah pawh lawmthu, member ka nih vena zawnah ka sawi ni sela. Chak takin sorkarin hma a lak chhonzawm niin ka hria a. Chairman, Secretary leh Member te ruatdan tur leh an hlauh tur te pawh a ni ang chu, khami rules kha tunah DP & AR GSW-ah a awm mek a. Hei hi a rawn tlang theih hnuah cabinet-in a pass leh a ngai a; post creation te pawh tihfel mai theih tawhin a awm a.

MLDB hi a khawihthu department te sawi dan chuan - *autonomous body* a nih avang khan sorkar hnuaia eng emaw kan din nen a inan loh avangin tlemin hun a la ta hlek a. Kan Minister leh a thawhpui ten theihtawp an chhuah a, kumin hun hmasa lamah hi chuan MLDB Chairman thar leh Secretary te pawh kan neih ka ring a. Pu Dy. Speaker, 1st February, 2022 (hmanni lawk) khan office pawh chei zawh tawh niin, luah tan a ni a. Controlling Officer, Pu Lalzirmawia Chhangte, Education Secretary in Chairman nihna a lo luah rih a ni.

Tin, National Education Policy, 2020 pawh hi han sawi kai zawk ka duh a. Hetah pawh hian thil tam tak ti hlawhtling turin sum sen te pawh a ngai dawn a. A bik takin elementary-ah tuna NEP-2020 rawtna ah hian pawl 5 hi middle school atanga primary-a chhuk thla tur a ni a. Tin, pawl khat hmaah hian foundation course dah tur a ni bawk a, additional classroom pawh mamawh nghal tur a ni. Hengte pawh hi chona lian tak infrastructure-ah leh a zirtirtuah pawh a ni bawk a ni.

Hetih lai hian zirtirtu chungchangah hian kan Minister chak tak hmalakna zarah hindi teacher 518 lai kan la tawh a. Tin, zirtirtu *regular* 152 leh MR teacher 880 lak a ni tawh a. Tin, term khat chhunga kaisan tam ber a ni hial em aw ka ti a. Headmaster-ah te, principal-ah te kaisang hi nikum October, 2022 thleng khan mi 548 an awm tawh a. Hetih lai hian tun sorkar kal mek chhungah hian nikum October, 2022 thleng hian pension 958 an awm ve thung bawk a.

Tin, Samagra High School 9 leh elementary school 2 hawn thar a ni a. Higher secondary school hrang hrangah additional stream leh stream thar 41 hawn a ni hman tawh bawk a ni. A ropui hle mai.

Pu Dy. Speaker, LESDE chungchang hian lung te pawh a tileng deuh a. ‘MBOCWWB’ han tih hi chuan, kan Speaker leh nang chuan thu hlui deuh sawi rem in tilo a, ka sawi lo mai ang a. ‘NIAS’ han tih te, nuai 128.2 zirnain lema sen te pawh sawi a chakawm viau na a, ka sawilo mai ang a. Ni 29.8.2014-ah Law Commission Chairman, khatih laia mi leh MYC Chairman khan a vailiam kha a ni a. Tunah erawh chuan MYC te pawh a dan a dang ta a. Sum siam nan leh ban phah rum rum ngai tawh lo turin *job-portal* te an ti a. Tunah chuan civil service coaching leh a theih ang angte tiin nula Betty leh tlangval KC Zalena te phei chu *main exam*-ah an rawn tling chho a. MYC Chairman, hei ka bula thu leh a enkawltu, LESDE Minister Pu Lalchhandama Ralte te chungah pawh House zahawm tak kaltlangin lawmthu ka sawi a.

Sawiloh theihloh ka tih erawh chu - CAG Report, 2016-17 kha kan dawng vekin ka ring a. Heti laiah kan sorkar hnua an sem a ni a. Khatah khan MYC-in nuai 77.53 zet mai dik lova a hman thu pawh kha a lang a. Engtin kal zel ang maw!

A tawp lamah chuan, Pu Dy. Speaker, (hun reilote min pek belh theih chuan ka lawm ngawt ang a), kan Minister zahawm tak Pu K. Lalrinliana chan ho pawh hi ka han sawi thuak thuak ang a.

Covid len laia ei leh bar leh nitin mamawh harsa lo a awm theihna te, gas harsatna te pawh, “hengte chu company leh agent-te inkar alawm” ti mai lova, Delhi thlenga a kalna rahte kan hmu chho zel a, lawmthu ka han sawi a. Tin, kudam 31, warehouse 23, VC house 150; tin, a repair-na 30 chuang te a awm a, a lawmawm khawp mai a. Ka bialah pawh Teikhang leh khaw hrang hrangah kudam sak thar a ngai em em a, hengte pawh hi min lo hriatsak ta sela.

Kan Minister zahawm tak, amah ngei pawhin a rawn tlawh tawh NE Khawdungsei storekeeper quarter pawh tlu lek lekin a awm a. Covid a reh chho bawk a, Covid chhung kha chuan kan hrethiam em em a, amaherawhchu, tunah chuan min tihsak thei se a lawmawm ngawt ang.

A tawpna berah chuan Pu Dy. Speaker, ‘chakai farm chungchang’ tih hi kan sawi thin a, hei hi *experimental stage* a ni tih hi Mizoram mipuite hnenah ka sawi duh a. Rocket-te pawh an kap chhuak a ONGC-te pawhin exploration an tihnaah oil-te pawh crore tam tak sengin an han zawng a, mahse an hlawhchham chang a tam a ni. Rocket an kahchhuah te pawhin scientists ho hian kut an beng dur dur thin a ni. Chuvangin, ‘tuna chakai farm hi tih tak tak chi a ni em’ tih enna tur experimental stage a ni a. CSIR mithiamte’n an rawn vil a, a hlawhtling lo thei a, a hlawhtling thei bawk a, tuna insawichhiat nan emawa hman tur a ni lo tih pawh kha ka han sawi tel duh a ni e. Ka lawm e, Pu Dy. Speaker.

DEPUTY SPEAKER : Tunge sawi leh ang le? Member zahawm tak Pu C. Lalsawivunga kan sawm e.

PU C. LALSAWIVUNGA: Pu Dy. Speaker, Minister 3-te demand kan sawi a, minute 10 chiah hun kan nei a, a hrehawm khawp mai. Ngaimawh zawng pawh kan sawi hman dawn lova; han lut nghal ta mai ila.

Demand No. 7 - Excise & Narcotics-ah hian 2020-2021 leh 2021-2022 aiin kuminah hian hlawh hi ₹1400 lakhs velin a tam a. Group B post 9-in a tlahniam a, Group C erawh hi chu 46 velin a pung thung a ni. Chutihlaiin hlawhah hian ₹1400 lakhs-in a pung thung a ni.

Kan ram ina kan buaipui chu *Zu leh Damdawi* hi a ni a, a hluar em em a, chhungkua, khawtlang, mimal, kohhran leh ram a nghawng a ni. Hei hi a pawl em em a. December Ni 31, 2022 thleng khan heroin kg 26.557 man a ni a, *drugs related death* pawhin pun lam a pan a. 2022 ah hian mi 43 thiin, tun kum February, 2023 thleng hian

mi 19 an thi hman tawh a ni. Hei hi END Achievement Report atanga hmuh a ni a. Zu pawh hi kum tinin a pung zel tih a lanchianna chu – 2022 ah hian zu liter 54805 man a ni a, fermented rice (zu bilh) hi tin 94451 man a ni a, dawidim (yeast) hi kg 361 chuang man a ni bawk a. Ganja pawh kg 91 aia tam man a ni a, *meth* kan tih pawh hi kg 84 aia tam man a ni bawk a ni.

ND & PS Act hnuaiah hian heng dan bawhchhia hi 20/21 - 21/22 hemi kum khat chhung lek hian dan bawhchhia man hi mi 2236-in an pung hman bawk a. MLTP Act, 2019 hnuaiah leh Mizoram Excise Act, 1973 hnuaiah hian case register hi kum khat chhung lekin mi 2429-in an pung hman a ni. Heng avanga kan jail dinhmun pawh hi harsa tak a ni. Aizawl Central Jail, Central Women Jail leh Aizawl District Jail bikah hian tunah hian mi 1169 an tang a, a capacity hi 624 a ni thung a. Mizoram pumpuiah hian tunah jail tang mek hi mi 1700 chuang an awm a, tichuan kan capacity hi 1300 chuang a ni. Chutiang khawp chuan tan inah pawh an leng lo a ni. Zu-khapna Dan (Prohibition Act, 2019) kan neih tawh hnuah hetiang hi kan dinhmun a ni a, a paw em em a. Vawiin niah hian kan sawrkar hi in enletna tur a awmin ka hria. Chuvang chuan, hetiang khawpa harsatna kan tawh karah hian, kan sorkar hian ‘a tih tur a ti em’ tih hi vawiin niah hian zawhna lian tak a ni.

Chutihlain Excise-ah hian kan budget han en vang vang ta ila, hma thar lakna tur a awm miah lo, budget-ah hian. Chuvang chuan, ruihhlo do chungchangah leh harsatna kan ramin a tawh mek su-kiang tur hian kan sawrkar hian ngaihtuahna a hmang tak tak lo tih hi a chiang hlein ka hria.

Tin, Demand No. 34 - AH&Vety hi tawite han sawi ka duh a. Nikum aiin 68% in kan budget hi a tlem a, 87% hi hlawha kal tur a ni bawk a. Chuvang chuan, hma thar lakna tur a awm lo. ASF avanga vawk farm neite hnenah *zangnadawmna* pek a nih laiin department ten an authorized Local Task Force ten miharsate - vawkvulh an tihhlum sak te compensation pawh a awm lova; ka bial chhungah phei chuan kan tawrhna a na em em a ni. Hengte pawh hi sorkarin hma min laksak ka beisei a ni.

Demand No. 20 - School Education-ah hian budget pumpui atanga 75% vel hi hlawha kal tur a ni dawn a. Budget Bu han en hian, capital section-ah hma thar lakna tur emaw, hnathawhna tur ruahmanna a awm mumal lova, a paw hle a ni. Ka bial Aizawl S-I chhungah, he House-ah pawh hian ka sawi tawh a, Govt. Central High School leh Govt. Bethlehem Vengthlang High School te khu a chhe lutuk tawh a, a sakna rei tawh a; kum 30 dawn a ni tawh a ni. Mahse capital-ah khatiang atana pawisa dah a awm lo hi a paw ka ti a. Tin, Republic Govt. Primary School-I leh Bethlehem Govt. Middle School building-te siamthat a ngai tawh a, a chhuat leh zun-in te pawh hman hleihtheih lohin a awm tawh a ni. MLA Fund atangin thutthlengte, dawhkante kan leisak a, chutiang chuan a theih ang angin kan tuam hlawm a ni. Sorkar ve zawk hian a

enkawl sikul hi engatinge tuamhlawm tur zawnga budget-ah pawh hian hmuh tur a awm loh? *Sorkar-tha* chuan a enkawl sikul mamawhte a pe dawn lawm ni?

Tin, SEDP teacher chungchang hi ka sawi lang lo thei lova. Advertisement pangngai chhuahin lak a awm hi ka hre miah lova, *recruitment rules* a awm hriat tur a awm lova. Engatinge sorkar dan leh dun kenkawh ngaipawimawh tur zawkin recruitment rules pawh awm lova, advertisement pawh siam lova party unit te an lak tir thin? Hei ringawt pawh hi thil lian tham a tling a ni. Dan kan zah tur a ni a, Dan a awm a nih chuan. Engatinge kan sorkar hian Dan a ngaihpawimawh loh?

Tin, zirtirtu 5 aia tlem awmna sikul hi Govt. school-ah hian 656 an awm a, Samagra Siksha hnuai hian 1280 an awm mek bawk a ni; chu chu tuna kan dinhmun hi a ni a. *Zirna* hi a pawimawh a, ram hmasawna tehfung, hmasawna engkim bul intanna a ni a. Chuvang chuan, tuna kan dinhmun mek atang hian ngaihtuahna thar hmanga system thar, kalphung thar duanga, zirnaah pawh hian ke kan pen hi a hun ta a ni.

Demand No. 19- LAD hi kum kal mekah hian danglamna hmuh tur a awm meuh lova, VC-te grant hmuh tur pawh a pung hran chuang lova, RGSA tan cheng nuai 8000 CSS dah a ni a. Amaherawhchu, hetah hian 10% SMS hi budget-ah hian a lang lova, hei hi engnge a awmzia?

Demand No. 17 - FCS & CA-ah hian, buhfai leina atana sum dah budget atang hian a danglam hran lova. Buhfai hralhna atanga hmuh tur deduct recoveries cheng nuai 5,000/- zetin a hniam thung a ni. FCI hian Mizoram chhungah kudam an rawn sa a, FCI Godown min rawn sak sak a; anmahni vek hian kudam-ah buhfai min rawn dah sak leh a, chuta tang chuan keini hian kan lo lei ve leh a ni. Engpawh nisela, Pu Deputy Speaker, kan ram hi buhah kan intodelh miah lo; Pathian-in buha kan intodelhna turin phaizawl tha tak tak min pe, awih-tlang ram pawh min pe; engatinge vawiin thlengin buhah hian kan la intodelh loh? State kan nih hnuah pawh kum 36 kan kal tawh; engatinge hemi chhung hian hmundang a mi lei ringawta kan la khawsak? Chuvang chuan, Pu Dy. Speaker, kan budget han en hian ‘a lungchhiatthlak’ tih zawng te pawhin sawi ta ila tawngkam mawilo a ni em lo ang chu maw; thahnemngaihna a ni.

Pu Dy. Speaker, kan *priority* leh kan value hi i thlak danglam ang u; buha kan intodelh lo hi a zahthlak a ni. Vawiinah pawh hetiana budget kan la sawi fo mai hi a paw ka ti em em a, ngaihtuahna thar; thinlung thar; rilru thar nen, hawh u, tan i la tlang ang u; i tang tlang teh ang u. Mihring nuai 11 emaw bawr chauh kan ni a, intodelh thei kan ni. Mahse, sorkar hian a tih tur a ti lo thin niin ka hria a ni. Pu Deputy Speaker, ka lawm e.

DEPUTY SPEAKER : Member zahawm tak Pu Zothantluanga ka sawm e.

PU ZOTHANTLUANGA : Pu Dy. Speaker, ka lawm e. Kumina kan budget hi kum kal meka kan budget aia a tamna lang tam lo mahsela SASCI-ah ringawt pawh kan finance minister, kan Chief Minister-in a rawn present-ah khan, crore 200 tih a ni a. Nimahsela, central-in a *year mark*-ah khan crore 500 tih a lo ni a. chuti a nih chuan crore 300 kan belh leh thei a. Kum kal laia PM-DevINE crore 600 lo lang kha a awm tawh lo bawk a, chuti a nih chuan a pun dan hi a tha thawkhat hlein ka hria a.

Engpawh nisela, central atanga kan dawn tur tam ber helaiyah a hman dan tur kan lo rel hi a ni mai a. A lo kal that chuan, kan state-in hmasawmna kan thawh tur te a lo tam thei a. Kan beisei leh budget-a kan dah te eng emaw avanga a lo luh theih loh chuan, harsatna te min siam thin a; a lo luh tlem chang te, a luhna tur ni loa kan ngaih kum chanve hnulama lo kal leh si ang chi te kan neih thin avangin, hemi ruahman hi chu thil harsa tak a ni tih a hriat a.

Vawiinah hian Minister 3 lai demand kan sawi dawn a, minute 10 kan nei a. Department hi 10 a awm a, minute 1 theuh pawhin a daih lova, pakhat sawina hi. Sawi thiam a har hle dawn a.

A hmasa berah chuan, Demand No. 29 - Social Welfare chungchangah hian sawi duh ka nei a. Ka bialah Tribal Girls Hostel 2 - crore 3 leh a chanve chuang man ve ve te, Old Age Home - crore 3 leh a chanve man te, Paite Girls/Tribal Girls leh Zotlang Higher Secondary School te min sak sak a, a lawmawm hlein ka hria a. Tin, ICDS-a thawkte central sorkarin an hlawh tur a rawn tihtawp State sorkarin an zangnadawmna, an hlawh turte a buatsaih sak hi a ropui ka ti a, lawmthu sawi a ngai nasa hlein ka hria.

Demand No. 20 - School Education chungchang member dangin an sawi deuh vek tawh a. Tun sorkar hi kan vannei khawp mai kawng lehlamah chuan, Covid avang te, thil harsatna chi hrang hrang lo thleng avanga kan harsat laiin, sorkar school-in hma nasa takin a sawn a, zirlai neih tawh mang lohna, defunct ngai tawh tur khawpa awm tawh te tunah hian naupang admission a lo pung a, classroom siam belh a ngai a, kan school tam tak te siamthat te a lo ni chho a. Chu admission lo pung ta chhan ber ni a lang chu – ‘zirtirtu indaihlo chung hian zirna hi a lo tha theilo a ni’ tih hi a lang Chiang khawpin ka hria a. Kan sorkarin zirtirtu 2500 chuang zet mai a han la te hi kan school lo that takna chhan leh mipui, naupangte leh nu leh pate’n sorkar school-a confidence an neih vang a ni a. Chutih rual chuan chutianga kan school mipuiin an lo bawh tak siah chuan, zirtirtu tun aia tam zawk ngaihtuah leh thei ni sela chuan, hei ai hian kan changkang leh zual ang tih kha a beiseiawmin ka ring a.

Keini pawhin MLA fund hmangin additional classroom te kan lo sa a, an hlawh han tum sak chang te kan nei a, chutianga chuan MLA te pawh kan tang viau hlawm a, chungte pawh chu a rah tha a chhuahna chhan te pawh a niin ka hria a, a lawm hlein ka hria. Tin, tunah hian kan school building chei that ngai, sorkar hmasa lamah chei that

loh leh enkawl loha a lo awm rei tawh avangin, school building sak that hi hmun tam takah kan la mamawh a ni tih kha ka han sawi duh a. A bikin kan bial tana lawmawm em em chu, primary school atanga university thleng keini bialah hian a awm a ni. Nimahsela, a thlunzawmtu ber higher secondary school ber pakhatmah kan nei lova. Kan Education Minister duhsaknain Samagra atangin Ch. Chhunga High School-ah khuan Higher Secondary - Commerce leh Science min tan sak a, naupangin an hlut khawp mai a. College pawh Aizawl West College Dawrpui Vengthar-a awm khu Aizawl West mai ni lo, Aizawl mipuiten traffic chungchangah harsatna tam tak kan tawh phah a. Kan sorkarin rem hre takin Handloom & Handicraft ram min pe a, chutah chuan insawna tur kan buatsaih mek a. Kan sorkarin *Look-West Policy* an nei hi a lawmawm hlein ka hria a ni.

A dawt lehah chuan Demand No. 28 - Labour, Employment, Skill Development & Entrepreneurship Department hi a ni a. He department hnuaiah hian Vice Chairman, Manpower Development ka nihna anga ka parent department a ni nghe nghe a. Labour te, employment te, skill te, entrepreneurship te pawh hi a pawimawh vek mai a. Tun hmain kan hre ngai vak lova, kan hriat dan chu a chhe zawng a ni a. Hun hmasa lamah chuan a thawktute ban an ngai a; tin, a changtu minister leh officer-te pawh suspend an nihna hmunah khan vawiinah chuan Minister tha takin theihtawp a chhuah a, hei hian hmsawna tam tak a thlen a. Naupangte hi skill kan siamsak chuan an tan nun khawchhuahna a awm a ni. Chumi atan chuan keini pawhin *Madhavi Foundation* nen khan in tie-up in tunah hian Noida-ah zirlai naupang eng emaw zat kan tir a. Chungte chuan skill, B. Sc - Hotel Management & Hospitality zir tur kha man tlawmte, kum 3 course niin, stipend te awm a, an zir chhung hian kum 3 course a nih lain experience kha kum 3 an nei nghal dawn a, 5 star hotel-ah kar khatah ni 5 an thawk ang a, kar khatah ni 1 theory-an ti ang a, tichuan kum 3 a lo nih khan kum 3 experience hnu-ah *job guarantee*, an hnathawh tur hmuhsak vek nghal tur a ni.

Amaherawchu Mizo tam takin an dil a, counselling kan han neih khan a hautak a, labour ‘thawh hah a ngai’ tih kan hriattir atang khan tam tak an tlanche leh a. Mahse tih tak taka ti tan chuan hnain a hmuak a, ti duh te erawh chu kan board hmingin kan han buaipui ve a, kan lawm khawp a. Tuna kalte pawhin theih tawp an chhuah a, chutiang chuan nikumah khan hma kan la a ni.

Tin, Delhi-a kan kal khan Taiwan Embassy kan dawr a, chu mite chuan Mizote tan skill min siamsak a, “India rama company-ah leh foreign company hrang hrang bakah, Taiwan company-ah te kan lo employ ang; mahse *Mandarin teaching* erawh nei hmasa ila” an ti a, tunah hian hma lak turin kan chhawp mek a ni.

Mizoram – ITI ngeiah te pawh hian plumber, electrician etc. zirna chi hrang hrang hi i en ila, ‘hlawh hmuh theihna tur khawpin an thiam em’ tih te kan han en a, a lo tha viau a. Mahse, equipments leh machineries-ah te kan lo indaih tawk lova. Kan

Minister hovin district hrang hrangte tlawh zel kan tum a. Kan Minister-in ruahmanna te a siam a, kan mamawhte lei turin a buatsaih mek a ni tih han hriat hian a lawmawm ka ti a ni.

Demand No. 17 - Food Civil Supply & Consumer Affairs Deptt. hi Pu Dy. Speaker, kan Minister hi a chhuanawm khawp mai a, supply chungchangah harsatna kan nei lova. Tuivamit-FCI godown kan neih hian harsatna a thlen thin avangin leh, zirna hmunpui panna kawng a nih avangin tunah hian Sairang Dinthar-ah FCI godown lian tak mai construction a kal mek a. Kan Chief Minister leh Supply Minister-te remhriatnain, FCI godown atanga Mizoram godown kan phurh man hi a to thin si a, man tlawm taka a thlen theihna turin a bulhnaiah ram zawn mek niin, tihfel tep tawh a ni a. A sakna tur pawh kan sorkar chak tak hian ruahmanna min siampui a, sum leh paite pawh min dah sak tawh tih ka hria a, lawmawm ka ti hle a ni.

Oil Depot chungchang hi sawi leh ka duh a. Ram thenawmte nena kan intihbuai chang pawh hian, oil kan neih dawn loh avang te, food grain a lo luh theih dawn loh avang te hian Mizote hi kan huai thei thin lova. Chuvangin, tunah hian remhre takin kan hotute'n oil depot lian tak Bairabi leh Sairang-a ruahmanna an nei te hi a lawmawm a. Hetianga kan intodelh phawt chuan leh, harsatna reilote chhunga kan tawh lo a nih chuan, 'Mizote hi kan dawih ngai lo ang' tih ka ring a ni.

Demand No. 35 - Fisheries Deptt. Ah hian Pu Dy. Speaker, sangha hi Mizote chaw tha ber emaw, kan chaw duh ber chu a ni lova, mahse hriselna avangin kan duh chho tan viau a ni. Ropui ka tih em em chu - Delhi-a kan awm laiin kan Minister zahawm tak hian central-a fisheries minister a hmuhnaah ka va tawiam ve a, chutah chuan, 'fisheries ponds-approach road min pe rawh' a ti a ni, Central Minister leh Minister of State te, Secretary leh Joint Secretary te an awm laiin. "Chutiang kan nei ngai lo" an tih chuan, "Mizoram chu a danglam a lawm" a ti a; "rural connectivity-in chu chu a thlang na nge" tia an zawnha chhangin kan Minister chuan, "tlang ramah kan cheng a lawm; kan fisheries hmunte chu hmun hniamah a awm a, a lakchhuahna tur atan Mizoram-ah chuan sangha tuikhuah-approach road kan mamawh a ni" a ti a. A tawpah chuan, 'project rawn siam rawh u' an ti a ni.

Minister fel tak tak kan nei a, *nachang* an hriatna hi Mizoram-in kan vanneihpui mek a. Chuvangin, kan Minister zahawm tak tak pathumte demand hi ka support a ni e, Pu Dy. Speaker.

DEPUTY SPEAKER : Member zahawm tak Dr. B.D. Chakma ka sawm e.

PU B.D. CHAKMA : Pu Dy. Speaker, nang leh kei hi district khat, chhim lam ve ve kan nih avangin hun min pek belh ka beisei a. Ni khatah Minister pathumte demand minute 10 zela sawi chu a har dawn khawp mai a. Ka ngaihtuahnaah chuan

opposition member ten thu tam tak an sawi theihlohna turin hetiang hian nikhatah minister pathum demand sawi rawtna a awm em maw ni ka ti deuh a.

Engpawh ni se, Demand No. 7-ah lut ila. Excise & Narcotics hi, hei MLTP Act, 2019 hi a fail a ni tih clear-cut example chu – *Rangvamual* hi a ni. Delhi atangin emaw, Mizoram pawn lam atangin mikhual leh VVIP tam takin Mizoram an rawn luh hian Rangvamual vel hi hmuh a hreawm hle thin a ni. Scooty leh four-wheeler tam lutukin traffic jam a siam thin a. Central Minister lo zin te pawhin, ‘hei hi engnge a awmzia, Pu BD’ tiin min zawt thin a, kei chuan short cut deuhin, ‘hei hi chu huaisenna damdawi hmunpui, *Rangvamual* a nih hi’ tiin ka chhang thin a. Chuvangin, traffic jam awmlon nan a kawng hi tihzau ni sela; anih loh pawhin by-pass awm thei se, Rangvamual hi paltlang lo ila a that zawk ka ring a ni; pawnlam atanga mikhual lo zinte tan hmuh a nuam lo a ni, Pu Dy. Speaker. Mahse, hei hi department lam tih dikloh a ni lova, sum awmlon vang a ni. Kuminah pawh Pu Dy. Speaker, en ila, RE leh BE a ngai renga dah a ni a, engmah pung a awm lova. Chutiingin, *Police Reward* ah pawh engmah dah a awm lova. Police ten ruihlo emaw an manin, a mantu chawimawina ‘reward’ sum tur engmah dah a ni lo a ni.

Chu bakah hnathawktu pawh an tlem si a, Excise & Narcotics thilah hian Mizoram chu control a har hle a ni. Nitin chanchinbu headlines-ah te pawh, ‘heroin chutizah chu man a ni; ephedrine eng emaw zah man a ni’ tih te kan hmu thin a ni, Pu Deputy Speaker. Chuvangin, MLTP Act leh Rules hi a *fail* a ni.

Tin, Demand No. 29 - Social welfare ah kal ta i la. (*Pu Zothantluanga, hon. Chairman-in Chair a la a.*)

CHAIRMAN : Aw le, sawi chhonzawm rawh le.

PU B.D. CHAKMA : Social Welfare-a *Other Charges* hnuaiia sum dah hi a tam riau mai a, ‘₹46,54,38,000’ tih kha khawngaihin Minister zahawm takin nakin a wind-up hunah min lo sawifiah sak se la; *Other Charges* hnuaiia dah hi a tam em mai.

Engpawh nise, Social Welfare hnuaiiah hian sawi tur tam tak a awm a. A pawimawh pakhat chu - Old Age Pension leh eng emaw sum kha hmuh har thin khawp mai a, a hun takah pek a ni ngai lova, a sum tlem tham viau mahse. Chuvangin, kum lama upate hian tanpuina an dawn tura hi a huna an dawn theih na turin kan Minister zahawm tak hian hma min laksak se ka duh hle mai.

Tin, Demand No. 34 - AH & Vety chungchangah nichin lawkah lehkha kan hmuh bel leh a. Beneficiaries pangnga ten poultry production atan ₹15,000/- vel an dawng thei tur hi House kal tlangin lawmthu ka sawi a. Tin, Animal Ambulance chungchangah hmana central minister lo kal khan Block tinah a pek tur thu kha a sawi a. Chutih laiin

Chawngte RD Block chan tur hi an la dah tha nge, kan la hmu miah lova. Khawngaihin kan Minister khan hei hi a lo sawifiah thei se.

Tin, Demand No. 18 - Printing & Stationery-ah hian kum tin cheng nuai 100 vel dah a ni thin a. Tin, “suspense” tih wording hi engnge a awmzia khawngaihin min lo hrilhfiah bawk se. Sorkar hmasaah pawh khan Printing & Stationery Minister Pu C. Ngunlianchunga khan department te hnenah khan Stationery sales outlet atangin an office mamawhte dawr ve turin ngenna a siam a. Ka hriat dan chuan, an dawr theuh thin a, kei ngei pawhin kan dawr ve thin a, paper te pawh a man a tlawm zawk a. Chuvangin, keini MLA zahawm tak te pawh hian Printing & Stationery Sales-outlet hi dawr ve theuh turin ka ngen a ni.

Tin, Demand No. 20 - School Education ah hian sawi tur tam tak a awm a, mahse hun hi a chep lutuk a. Engpawh nise, SEDP teacher hian thla khatah ₹10,000/- chauh an hlawh a. Anni hi training tura rawtna a awmin ka hria a. Chuvangin, Pu Chairman, SEDP teacher-te hlawh tihpun dan hi awm thei se ka ti khawp mai.

Pu Chairman, ka bial hi a zau a, khaw 88 lai a awm a. Mahsela, matric exam centre hi Chawngte-ah chauh a awm a. Borapansury lam, feeder school pathum awmnaah hian a dang pakhat min dah sak turin ka ngen duh a, mahse nakumah term a tawp dawn si a. Next-ah hian sorkar siam kanin beisei loh pawhin, kha kha chu advance in ka ngen duh a ni. (**Chairman:** Minute khat i la nei e.)

Tin, Demand No. 17 - Food & Civil Supplies-ah pawh sawi tur tam tak a awm a. Thil pakhat, (bial dangah a awm nge, awm lo chu ka hre lova) engmah hriatpuina awm lovin BPL atangin APL-ah; APL atangin BPL-ah, khatiang khan kan peng zel mai a. Pu Chairman, khatiang tihtheihna Dan kha a awm em? Nikumah BPL-ah an awm a, a kum lehah APL; kuminah APL a nih chuan, kum lehah BPL. Kha kha engnge a awmzia, kan Minister chak tak hian min hrilhfiah thei se.

Tin, Borapansury kudam hi a area-coverage a zau hle a. Thil mak deuh mai chu - mi pakhat hi *All-in-One* in a awm a; chowkidar a ni a, store-keeper a ni bawk a, Scaleman a ni bawk a; hna pathum hi mi pakhatin a thawk a ni. A buaithlak hle mai. Kan store-keeper hian Haulawng nen min kawp a, Haulawng chu *khithah*, ka bial chu *khutah*; a indaihlo lutuk a. Chuvangin, full time store-keeper hi min dah sak ve se kan lawm hle ang tih kha ka sawi duh bawk a ni.

Tin, Fisheries Department chungchangah, *chakai farm* kha chu kan sawi ve lo mai ang a, mahse, a *fail* tih kha chu a chiang a. Pu Chairman, ka bial Udalthana khua hi Chawngte hnaivaia awm a ni a. Fisheries Deptt. hnuvaia fish-seed production chungchangah hian private entrepreneur pahnih pathum chu an awm a. Khawngaihin, State hnuai atang hian *Fish Seed Accreditation* an nei thei ang em? Anrawn dil ang a,

kan minister hian a lo ngaihtuhsak theih chuan a lawmawm hle ang a. Southern Zone-ah hian anni hi fish-seed supply thei dinhmuna ding anni tih kha ka sawi duh a ni.

Eng pawh ni se, he budget hi duhthusam ni lo mahse, support loh theihloh a ni a. Chuvangin, rilru nuam lo takin, he demand pathumte hi ka support e. Pu Chairman, ka lawm e.

CHAIRMAN : Dr. ZR Thiamsanga i lo sawm ang.

DR. Z.R. THIAM SANGA: Pu Chairman, ka lawm e. Vawiin hian kan Minister zahawm tak tak pathuamte - Er. Lalrinawma, Pu Lalchhandama Ralte leh Pu K. Lalrinliana te demand kan han sawi ho hi lawmawm ka ti hle a. Department-a demand zawng zawng ka rawn sawi kim thei dawn lova, ka rawn sawi lo anih pawhin kan minister-te in department chan theuhah in thawk tha hle a ni tih ka rawn sawi hmasa a.

A hmasain, Demand No. 7 - Excise & Narcotics Department hi an pawimawh khawp mai a. Kan ngaihthlak angin staff an in daih lova, chuti chungin theih ang tawkin chhun zan zawmin hna rim takin an thawk a ni. Ka bial chhungah pawh kumin kal ta khan heroin cheng nuai 1607 hu zet a man a ni. Staff an in daih lova, lirthei pawh an indaih lova, mahse theihtawp an chhuah a. A changtu minister leh department te an an thawkrim hle a, an fakawm hle a ni tih Pu Chairman, ka rawn sawi duh bawka a ni.

Mahni bial te a sawi loh theihloh a. Champhai khi Indo-Myanmar border-a awm a nih avangin, damdawi rawn tawhlhuhna hnar ber a ni a. Tunah khian Excise office te, staff-quarters te kan nei tha lo khawp mai a, hei hi kan Minister-in min lo hriatsak se ka duh khawp mai. Tin, eng emaw thut thlena vei-vahna tur two-wheeler tha tawka min pe thei se bawka se.

Thil pakhat ka sawi loh theih loh – Grape-wine Rules min rawn pe ta hi lawmawm ka ti a, ka bial chhunga kut-hnathawkte sorkarin a ngai pawimawh zia a lang a ni. Sorkar hmasaah *total prohibition* avangin kan grape huan zawng zawng chul ram chang tawh hnu kha MNF a lo sorkar a, mipuiin eizawn nan grape an han ching chho leh ta a; tunah grape-wine rules min han pe leh ta a. Chul ram chang tawh kha nikum chhung pawh khan grape nuai tam tak man an hmuchhuak a, lawmawm hle a ni. Champhai leh Hnahlan tlang dung mai nilovin he sorkar hian kuthnathawktute hi a ngai pawimawh a ni tih hi Pu Chairman, a lang a ni.

Tin, Demand No. 29 - Social Welfare Department-ah hian, sorkarin department pakhat kha directorate pahnih - Social Welfare & Tribal Affairs Deptt. leh Women & Child Development Deptt-a then a ni a. Staff erawh chu an indaih lo khawp mai a, hei hi kan ngaihtuah deuh chu a ngaiin ka hria. Tin, ICDS hi, naupang kum 6 hnuai lamte hi tha taka kan enkawl chuan, an puitlin huna thluak tha tak an neihna turin tamtakin a

lo thawk tawh a ni an ti a ni, mithiam ten. Chuvangin ICDS - Anganwadi Centre te hi kan ngai pawimawh a tul a. An thawk tha a, kan naupangte school tak tak an tan hmian Anganwadi centre-ah hian an lo enkawl thin a ni. Chuvang chuan, tuna Anganwadi centre kan neihte hi sum harsatna avangin building repair te a lo ngai a, worker te pawh an lawmman te bei tham viau mahse, theihtawp an chhuah a. Chuvang chuan, Anganwadi building repair emaw, a sakna te pawh hi tih theih dan awm se, kan Minister hian minlo chhinchhiah sak se ka duh khawp mai.

Tin, Social Welfare hnuai hianin tunhma khan wheel chair te, hearing aid te, zakdawh tiang etc. te pekchhuah a ni thin a, tun hnuah hian a harsa ta deuhhleik a. Hei hi kan mamawh a ni tih kha kan minister khan min lo hriat sak leh se ka duh khawp mai.

Tichuan, kan bial – Champhai-ah khian Women & Child Development hnuai DPO leh CDPO te hian anmahni pualin office an la nei lova, tunah hian mi in an luah a. Hei hi *Article 275* hnuai emaw atangin tih sak dan a awm lo maw tih kha ka zawt nghal duh a. Tin, Social Welfare Deptt-in Conservation Hall keimahni district ngeiah minrawn sak sak a, kan lawm takzet a ni.

Demand No. 34 - Animal Husbandry & Veterinary Deptt. ah hian, kan bial chhungah Veterinary Hospital minrawn sak sak a, sawi sen lohvin hna minrawn thawh sak a ni. Hei, Kothari Commission hnuai piggyery under national life stock, piggyery farming, rural backyard poultry te leh FOCUS hnuai mithun shelter te, grazing area leh pig-breeding te minrawn tih sak a kan lawm takzet a. Amaherawhchu, kan bial khi tunhma pawha ka lo sawi tawh angin sial-vulhna hmunpui a ni a, Tualcheng te, Murlen te, Rabung te, hmun tha tak tak a awm a. Chuta kan mamawh chu barbed-wire hi a ni a, heng hi min supply thei sela chu kan duh khawp mai.

Tichuan, tunhnaiha khan kan Chief Minister zahawm tak khan Mobile Veterinary Unit - Ambulance 26 lai mai Ni 2.2.2023 khan min han vai-liam sak a, a lawmawm hle a. Hei hian kan ran hriselna tur, mobile-in an han kal ang a, hri leh eng emaw harsatna lo awm pawh ni se an vei zung zung theihna tur min han ngaihtuhsak hi a lawmawm kan ti khawp mai a, sa thianghlim kan han ei chho thei tawh dawn a ni. Tin, hei, ran hri leng lo phei se chu Mizoram-ah hian vawk te, bawng te pawh hi kan intodelh theih deuhthaw tawh a ni mai a, theih tawpa Veterinary Department ina hma an lakna hi a lawmawm ka ti hle a ni.

Tin, Education Department hi a lawmawm a, fak loh theihloh dinhmunah a awm a. Tun hmaa kan education dinhmun kha kan hria a, ‘world-class education’ kan ti a, amaherawhchu school tam tak chu defunct ngai khawp khan an awm chho ta a. Amaherawhchu, nichina kan ngaihthlak tak ang khan SEDP teacher eng emaw zat, MR teacher eng emaw zat, tin, NABARD hnuai te, leh thil dang dang hnuai school

repair tam tak te kan han nei a, sak thar te tam tak a awm bawk a. Tunah chuan sorkar school zirlai admit tur hmu lo thin khan zirlai admit senloh kan hmu tawh a ni. Pu Chairman, he sorkar hian education hi a ngai pawimawh hle tih a chiang a ni.

Tin, he department budget pawh vaibelchhe 69 laiin nikum ai khan a tam a ni. He sorkar hian thalaite education lama hma an sawnna tur, dawmkanna tur hi a ngai pawimawh a. MYC coaching centre din te bakah tunah pawh hian kan hriat angin mi pahnih chu UPSC- main exam an paltlang a, result tha tak nakinah an neih pawh kan beisei a ni. Chutiang chuan hma kan la chho mek a, a lawmawm hlein ka hria.

Tin, LESDE hnuaiah pawh thalai eizawna nei lote'n eizawna an hmuh phah a, hna tamtak an rawn hauh chhuak a ni. Hengte pawh hi tunhmaa kan hriatloh kha tunah chuan kan hre thar ta a.

Tin, ka bial chhungah hian khawvel pian tira ta kan la beisei ngai loh leh kan neih ngai loh Rabung Higher Secondary School SAMAGRA hnuaiah sorkarin min han pe hi, ka bial Rabung khua hi chuan he sorkar bakah a changtu Minister leh a department hi an theihngilh tawh dawn lo a ni tih hi ka sawi duh bawk a ni.

Pu Chairman, hei, budget te pawh tlemin a lo tam ta a, kan Chief Minister-in School Education a ngai pawimawh bawk a, school upgradation te pawh 'kan nei maithei' tih te pawh a awm a. Kan bial chhunga Hnahlan High School te pawh khi hman lawkah school upgrade-na tur te min han pe a, room te pawh min tihzauh sak a; amaherawhchu, tunah hian kan leng lo a ni. Nakinah chuan upgrade tur te pawhin kan beisei a ni. Tin, thingtlangah pawh high school te a awm ve a, heng school-te pawh hian building an nei loh chuan class an kal thei lo mai dawn a ni. Chuvang chuan, ka bial - Vaikhawtlang, Khuangphah, Neihdawn-a school te pawh hi upgrade ngai leh lumpsum a han pek ngai te pawh a awm a, khangte pawh kha ka han sawi duh a ni.

Tin, Printing & Stationery-a kan revenue collection - printing work atangin cheng nuai 81 chuang kan hmuchhuak hi a lawmawm khawp mai a. A hmain nuai 93 an hmuchhuak tawh bawk a, kan hmang tangkai tan ta hi a lawmawm takzet a. Tin, an hnathawh pawh hi a tha a, letter head note-bu an siam te pawh a chhuanawm khawpin ka hria a ni. Chuvang chuan, department – Govt. stationery sales outlet la hmang tangkai lo zawng zawngte leh private-te pawh hian, sorkar Printing & Stationery kan nei hi a tlawm si a, kan hman tangkai ve te pawh hi a pawimawh khawpin ka hria a ni.

A tawpna atan chuan Pu Chairman, Food & Civil Supplies Deptt. hi an thawk tha si a, ka sawi loh chuan zaninah hian ka mu thei dawn si lova. Mizoram-in hun khirh tak kan tawng a, khatiang hun hreawm, hun khirhkhan, ramri buai nen kan eizawna hnar kawng min lo chhut chah sak a, khatiang chung a ei leh bar leh gas supply

hnianghnara kan awm te hi ‘engvang nge?’ kan tih chuan, he kan sorkar leh kan minister te, a thawktute hi anni. Chuvang chuan, fak turte chu i fak mai ang u.

Chakai project an han siam a, an han ti dawn dek dek a; a thawk tha te hi fak ve mai ila. Chuti lova, member zahawm takte kan insawi chhe ringawt thin hi chu, Pu Chairman, a dik lovin ka hria. Fak tlak te chu i fak ve ang u. Kan LAD Minister hian VC house pawh eng emaw zat min siam sak a, eng emaw zat min repair sak a, thil tam tak Mizoram chhungah pawh hna an thawk a ni. Ka bial chhungah pawh thil tam tak min sak sakin, min repair sak tawh a, min la sak sak leh turte pawh a la awm a ni. Thingtlang tan hian he sorkar hi a chhenfakawm a, he sorkar hnuaiah hian VC leh zel te pawh hi kan duh reng a ni.

Chuvang chuan, he kan Minister pathum-te demand hi tha ka ti a, pass ngei turin ka rawn thlawp a ni e. Ka lawm e.

CHAIRMAN : Tunge sawi leh ang le? Er. Lalzirliana.

ER. H. LALZIRLIANA : Pu Chairman, vawiinah kan Minister zahawm tak tak te demand sawi theia ka awm hi ka lawm hle a. Vawiina kan demand sawi hi 8th Legislative Assembly-a kan sawi hnahnun a lo ni ta zel a. A figure kan han en chuan, duh a khawp lo vek mai a. Amaherawhchu ka sawi fo thin, sorkar leh mipuite, department te pawhin rilrua kan dah thin tur chu – ‘keini State te tan hi chuan budget ropui tak pharh a harsa’ tih hi kan kutzungpui tluka kan hriat chian a ni a. Chutih mek laia pawimawh em em chu - kan neih ang chhun chhunah *optimum utilization of resources* bakah *revenue generation* leh *unnecessary expenses* cut-off hi keini State te chuan kan kalpui reng tur leh kan rilrua kan hriat reng tur niin ka hria

Vawiinah department hrang hrangte demand hi ka sawi vek seng lo ang a, ngaih-pawimawh zual te leh thil tula ka ngaih ve te ka sawi-lang ang a, lawmthu sawina tur pawh tam tak a awm a ni.

Education Department-ah hian ka tan ang a. A hmasa berin lawmthu ka sawi ang a.

Mamit Govt. Higher Secondary School chungchanga kan lawmna em em chu - Science leh Commerce zirna min pe a, tunah khuan batch hmasate an chhuak tan a. Chutihrualin Science leh Commerce te awmna tur hostel kan sa mek a, session thara luah theih mai tur a ni hi lawmthu ka sawi hmasa a. Chutih lai karah chuan department leh a changtu minister ngei te pawhin min hriatpui – Mamit District chhungah hian govt. higher secondary school pangngai hi pahnih chiah kan nei a, Mamit leh Rawpuichhip-ah; a dang zawng chu Govt. Adhoc Aided te, lump-sum Aided te, private school te an ni a. Tin, private pawh la tling pha lo school Khanthum hi Bru khua a ni a, in 70 vel

awmna a ni. Hetah hian School tak ngial pawh kan la nei lova, Non-Special Residential Training Centre (NSRTC) kan nei a. Chu chu theih ang angin zirtirtute leh an school kal hram hramna tur te vawiin thleng hian kan la ngaihtuah a, ruahmanna kan han siam a. Serhmun khua an rauhsan tak atang hian primary leh middle school hi hetilaiah hian min sawn luh sak thei se tih department leh a minister hnenah te kan thlen a. Tunah hian hmalak mek a niin ka hria a, lawmawm ka ti a. Hei hi arang thei anga min tih hlawhtlin sak theih chuan kan lawm hle ang tih kha ka sawi duh a.

Tin, lump-sum Aided-a awm mek Dampui High School Adhoc Aided-ah dah tura ka ngenna te, Hmunpui High School Adhoc Aided-a awm provincialized tura ka ngenna te, tin, heng private school - Tuipuibari Private High School, Lengpui Higher Secondary School, Lengte High School te hi Samagra hnuaiah dah tura ka ngenna te, West Serzawl lump-sum hi Adhoc Aided dah tura ka ngenna te, Rawpuichhip High School Higher Secondary School-ah upgrade tura ka ngenna te hi min tih hlawhtlin sak hram turin ka han ngen leh a ni.

Labour & Employment hi kan duh ang hian Mizaoram mipuite hian kan la hmanh tangkai tawh lova, a nih tur ang hian kan la hmanh tangkai tawh lo niin ka hria a. Pakhatnaah chuan - awareness level a hniam em em a. District Capital-ah tal hi chuan District Office hi hawn dan a awm lawm ni tih kha kan Minister-in min lo hriat sak sela.

Tin, Excise & Narcotics chungchangah hian khawchhak lam atanga an rawn chhuah thlak; Champhai te rawn kaltlang vek tawh; motor tha pui puia an rawn phurh Tripura lama tlang tam tak a awm a ni. Tam tak chu an man a, tam tak man loh a awm bawh a, chu chu a let zawngin a rawn lut ve leh thung a. Champhai lam atanga rawn chhuk thla hi chu a *pure* hmel a, khi lam atanga rawn pawlh-dal tawh Mizoram lama rawn lut leh hi chu *spurious* a ni tawh a, hriselna atan pawh a hlauhawm a. Amaherawhchu, a rawn lut nasa em em a ni. 'Khawchhak lam' kan tih ka tih lai hian khawthlang lam atang khuan nasa takin a rawn lut a ni tih hi kan Minister leh department ten min hriatsak ula. Manpower indiahlohna te a nasa hle tih kan hria a, SEDP atang te emawin provisional employee han lak belh dan te hi awm sela, tih ka ngenpui bawh a. Mamit - District Capital-ah khuan Excise Department hian ram a nei a, a neihna a rei tawh mai a, vawiin thlengin hmalak a awm lova. (*Dy. Speaker-in Chair a la a*).

DEPUTY SPEAKER : Sawi chhunzawm rawh le.

ER. H. LALZIRLIANA : Pu Dy. Speaker, Excise Department tena kan hmunhma neih khu hmalak thuai tumna a awm em? A nih loh chuan, khawthlang mipuite in pe let leh thei ang em? Development eng emaw hma han lak nan kan duh khawp mai tih te kha min han hriat sak sela.

Social Welfare hi, ka bula thu Pu Thiama sawi kha ka thlawp khawp mai a. Hearing Aid te, Wheel Chair te hi MLA fund tam tak kanin sensona a ni tlat mai a. Tunhma a khatiang awm thin kha, “tunhnuah a awm leh theih dan te a awm em?” tih te kha ka han zawt pah ni sela.

AH & Vety-ah hian nasa takin kan bial chhungah te hma lakna awm a. Vawk-vulhna phei chu Lengte leh Nghalchawm te hi *cluster area* niin vawk farm lian tak mai, vawk sangkhat chuang vulhna a awm a. Amaherawhchu, hripui avangin khang zawng zawng kha an thi a, tunah hian bul an tan chho leh mek a. Nasa zawka hei hi enkawl leha, mithiam VFA te nen mumal zawka han tih that leh ni sela tih kha kan advise duh bawk a ni.

Tin, Food & Civil Supplies-ah hian a changtu minister leh a department-a thawk zawng zawngte fak an phuin ka hria a, hemi chungchangah hian. Harsatna namen-lo karah pawh an tih tur mai piahlamah an tih tur bak mipuite avangin nasa tak an ti niin ka hria a. Ka bialchhungah hian DCSO Office kum 2019, kan han sorkar tirh khan thliin a len tlu tawp mai a, office nei lovin, baihvai takin an awm a, vawiin thleng hian DC complex-a anmahni office tur ni lovah an la thu a. Amaherawhchu, kan Minister zahawm tak hian sum awm awm pawt khawmin, tunah khuan luah theih tepin a awm a, kan lawm khawp mai a, lawmthu kan han sawi ni sela. Chutih rual chuan, tunah a furnishing an khawih tan a, duh ang taka perfect lohna lai te leh, a furnishing chungchangah te duh thu kan han sam a, chung chu min han enpui leh ta sela kan ti a, DCSO quarter thar te pawh min sak sak dawn niin kan hria a, lawmthu ka sawi bawk a ni.

Tin, kan sawi fo thin Legal Metrology, Mamit hi vawiin thleng hian mumal takin an la function lova. Inspector kan la nei lova, tunah hian Grade-IV in office hi a luah a, engmah hmalakna leh han function mumal a la awm lo a ni. Hei hi khawngaih takin tun ministry chhung ngei hian mumala function thei turin Inspector leh a tul ang angte min han ngaihtuah sak sela tih hi kan dilna ni bawk sela.

Ka bialchhunga khaw 5 - Dilzawl, Khanthum, Tuipuibari Venghlui, Chi Lui, Saitlaw, Tlangkang te hi head load-a supply lak a ni a, retailer-te hian head load-a an bill tur ang hi an hmu lo niin kan hria a. Hei hi min lo check chian sak sela, anih tur anga an khua ngeiah an lak theihna turin ruahmanna min siamsak turin ka ngen bawk a.

Tichuan, LAD hnuaiyah VC House tam tak min sak sak hi kan lawm a, a ho hian Mamit-ah *LAD Park* kan hawng a, kan hawn kha a ngaiin a la awm ni deuh berin a lang a. Covid te a lo ni leh bawk nen, kei pawhin ka la tlawh leh chiah lova. Hei pawh hi mumal zawka improve-na tur ruahmanna min siamsak theih chuan kan lawm ngawt ang.

Tin, sawi lan loh theihloh Tuipuibari leh Rajiv Nagar khu, Tuipuibari-ah khuan monsoon stock ngei ngeiin a ngai a, kan kudam khu a te a, community hall kan neihah khuan an dah nghuk reng mai a. Mahse, 'hei hi kan hman ve a ngai tawh' kan ti a, eng tin tin emaw kanin lakchhuah tir a, kan hall te chu 'hall' a nihna ang te chuan kan han hmang ve a. Amaherawhchu, an kudam khu a te a, Rajiv Nagar khu 'Tuipuibari-II' tih thin a ni a, khutah khuan a unit angin emaw, anih loh pawhin *main centre*-ah khu aia liana kudam min sak sak theih chuan kan lawm ngawt ang. Keini hi *aspirational district* kan ni a, a bialtu MLA-te hi aspirational hmel kan pu lo mai zawk a; 'ngaihtuah bik ngai kan ni e' tih kha min hriatsak turin kan ngen a ni.

Vawiina kan Minister zahawm tak takte demand hi ka thlawp a, pass ngei turin ka ngen a ni e. Ka lawm e.

DEPUTY SPEAKER : Member zahawm tak Pu KT Rokhaw ka sawm e.

PU K.T. ROKHAW : Pu Dy. Speaker, Demand No. 20 - School Education hi ka han sawi phawt ang a.

Mizoram-ah hian teacher indaihlohna a nasa em em a, ka bialah phei chuan SEDP teacher lak hma phei kha chuan Govt. high school-ah teacher pakhat te kan nei a, a thenah pahnih te, a thenah phei chuan teacher an pension vek a LDC pakhat chiah kan neihna hmunte pawh a awm a. Chutiang anih lai chuan kan School Education Minister leh a department ten SEDP teacher la turin ruahmanna an rawn siam a, a khaw neitu ngei teacher-a la tura tih a ni lehngal a; ka bialah pawh teacher 2-4 te kan nei ve thei ta a, ka lawm hle a ni. Govt. high school hi pasarih vel kan nei a, Adhoc Aided nen phei chuan sawm chuang an ni a. Tunah SEDP teacher hi lak ni lo ta se chuan, ka biala high school te tan chuan kal ngaihna a awmlo reng reng a ni. Tichuan, kan Minister ka han ngen duh chu - tunah pawh khian kan indaih lo em em a; a thenah chuan MLA fund atangin teacher te kan ruai a ni. Engpawh nisela, SEDP teacher hi lak belh leh theih ni se ka tih kha. Zirna hi a pawimawh a, an la leh anih pawhin, thingtlang lam hi duhsak ni sela. Tin, a theih phei chuan an khaw mi ngei ni thei se tih kha. Aizawl mite, Lunglei mite thingtlangah in lo dah a, a thenah chuan an lo join a, kar hnih-khat an awm a, an hmel hmuh zawm tur a awm tawh reng reng lova, thla hlawh lak hunah DEO Office-ah an rawn lang leh chauh thin a ni. Chuvang chuan, kan minister ka ngen duh chu - lak leh anih pawhin, a khaw mi ngei duhsak ni se a lawmawm ngawt ang.

Tin, SEDP teacher-te hi a tlangpuiin mithiam B A B. Ed. te an ni a, chuvang chuan SEDP teacher atana rawih tawhte hi chu *contact basis* tala tih theih a ni se a lawmawm ngawt ang.

Tin, Pu Dy. Speaker, Samagra hnuai ka bialah hian school pahnih New Laty leh Lopu-ah min din sak a, kan lawm khawp a. Tunah hian a building kan nei lova, teacher

quarter kan neilo bawk a. Khawngaihni quarter te chu a theih rih loh anih pawhin school building changtlung tak min din sak turin ka ngen a ni.

Tin, NABARD sum hmanga Mizoram hmun hrang hranga school te thuam that leh sak that anih mek laiin ka bial Palak-ah chuan sak that leh thuam that pakhatmah a la awm lova. Chuvang chuan, kan Minister hnena ka ngen duh chu - Adhoc Aided high school - Tisi High School te, Siata High School te hi Assam type a ni a, a building hi a chhe tawh khawp mai a, a thara min sak sak turin ka ngen a. Tin, Zate Memorial High School, Chapi a mi hi kan minister nen campaign lai khan kan en dun tawh a. A building chu concrete a ni na a, a chhe tawh lutuk a. Khi khi Pu Hiphei Memorial a tana a pa hminga kan din a ni a, khawngaih taka khi building khi min sak that sak hram turin ka ngen duh bawk a ni.

Tin, Pu Dy. Speaker, Tipa-V Centenary Higher Secondary School upgradation chungchang hi ka han sawi leh duh bawk a. Hei hi lumpsum Grant-in-Aid a ni a tunah khian, Adhoc Grant-in-Aid ah min hlankai sak hram turin ka ngen a. He higher secondary school hi Palak bialah chuan kan neihchhun tak tak a ni a, tunah khian feeder-school ringawt pawh high school 18 lai kan nei a ni. Tunah khian School naupang 200 vel kan nei a, building, facilities leh campus changtlung tak kan nei tawh a, kan mamawh ber chu Adhoc Grant-in-Aid hi ani e tih kan sawi duh bawk a ni.

Tin, Pu Dy. Speaker, Demand No. 17 - Food, Civil Supplies & Consumer Affairs hi han sawi leh lawk ka duh a. Siaha leh Kawlchaw ah hian supply kudam kan neih thatloh avangin hmundang kudam nei thate angin buhfai kudam-a kan dah hian, *first in, first out* kan ti thei lova, dah hmasak a piang a kil lama dah a nih avangin lakchhuah lehngal kha a har tawh thin a, buhfai dah chhiat palh a hlauhawm em em a ni. Hei hi a chhan chu - a building a tet em vang a ni. Chuvang chuan, Siaha lama buhfai min pek tur hi chu a theih hram chuan FCI buhfai ni hram sela, FCI buhfai hi chu *treated-rice* ani a, rei fe kan dah pawhin a chhe maim ai lo a ni. Tuna kan sem ang open-market rice emaw, local harvest rice emaw te hi chu dah rei hian eitlak a ni tawh thin lova. Chuvang chuan, kan Minister hnena ka ngen duh chu - Siaha lam khi, Kawlchaw pawh ni se kudam kan neih thatloh avangin FCI Rice, treated rice ngei hi khawngaihni min pe thei sela, a lawmawm ngawt ang.

Tin, Siaha District-ah hian store-keeper kan nei ve nual a, ka hriatsual loh chuan paruk vel an awm a, mahse hmantlak erawh chu pahnih erh awrh chauh anni a, chu chu kan dinhmun a ni. Engpawh nise, Store Keeper lak leh turah hi chuan chhimlam hi khawngaihni min duhsak hram rawh se tih ka ngen duh bawk a ni. Tin, kudam hi nikum lam te khan pahnih-pathum min sak sak a, kan lawm khawp a. Mahse tunah hian Chapi supply centre-ah hian kan nei lova, Siata-ah kan nei lo bawk a, Phura leh Lopu-ah te kan nei lo bawk a, fur lo thleng leh tur hi kan huphurh lawk hle a ni. Chuvangin, kudam hi khawngaiha min sak sak turin ka ngen bawk a ni.

Tin, Pu Dy. Speaker, ka han sawi leh duh chu - Social Welfare Department, Demand No. 29 hi a ni. Tipa-V ah khian *Special Central Assistance to Tribal Grant* kaltlangin tribal hostel min sak sak turin kan Minister hi ka ngen baw k a. A chhan chu - zirlai awmna tur nei mumal lo mi inluaha khawsa an tam em em a, zirlaite tan in luah hi a hautak baw k si a. Chuvangin, Girls' Hostel min sak sak turin ka ngen duh baw k a.

Tin AH & Vety Siaha District-ah hian Animal check-post leh clinic centre sak tura ruahmanna khuate - Lobo, Zyhno, Siasi, Phura leh Lopu-ah te hian, a ranglama thaw k thei turin hma min laksak turin ka ngen baw k a ni.

A tawpna atan Excise & Narcotics Department hi tlem han sawilan ka duh a. Zu kan khap a, mahse Aizawl leh Mizoram-ah hian zu in tur a tam em em tho mai a. Hei hi Excise Department thaw h thatloh vang ni lovin, an indaih ngang lo a ni; enforcement an indaih ngang lova, tihngaihna a awm lo a ni. Chuvangin, Zu-khap (total prohibition) hi a hlawhtlin kan duh a nih chuan, enforcement lam hi sorkar hian a ngaih pawimaw h a ngai a ni. Tuna Excise Constable Mizoram puma kan neih hi 200-300 erh-awrh chauh anni a, total prohibition tihlawhtlin ngaihna a awm thlawt lo a ni. Chuvangin, total prohibition tihlawhtling tur chuan, excise enforcement kan thumthat a ngai a ni tih hi Pu Dy. Speaker, ka sawi duh ani e. Ka lawm e.

DEPUTY SPEAKER : Member zahawm tak Pu C. Lalmuanpuia ka sawm e.

PU C. LALMUANPUIA : Pu Dy. Speaker, vawiinah kan minister zahawm tak tak pathumte demand kan sawiho thei hi a lawmawm ka ti a. Hetianga sawina hun tha min petu Pathian hnenah lawmthu ka sawi a ni. Minister zahawm tak tak pathumte demand anih a vangin chipchiar takin ka luhchilh hman dawn lova, ka han sawi zawr zawr ang a.

Pu Dy. Speaker, Demand No. 7 - Excise & Narcotics Department hi member zahawm tak takte khan an rawn sawi nual tawh a. He department hi lian lo anga lang, department pawimaw h tak a ni a, '*kan ram min tiralmuangtu; ruihhlo laka min vengtu*' ti te pawhin kan sawi thei awm e.

Kha, member zahawm tak tak ten an sawi a, an buai tur zia ka ngaihtuah a. Ruihhlo khati zat kha lo man lovin kan ram chhungah hian han darh ta se, 'engtiang takin buaiin awm ang maw' tih hi ka ngaihtuahnaah a lo lang a. Chutah chuan, he department hi pawimaw h tak ni siin an indaih lo em em a, 'thumthat a ngai a ni' tih kha ka thlawp a. He department hi kan khawtlang a lo nawm zelna tur atan thawhhlaw k tak a nih avangin, 'thawmthat ngaite thawmthat ni se' tih kha ka rawn rawtpui baw k a ni.

A pahnihnaah chuan, Demand No. 29 - Social Welfare Department hi department pawimawh tak niin ka hria a, raipuar a tangin an buaipui a, hetah Anganwadi leh ICDS; chutah tleirawl an buaipui a, pitar-putar - old age pension thlengin. He department hi department hlu tak leh engkim min huaptu a ni a, a pawimawh em em a.

He department hi kan tangkaipui khawp mai a, keini pawh kan bial chhungah khu *Protective Home* kan nei a, khu khu vawikhat chu ka zuk tlawh a, Rohingya raltlan zinga mi an lo man te, human-trafficking lampanga an lo man te ka zu hmu a, enkawlna a tha khawp mai a. Tin, nunphunga harsatna tawkte enkawlna a ni a, an hmalakna a ropui ka ti a, fak an phu hle a ni.

Tin, kan sawi hmaih hauh lo tur chu, Jordan Centre - ruihhlo ngaite enkawlna Sethawn-a an buatsaih te hi an fakawm a, an chhuanawm hle mai a. Helamah hian tan lak sauh sauh a ngai a, thuam that zel pawh a tul hlein ka hria a ni.

A pathumnaah chuan Demand No. 34 - Animal Husbandry & Veterinary (AH & Vety) Department hi pawimawh tak a ni a. Sa eitura kan intodelhna theih nan tan latu department pawimawh tak a ni a. Tunhnaiah ASF a leng a, buai namenin an buai lova, an hmalakna hi a chhuanawm ka ti a. Theihtawp an chhuahna zarah tunah hian ASF te pawh hi a kiam tanin kan hria a, an hmalaknate a chhuanawm a, saa kan intodelhna tura tan an lakna zel turah pawh puihbawm an phuin ka hria a, tan la zel tur pawhin ka chah duh bawk a ni. Tunah chuan saah intodelh thei turin vawk thihna te pawh tunah a lo rem tan a, helaia an hmalaknaah hian an tangkai hle a ni. Tun hnai lawkah Mobile Van Unit RD Block hrang hrangah sem a ni te, kha a lawmawm ka ti a, an chhuanawmin fak an phu reng a ni tih te kha ka sawi duh a.

Tin, Sericulture hi a pawimawh khawp mai a. Kan ramah hian sericulture-a kan hmalakna hrang hrangte hi han ngaihtuah hian a source a tha a, a market a buai ve lo a ni. Chuvang chuan, sericulture department te hmalakna a fakawm a, ‘aspirational district’ kan tih Mamit district leh Siaha district lamahte pawh hmalakna a kal mek a, hengte pawh hi tha taka hma la zel turin duhsakna ka hlan bawk a ni.

Pu Dy. Speaker, Demand No. 18 - Printing & Stationery Department hi a pawimawh khawp mai a, lang vak si lo ah chuan department pawimawh tak a ni a. Vawiina paper kan hman leh confidential eng eng emaw khawihtu pawimawh tak an ni a, an khawlte pawh, nichina member zahawm tak takte sawi ang khan upgrade ngai tam tak a awmin ka ring a. He department hi te deuh anga lang, pawimawh tak si a ni a, kawng engkima kan hman tangkai anih avangin thuam chak a ngaihna lai te thuam chak a, puihbawm a ngaihna laiahte puihbawm ni se a lawmawm ngawtin ka ring a. Staff an tlem rem-rawm ai hian an thawk na hle a ni tih kha ka sawi rualin, ka fak duh bawk a ni.

Tin, School Education hi a pawimawh khawp mai a, khawvel hmasawna tak takah Mizoram te pawhin ke kan pen theihna tura kan hma chhawp pawimawh tak chu 'School Education' hi a ni a. He department hian kawng hrang hrangin hma a la a, a changtu minister leh department te an tang em em a, zirtirtu indaihlohna a nasa a; chungte phuhru tur chuan zirtirtu sanghnih-sangthum dawn mai, SEDP teacher nen te pheih chuan sangthum chuang lai anih ka ring a, heng hmasawna an han thlente hi, 'zirlaite hmakhua an ngai a ni' tih a lang a, henga hma an han la te hi a fakawm ka ti a. Tin, zirtirtu an lak dan te kha a chhuanawm ka ti; fair tak leh dik taka zirtirtu an la te kha a ropui ka ti a, fak an phu hle a ni. Tin, kaisan ngai headmaster te, principal te an kaisang a, ka lawmpui tak zet zet bawk a ni.

Tin, mahni bial chhung han sawi zel hi a tha a, vawiinah remchang ka han la ve ang a. Kan Bial chhung Edenthah high school min han din sak hi kan lawm khawp mai a, lawmthu ka sawi duh a. Kan indaih lo em em a, kan hriat theuh angin Durtlangah BSUP a chim avangin Edenthah BSUP ah te an inhnawh thla a, chutah chuan zirna mamawhna a sang em em a ni. Chungah te pawh chuan min phuhru em em a, an chungah lawmthu ka sawi a ni. Tin, Chanmari West High School sakna tur sum min han pe te hi kan lawm em em a ni.

SSA hnuaiyah hian kawng hrang hrangin ruahmanna a kal a, *free-midday meal* (chaw-chhun) kan tih te, text book te leh uniform te a free a an sem thei zel te hi lawmawm ka ti a. Tin, *bilingual - English & Mizo text book* high school mathematics leh science subject tana buatsaih a ni hi a lawmawm ka ti a, lawmthu ka sawi a ni.

Tin, samagra zirtirtute hi dah ngheh chhoh dan tur kawng awm thei sela, hengte hi an awm loh pheih chuan kan buai der dawnin ka hria a. Chuvang chuan, hengte tan pawh hian kawng eng thei sela, kawng buatsaih sak zel theih ni sela a lawmawm ngawtin ka ring a ni.

Tin, Pu Dy. Speaker, LESDE hi a pawimawh khawp mai a, Covid hriin min tihbuai lai pawh khan a contribution kha a lian em em a ni. Ration supply te pawh a free-a sem kha a niin ka hria a, he department hi a pawimawhin, fak tlak a ni. Kan han ngaithla a, Japan ramah nurse 20 zet mai kal turin an han inbuatsaih te kha an chhuanawm hle a, an chungah pawh lawmthu ka sawi bawk a ni.

Tin, Demand No. 17 - Food, Civil Supplies & Consumer Affairs Department hi a pawimawh khawp mai a, a loa kan awm theihloh department pawimawh tak a ni a, kan nitin mamawh bik min phuhrutute an ni a. Vawiinah hian harsatna lian awm lovin buhfai a ni emaw, gas a ni emaw heng zawng zawngah hian min phuhru a, harsatna awm lova kan gas mamawh dawn belh zel a ni te hi a lawmawm khawp mai a. Tin, PMGKY scheme hnuaiyah buhfai a thlawna kan han dawng te pawh hi a lawmawm ka ti khawp

mai a, lawmthu ka sawi a. Heng kaltlanga ruahmanna an han siamte hi a lawmawm em em a ni.

Tin, *oil depot* kan sawi thin a, a hmunhma tur Sihmui ah leh Bairabi ah buaipui a ni te hi a lawmawm ka ti a. Tin, LPG - home delivery bul tan niin, hmun tam takah an han ti tan te hi a lawmawm ka ti khawp mai. Tin kudam kan mamawh tam tak an han phuhru a, sak belh a ni zel te hi a lawmawm ka ti em em a ni.

Tin, Fisheries Department - Demand No. 35 hi han sawi leh ka duh a. Pu Dy. Speaker, sa thianghlimah pawh sangha pheih chu Lal Isua pawh khan a tihpun ngat kha a ni a; sa hrisel a ni a, sangha thar-chhuahna lamah hma an la nasa em em mai a, a lawmawm ka ti a. Sangha khawitute'n an mamawh ber sangha chi subsidize-a pek chhuah hi nuai 58.24 lai a ni a, a lawmawm ka ti a. Tichuan, a dah thatna tur mamawh a ni a, Ngaizel-Aizawl ah hian cold storage din tura ruahmanna a awm mek te pawh hi a lawmawm ka ti khawp mai. Tin, mini-cold storage Champhai leh Kolasib district-ah te ruahmanna siam a ni te hi a lawmawm takzet zet a ni.

Hun a tawi deuh hlek a, heng kan Minister zahawm tak tak pathumte demand ka rawn sawi chhuah takte hi a lawmawm ka ti a, pass ngei turin ka rawn thlawp a ni e. Pu Deputy Speaker, ka lawm e.

DEPUTY SPEAKER : Member zahawm tak Pu Lalchhuanthanga ka sawm e.

PU LALCHHUANTHANGA: Pu Dy. Speaker, ka lawm e. Vawiihah Minister 3 te chan department 10-te demand kan sawi a. Sawi kim theih a ni dawn lova, amaherawhchu kan sawi chhunte erawh hi chu a pawimawh viau dawn a, kan minister te pawh khan ngun takin min lo ngaihthlak sak se la a tha awm e.

A bul tan nan chuan, Demand No. 28 - LESDE hi sawi ka duh a. Ka bial chhungah ITI Training Centre a awm a, hei hi sawi tul tak a ni a. 1975 hmalama assam type building kha tun thlengin an la hmang a, a awngrawp em em mai a. Chuvang chuan, building sak tharte khu an mamawh a. Vawikhatah a vai vai chuan ti theilo mahsela, a hmatiam deuh hleka building te khu chei that a nih loh chuan a tha dawn lova. Tin, Girls' hostel hi an nei lova, Boys' hostel building pakhat an luah a, Boys hostel pawh hi a indaih lo em em mai bawk a, chungte pawh chu ngaihtuahpui an ngai khawp mai. Tin, staff-quarters hrim hrim te pawh khu thawm thata, building thar neih te pawh an mamawh khawp mai a, hengte pawh hi kan Minister zahawm tak hian min lo hriatpui se la.

Tin, faculty chungchangah hian pension an chhuak reng a, chuvangin indaihlohna a na a, heng post ruakte hi regular post-a fill-up zung zung theih ni sela.

Tin, ITI hi sorkar hmasa leh tuna mi pawh hian ‘a ngaihthah deuh em aw’ chu ka ti a. Tun thlengin training institute hi 3 chiah kan la nei a, district dangah pawh hian a hawn ve theih em, kan thalaite ei zawna atana intuai hriamna tur pawimawh tak a ni a; a hmasawn zawng te pawh hian kal tum ta ila, a thain ka hria a. Tunah hian principal nghet hi an neilo hrim hrim a. Heng training institute pathumah te hian district labour employment officerte hian an la hmui a ni a. Hengte hi principal post ngheta siam theih ni sela a duhawm khawp mai.

A dawtah chuan Demand No. 20 - School Education hi; tun tumah chuan mahni bial chanchin kha kan hriat a ni a, ka han sawi uar deuh dawn a ni.

Ka bial chhunga school hrang hrang primary school atangin kan tlawh kual thin a, school te hi an lo tlabal khawp mai a. A thenah pheih chuan building pawh kan sa hial a; chutiang khawp chuan a building te a tha lova. School kan tlawhnaa an harsatna an sawi ber chu - tun dinhmunah chuan an compound hungna (fencing) a ni a. School hung loh anih chuan a zahawm lova, a pawimawh khawp mai a. Sorkar ram a lo nih avangin, thenawmte nek an tuar nasa a. Chung fencing mamawh zual ka hnena rawn report te hi, Pu Dy. Speaker, kan Minister hian min lo chhinchhiah sak sela; ka han sawi ang e –

Mamawii Girls High School,
Kulikawn Middle School,
Salem Middle School,
ITI Primary School,
Tlangnuam Primary School-III leh,
Kulikawn Primary School te anni a.

Hengte hian compound tha tak tak an neihte hi humhalh saka, fencing tha tak han siam sak a chakawm khawp mai a. Keima fund atang chuan a harsa thin si a, kan minister khan min hriatpui sela ka duh hle a.

Tin, School buiding thenkhat ruahsur avanga inchung far, class lak mumal theihlohna a awm a, chungte chu – Tlangnuam Primary School leh ITI Middle School-te hi enpui an ngai khawp mai.

Tin, SEDP hnuai teaching-staff leh non-teaching staff an lakte mi 700 chuang October, 2022 atangin tunah hian hlawnh la thei lovin an la awm a ni a, hengte pawh hi chinfel sak vat a thain ka hria. Tlangnuam Primary School-II hi a building a awngrawp tawh khawp mai a, hei hi sak that turin DPR pawh thelut tawh niin ka hria a. Hei hi kan Minister hian min lo enpui bawk sela a lawmawm khawp ang.

Demand No. 34 - AH & Vety hi a pawimawh khawp a, sawi ka duh bawk a. Hei hi ka bial chhung Salem Veng-a awm rantalhna hmun a ni a. A panna kawng khu a tha lo khawp mai a, meter 250 lek kawng thalo deuh khu a awm a, hei hi Ran-talh

Association ten an thawm tha ve thin nain, a tha rei thei lova. Hei hi kan Minister zahawm takin min lo hriatpui sela. Tin, a thli hi kan problem tawh khawp mai a, nikhatah hian bawng 100 dawn dawn talh a ni a. A thli hi a rimchhia a, hei hi a hrisel lovin hrileng pawh a kai chhuak ang tih pawh a hlauhawm a, khulai ran-talhna hmun khu a lun viau tawh avangin enkawl zui chu an mamawh khawp mai.

Printing & Stationery hi an sawi tawh hlawm a, a tangkai tur angin kan hman tangkai lo hle niin ka hria a. Printing thilah calendar siam te, diary te sorkarin sum tamtak a senna thin a ni a. Printing & Stationery hi tihchak deuh hleka, sorkar sum renchemna atan hman theih a ni a. Chuvangin, he department hi tihchak zual a pawimawh hlein ka hria.

Demand No. 41 - Sericulture hi ka sawi thin a, Eizawna nem, hahdamthlak, hlawk tak si a ni a. Hei hi a department lam chak loh nge, mipui hian a nachang kan hrelo hle mai a, kan ram tan hian a pawimawh khawp mai a. Hmeichhe awm-nem zawk leh tar-chaklo tan pawha ei zawna hlawk tak a ni a. Hetah hian tan lak zual a pawimawh khawp mai.

Excise & Narcotics lamah hian pakai leh ta ila. District office hmun nei Aizawl leh Lawngtlai te hian building an la nei lova. Heng pawh hi an department chuan an ngai pawimawh khawp mai a. Mizoram sorkar atanga sum a awmlo anih pawhin, SASCI sum hman pawhin ngaihtuah sak theih ni sela a tha khawp ang.

Tin, Social Welfare hi tihrik ve lawk ka duh a. Ka bial chhunga Anganwadi-te ka tlawh kual thin a, Anganwadi thawktu ten an mamawh hrang hrang an lo sawi thin a, henge pawh hi kan enpui a ngai khawpin ka hria a. An building a hlui tawhin, rawng hnawih thar ngai a tam khawp mai a. Henge pawh hi kan Minister zahawm tak hian min lo hriatpui sela. Mission Veng-ah hian Anganwadi pakhat chauh a awm a, chu pawh chu veng mawng, Ar-Huana-a awm a ni a, a veng laili deuhah hian Anganwadi hawn ve an chak khawp mai a, kan sorkar hian minrawn tihsak sela. Mission Veng hi veng lian a ni a, veng mawng lama pakhat chauh awm hi chu awmzia a awm lo viau a. Chuvangin, min hawn belh sak thei sela a lawmawm khawpin ka ring.

Pu Dy. Speaker, Fishery chungchang hi sawi leh ka duh a. Fishery-ah hian potential kan nei tha kan ti hle a, a rei tawh a; department upa tawh tak pawh a ni a. Amaherawh chu, sangha-a kan la intodelh lo hi a dik lovin ka hria a. Hemi department te hian tan an la tawh lo nge, sangha-a intodelh hi thil harsa lo niin a lang si a. Sangha-a kan intodelhna tur hian tan kan lak leh zual a ngai a. A vawnthatna kan neih pawh kan hman tangkai tawklo niin ka hria. Chuvangin, fishery lama intodelh pawh tum ve tawh ila. 'Potential kan nei tha' tih ringawtah hian duh tawh lo ila, a tak ramah a hlawhtlinna hmuh tum tawh ila, a tha ang e. Pu Dy. Speaker, ka lawm e.

DEPUTY SPEAKER : Hun a hmang dik hle mai. Member zahawm tak Pu Lawmawma Tochhawng i sawm ang u.

PU LAWMAWMA TOCHHAWNG: Pu Dy. Speaker, ka lawm e. Thluaithlum lovin bung nghal chat ila. Kan Minister zahawm tak tak pathum te demand thlawp awm tak tak hi sawiselna te, han sawihnawmna te awm mahsela; kel-vulhtu pakhatin, a kel, 'kela, be be mah la kan talh dawn tho tho che' a tih ang deuh khan, kan pawm tho tho hmel a. Chuvangin, an pawisa hman tur te hi duhthawhna leh 'hetiang hian ni ve se' han tih te kha sawi ve kan han duh a ni.

Pu Dy. Speaker, Demand No. 7 - Excise & Narcotics-ah hian tan ila. Department pawimawh, lian em em si lovah chuan mawhpurhna sang tak nei a ni a, mihring nunna, ruihlo leh zu-chhia laka lo vengtu a ni. A pawimawh em avang hian thawh pawh an thawk rim khawp mai. Mahse, sum harsat avanga thawktu lakbelh theihloh hi a pawi khawp mai a, tih sak hram hram theih dan awm se ka duh khawp mai; thawktu tam zawk hi rampumah mamawhna a sang a ni. Chumai bakah chuan district hrang hrangah hian lirthei tha zawk leh tam zawk an mamawh khawp mai a, ram leh hnam chhantu, ngaih pawimawh phu tak a ni.

Demand No. 29 - Social Welfare hi, naute a pianchhuah atanga thlana a luh thleng ti mai ila, tar-kun khup-bilha an dam thleng pawha lo ngaihtuahtu leh lo ngaihventu, lo ngaihsaktu anni a, 'Huapzo Department' a ni ringawt mai. Naupang lo piangte an hmakhua tur buaipuitu anni a. Tunah leh nakina tan pawha kan ram leh hnam awm zel dan tur hi an kutah a awm thui khawp a ni. Tar-pension pek an han ni tur te leh, a hun taka pek tura an inbuatsaihna te kha a lawmawm a. Kan thunun phak bak ni deuh hlek mahsela, thil lawmawm tak a ni a. Naupangte hi Anganwadi level atanga uluk leh zual, hmahlir thui tak nei chung a zirtira, thanhnemngai leh uar zawka kalpui hi kan thatpui a rinawm a. Nau piang kan tlem telh telh a, mithi kanin khap thei bawk si lova. Chuvang chuan, kan ram hi dinhmun derthawnga ding mai thei kan nih zia hre chung a kan thalaite fa hring tam tur leh, chhungkaw mumal tak din tura inzirtir te pawh hi, inkaihhruaina tha tak hnuaiah kan mamawh tak meuh meuhin ka hria a, uar leh zual ta ila.

Demand No. 34 - AH & Vety, ran hrisel leh ei tlak intodelh tura an hmalakna hi harsa mahsela, zawi zawiin hmasawmna hmuh tur a awm zel a. Tunhma atangin a rawn inchherchhuan chho zel a, hma kan sawn hret hret a. Arsa bikah phei hi chuan tunhma lawka phai-ar a tukri-tukri a an rawn phurh luh thina pawh kha hmuh tur a awm ta mang lova. A pul hian min ti buai lo phei se chuan ar-ah na na na chuan kan hnianghnar tawh hi maw le! Hei hi thil lawmawm tak a ni. Tin, artui lama intodelhna tura kan hmalaknaah tan nasat leh zual a ngaiin ka hria a. Kal chet chetin kan la kal mek zel a, hma kan sawn hret hret na a. Phai vai-artui var, zo artui uk khek -khawkin a la pawlh hneh lo hi chu,

tan lak a ngai viauin ka hria a. Tin, thil tihtheih si, hmanhmawh ut-uta tih kha, tiloh theih siloh kha a ni a. Chuvangin, helamah pawh hian tan kan lak a ngaiin ka hria.

Lunglei Lungpuizawl-a artui awpkeuna cheng tam tak mana din te pawh saw tangkai lehzuala hman ni thei sela a lawmawm ngawtin ka ring. Vawk-pul hri avanga kan tawrhna kha a nasa khawp mai. Hetiang hri chhia hi tawk lo ila chuan, vawkah na na na hian chuan ‘kan intodelh thei mai awm mang e’ tih dinhmunah kan ding tawhin ka hria a. Uar lehzual leh uluk zawka helama kan kal chuan, vawksa thianghlim eitur kan nei theiin a rinawm. Kumin krismas leh kumthar vuak vetah khan ‘sial’ a lar hle mai a, khawpui chhungah leh hmundang dangah pawh. Helamah pawh hian kan ramah hian intodelh theihna tur emaw, hnianghnar zawka a kal theihna tur a awm a ni tih hi a lang chiangin ka hria a. Chenfakawm zawka kan awm theihna tur atan hma lak zui ni thei se la a thain ka ring.

Demand No. 20 - School Education-ah hian sawi tur tam tak a awm a. He department hian a huapzauh em avangin fak leh sel pawh a hlawh na-ngiang a ni. Harsatna leh hun khirh tak hnuaiyah pawh sorkar sikula zirlai in admit lo pung zel hian hma a sawn zia a ti lang chiang a. Sikul thar leh repair te, zirlai naupang tui thinghlim in leh inthiarna tha zawk tam tak pek ringawt pawh hi hahthlak tham a nih lain, midday meal leh text book te ngaihtuah sak a la ngai a, rawngbawlna hautak tak a ni. Kan hnam nunzia chawinun zelna atana zirlai bu her rem te, Mizo leh saptawnga chhiarkawp leh science zirna ruahman thar te hian hmasawwna rahbi min rah tir ngei dawn. An puala pawisa dah hi thahnem deuhin lang mahsela, a hmangtu leh chhawrtu tam ta chu senso pawh tam awm reng niin ka hria a. Zirtirtu indaih lohna te, sikul upgradation te, sikul sak thar leh repair te hi chu district leh bial ang pawhin min ngaihthah dawn loh avangin lawmthu kan sawi a. Min tihsak tawh zawng zawngah pawh lawmthu kan sawi a ni. *Mizo Language Development Policy* hi kan la tangkaipui dawn khawp mai. Mizo hnam min chawinung zeltu turte zinga a ke pakhat pawimawh tak a ni. A hlu a, a hlu tial tial dawn niin a lang.

Demand No. 28 - LESDE-ah hian tlem han sawi ve leh ila. He department hi a lenloh leh larloh aia ram leh hnam tana pawimawh a ni a. A kila lungrem tangkai, ‘lung tangkai’ kan tih ang mai kha a ni. Hlawk zawk leh kawng kal mumal neia, mihringa theihna awm te, a bikin thalaite tan an thiam leh rem hriatna te haichhuah sak a, intodelhna tlo leh hlawk lama kaihruaia, kawhhmuh tu a ni a. Lang vut-vut si lova luipui tuilian ang mai kal dulh dulh, ramin a hnathawh kan hmuh leh chhawr mek a ni. Hun reilote chhunga Central Service a lang thei tur MYC pumchhuak kan nei ta te hi, ‘thawktute an awm mai mai lo’ tih lanchian tirtu a ni a. A chhawrtu tur mipui thalaite nen a thawktute pawh kan tanrual ve zel a ngai awm e.

Demand No. 17 - Food, Civil Supplies chungchangah hian, Zoram chawbel, hripui leh lirnghing, ramri buai leh vawk-pul hriin min tlakbuak burh-burh lai pawha,

chham lo leh nghei lova ram mipuite min siamtu a ni a. Heng zawng zawng hi kan Minister zahawm takin a tihtheihna chhan chu - Pathian min tanpui vang a ni; 'Pathian min puih vang a ni' tih kha hriat reng tlak niin ka hria a. Hun lo la awm leh zel turah Pathian puih tlakin an thawh zel kan beisei. Buh ei tur sem-zai leh ei tur chhekkhawlna kudam leh rampum pui tana an han buatsaih min han chhawpchhuah sak te, oil depot lian zawk leh gas bottling plant rampum ina kan la chhawrbawkw em em tur ruahmanna an nei te hian 'an ngaihtuahna ram leh hnam tan an seng a ni' tih a tilang chiang a. Hlawhtlinna kan hmuh thuai thuai kan beisei a ni.

Demand No. 19 - LAD hi urbanization vangin a mawhphurhna hi chhawk hret hret nimah sela, rampum dapa thawh tur nei a la ni fan mai a. Sorkar sum bawma tangka chhunglut tam thei zawnga park hrang hrangte out-source anni mek hi ram tan thil vanneih thlak tak a ni. Uar deuh deuha tih a chi ngawtin ka ring. *Enitnman*: Lunglei District Park outsource tura tender chhangtuin a chhan kha chawlh kar khat chhung lekin a hmu chhuak vek niin kan hria a. Sorkar a hlawk bawkw a, a chhangtu a hlawk bawkw a, a lawmawm takzet a ni. Ramngaw siam belh zel chung a hetiang park nuam leh changtlung zawk siam belh zel hi ram mipuite tan pawh, sorkar tan pawh a hlawkin, a thain ka ring. Ngaihtuahna lo hmang tai la.

Pu Dy. Speaker, hmannah pawh khan ka sawi lang zawk tawh a, bial chhung thil han sawi lan ve leh ka duh chu - Lungpuzawl VC te chungchang saw a ni a. Kan VC kan Minister zahawm tak ten an eizawna khap rih anih vanga an manganna leh an hrehawm tawrhna saw min ngaihtuahpuia, min sutkian sak hram turin kan han ngen nawn leh a ni. VC House hmun hrang hranga sak thar leh siam awm chuk mai te hi a hmuhawm a, kan bialah pheih chuan a thar sakna tur kan lo nei tawh lova, min rawn zawh pawhin bial dangah kan theh chhuak hial a ni. Thil lawmawm tak a ni; an awm mai mai lo e, LAD changtu Minister leh department te hi. Tin, Dan lova khaw din dap chhuaha, dan ang thlapa kalpui kan mamawh tam leh zual; a bik takin khawthlang lam ramah te niin ka hria.

Demand No. 35 - Fisheries Department hi ka han sawi leh lawk ang a. Kan Lalpa Isua ngei pawhin a ei thin leh, a tih pun a ni tih memberte atang pawhin kan hriat tawh kha; chutiang enkawltu department chu a ni a. A phurawm rualin, mawhphurhna erawh hi chu a tih theih a, kohhran leh pawl hrang hrangte .. (Ka zo tep e, Pu Dy. Speaker). Kohhran leh pawl hrang hrangte, mimal inneih leh pass lawmnaah te pawh kan *menu* zingah chuan 'sangha' hi a tel ve deuh ziah a ni. Hei hianin 'sangha kan mamawh nasa' tih a tilang chiangin ka hria a. Amaherawhchu, zawhna lianpui a awm thei ta a. Heng sanghate hi mizo thar nge, phai ram atanga kan lak luh tih hi ngaihtuahna a awm thei a ni. Hmun dang atanga lakluh a tlem tial tial a, tih tawp hial theih a chakawm khawp mai. A chi, a note siam chhuah hi uar zawka kalpui theih ni se a tha awm mang e ka ti a. Sangha pui pahnih, a pa leh a nu hian tum khatah sangha chi 50,000 – 80,000 an thar chhuak thei e, tih a ni a. Chuti anih si chuan, engatinge kan la tih loh le? Mite pawhin

an tihtheih chu Mizo-nu, Mizo-pa, Mizo-nula leh tlangval te hian kan tithei ve awm si a; chuvangin, helamah pawh hian tan lak a tha awm mang e, ka ti a. Kan rama lui-sangha, a bik takin heng nghahhhrah te, nghatun te hi vulh-pun leh humhalh hi na zawka kalpui ni thei se a duhawm ngawtin ka hria. A rem mek zel niin ka hria a, thil tihtheih a ni a, ngaihtuahna thar, inpekna thar leh ruahhmanna thar te nen hengte hi kalpui ta ila, sangha-ah hi chuan, nichina kan ngaihtlak tak ang khan intodelh thei dinhmunah kan dingin a lang e.

Tichuan, Pu Dy. Speaker, heng kan Minister zahawm tak tak pathumte demand hi a thlawpawm ka ti a, ka support a ni. Ka lawm e.

DEPUTY SPEAKER : Kan hun tiam dar 4 a lo ri ta chiah mai a, kan sawi chhunzawm dawn nge, kan chawl ang? Kan business a la zo lo nasa bawk si a, engnge House ngaihdan? “Dar 5 thleng chu sawi ila, tichuan, dar 5 hnu ah kan zawh loh chuan, kan chawl ang” tih chu House ngaihdan a ni maw? Kan lungrual tlang em? (*House an lungrual a*)

Awle, chuti anih chuan, kan sawi chhunzawm leh ang a. Member zahawmtak Pu Vanlalhlana ka sawm e. Ani hi a phar hmasa ber a ni.

PU VANLALHLANA : Pu Dy. Speaker, ka lawm e. Vawiinah hian Minister zahawm tak tak pathumte - Er. Lalrinawma, Pu Lalchhandama Ralte leh Pu K. Lalrinlana te demand kan han sawiho dawn a ni a, Er. Lalrinawma demand hi ‘Minister’ anih lawmpui nan kan sawi hmasa ber ang a. Ani hi ka mi hriatchian, mi-dik leh taima a ni a, ‘Minister’ a ni hi ka lawmpui khawp mai a. A thiante zawng zawng ‘Minister’ an nih laia, a ni ve lo kha a hrehawm ka lo tihpui deuh a; amaherawhchu tunah ‘Minister’ nihna a chang hi ka lawmpui khawp mai.

Demand No. 7 - Excise & Narcotics hi ka sawi hmasa ber ang a; Demand atanga 96.5 % hi hlawh ah a kal a ni. Chuti anih chuan an hnathawhna tur hi a tlem hle mai a, an hmabak an hnathawhna tur hi a bawn hle mai si a. Kan ngaithla tawh a, drugs hi Mizoram-ah a lo lut nasa em em a ni. Kumin December thleng khan kg 26 leh gram 557 man a ni a, ‘man loh hian engzat nge Mizoram paltlang ang’ tih leh, ‘man si loh, Mizoram-a tangkhang engzat nge awm ang’ tih te hi ngaihtuahtham tak niin ka hria. A kum telin drugs addict an pung a, he thil hian kan thalaite a run nasa lutuk dawn a ni. Chuvangin, he thilah hian sorkar, NGO, kohhran leh mipute nasa taka kan tan tlan a ngaiin ka hria.

Drugs kan man zah a pun chhoh dan hi han thlir lawk ila –

2018 – 2019 – kg 8 leh gram 111;

2019 – 2020 - kg 15 leh gram 826;

2020 – 2021 – kg 18 leh gram 416;

2022 - 2023 (Thla 10 chhung) – kg 26 leh gram 55 7 man a ni a.

Hei hi kan dinhmun anih avang hian he thil hi ngaihthah mai chi a ni lo tih kha ka han tarlang duh a ni.

A dawt lehah chuan, Demand No. 29 - Social Welfare-ah hian thil pahnih chauh ka han sawi ang a. *Pakhatnaah* chuan - Anganwadi hi a pawimawh em em mai a, sikul bultanna a ni. Naupang sikul tak tak la rap pha lo ten zirna an tanna tak tak a ni. Amaherawh chu, (In bial te anni ve em ka hre lova) kan bial chhungah chuan Anganwadi hi a awngrawp nasa em em a, kei pawh hian Anganwadi 10 vel hi chu ka thawm tha a ni, MLA fund atangin. Chuvangin, Anganwadi sak that leh tihchangtlun te hi a tul em em a ni. Chu chang ni lovin, a thawktu (worker) leh helper-te lawmman te hi a beitham em em a, hengte hi tihpun a thain ka hria.

Tin, old-age pension kha han tarlan ve ka tum a, mahse kha, sawi vak ngai lovin Minister-in hma a lo la tawh a, an dawng mai thei dawn niin ka hria a, a lawmawm ka ti a. Nidangah pawh hma tak leh a hun takah an dawn theihna turin tan la se tih kha ka sawi duh a ni.

Tin, Animal Husbandry & Veterinary leh Sericulture pawh hi mi tamtak inngahna, eizawna atana hman a ni. SEDP tilartu lai tak tur pawh a niin ka hria a. Amaherawhchu, cheng 25,000/- chuan Vety emaw, Sericulture a ni emaw ropui takin bul a tan theihloh; intodelhna kawng kha a kawktu thei lo a ni. Chuvangin, hengah tal hi chuan cheng nuai 3 kha han target theih ni sela chuan, Mizo mipui chhungkua eizawna mumal neilo tam tak hian an bawh ruih ruih thei maiin ka ring a. Chu chu ka sawilang duh a ni.

Tin, a dawt lehah chuan - School Education, Pu Chhantea demand hi ka sawi duh a. Han en chuan budget pum atang 11% hi education chan a ni a, department malah chuan a chang tam ber dawttu a niin ka hria a, ka lawmpui khawp mai a. Amaherawhchu, *quality education* siam tur chuan 11% ringawt hi a tawktu lo; total budget atanga 25% emaw tal hi a ngai a ni. Kan ram zirna hi reform a ngaiin ka hria a. Minister zahawm tak hian term tirh lamah khan MLA te kha “In MLA fund 15-20% tal hi education-ah lo hmang teh u, in bialah” ti khan min ngen a; a tul lo ti pawl ka ni a, ‘Sorkar property leh sorkar sikul chu sorkarin a enkawl tur’ ti tlat pawl ka ni. Amaherawhchu, loh theih lovin ka han kal a, ka han hmu ve a, school te kan han visit a. Kan school hi a tlabal em em mai a lo ni. Nichin khan school mal mal chanchinte kan han ngaithla a, bial thenkhat, kan Minister-in min lo hriatsak ve sela ka duh chu - ka bial chhung Chaltlang atanga Selesih thleng Govt. institution zawng zawng khi repair ngai vek an ni. Chuvangin, education tha nei tur chuan building tha te hi a lo pawimawh a.

Tun hmain education hi missionary ten bul min tan sak a, kohhranin school an enkawl a, a tha viau a ni. District Council kan lo ni a, enkawl dan a lo dang ta a. School te pawh District Council-in an han enkawl ta a, political appointment te a lo ri a. Tin, tun hmaa kan hriat ngailoh - zirtirtu sawnthlak te, zirtirtu sawnpai te, zirtirtu zurui te kan lo hre ta a, chung chuan kan education quality hi tlem tlemin a tichhia a ni. UT-ah kan chuangkai a, State-ah kum 30 kan nih hnuah tun kan dinhmun hi kan hre vek a. Kan education hi siamthat a ngaiin ka hria a. Aikal zirtirtu nen, posting leh transfer-ah pawh problem kan lo nei chho ta a. Zirtirtu ten an hnathawhah sincere takin inpekna an nei tawk lo ni ten a hriat thin ta a ni. Chuvangin, keini chauh hi education-a problem nei kan ni bik lova, mi state chu tal chhuah theih chin a awm a, chung kawng chu keini pawhin kan zawh ve theiin ka hria a.

Entirnan - Delhi-ah chuan Aam Aadmi Party (AAP) an awm a, Sisodia chu Education Minister niin Delhi zirna chu an siam tha ta a. Tunah chuan Delhi-a Govt. institution zawng zawng chu private institution-a tha an tih khan result-ah an pha tawh lo a ni. Enrolment pawh a pung em em a, drop-out pawh an awm tawh ngai lo. ‘Engtinng e an tih?’ kan tih chuan, Aam Aadmi Party an lo sorkar a, zirtirtute Cambridge-ah te, Singapore-ah te, IIT Ahmehdabad-ah te training turin an zir a. Tichuan, an lo haw a, chungte chuan midangte training an pe ve leh a, an in refresh a, tikhan an in motivate nasa a ni.

Tin, chu chang a ni lova -An govt. building chhe lutuk te, an toilet hman tlak loh te an siam tha a, an institution te pawh kha an renovate a ni. Tin, curriculum danglam tak ‘*Happiness Curriculum*’ te an han introduce a. Chutiang chuan an govt. institution kha an siamtha a ni. Tin, Nagaland-ah pawh tuna kan problem ang hi an problem ve vek; proxy-teacher leh corruption te a hluar em em. Amaherawhchu, ‘communitization of education’ an ti a, Elementary - primary leh middle school kha sorkarin enkawl chungin khawtlang kutah an dah ta a, legislature-ah dan hmangin an pass a. ‘Village Education Committee’ a ding a, an thu em em a, recruitment-ah an thu a, zirtirtu an la a. Heti laia keiniin *transfer & posting* a problem kan neih ang hi an nei ve lo a ni.

Tin, school building tha te an ngaipawimawh em em a. Account pahnih an nei a, pakhat chu - *hlawh lakna* a ni a, pakhat leh chu - *school development*-na tur a ni a. Regular takin government atangin fund an hmu a, tichuan, school committee chuan a enkawl ta a. Chutiang chuan changtlung takin tunah hian an kal chho a ni. Chuvangin, tunah hian keini pawh hian, eng kawng nge kan zawh ve dawn? Kan mithiamte hi tir chhuak ve ila, kan tana tha tur *communitization of education* Nagaland-a an tih ang te chu kan ti ve thei em? Kan tan a remchang em? Nge, Delhi-ah te a aia thate pawh awm thei a ni. Chuvangin, khalai kha kan hotute hian hria se ka duh tak meuh a ni.

A tawpna atan ka sawi ve duh chu – *Local Administration* chungchang hi. Local Administration tha hi kan va mamawh em a ni. Local Council leh Village Council kan

nei a, kan mamawh hi a phuhruk pha lo ta deuh a ni. Party zawng zawng hian tualchhung relbawl na tha kan sawi vek a, MNF party pawhin SEDP Bu-ah te pawh an telh a. Tin, tun sorkar phei chuan draft-bill te pawh a buatsaih a, ka lo beisei dan tak chuan heng an draft bill te hi rawn pharhin kan discuss te pawh ka ring a, amaherawhchu, introduce a la ni em lova. Session lehah te chuan introduce a nih beisei ta ila. Chutiang chuan kan ramin kan mamawh, thingtlang leh khawpui a awmte pawh kan hmasawna tur chu 'Local Administration tha' a ni.

Hrangturzo Constituency-ah khian Leng khua a awm a, anmahni bakah dan bak te pawhin an kal a ni ang. Amaherawhchu, administration tha tak an nei a, an inenkawl na a tha em em a ni. Healthcare thlengin anmahni pualin an nei thei a, an khua leh tuite pawh an hlim. Chutiang ang chu khawdangte pawh hi kan ni thei a ni. Pu Dy. Speaker, ka lawm e.

DEPUTY SPEAKER : Member zahawm tak Pu Lalrindika Ralte ka sawm e.

PU LALRINDIKA RALTE: Pu Dy. Speaker, ka lawm e.

Vawiinah hian demand sawi neuh neuh tur a awm a. A chhungthu erawh hi chu a hnathawk ten hlawh lak tur an neih hi chuan a thaah ka ngai mai a, kei chuan. Tin, kan minister ten min lo hriatsak tura ka duh chu - kan bial pawimawh chu ka sawi vak dawn lova. Nakinah office-ah kan la rawn kal ang a, chungah chuan min lo ngaihpawimawh sak ka duh a, ka ngen duh bawk a ni.

Pakhatnaah chuan Excise hi sawi ka duh a. Excise hi revenue earn turah ka ngai a. Tunah hian an kal chho a, wine te kan zuar a nih chuan, sum te pawh an hmuchhuak turah ngai ila; hei hi chu sawi ta vak lo ila.

Tin, Social Welfare-ah hian tunah hian tar pension kan tih mai hi an hmu tha em tunah hian ka hre chiah lo a a update takin, hei hi kan ngaihpawimawh sak a thain ka hria. Kan senior-ten an chanvo hi a rang thei ang bera an hmuh thin hi a thain ka hria a, hei hi a kaihhnawihah hian ngaipawimawh turin ka duh bawk a ni.

Tin, Vety hi, tunlai hian Tripura atangin ran a rawn lut nia hriat a ni a, hei hi sorkar hian a hria em ka hre lova; kan minister hian min lo enchian sak se a thain ka hria a. Kan bial lam Tripura lam atang tein vawk leh ran dangte pawh aniang chu, chung chu a rawn lut niin ka hria a, hei hi min lo enchian sak turin ka ngen bawk a ni.

Tin, Demand No. 35 - Fisheries-ah hian tlem ka sawi leh duh chu - nichin khan an sawi a; sangha hi kan ti ve viau a, mahse kan intodelh hlei thei lo a. Tun hma khan sangha hi Andhra Pradesh atang tein a rawn kal thin a, a rawn kalna hmun hi kei pawhin

ka zuk tlawh ve tawh a. Mizoram atang chuan a hla hle mai a, khulai atanga lo kal, helai khawtualala kan thar ina a rate kan compete thei lo hi a dik thei lovin ka hria a, hei hi kan enchian deuhthe pawh a thain ka hria. Kan ngaihtuahna te kan thlak chiah lo anih pawhin, thil kan ngaihtuah dan erawh hi chu 'kan thlak a tha ang a' tih ngaihdan ka nei bawka a ni.

Tichuan, Demand No. 17 - Supply Department hi sawi ve ka duh a. Supply hi kan hre ve nual a, buhfai buk tling lo hi kan sawi thin a, a veiaawmin ka hria a. Hei hi sorkar pawh hian buhfai buk tling mipui ten kan lak ngei theihna tur hian hma la se ka duh a, chu chu minister pawh hian hma la ngei se a thain ka hria a. Ration card neih hi Mizoram-ah hian 2,82,843 vel kan awm a, he mite ina vaawikhat buhfai kan lak hian, (la angah in ngai ta ila) kg 1 theuhin buk tling lo ta se, kg 2,80,000 chuang hian a tling dawn lo a ni; mipui chan ai hi a heu dawn a ni tih hi sawinawn leh ka duh a. Chuvang chuan, hei hi a pawisa a chan tir pheih chuan, tunah hian ₹2,750/- in sorkarin a lei a, chu pawh a kal man tel lo leh nghalin a ni a. Hei hi a pawisa luang ral hi a tam ang reng hle a ni tih hi kan hriat pawh a tha a, a serious-in ka hria a, chu chu ka sawi tel duh a.

Tin, department hian open market atanga buhfai a lei thin turin a inbuatsaih mek a. Hemi kawngah hian experience atanga ka sawi duh chu - a bag hi buara bag kher ti lo hian, a bag quality tha deuh supply-ah te kan ti thei anih chuan, supplier-te awlsam zawkna a nih ka beisei a, sorkar tan pawh chu chu a awlsam zawkna a nih ka beisei a. Buara bag ni kher lo 'satha ip' kan han tih ang chi te pawh hi a quality tha an hman thei a nih chuan, heti zawng hian sorkar inher rem thei se tih hi ka sawi duh bawka a. Sum hi kan seng nasa ang reng khawp mai a, supply-ah hian; ka rilrua awm chu 'kudam' hi a ni, FCI in kudam a nei a, department pawhin kan nei a. Tunah hian Tanhril atanga Zuangtui kalna khu quintal 1-ah ₹65/- vel a niin ka hria a, a la ni chiah em ka hre lova. Chumi a lo nih chuan, Aizawl leh Tanhril atanga Zuangtui thleng tura kan pawisa senso tur hi a tam viauin ka ring a. FCI kudam bul hi kan ram a ni a, 'FCI kudam bulah hian kudam hi kan nei ve thei mai em?' tih hi hun lo kal zel turah chuti zawnga ngaihtuahna kan sen chu a thain ka hria a, sum tam tak kan save thei dawnin ka hria a ni.

Tin, directorate building khi kan minister hian a hre tho maithei a, a building khi a rawih ang reng hle a, a chhuat RCC-a do hi a risk a sang viauin ka hria a, hei hi thawktute tan pawh an himna hi a ngaih pawimawh awmin ka hria a, sorkar pawhin ngaipawimawh se a thain ka hria a.

Tichuan, Demand No. 20 - School Education hi a ngaihpawimawh awmin ka hre bawka a, ram changkangte ngaihpawimawh chu education te, health te hi a ni a, keini pawhin hei hi kan ngaihpawimawh a thain ka hria. Mihring ti-mihringtu, mihring min tihlutu chu kan hriatna hi a ni. Mi hi sek viau mahse, a hriatna a bil tlat chuan a hman tangkai tak tak theih lova, mi hi hriatnaa kan phak tlat loh chuan el an har khawp mai. Chuvang chuan, kan education system hi kan ngaihtuah nawn a thain ka hria. Khawvela

miin an ngaih pawimawh chu ‘elementary’ hi a ni a, Pathian thua kan hmuh chu – “Naupang chu a kalna awm kawngah zirtir ula, a puitlin hnu pawhin a thlah lo ang” tih hi a ni. Puitlingte hi chu advisor te nena kan inhual tir rap pawh hian rin aiin kan thutlukna hi a ropui lo tlat. Chuvang chuan, ‘elementary education’ hi kan ngaih pawimawh a thain ka hria.

Mi ramah chuan a zirtirtute pawh hi an uluk em em a, thiamna kawngah pawh *thiamna bik* neite hi an duh zawk a, elementary-ah hian. Chuvang chuan, kan naupangte hi kan ngaih pawimawh a thain ka hria a. Mizo phei chu kan vannei a, Kristian kan ni a, mihring nun hi sakhua nen a inzawm tlat avangin, a sakhaw zawng pawhin kan vannei a. Education leh Christianity te hi a inzawm tha em em a. Kei chuan ka ngaihdan chuan, ‘kan thiamna te, kan finna te hi sakhaw dang hian min pha thei dawn em ni’ tih hi ka ngaihtuahnaah a awm thin a. Kristian-thinlung, Kristian-rilru hi a fine em em a ni. Chuvang chuan, Kristian kan ni bawk a, education tha kan neih hi chuan kan hmalam hun hi a eng a ni.

Khawvel ram changkang zawk te avang hian kan vannei a, kan entawn turin hnuhma an lo nei tawh a. Vawiinah keini hian a hranpain hre kher lo mah ila, history te a awm a; ‘miin engtinngge hma an lo lak tawh’ tih te awlsam takin kan hre thei a, tunlaih chuan. Chuvang chuan, khawvel danga hma an lak dan te, engtinngge mi ram te hian thil an lo kalpui tih te pawh hi kan zir a thain ka hria a, chu chu kan rilruah pawh awm se a thain ka hria a ni.

A tawp bera ka sawi duh chu, Education chungchang kan sawi zawng zawngah khan a pawimawh ber chu – ‘A thawktute, kan hnathawktute engtinngge phur takin an thawh theih ang’ tih hi a ngaih pawimawhawmin ka hria a. Vawiina kan kal anga hlauh pawh lak mumal tur an neih loh hi chuan, kan hnathawktute hi phur takin hna an thawk ang em tih hi ka rilruah a awm a. Education te pawh hi sorkar pawh hian *priority* kan pe thei lo em ni? Kan ram hnuk tak tak, thlai te chu a tam thei, a chhe vek thei, mihring thiamna erawh hi chu a tam thei lo; kan ngaih pawimawh a tha in ka hria a. ‘Invest-na tur a ni; invest ngamna a ni’ tih hi ka sawi duh bawk a. Chhungkua ang pawhin kan ngaipawimawh tur a ni a, sorkar pawhin a ngai pawimawh tur a ni. Mihring hian a hmuh tur anga education tha a hmuh loh chuan... (**Dy. Speaker:** I zo thei dawn tawh em?) kan future hi kan tichhe palh ang tih a hlauhawm a, ‘education’ hi karawn ngai pawimawh angreng viau a ni e. Ka lawm e.

DEPUTY SPEAKER : Member zahawm tak Pu K. Laldawngliana ka sawm e.

PU K. LALDAWNGLIANA : Pu Dy. Speaker, ka lawm e. Minister zahawm tak takte - Er. Lalrinawma, Pu Lalchandama Ralte leh Pu K. Lalrinliana te chan Demand pawimawh tak tak kan sawiho thei hi a lawmawm ka ti hle a ni. Budget hi kan

hriat angin ‘ruahmanna’ a ni a, Pathian rinchhanin legislators, te sorkar officials zawng zawngte leh mipuite tanho a pawimawh hle a ni tih kha kan sawi hmasa ber duh a ni.

Demand No. 7 - Excise & Narcotics Department chan hi ka sawi hmasa ber duh a. Mizoram sorkar, ‘*Pathian leh kan ram tan*’ titu MNF party pawhin ‘ram hmelma a ni’ tih hriain leh sum tam tak hlahu huamin zu-zawrh a titawp a, ‘ruihhlo kan do a ngai a ni’ tih hriaa hma a lakna a ropui ka ti a. Excise Department te in daih lo viau mahse an theihna zawng zawngin ram tana ke an penna hi a ropui ka ti a. Chutih rual erawh chuan, department indaihlohna a tam em avangin kohhran, YMA te leh mimal te pawn mut-mawh, hnar-mawha neihin ruihhlo hi kan do tak tak a ngai a ni. Hei hi kan hnam damna tur a ni tih hi kan sawi lang duh bawk a ni.

Demand No. 29 - Social Welfare Department hi, Naute a nu-in a pai atanga a thih thlenga buaipuitu department a ni a. Staff-te indaih lo hle mahse, an hnathawh pawimawhna hi hre thara, taima taka an thawh hi a pawimawh hlein ka hria a. Kan hriat angin ka bialah *Jordan Centre*, Sethawn hmunah a awm a, khulai hmun khu ka ngai pawimawhin, ka tlawh ngun khawp mai a, tun ai hian sorkar pawhin kan ngaihsak deuh a tulin ka hria a ni. *After-care*, ruihhlo ngaite an chhuah hnu pawha thiam thil neia enkawl zel te a pawimawh hlein ka hria a, tul ka ti hle a ni. Thawktute inpekna ka fak a, tunah hian patient 57 an awm mek a, mumal takin, kalphung fel-fai tak neiin an kal mek a ni.

Demand No. 34 - AH & Vety Department hi Mizo society nena inkawp tlat mai, Aizawl khawchhungah pawh ranvulh phal loh pawhin inah ui kan vulh a ni a; khatianga inkawp tlat mai, Zo-khaw lamah pheih chuan vawh kan vulh a, ar kan vulh a, a vulh theih ang ang kel thlengin kan vul a ni. Chuvang chuan, department pawimawh leh tangkai em em a ni a. Kan sorkar pawhin ngai pawimawhin doctor indaih lo viau mahsela, hmanni lawk khan *Mobile Veterinary Unit* RD block tinah doctor-te la tharin leh staff te, driver te hnathawkin tunah ruahmanna an siam hi a fakawm ka ti a, RD block tinah hian ‘hmasawna ropui tak kan hmu a ni’ tih kha ka han sawi tel duh a. Keini bial Lungdai atanga khaw 7 - Serkhan, Nisapui, Lungmuat, Hmar Chaltlang, Bukpui thlengin, ran vulh an tam si a, doctor kan nei lova; kan department hotute an awm bawh a, kan sawi ngun tawh a, doctor a hma lama min lo pek theih chuan kan lawm ngawt ang.

Demand No. 41 - Sericulture Department hi department lar lo tak a ni a, thalai rual ten hei hi kan incho thar a pawimawh hlein ka hria, pangang khawi hi. Kan bag te pawh hi silk-pangang khawi atanga siam a ni a, market-ah buai a awm lova, vulh a awlsam bawh si a. Sericulture Department hi indaih lo viau mahse, thalai ten kan bawh thar a, ‘sorkar pawhin kan ngaihpawimawh thar a tul hle a ni’ tih kha ka sawi tel duh bawh a ni.

Demand No. 18 - Printing & Stationery Department hi department pawimawh em em, *revenue-earning department* a ni a. Department hrang hrang ten kan ngaihpawimawh lehzuala, an thil neih ang hi dawr ve a hma kan lak a tul hle a ni. A thawktute pawhin an theih ang tawpin hma an la a, kan office bul lawkah an awm a, kan thlir thin a; tun ai hian department hrang hrang hian dawr tam deuh thei ila a tha ngawt ang tih kha ka sawi duh bawk a ni.

Demand No. 20 - School Education hi a va han pawimawh em! Education revival kalpuin, Pathian leh mipuite zara helaiah legislator-a ka lo thut ve hian, ka hna hmasa ber chu - school tlawh-chhuah a ni. Khawtin ka tlawh a, chuta ka hmuh chhuah chu, ‘zirtirtute tan kan lak deuh a ngai’ tih hi. Sorkar school-a thawkte an hlawh a tam viau mai a, private school-ah hlawh tlem zawka thawkte school an bawh thin hi kan ngaihtuah chian a ngaiin ka hria a. ‘Sorkar hnuaiyah hlawh tha zawka thawk te kan intuitai thara, hma kan lak thar a tul hle a ni’ tih hi ka sawi nasa khawp mai a. Chutih rual erawh chuan, kan mamawh - Education Department-in school tha tawh lo tam tak min repair sak a, sak-that ngaite an sa tha bawk a, SEDP - zirtirtu qualify ngei tam tak lak anni bawk a, chu chuan min han chhan viau a. Ka bialah hian english medium school a awmlah avangin, sorkar school-ah tunah tha takin kan kal a ni tih kha ka sawi lang tel duh a. Chutih rual erawh chuan ka bial chhung Hortoki Middle School-I hi kan sawi tam tawh khawp mai a, kan han thawm chang pawhin media-ah te an han tilang thin a, min lo ngaihpawimawh sak a, a rang lama min sak-that sak theih chuan kan lawm khawp ang.

Tin, Higher Secondary kan nei mumal lova, Thingdawl khaw lian tak mai hmunah khuan Samagra atangin Thingdawl Higher Secondary te min dah sak theih chuan kan lawm khawp ang. Hortoki, in 600 chuang awmnaah pawh higher secondary school a awm lo bawk a, ka han sawi lang tel duh bawk a ni. School hi a tak taka kalpui theih turin kan tan ho a ngai a, zirtirtute, minister, a bialtu, mipuite bakah nu leh pate nen kan tan ho a ngai a. Kawng tha, motor tha, sum leh pai ngah mah ila, education-ah kan tlak-hniam si chuan, kan ram hi, ‘hnam bo tur kan ni’ tih hi kan sawi belh duh bawk a ni.

LESDE - Demand No. 28 hi han sawi ve leh ka duh a. Hei hi thalai rualte tan kut-themthiamna training-na hmunpui a nih avang hian, thalaite’n kan bawh em em a, training tur pawh an inla seng lova. A thawktute indaih lo viau mahsela, thahnemngai lehzuala hma kan lak a tul hle a ni. Hnamdang hnathawktute kan chhawr lohna turin trainee-te pawhin chhawrtlakin rawn training chhuak zel sela, Mizo-fa ngei chhawr zel kan duh a ni. Chutiang chuan, tih takzeta training chhuaka, taima taka thawk turin kan beisei bawk a ni

Demand No. 17 - Food, Civil Supplies & Consumer Affairs hi, ‘food’ han tih hian, ei leh bara kan intodelh ringawt pawh hi kan minister chungah lawmthu ka sawi

duh a. Sawi hi a nuam a, ei leh bar chungchangah ka bialah pheih chuan buh-thapa eizawng thin khan 'eizawna kan nei tawh lo' an ti a, buhfai hi a tha ta viau a nih ka ring a, kan hnianghnar mai bakah. Hengte hi a lawmawmin a ropui ka ti hle a ni.

Tin, bial chhung leh a ram pum pawhin kan hriat angin Supply Deptt-ah hian Legal Metrology hi sawi lan ve ka duh a. Hei hi *dan* kengkawhtute anni a, *Dan* hi tun ai hian kenkawh deuh theih ni se a tha awm mang e tih ka sawi duh a ni. Dan lo in oil leh gas supply te black-in an zuar a, hengte hi mana hrem hi a va tul tawh em ka ti tel duh bawka ni. Kan vannei a, kan sawi tam lo a gas kan hnianghnar avangin. Mualkhang-Gas Bottling Plant tih len tur hmalak mek a ni te hi a lawmawm kan ti hle a. Gas leh oil-a harsatna kan neilo te hi a ropui hle a ni.

Demand No. 19 - LAD ah hian Village Council hi a enkawltute'n an enkawl that deuh hlek a ngai. Kan Village Council-te hi an pawimawh em em a, kan sawi ang khan VC house thar kan sa teuh a, 150 chuang; repair pawh 98; sakthat tur pawh 23; computer set pawh kan pe teuh a ni. Kan bialah pawh kan mamawh hle mai a, kan minister-in min lo hriatpui se tih ka sawi duh a ni.

Demand No. 35 - Fisheries DeDeptt. Demand-a ka sawi duh chu - blood sugar leh BP sang nei tan pawh sangha hi kan ei theih a ni. Sangha hi kan dam nan leh kan hriselna atana kan mamawh ber a nih avangin, 'sangha dil siam hi uar ila, a siamna tur tanpuina kal tha se la, a department pawh enkawl tha se, thar teuh teuh ang u' tih ka sawi duh bawka ni.

Aw le, kan Minister zahawm tak tak pathumte demand hi ka support a, pass ngei tha ka ti e. Pu Dy. Speaker, ka lawm e.

DEPUTY SPEAKER : Member zahawm tak Dr. Vanlalhlana kan sawm e.

DR. VANLALTHLANA : Pu Dy. Speaker, ka lawm e. Ka luh hmain - Nimin khan minute 7 leh a chanve velah khan 'I zo thei tawh ang em?' tih kha ka dawng a. Zingkarah ka inbuatsaih a, tum hnih ka inchhiar chhuak a, minute 10-a inkhung luh hram ka tum a; khatianga tihsual-palh awm zeuh khan kan inbuatsaihna a tibuai nasa viau mai a. Video en leh pawhin, ka thut khan minute 10 a la tling lo a ni. Mihring kan ni a, tihsual palh a awm thei a; amaherawhchu theih tawp chhuah zel a va tha ve tiin thuhma ka nei duh a ni.

Minister zawng zawng demand-a luh kual a, han tih ka chak viau a, School Education-ah hian hun tam zawk hman ka tum a.

Kan School Education Minister zahawm tak hi a tang khawp mai a, hmanni lawkah pawh ka han leng lut a, hmalakna turte kan sawi a ni. School Education hi

literacy rate-ah pawh min nawr sangtu a ni a, amaherawhchu kan CM zahawm tak tarmit ka han vuah hi chuan, literacy rate-ah hian kan lo sang lo khawp mai a; a khaikhinna tur, a tehna tura kan teh lem loh kha chuan. Mizoram-a zia leh chhiar thiam hi, UP pawh 1% in kan lo pha lova, chu vel chu kan ni a. Literacy rate-ah hian a sang ber dawttu pawh kan lo pha lo; state heti zat zingah 25 - 26-na vel kan ni deuh chauh niin ka hria a, tan lak a ngai hle mai.

Tin, NABARD loan lak chungchang hi sawiloh theihloh a ni a, a chhan chu - Grade A consultancy meuh siin an DPR vaibelchhe chuang contract an sign-ah khan, engatinge 'GST tel lo' tih pawh an lo en loh tih te hi ngaihtuah tur a ni a. Check list an nei tur a ni; SOP te an nei tur a ni. Chutah chuan 'Grade A an ni' pawh tih tlak loh niin ka hria a, an chungah engtin emaw action lak te pawh a ngaiin ka hria. DPR-ah hmalakna tur a awm vek a, a inziak vek a, chutiang ni lova tu MLA-ten emaw duh dan an rawn sawi a, DPC-in, 'heti hian ni zawk rawh se' tiin list an rawn nei a, 'copy to MLA' tih te a awm a ni. Chutiang chuan hma lak a ni ta zawk a ni.

A awmzia chu - project siam a nih hian school zirtirtute, a hman tak tak tute rawn an ni lova, dawhkan atanga project siam a ni; a pawh thin khawp mai. Chu chu kan inngahna ber, school kan kalpui dan a ni. Consultancy-ten an han ti dawn a, 'hei hi a remchang zawk ang e' an ti a, an kawh chawp mai mai; a tak pawhin kan hria a ni. Chuvang chuan, a thlawn a dawn ni lova, nakin zela midangin an la rulh tur sum kan pukah hi chuan 'fimkhur takin i kal ang u' tih ka sawi duh a ni.

Pahnihnaah chuan - Zirnaah hian intodelh kan inzirtir tel a ngai. Kan bial chhungah sawn theih tawp kan chhuah ve a, kan minister-in min tuipuina a zarah; lawmthu kan inhrilh pawh ni ta se. High School pahnih kan nei a, IIM atang MBA chhuak pahnihin intodelh min rawn zirtir a ni. Chutah chuan pawl 9 leh pawl 10 annih chhungin kar khatah darkar 1 leh a chanve vel an lo inzirtir ve chuan, pawl 10 lo pass lo palh pawh ni se, 'mahni kein an ding thei tur a ni' tih kha kan thupui ber a ni. An pass a nih chuan, a tha; tichho zel rawh se. Pawl 11 leh 12-ah pawh hmalak chhoh dan tur rilruah a awm chho a ni.

Anmahni ho kha group 26 velah kan han then hrang a, group tin ₹2000/- kan pe a, 'hei hi lo tipung rawh u le' kan ti a, '₹2000/- erawh hi chu min pe let leh ang' kan ti a. An han ti ve tak tak a, an theih ang tawkin, ₹2000/- chuang te an help thei a ni. An inzirna leh hmalak dan te presentation kan han neihpui a, thenkhat chu 'hetianga hmalakna a awm hi kan va lawm em' an ti a, hnukulh chungin presentation an rawn pe a, kei pawh min khawih khawp mai. Kan naute, kan thalaite, kei ngei pawh inhre vek a, college zirtirtu ka ni; Commerce zirtirtu ka ni a, kan zirlaite an chhuah kum 5 hnuah, 'hna an nei em; engtinge hna an thawh chhoh' kan ti a, kan umzui a, 20% hian 'hna' kan tih, thla tina lut ang chi hi 'engnge an neih' tiin ka umzui a, a chanve pawhin an nei lo a ni. 'A chanve dang tan khan engnge kan tih' tih kan rilruah a awm a ngai.

Tin, kan school inziah luhnaah a tlahniam tial tial a, class I leh X inkarah hian a khi zau tawh lutuk a ni. Class-X an pass hnu hian class-XI leh XII ah dropped-out an tam leh lutuk; chungho tan chuan engnge kan tih? School hi hnazawna tur ni lovin, *career guidance* kan nei a, ‘engnge nih i tum’ kan ti a, ‘eng hna nge i thawh dawn’ kan ti a. Chu ai chuan, ‘intodelh chungin engtin nge i chhungte i chawm dawn?’ ti a kan inhrilh tam a ngai tawh khawpin ka hria. ‘Engnge nih i tum?’ tih ai chuan, ‘eng danglamna nge thlen i duh; tuna kan kalphungah hian hnathawk chungin eng danglamna nge thlen i duh’ tih te kan inzirtir a ngai tawh a, chu chu education-in a tih tum tur a ni. *Mihring hman tlak; mihring intodelh* hi kan syllabus chung atang hian kan siam a ngai a ni.

Ka vei lutuk a, 2008 khan hemi chungchang hi ka lo ziaak ve tawh a, SCERT Director hnenah pawh ka thehluat ve rawk a ni. A tih dan tur te, college thlenga a kalpui dan tur – ‘Entrepreneurship and Education’ tih te saptawngin ka ziaak a, ka han ti ve vak a. Tin, sikul hi a tlawh nasa pawl chu ka niin ka hria a, Thawhtanni pawh khan pahnih chu ka han tlawh leh a; ka awm hle hle thei lo a ni ber a. Zirtirtute hi ‘an chhe hran lo’ tih hi ka hmuh dan a ni. Chutah chuan zirtirtute hian tihphur an mamawh a, ti phur tur chuan an thawhna hmun hi kan siam that a ngai.

Inhnialna awm thei deuh mai, ‘Hawthorne Effect’ an tih, Mayo ten experiment-a an tih – ‘*Light ringawt hian engtin nge hnathawk ho rilru a tih danglam*’ tih te, research tam tak a awm a ni. Zirtirtute pawh hi an hnathawhna hmun hi ti danglam ta i la, an hnathawhnaa zirlai an enkawlinaah te, an hnathawhna te hi engtia danglamin nge an awm’ tih hi rilruah a awm fo a. Nu leh pa tam takin ‘hei hi ka fapa/ka fanu luhna a ni’ tih tur hian sikul hi an hmu lo thin a ni. Chuvang chuan, theihtawp kan chhuah a ngai.

Kan bial chhung sawi ve a ngai tlat. Kan Minister hnenah hmanni *Zawhna & Chhanna* hunah ka sawi nual tawh a; hei, a list ka nei a, hmanniah hmuh ka tum a, ka nawmsam loh avangin ka keng thei lova. Amah chu ka hmuh tho a, ‘phek sawm chuang an mamawh’ te kan ti a. Nakinah Minister pawh kha ka rawn hmuhpui leh dawn a ni, he mi list nen hian. Kan bial chhunga pipu chhe zawng zawng, tawlhphahrit chhe zawng zawng kan siam tawh a; computer/printer nei lo; a chhia pawh ni se, nei lo pawh ni se, kan thuam vek tawh a; ceiling nei lo zawng zawng hi kan bial chhungah hian ceiling pek vek kan tum a. Chutiang chuan bang te a lo khi tem-tuam a, zun in nei tha lote pawh an awm; mipa leh hmeichhia zun in nei hrang lo te pawh an lo la awm a ni. Chungte pawh chu hma lak kan han tum ve a.

Tin, kan Minister zahawm tak min tuipuina azarah bawh adopted school kan han nei ve a, tun Inrinni khan kan han hnatlang a, mi 100 chuang an rawn chhuak a. YMA-in hna min thawh sak a, school chung kan han thlak chu a lawmawm lutuk a ni. Thawhtanni-ah ka han kal leh a, mi eng emaw zah kan han thawk leh a, chutah chuan an lo hnatlang leh a. School kha YMA hruaitute khan an lo vei ta em em mai a. Chutiang

chuan ‘khwatlangah hian YMA te an inrawlh chuan hma kan sawn dawn a ni’ tih hi a lang chiangin ka hria a. Sawi tur tam tak a awm a, ka han duhtawk chho dawn ang a.

National Achievement Survey, India ram hmun hrang hranga school pawl 3, pawl 5, pawl 8, pawl 10 zirnaa mathematics-ah khan *All India* kan pha lo fai vek a ni. Chu chu 2021 report, a thar ber a ni. A dangah chuan, language-ah chuan kan tha tlangpui; engatinge Maths-ah leh Science-ah khan kan that theih loh tih hi rilruah a awm a. Amaherawhchu, kan sorkar hmalaknain Mizo tawng ngeiin kan han nei dawn a, Science leh Maths-ah te hetiang hmalakna a awm te hi a lawmawm ka ti tak zet a ni.

Hei, LESDE lamah han lut ve dawn i la. Kan MYC Chairman Dr. Vanlaltanpuia leh a thawhpuite, Minister te pawh a ni ang, chung hnathawh azarah KC Zalena leh Betty Lalrinfeli te Mains Exam an han through chho ve leh thei ta a, ka lawmpui tak zet a ni. LESDE hnuaiyah hian ITI te kan nei a, *Pum Innovation Fair* kan nei te kha a hmuhnawm ka ti a, kei pawh ka kal a, ka kal nawn nghe nghe a ni. A nuam ka ti; a hmuhnawm ka ti. Khatiang kha tih zel tlak a ni. Tin, *National Skill Competition*-ah Mizoram atangin lawmmawm la thei pahnih kan awm te kha a lawmawm ka ti a. Minister leh a thawhpuite hmalakna lo ngaihthlak/ lo hriat te pawh a lawmawm thin.

ITI nen thawhhona tur kan kan bialah sawn ‘*Common Facility Centre for Home Trades*’ kan ti a, plumbing, electric wiring, steel fabrication tih vel tihna tur hi kan buaipui ve a. Amaherawhchu, sorkar college an rohsan deuh tawh hi kan han dil a, kum chanve aia tam file a tang ta reng mai a, a buaithlak thei khawp mai. Hei erawh chu department dang thil a ni a, amaherawhchu, ka han sawi tel ve hrim hrim a ni.

Fisheries lam kha ka han lut leh lawk ang a. Pu Dy. Speaker, *Chakai farm* kha experimental a ni lo a ni; kan Minister pawh hian a chiangin ka ring. Note sheet te, a hmaa demand kan sawinaah te kan Minister thusawi kha lo en leh rawh u; ‘experimental’ tih a ni lova. Kan Minister zahawm tak hi in tisual a ni; keini zirtirtute chuan ‘experimental’ kan ti a, a fuh loh leh, ‘experimental a lawm’ kan ti a, kan nui ho hak hak kha a ni a, tunah erawh chuan ‘experimental’ tih a ni.

LAD lampangah khan han lut leh lawk ila. Nichina Member zahawm tak Pu Vanlalhlana’n a rawn sawi ang khan, *Mizoram Village Council Bill, 2023* a tlang ta lo kha pawl ka ti a. VC te thuneihna pek belh tur te, District Development Committee leh khatiang chi hrang hrangte, a draft-a hmuh theih khan a lo awm ve bawk a, development kan neih zel theihna tur atana rahbi pawimawh tak niin ka hria a. Nakinah pawh a rawn lut ngei turah pawh ngai i la. Tin, LAD Directorate hi kan bial chungah a awm a, MINECO lamah insawn phei an tum tawh a, awmna tur hmun saw an indaih lo tawh em em mai a, DLAO phei chu awmna tur a neihloh kan ring hial a. Chutiang chuan tunah pawh garage awmsa te saw tihpum leh mai tur em ni tih te rilruah an nei niin ka hria a. Hetah hian nasa taka hma lak a ngaiin ka hria a.

Tin, Legal Metrology lampang kha a tawp ber nan ka han lut leh ang a. Hei, 'Supply' han ti tawp mai i la; Supply Department lam hi ka luh chilh nasa ve angreng thin a, sawi tur te a tam thin a. Legal Metrology hi kan thumchak a ngai a, kan tihchak a ngai a ni. Mipui zawng zawng mar dektu pakhat a ni a, mipuite consumer kan ni vek a. (**Dy. Speaker:** I zo thei dawn tawh em aw?) Chumiah chuan an chak chuan mipuite tan thil tha a thleng thei dawn niin ka hria a. Keima experience-ah ngei pawh, cement chak leh chak lo an lo tehna kha in kan sak ve pawh khan an result kha ka hmang a, an result hmang khan cement company te kha kan lo thlang ve a ni. Chutiang chuan an hmalakna te kan lo en a, 'kan lo hmang tangkai a ni' tih kha ka han tarlang tel duh a ni e. Ka lawm e.

DEPUTY SPEAKER : Member zahawm tak Prof. F. Lalnunmawia ka sawm e.

DR. F. LALNUNMAWIA : Aw le, Pu Dy. Speaker, a hmasain kan minister pathumte zinga pakhat - Er. Lalrinawma demand-ah han tan ka duh a. Ani hi budget a pharh hmasak ber tur a ni a, sawi pawh ka phur khawp mai a, aniin min han kaihruai tur pawh hi ka lawm a. Pathian zarah kan dam ang a, tun mai ni lo, nakumah te, kum leh zelah te pawh a la pharh zui zel ka beisei a, duhsakna ka hlan bawk a ni.

Social Welfare hi department huam-zau tak a ni a. Nu naupai atanga naupang, pitar/putar thlenga enkawltu, mi chhumchhia te leh harsa bik te, rualbanlo te thlenga enkawltu department a ni a. Chuvang chuan, department pawimawh tak a ni a. Kan bialah pawh kan chhawr a, kawng hrang hranga hmasawna hnate pawh min thawh sak a. kan lawm hle a ni.

Tin, chung zinga han tarlan ka duh chu – Kelsih-ah sawn *Tribal Research Institute* tur building sak a ni a, zawh-thawkhak a ni tawh a, vaibelchhe 20.8 senga sak a ni a. Chutah chuan Mizo-bungrua leh Mizo-thawmhnaw, mizo nun zia pho-lang thei tur dah tum a ni a. Tin, a bulah sawn 'Ropuiliani Museum' tih, Mizo nu-ropui, *Ropuiliani* hriatrengna sak a ni bawk a, museum pawh vaibelchhia 15 zet senga sak a ni mek bawk a ni. Zawh fel a nih hunah chuan Mizo hnam zia leh nunphung tarlang thei tur thil tam tak dah a ni ang a, kan thalaite leh zirlai research ti mite tan pawh thil tangkai tak a rawn ni ngei ang tih ka ring a ni.

Tin, he department hmang hian Social Welfare hian ZMC - kan medical college neihchhunah Tribal Girls' Hostel min sak sak bawk a, hmanni lawkah minister hoa hawn a ni a, kan bial chu kan lawm hle a ni. Chutiang chuan he department hi kan chhawr tangkai a. Tin, vanduaiana avanga kut tual lei chham te leh mi rethei bik te chhawmdawl hna pawh he department hian a thawk a, kan bial ngeiah pawh kan chhawr hle a ni. Tin, kumin budget-ah hian he department Grants-in-Aid - non-salary component-ah hian

cheng nuai 2370 zet dah a ni. Heng hmang hian kawng hrang hrangin hna a thawk ang a, kan tangkai pui zel ka beisei a ni.

Tin, AH & Vety-ah hian ka kai ang a. Thil lawmawm deuh chu - he department hmalaknain keini bial chhungah pawh vawk-vulh leh ar-vulhna lamah pawh nasa takin min pui a, keini hi ar vulh nasa tlangdung kan ni a, Aizawl South-III bial hi Aizawl chawmtu pawimawh tak kan ni ve a ni. Tin, 2019 khan vawk vulh turin SEDP project-ah mi eng emaw zat thlan anni a, tuna ka lawmna deuh chu - tun tumah hian khang thlan bikte kha kan intiam tawh ang ngeiin cheng ₹3,00,000/- hmu tura ruahmanna a kal mek hi lawmawm ka ti a, sorkarin a lo intiam tawh nuaih 3 an dawng dawn a ni. Chu chu Pu Dy. Speaker, ka lawmna a ni a. A nawlpuiin la pe thei rih lo mah ila a hmahruai, kan thutiama kan din zia lantir nan cheng ₹3,00,000/- an dawng dawn a ni. Tin, Ar vulhtu te pawhin ₹150,000/- dawng turin tunah hian sorkar department in ruahmanna an siam mek hi kan lawm hle a. Tin, *National Mission Livelihood* hnuaiah te nasa taka hma lak a ni a, ran vulh lamah hma kan sawn hle a ni. Tin, department lamin VFA eng emaw zat lak belh tawh leh, lak belh zel tumin hma a la te hi ka lawm hle a ni.

Tin, Excise Department ah hian - hei, kan ram hi ruihhlo hian min run a, nasa takin kan thalaite ruihhlo bawihah an tang mek a ni. Nasa lehzuala Kohhran leh NGO te nen hma lak a ngai hlein ka hria a. Chuvang chuan, manpower indaihlohna te pawh hi phuhru tura tan kan lak deuh deuh te pawh hi ka beisei a ni. Chu chu a chanpual bika ka han sawi duh ch u a ni a. Kan Minister zahawm tak hi theih ang tawka chak taka min hruai zel turin ka beisei a, duhsakna ka hlan a ni.

Tin, Pu Lalchhandama Ralte, Minister zahawm tak demand - School Education-ah hian han luh ka duh a. Pu Dy. Speaker, hemi kan sawi hian tun term liam taa sorkar kha a tehkhin loh theih loh a. Kha Congress kaihhruai sorkar kha sum renchem thiam niin an sawi thin a. Chutih rualin, a hnathawhte leh kan school dinhmun te kan thlirlet chuan, school building chhia a tam em em a, repair hleih theih loh, zirtirtu indaih lo reng rengin kan awm a, zirtirtu leh khawtlang ten thawh khawmin an ruai a nih kha. Chutiang chuan, mipui kan phun luai luai a, he kan sorkarah erawh chuan School building chhia te repair an ni chho ta mek a, ka bialah pawh tam tak repair a ni tawh a ni. Tin, zirtirtu pahnih-khat lek te, pathum lek awmna te kha, zirtirtu pali-panga te kan lo nei ta a, rawih chawp ngai lutuk lovin tam zawk chu kan lo awm ta a. Chutih rual erawh chuan zirtirtu nghet ho an pension ve zel thung a, indaih viau thin kha kan indaih lo leh tan tawh a. Chuvang chuan, sorkar hian SEDP hmangin min rawih belh sak leh se chu kan duh hle a ni.

Tin, grant-in-aid hi tun sorkar kumthar lo awm turah cheng ₹3,60,708/- zet dah a ni a, heng hmang hian school tihhmasawn a nih ka ring a. A bik takin kan sawi fo tawh angin Samagra a thawkte hlawh tihpun a ni te kha ka lawmpui a, ‘an hamthatna tur pawh sorkarin a ngaihtuah sak zel a ni’ tih ka hriatin kan lawm hle a.

Tin, CSS hindi teacher sang chuang rawih a han ni bawk a, chuang chuan school-in hma a sawn a, sorkar school awm mang lo te kha tunah chuanin an buk em em tawh a. Ka bial Sateek-ah school naupang 10 pawh tling mang lo thin kha tunah chuan 100 chuang an lo awm ta a, khawtlang tangrualte nen school tihlen hial te a lo ngai ta a ni. Tin, Samtlang-ah pawh school naupang nei tlem hle thin kha tunah chuan mawi tawh tak an awm tawh a ni. Chuwang chuan, sorkar school-a kal naupangte an lo pung a, sorkar school-in rin an hlawh chho te hi a lawmawm hlein ka hria a ni.

Tin, LESDE hi tawi tea kan sawi duh chu - an thawm a na viau lo na a, Labour Welfare fund-ah hianin 1% labour cess a lut a, chu chu Mizoram-a kut hnathawktute'n nasa takin an chhawr a. Chutihruah chuan hei aia society-ah inziak lut leh zual tura *awareness* kan neih a tulin ka hria a, bial tinah hemi zawng hian hma la se kan tangkaipui leh zual ka beisei a ni.

Awle, Minister zahawm tak Pu K. Lalrinliana chanah hian lut leh ila. Food, Civil Supplies & Consumer Affairs ah hian lawmna deuh ka neih chu - Kudam indaih lo reng renga kan awm thin kha tunah Sihmui-ah kudam lian tak din tum a ni te, tin, Mizoram ina kan mamawh em em oil dah thatna fur leh eng emaw hleka kan buaina thin kha a awm tawh loh nan oil depot lian din tura hmalak a ni te hi a lawmawm hlein ka hria a ni.

Tin, Fisheries Department-ah hian, hei central scheme PMSSY atangin keini bialah pawh tuikhuah nei ten sangha dil han tihthat leh chei-thatna eng emaw zat kan hmu a, kan lawm hle a ni.

Tin, Pu Dy. Speaker, *chakai-farm* chungchanga tawitea sawi ve ka duh chu - ka bial Samlukhai leh Sialsuk-ah te pawh chakai tihpun dan tur zir-chianna neih a ni a, tunah an kalpui mek a, hma erawh chu kan sawn lutuk thei lova, a zir-chianna ('pilot project' te pawh ti ila kan sawi sual awm lo e) Fisheries Department-in hma a la a. Mi-thenkhatin social media-ah chakai hmunah brocoli te ching ang deuha an rawn chhuah te a awm a. Engpawh nise, hei hi chu kan minister-in a la rawn sawifiah ka ring a. Ka sawi duh zawka chu - he zir-chianna 'pilot project' kan tih te hi a pawimawh khawp mai a, India sorkar-laipui pawh hian hmasawanna hna thawh nan hian research grant hi a ui lova, University leh college-ah te hetiang project hrang hrang zir chianna nei tur hian sum tam tak a pe thin a ni. Chutiang deuh chuan Mizoram sorkar pawhin ruahmanna siamin, 'chakai khawi/vulh hi a hlawhtling thei dawn em' tih a han enchhin a ni a. A hlawhtlin loh chuan, 'a tha thei lo a ni' tih kha kan hmu mai dawn a. Tin, a lo tha thei a nih chuan, kan tipung mai turah ka ngai a. Chutiang a nih vel laia a chhe thei ang bera lo sawi chiam kha chu 'a la hun lo deuh em aw' tih hi ka ngaihtuah a ni. Chuwang chuan, department hmalakna ngaichangin, 'chakai khawi lamah hian hma lak vak chi a ni em?' tih kha kan la hmu mai turah ka ngai a ni.

Tin, Pu Dy. Speaker, a tawpna atan .. (**Dy. Speaker:** Ngawi rawh aw. Kan chawl hun kha kan thleng a, kan sawi zawh tir law law dawn em ni?) (*House-in a remti a..*) Awle; tawngkam hnih-khat a ni mai a, Pu Dy. Speaker.

Ka han sawinawn duh thin chu - thenkhat ten kan sorkar hi sum hman uar lutuk leh hman-puk te pawh uar lutuk ang deuhah te an sawi thin a. Amaherawh chu, ‘engnge kan hnathawh’ tih kha en tel ve a ngaiin ka hria a. School building tam tak kan thawm that te, zirtirtu indaih lo tam tak a sang chuang kan lak te, kudam tam tak kan repair te he kan sorkar chhung hian a tam em em a ni; kan sawi seng lo ang a. Chuvangin, sum kha a tul chuan sorkar pawn a puk mai a; a pawimawh erawh chu – ‘engnge kan hnathawh’ tih kha a ni. Chuvang chuan, mipui tena kan chhawr theih turin sorkarin thil hlu tak tak a siam a ni. Heng hmasawanna kan hmuh te hi kan thlir tel a ngai a, a sum kha a lo-thlawnin he sorkar hian a seng lova, mipuite mamawhah thil tha tih nan a seng a ni. Chuvang chuan, thil tha tih nan chuan lo seng tam deuh mah ila emaw, loan te pawh lo la deuh mah ila a tha tho a ni.

Vawiina kan Minister pathumte demand hi, ‘phur takin ka rawn thlawp a ni’ tih han sawi a ni e. Ka lawm e.

DEPUTY SPEAKER : Dar 5:1 a ni a, minute engzat nge kan chawlh ang? Darkar chanve chawl ta ila, dar 5:31 PM ah kan tan dawn a ni. 5:45 zawk maw? In duh dan kha sawi Chiang ula. Aw le, 5:45 a nih dawn chuan, dar 5:46 PM-ah kan tan leh dawn a nih chu. Kan chawl tawh ang aw.
(*Recess till 5:45 PM*)

5:46 PM

DEPUTY SPEAKER : Member zahawm tak Dr. Vanlaltanpuia ka sawm e.

DR. VANLALTANPUIA : Pu Dy. Speaker, ka lawm e. Vawiinah Minister pathumin an demand te an rawn pharh a. Chief Minister zahawm tak bakah Speaker leh he House thahnemngaihna in MLA la tuai deuh hote Delhi-ah training min kal tir ve thin a. Chuta ka zirchhuah ve chu - Parliament-a demand an pharh dan leh State-a kan pharh dan hi a lo inang chiah lova. Anni chu, Finance Minister-in demand a han pharh hnu hian an chawl vang vang a, chumi chhungin Parliament-a committee hrang hranga expert-te sawm-khawmin budget te an lo chinglet thin a. An rawn kal let leh hi chuan sawi lutuk ngai tawh lovin, mahni bial bial sawi vak ngai lo hian an tawp mai thin a. Keini erawh chu kan tih danphung hi a la nih chiah loh avang hian sawi thiam a har deuh thin a.

Leh lamah department te kan hriat chian vek loh avang hian thahnem ngaihna in han sawi ve chiah mah ila, mi department suggestion pe ang kan nihna chen a awm

bawk si a, sawi tur chin hi hriatthiam a har em mai a. Chuvang chuan, mahni bial mamawhte demand atan kan sawi hi a ni deuh maiin ka hria. Chuvang chuan rampum huap anga suggestion tha tak tak te han sawi ve khan mi department va sawi sak dinhmunah kan ding a, hriatthiam har ka ti a.

Demand No. 20 - School Education atang hian ka tan ang a, Pu Lalchhandama Ralte, Minister zahawm tak enkawl a ni a. Ani hi mi sincere em em mai a lo ni a. Foreign-ah te kan han zin dun a, hun ngai-pawimawh mi a ni tih te ka hria a. Function a telna reng rengah pawh darkar chanve tala thleng hma ziah mai, tiang khawpa minister sincere a lo ni a, a department enkawlah pawh hian fak a phu hlein ka hria a.

Pakhatnaah chuan - Hna lak chungchangah hian zirtirtu eng emaw zat - SEDP teacher te, Hindi teacher te, MR teacher te pawh lak a lo ni tawh a, *free and fair* process a hmang thinin ka hria a, a fakawm hlein ka hria a ni. Teacher transfer and posting-ah te pawh hian a lai khawpin ka hria. MLA te'n kan ngaih pawimawh te pawh hi min ngai pawimawh sak thin a, a chungah pawh ka lawm em em a ni.

Kan member-puite'n he department achievement tam tak an sawi tawh a. Amaherawhchu, keiina ka lo chhinchhiah ve, miin an sawi lutuk loh han sawi ve ka duh a.

Kan hriat angin Pu Dy. Speaker, Covid-19 lai khan kum hnih chhung kha chu '*lockdown; lockdown lo*' ti reng kha a ni a, tiang khan hun kan hmang a. Hemi chhung hian India ram pumpui off-line mode-a pawl 10 leh 12 exam tir awm chhun kan ni a, a lawmawm takzet zet a ni. India ram State dangte pawhin an tih theihloh laia he department-in khatiang achievement an neih kha a chhuanawm ka ti a ni. Chhatisgarh atang te pawhin kan thawm thangvel te an lo hria a, rawn zirchiangin an rawn kal tih te ka hre leh zel a. Chuvang chuan, he House-ah hian an achievement hi ka duh a ni; department ropui tak a niin ka hria. Tun chena kan achievement te hi a lawmawm ka ti a - School *timing* sawn-tlai te, Govt. School siam thatna kawnga NGO leh Mizoram-a pawl hrang hrang hote thawhpui sawm atangin, mipui pawh hian *sense of ownership* (a neitu nihna) hi kan neiin, school pawh hi an vei viau tawh niin ka hria a. Heng zawng zawng hi kan Education Minister zahawm tak leh department thawktute hmalakna niin ka hria a, a lawmawm ka ti a ni.

Ka bialah hian school chhe zual min lo chhinchhiah sak tura ka duh a awm a. Chung zingah chuan - Phaileng South School P/S te, Pukpui Primary School -II te, Mausem Primary School te, Bualpui -V Middle School te, Rawpui Middle School te, Sekhum Primary School te, Ramlaitui RMSA an ni a, khawngaih takin min lo chhinchhiah sak se ka duh a ni.

Ka let leh lawk ang a. 'Education' hi a pawimawh em avang hian, ka member-puite pawh khan an sawi nasa tawh a. Delhi sorkar education-a an hmingthatna te kha kan hria a. Tunhnaia ka zuk zir chhuah ve tak chu - Andhra Pradesh hian scheme tha deuh mai, '*Amma Vodi*' an ti a, India ramah an hming thatpui khawp mai a. Smart Class introduce te, Bijous App han pek te an lo hmingthat pui em em mai a, budget te pawh an ngah em em reng mai a. Heng te hi kan Minister zahawh tak pawh hian a zirchiangtu turte pawh din sela, mi hnen atanga idea lak te hi thil pawimawh tak a ni a. Chuvang chuan, India rama zirnaa che tha em em AAP - Delhi sorkar te leh Andhra Pradesh te pawh hi lo zirchiang se, tih te kha ka sawi ve duh a.

Tunhnuah hian tling lo tak chungin Mizoram Commission ka han enkawl ve a, *All India Service* coaching te hi kan bei nasa ve ta a. Heta ka thil hmuhchhuah ve chu - Kan curriculum leh syllabus te hi a hausa tawh lo nge ni, *Concept Clarity Education* lamah hian kan tan a ngaiin ka hria a. Vai lehkhathiam tak takte nena han inelnaah hian concept-a chian hi a ngai em em mai a. Vaki tawng inzirtir '*good morning*' tih kha tlai lampangah '*good morning*' a tih ang deuha, zirna ang zelah *spoon-feeding* kha chuan 'education' kan hriatthiam dan a dik thei lova. Chuvang chuan, han Education Minister hian *quality* lama kan than theih nan tan han la leh se, tih hi ka sawi leh duh lawk a ni.

Demand No. 17 - FCS & CA hi ka sawi leh lawk ang a. Minister zahawm tak Pu K. Lalrinliana enkawl department a ni a. Kan Minister ho hi an fel hlawm khawp mai a, kan ute, kan pa rualte an ni a, an bulah hian kan thla a muang em em a ni. Pu K. Lalrinliana hi mi a dawnawn dan te, a polite dan te leh mi a thlamuan thiam dan te hi ka ngaihtuah a, a ropui ka ti a. Aizawl-ah hian hian mikhual ang deuhin Lunglei atangin ka rawn awm ve a; cooking gas harsat theih zia leh mahni chhungkua atana lo tlan ve dawr dawr tawh ka ni a. A department enkawl chhunga gas supply nitin trip 17 kan hmuh thin 23-a tipunga Mizoram min han enkawl hi a lawmawm ka ti em em a, he House-ah hian lawmthu ka sawi duh a. 'Lei tlahniamah gas bur khat cheng ₹2,000/- a awm' an ti a, ka tlan thla dawr dawr thin a, tunah chuan khang harsatna te kha a awm ta lova. Chuvang chuan, Pu Rintea chungah hian lawmthu ka sawi a. A department FCS & CA hmalakna zawng zawngah hian *basic amenity* (nitiin kan mamawh) buhfai, gas leh oil te hnianghnar taka Mizoram min han han enkawl hi a lawmawm ka ti em em a ni. Ramri buai avanga gas/oil supply ah buai chang han neih mai te leh buhfai han tlakchham te hi State pakhat ve riang-ruang tan chuan a zahthlak em em mai a, Chumi atana oil depot hmun an han identify tawh te hi a lawmawm ka ti a, 'han tang zel sela' tiin ka chah duh bawh a. Gas bottling plant-a hmalakna te an tih puitlin theih chuan, gas bur 7,000 nitin an siamchhuak thei dawnin ka hria a. Hengte hi a ropui ka ti a, fak a phu hlein ka hria. A department chungah hian 'Mizoram mipui kan lawm em em a ni' tih hi kan sawi duh a ni.

Demand No. 29 - Social Welfare-ah hian Er. Rinawma, minister thar kan nei a, vanduaithlak takin kan minister pakhatin min chawlh san a, ani hi minister a rawn ni

thar ta a, a lawmawm ka ti a, ka han congratulate duh a. Minister tha tak anih chhunzawm zel pawh ka beisei a ni. Amah hi mi humble leh mi-inngaitlawm tak a nih anga *Mizoram mipui-idol* pakhat a nih zela, he department a enkawl chhohna tur zawng zawngah hian tha taka a enkawl theih nan he House kaltlang hian duhsakna ka hlan a ni.

Social Welfare hian sawi ang khan Article 275(1) hmangin Mizoram tana ro- tling thil tam tak a siam thin a, khawngaih takin minister hian min lo chhinchhiah sak se ka duh chu - ka bial Serkawn, Zotlang hi chhim lam tan chuan kan *St. Pauls*, ve a ni a, kan school neih that chu *Baptist Higher Secondary School* a ni mai a, sawtah sawn mi kan accommodate zo lova, a bul vel Zotlang Higher Secondary School-ah te an kal ve hlawm a. Entirnan - Tlabung leh western-belt atang tein student an tam a, Article 275(1) atang hianin DC kaltlangin hostel tha deuh kan mamawh khawp mai a, hei hi khawngaih takin tun kum atana hma lakna turah hian hma min lak sak se ka duh a ni.

Demand No. 7 - Excise & Narcotics Department-ah hian ka han lut ang a. He department hi a mawhphurhna a sang hlein ka hria a. Kan hriat angin global menace - *drug trafficking* hi Mizoram hi a tuartu ber India ramah chuan kan ni a, an hmalak tawhna a ropui ka ti a. Excise & Narcotics hi drug an *seize* tawh zawng zawng avang hian fak an phu hlein ka hria. Khang ho kha awm ta lo se, khati zat kha man lo ta ila, 'No. 4' kan tih te, 'meth' kan tih ang ho chite khan Mizoram hi a tichhe hlein ka ring a. Chuvangin, he department hian tan han la zel sela, an hnathawh tawh zawng zawngah te a lawmawm ka ti a, duhsakna ka hlan bawka ni.

Nichinah khan member pakhatin a sawi a, Aizawl lo kal tur chuan Lengpui-ah tum a ngai a, hemi kawngah hian zurui hmuh tur an awm nasa em em leh, a chhun en lai pawha hetiang thil hmuh hrehawm awm thin ho hi thenfai thiam emaw, awmze nei deuha hmalak thiam a ngai hlein ka hria.

Tichuan, wawiina kan minister-tena demand an rawn pharh ho hi a lawmawm ka ti a, ka support a. Ka inbuatsaihna chu a awm teuh mai a, mahse ka sawi zo thei dawn ta lova. A zavai hian 'he House hian lungrual takin pawmpui ila' tiin ka rawn thlawp a ni e. Ka lawm e.

DEPUTY SPEAKER : Member zahawm tak Pu C. Ngunlianchunga ka sawm e.

PU C. NGUNLIANCHUANGA: Pu Dy. Speaker, a thu-ah hian lut nghal mai ila, hun a tlem si a.

Demand No. 20 - School Education Department hi helai House-ah hian ka sawi tawh a, mimal pawhin ka sawi fo tawh a. Ka bial Bungtlang South-ah khuan Higher

Secondary School ‘*Samagra* atangin min din sak ve teh u’ ka ti a, a la hlawhtling hlei thei lova. Hei hi tun sorkar chhung ngei hian Bungtlang South-ah khuan min din sak theih chuan, khaw 50 velin an hmang tangkai dawn a ni. ‘Min dah sak thei hram se’ tih hi a pakhatnaah ka sawi duh a.

Tin, Lawngtlai District high school headmaster post ruak hi tun sorkar chhung hian hnawkhah theih a ni ang em? Tun MNF sorkar chhung hian seniority promotion leh LDE te hi, vawihnih post ruak eng emaw zat hnawh khah a ni tawh a, Siaha District leh Lawngtlai District hi kan tel ve mang tlat lo mai a, chu chu tun sorkar hian tih tumna te a nei hnai em? Min tih sak ve tho dan te a awm em? Keini pawh Mizoram chhunga mi ve tho kan ni a, kalsan kan ni fo mai hi chu kan hrilh a hai deuh a. Engpawh nise, kan inpumkhatna te tinghet zualtu atan pawh a pawimawh khawpin ka hria.

Tin, a pathumnaah chuan - Kan minister pawh hian a hrechiang ang reng a, sorkar hmasa lam atang khan lo buaipui tawh a ni a. District Council-te sawn middle school chin hi 6th Scheduled hnuai a awm annih angin District Council-te kuta awm a ni a. *Provincialization*-ah khan school eng emaw zat a lut a, khata zirtirtute kha state hnuai hian an awm tlat mai a. School pakhatnaah zirtirtu Mizoram sorkar hnuai a thawk leh state hnuai a thawk an awm dun a, a buaithlak lutuk a. Sawng te saw kan hotu thenkhatte tawngkam ang deuhin, bang chhak kha, bang thlanga sawn mai tur a ni a, kha an pawisa state-ina a chhawr ho kha district council budget-ah corporate mai sela a zo a ni mai a; mahse vawihnih thlang hian tih a ni lova, saw sawn administration-ah harsatna tam tak a thlen tlat mai a. Tun sorkar chhung hian kan minister zahawm tak hian min dahsak thei sela a lawmawm hle ang.

Tin, palinaah chuan - Lumpsum Grant ka bialah hian pahnih a awm ve a, MLA fund atangin kumtin cheng ₹2,00,000/- kan pe thin a, amaherawh chu congress sorkar tawp lamah khan cheng ₹2,50,000/- a tihpun sak annih tak atang khan kan han awl a. school building te BADP atang khan kan sak sak a, an mamawhna hi a sang khawp mai a, tunah hian cheng ₹2,50,000/- an school khan kum khatah an dawng ve a, chu chu zirtirtu pathumin an intawm a ni a, an mangang khawp mai a. M. Kawnpui-ah phei chuan a building kha a tlu lek lek a, MLA fund atangin cheng nuai 5-in kan sak sak a, zirtirtu an indaih lova, thlakhata cheng singhnih vel hlawh MLA fund atanga pek turin kan han chhawr ve rawih mai a, an khua khan an mamawhna a sang si a. Kha kha tun sorkar hian tihsak hram dan a awmthei ang em? Nakinah min react se ka duh a.

A tawp ber atan chuan - SEDP hnuai hian, kan sawi fo thin angin ruling bialah chuan a awm deuh thup mai a, opposition bialah chuan a awm ve lova, hmeithai zinga eng emaw zawn ang deuh tlat a ni mai a. Tun sorkar hi tawp ta se, SEDP hnuai an chhawr ho hi engtingge an kal ang, tih lai te kha min han hrilhfiah sak se ka duh khawp mai.

Tichuan, Pu Dy. Speaker, Demand No. 17 - FCS & CA Department-a kan Minister hi a chhuanawm ka ti a. Pu Dy. Speaker, nang pawhin i hriat kha - I bialah te, ka bialah te, Lawngtlai District-a awm si, supply centre Siaha District hnuaiawmte, Hnahthial hnuaiawm te, Lunglei DCSO hnuaiawmte kha eng emaw zat siamrem niin Lawngtlai District hnuaiawm dah a ni tawh a. Tunah hian Chawngte area leh Borapansuri vel khi Lawngtlai District tho a ni a, Lunglei DCSO hnuaiawm an la awm tlat mai a. Hei hi tun sorkar hian han *champion-pui* law law ula, a district inthen dan - Lawngtlai District hnuaiawm kha chu Lawngtlai DCSO khan enkawl mai sela tih kha ka han sawi duh a.

Chumi piahah chuan, kan bial Kawlchaw, *Kawlchaw-theihai* a lar viau hi; Kawlchaw, Sihtlangpui leh Chawntlangpui hi ka bial chhunga mi ni siin Siaha DCSO hnuaiawm a awm leh a; Kawlchaw West, Sihtlangpui leh Chawntlangpui (chhimtuipui thlanglam a nih chu); chu chu Siaha DCSO hnuaiawm a awm a, Lawngtlai DCSO hnuaiawm min dahsak ula a remchang zawk viauin ka hria a ni. Tin, Lawngtlai DCSO Office hian FCI kudam atangin buhfai a lakchhuah thin a ni a, department inspector pakhat emaw, state hnuaiawm thawk kha FCI-ah khan a buaipuitu kha a ni a. Tunhma chuan office room pakhat a luah ve thin a, tunah chuan kha kha FCI hovin an hnawtchhuak tlat mai a, khatah khan harsatna a nei a, kha kha kan Minister zahawm tak hian min hriatsak se; a theihloh pawhin an ram sirah khian lian tak pawh a ngai lem lova. Khang te kha dah sak theih dan awm sela a lawmawm khawpin ka ring a. Tin, Lawngtlai DCSO Office khi kan sorkar laia kan sak a ni a, kan lo sa te deuh hlek a ni ang, an lenglo khawp mai a. Han tihlen sak deuh dan awm thei se a thain ka ring a.

Tin DCSO quarter hi a hlui tawh khawp mai a. Chuti lain Store-keeper quarter eng emawzat leh kudam te sak a ni a, a lawmawm a. A hotupa ber DCSO quarter kha a chhe berah a tang tlat mai a; khi khi ‘a ngaihpawimawhawm khawp mai’ ka ti a nih chu. Kha kha FCS&CA lamah ka sawi theih ni sela.

Tin, Vety Department - Demand No. 34 hi, Pathian leh kan hotute duhsaknain kum 5 ka lo enkawl ve tawh kha a ni a. Hei, vawiin-ah kan Minister thar ka lawmpui a. Tin, a ni hi mi viak-tha, mi-thil pending lo, a tawng ang phat phat hi a ni mai a, a tawng pawh hi a liam zawt zawt mai a, khatiang ang deuh tho khan. Kum 10 MLA kan han ni ho ve ta a, kan inhre ve thawkhat viau a, a chungah beiseina sang tak pawh ka nei a.

Chutih lai chuan hei, vawiina kan hrawn sorkar hian kum 5 a lo hmang liam dawn ta a, budget vawi 5-na a lo ni ta a. Rawtna pawh ka siam ve a, mahse a thleng zo dawn lo a ang khawp mai a.

Ramrikawn-ah khuan ranchaw-herna an nei a, tunhma chuan nikhat ah hian metric ton 5 vel a her thin a, kan hunlai khan IRDF hmangin kan tilian a, metric ton 11 vel an her thei ta a. Khu khu ka hunlai khan ‘out-source tur; sorkarin a enkawl reng tur

a ni lo' kan ti a, a file te pawh kan kal tir a. Mahse hei kum 5 a kal a, department lam hian a phal vak lo ve deuh a; khung te khu kan sum hnar pakhat a ni ve a.

Tin, tunhma khan, tikhan an lo her tawp mai a, revenue te pawh 'cheng khat tal sorkarah in pe ve tur a ni; in chhunglut ve tur a ni' kan ti a. Tukin zinga ka zawhnaah chhannaah khan 0.05/kg an lo pe ve a. Khung, sorkar-ina sum kan sen teuh teuhna te pawh khu mimal - entrepreneurship emawin nei sela. A bul kan tan tawh a, a tha viauin ka hria a, a bak hi chu mimal kutah lut ta sela.

Hei, Mizoram sorkar chu kan hria a, nimirah *General Discussion* te kan nei a. Sum leh pai kan neih loh zia, keimahni resource kan nei ve loh ziate. Vety hi sum lakluh theihna, keimahni kan intodelhna mai piahlamah kawng thatak niin ka hria a. A bulah khuan 'ZPDS' an ti a, society pakhat, sorkar ang tho a kal a ni a. Ar-vulhna an nei a, he sorkar hian hma a lo lak belh a, a lawmawm ka ti a. Kan hunlai khan nikhatah Artui pum 200 tui theiin an siam a. Tunah hian IRDF a tang te leh SE a tang tein nuai khat tui turin hmalak mek a ni a. Khungte khu Haryana emaw, Hyderabad Artui emaw ringawt ni lovin, (ka hmaa mite pawhin an rawn sawi tawh kha) keimahni pawh hian kan intodelh ve thei a ni. Chung te pawh chu sorkar hian a bul tan ila, tifel ila, private-ah pe ila, chung chuan tax rawn pe ve sela, 'revenue chuti zat chu he mite hian an rawn pe ve tur a ni' ti ta ila, sum kan raise-na tur pakhat kha a ni dawn a ni. Chutiang chuan Lunglei-Lungpuizawl-ah IRDF a tangin Artui awpkeuna *hatchery* an siam leh a, tukinah te ka va phone a. Vawiin chiah an la keu tir a, mahse a puitling tawh a, a lawmawm ka ti a. Vawikhatah 2500 an awpkeu tir a, vawihnihna ah 5000, a vawithumna ah 4500, tunah 4500 an kaltir mek a. Pu Dy. Speaker, nang leh kei chu bial inzawm kan nih kha; a pawimawh ka ti a, kan intodelhna tur kan ruahman lai chuan Aizawl-undivided district tan hian ZPDS hian a chawm ang a, Lunglei-undivided district chu Lungpuizawl-in a chawm ang a, Tin, Lawngtlai-undivided district (Chhimtuipui District) kha Mampui-in. Article 275(a) atangin cheng nuai 125-in bul kan tan a, minister hmasa nen pawh 'sanction; sanction lo' tiin kan inhnial ngat ngat kha a ni a. Duh angin a production chu a tha vak lova, a pawl ka ti a. Ar-note vairam a tanga chah reng lovin, 'keimahniin kan thar ve thei a ni' tih laia hi a ni a.

Tin, chumi piah lamahah chuan vawk-note tihpunna tur pawh Mampui-ah *Undivided Chhimtuipui* tan bul kan tan a, Lunglei Area tan Lungpuizawl-ah, hetah Thingsulthliah Block-ah pui 250, a note tharchhuah nan, Kolasib Area tan Thingdawl-ah; tiang chuan ruahmana kha kan hunlai khan kan lo kalpui ve a. Amaherawhchu vanduaithlak takin (**Dy. Speaker:** I zo thei dawn tawh em?) Pu Dy. Speaker tlemte, khawngaihni. Kan hmalakna han sawi ve tha ka tihna chu, tun sorkar hian duh angin a umzui chak lo laia hi. Keimahni kan intodelh ve a ngai. Mi ta ringawt lei lova, a zuartu kan nih ve hi a ngai a ni.

Tin, Thenzawl-ah kel chi-tha, a beng lian chi tihchhuahna tur; a puitling pakhat kg 50 ni turin bul kan tan a, wawiin niah a kal mup mup a, a lawmawm ka ti a. Chumi piahlahmah chuan, sial hi, helaiyah pawh kan sawi kha. Mizote chuan sial-chek tluka sa-chek tui a awm kan hre lo a ni. Sial note te pawh tihpunna tur Thenzawl-ah khan, engnge a an zel tak ka hre lova. Engpawhnise, ka han sawi duh laia chu - Sa mai nilo, keimahni sum leh pai, sorkar rawn tanpuitu tur a tan pawh hian Vety Department hian 'scope sang tak a nei a ni' tih hi.

Tin, vanduaithlak ka tih erawh chu - ASF avanga hripui lengin Zoram pum a tuam a, khanga an thahte chauhin tanpuina an hmu erawh kha chu an lainatawm ka ti a. **(Dy. Speaker:** Awle, duh tawh dawn tawh rawh le) Sorkarin SEDP te pawh kan nei a, kan hunlai khan NEDP atangin kan tanpui vek a ni, vawh thi zawng zawng kha; tam erawh chu a ni lo. Khatih lai khan tuna kan sorkar chelhtu party phei chuan bawng thi te kha Durtlang-ah te an lo va ral vel a, mahse an han sorkar a, an tuarnaah an tanpui leh ta si lo hi chu, hmangaihna diklo tak niin ka hria; 'hmangaihna dik tak a ni lo' tih kha ka sawi duh a.

Tin, (Pu Dy. Speaker, kamkhat chiah) pilot project kha 2019 khan an han tan a, 'MNF sorkar chuan an ti ngei dawn e; ₹3,00,000/- an sem dawn e; a va ropui em' kan ti a, mahse wawiin ni thlang hian 2019 a mite khan ₹3,00,000/- kha an la dawng tlat lo a ni.

DEPUTY SPEAKER : Ka sawi ve a rem vak si lova, Lawngtlai lam kha han sawi deuh nghek la tha tur a nia.

Awle, Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Dy. Speaker, ka lawm e. Wawiin niah hian kan minister pathumte demand kan sawi mek a ni a. Hei, kei pawhin eng emaw han pehhel kual lova han sawitlang mai duh ka nei a, hun te a tlem a.

Demand No. 20 – Sorkar department lian ber, a thawktu pawh 25% vel awmna 'Education Department' hi a pawimawh hlein ka hria a. MNF Ministry - Pu Zoramthanga kaihhrui hmasaah khan, India ram State te, (small State) a ziaik leh chhiar thiam inelnaah te khan *pakhatna* a kum zawn khan kan la thin a. Amaherawhchu, kan hnu ah kum 10 sorkarna kan han kalsan zawh chung khan a lo tlachhe hle mai a. Chutah chuan kan sorkar school-ah te pawh admission awm loh avanga khar ngai khawpin; a bik takin Serchhip bialtu MLA zahawm tak Pu Lalduhoma'n min bial lain Aizawl West-I ah pawh Zachana Govt. Primary School te pawh khar hial a ngai a. Ani a bialtupa khan a ui khawp mai a, khatihlai khan.

Amaherawhchu, SSA sum ‘*lapse; lapse lo*’ tiha vel inhnial ngai khawpa ‘sum enkawl thiam’ tia lehlama members thenkhatte’n an sawi fo khan a han enkawl tak tak chu, khati khawp khan kan zirna a lo chhe ta a. Tunah kan Education Minister zahawm tak hian kan bulah pawh tih-takzetin a sawi a, “Mizoram Education hi revive a ngai a ni; *Education Revival* hi ka kalpui dawn a ni” a ti a, ka beiseina a sang lo khawp a ni, a dik tak chuan. Amaherawhchu, tiang khawp hian vawiin niah hian a rawn zichhuak chho hi lawmawm ka ti a. Tin, sorkar school admission te a lo pung a, ka bial ngeiah pawh entirnan Marpara Primary School ah chuan naupang pakhat chauh awm thin kha a let-li velin an pung a, 4 an awm tawh a ni. A lawmawm khawpin ka hria. Chutiang chuan vawiinah hian kan Education Minister leh a thawktute’n tan an la a, a lawmawm ka tih rualin school zirtirtu indaihlohna te hriain, nichina member dangte sawi ang khan kawng hrang hrangin min ngaihtuah sak a, a lawmawm ka ti a. Chutih rual erawh chuan pension an chhuak ve zel a, helai hi ngaihtuah nawn fo a ngai awm e ka ti a.

Tin, ka lawmna em em chu - Dampa bial hi ka sawi fo tawh leh nichina member zahawm tak Lawngtlai West bialtu sawi kha ka thlawp khawp mai a; tunhmaa India rama small-states inelnaah pawh khan literacy percentage min pawt hniamtu chu Dampa Bial leh Lawngtlai West saw a ni ziah a ni. Chuvang chuan, Pu Nguna kha ka thlawp khawp mai a, Samagra atang khan Pu Dy. Speaker, kan Education Minister khan lo chhinchhiah se la, Samagra school min din sak kha ka ngen a, a awm ka ti a. Chutih rualin kan bialah pawh hian khatianga din kha a awm a. A bik takin kan minister kaltlangin vawiinah hian higher secondary school nei ngai miah lo Phuldungsei-ah nikumah class kan tan a, pass percentage pawh 100% a ni a, a building pawh vawiinah hian nuai za telin an sa mup mup a. Chutiang bawkin Silisuri-ah pawh Samagra min din sak a nuai za chuangin, tunah building an khawih mek a ni a, hma kan sawn hle a, a lawmawm ka ti a. Tin, Reiek-ah +2 zirtirtu kan la fel mek a, march thla hian school admission pawh kan ti thei dawn a, a lawmawm hle a, lawmthu ka sawi bawk a. Chutih rual erawh chuan dilna awm mek -Kanghmun leh Darlung te hi tunah *under-processed* niin ka hria a. Tin, West Phaileng, ka biala khaw lian berah tunah hian Commerce stream dilna kal mek a ni a, min approve dawn emaw kan tih laiin eng emaw vangin harsatna kan nei ta a, heng te hi min lo chhinchhiah sak se ka duh bawk a.

Tin, chutih rual chuan Lawngtlai West bialtu zahawm tak sawi ang khan, ka bial West Phaileng-ah hian Higher Secondary School (private), kum 2008 atanga lumpsum suma kan lo enkawl tawh, a din atangin kum 19 a lo liam tawh a, hei hi upgrade dan te a awm em? Tin, High School bikah hian West Phaileng Centenary High School te, Chhippui High School leh Rulpuihlim te hi kum 20 chuang a ni tawh a, hei hi upgrade dan te awm em, nakinah a wind-up pahin min hrilh se ka duh a.

Tin, he sorkarah hian ka lawm em emna chu - Samagra kan han din chhohah hian central atanga fund kan hmuh lo do-letna tur *matching share* te pawh kan CM zahawm takin vawiinah budget-ah min han khung sak te hi lawmawm ka ti a, he sorkar hian a

taka zirna a ngaih pawimawh zia a langin ka hria. Chuvang chuan, kan ramah Education Minister zahawm takin a tum ang ngeiin *education revival* hi a thleng mek niin ka hria a, lawmawm ka ti takzet a.

Chutih rual chuan, kan Pathianthu-in, “engkimah tawngtai leh dila lawmthu hril tel zelin” a tih ang deuh khan han dil tel duh ka nei a. Silisuri East-ah khuan Anganwadi bak school kan nei miah lova, village council hnenah pawh ka sawi tawh a. Chakma hlang awmna a ni a, khutah khuan primary school din dan min ngaihtuah sak turin ka ngen nghal bawka ni.

Tin, Pu Dy. Speaker, Lawngtlai West bawka kha a sawiloh theih lova. Hemi education administration-ah hian kan district hi Lawngtlai West ang chiah hian kan buai khawp mai a, Reiek RD Block huam chhung tlangdung khaw 14 hi Aizawl West SDEO-in a enkawl a, a thlang lam zawng khu West Phaileng SDEO in a enkawl a ni. District administration leh eng emawah kan inkohkhawm hian DC chair-na hnuaiah tihian kan han sawi tlang dawn thin a, helam district-a an beh tlat avangin an lo kal ve ngai lo a ni. Chuvang chuan, a buaithlak khawp mai a, hei hi min enfel sak se ka duh khawp mai.

A dawt lehah chuan, Demand No. 17 - Food, Civil Supplies and Consumer Affairs Department chungchang hi, kan Minister hi a chhuanawm hlein ka hria a. Covid, ramri buai leh refugee tam tak karah pawh min champion-pui a, ram mipui ten ei leh bar nghei lo leh tlachham miah lovin, keini bial ang hmun kilkhawrah pawh harsatna kan tawka miah lova, hetiang minister kan nei hi a lawmawm hlein ka hria.

Tin, kudam tha tak takte min sak sak a, ka bial chhung - Reiek, Darlung leh Pukzing-ah tha tak staff-quarters te nen min sak zawh sak tawh a, tunah hian sak leh hmasak turah hian Phuldungsei min telh niin ka hria a. Tin, UT lai atanga vawiin thlenga la thawm-that loh Khawrihnim leh Marpara hi kan la nei a, hei hi min en sak bawka se ka duh khawp mai. Tin, chutih rual chuan kan harsatna ber thin oil chungchangah ramria buaiin kan nghei thin a, chutiang bawkin gas te pawh a ni a. Oil depot lian zawka leh gas bottling plant lian zawka min buatsaih sak chungchang thuah hian lawmthu ka hrilh a. Chutih rual erawh chuan, nichin ang tho khan DCSO Mamit hian West Phaileng lam a enkawl a, helai chhak tlangdung hi Aizawl West hian a enkawl tlat mai a, district administration ah nasa takin buaina kan tawka thin a ni. A chhan chu, district administrator DC-in meeting a koh pawhin an lo tel ve ngai hauh lo mai a, helai hi bialtu nih pawh a buaithlakna chen a awm a, a lehlam-lehlama han khak tawn reng a ngai thin a ni. Chuvangin, hei hi min ennawn sak se ka duh a ni.

A dawt lehah chuan Demand No. 19 - Local Administration chungchang hi nichin khan House-ah Pu Dy. Speaker, zawhna ka siam ang khan, a minister hian kan Chief Minister duh dan leh remruat angin a kalpui a, kei pawh ka zu tel a. Mizoram-a kan sawi thin, a thua kan neih, a taka kan hman ngai loh Zampui-Phuldungsei khu

nichina zawhna chhanna ang khan Mizoram-ah rin luh niin village council kan pe a, a enkawltu minister hi a fakawm ka ti takzet a. Chutih rual chuan, ‘MNF ministry a lo pian apiang hian kan ram hi zauh a ni’ tih vawiinah hian he House-ah hian ka sawi nawn duh a ni. Kum 1987-88 Pu Laldenga ministry-ah vawiina Thinglian-Hachhek constituency-a village council pakhat khu Assam atangin VC pek a ni tawh a, vawiin thlengin kum 40 deuh thaw tluang takin a kalpui a. Kum 1998-99 Pu Zoramthanga ministry a lo kal khan, kan Home Minister zahawm tak Pu Lalchamliana bial - Bilkhawthlir bialah khatih laia Saihapui ‘V’ kha Mizoram sorkar khan village council a pe bawk a, vawiinni thlengin Mizoram-village council a ni. Chuvang chuan, ‘MNF ministry a lo pian apiang hian ram hi zauh ziah a ni’ tih hi ka sawi nawn duh a ni. A lawmawm ka ti a, ram leh ram indonaah khaw pakhat kan inlak sak pawhin kan lawm hle thin kha a ni a; vawiinah hian a lawmawm takzetin ka hria a, ka sawi nawn duh fo a.

Tin, chutih rual chuan LAD-ah nichina ka sawi ang tho khan, helai administration bawk hi a buaithlak khawp mai a. Mamit DLAO-in West Phaileng RD Block huamchung a rawn cover a, helai chhak tlangdung zawng zawng hi LAD Directorate lam hian a control thung a, hei hi district kan meeting a, village chungchang leh development kan ngaihtuah ho pawh hian an lo tel ngai lo a ni. Chuvangin, helai hi siam rem dan a awm em tih kha ka zawt bawk a ni.

Pu Deputy Speaker, point hnih chiah ka la nei e, ka sawi rei tawh lo ang.

A dawt lehah chuan, Demand No. 7 - Excise & Narcotics chungchang hi member thenkhat khan duhthawh takin ‘MLTP Act, 2019 hi a hlawh chham a ni’ an han ti a, kei chuan hlawhtling hlein ka hria a ni. Hlawhtling lo sela, vawiinah hian zu zuar khawlaiah kan la hmu ang a, a lei tur kan la intlar put-putin ka ring deuh a. Chuvang chuan, kan hmu ta lo ringawt pawh hi, kohhran thlirna atang hian ‘a hlawhtling a ni’ tiin ka comment duh tlat a. Chutih rual chuan, ‘drugs man tam zia’ te an han ti a, khatiang man theia kan excise force te an an active hi lawmawm ka ti a.

Pu Dy. Speaker, kan death-rate tlakhniam zia term hmasa nena khaikhin kan hria a ni. Kan Home Minister zahawm tak hi sawlaiah sawn nuthlawi rualin recess room-ah sawn an bial laih-laih mai a, ‘engnge ni in tih dawn?’ ka ti a, compassionate ground-a police luh dil an lo zi hut hut mai a ni. Ka zawt chiang a, ministry hmasaa zu avanga an pasalte boral chhungte an ni a, eizawna an nei si lova, compassionate appointment hna an lo dil a lo ni a. Khatiang tawng lova, MLTP Act kan kalpui hi chu ‘a lawmawm hle a ni’ tih hi sawi loh chi niin ka hre lova, Pu Dy. Speaker ka han sawi a ni.

Tin, Demand No. 28 - Labour, Employment, Skill Development & Entrepreneurship hian kan thalaite chona nasa tak a pe a, hma chak takin a la a, Japan ram thlengin kan thalaite an tirschhuak a. Ka bialah pawh sorkar hmasain building a sak

hluihlawn tawh kha kan minister chaktak hian a kalpui leh a, a building renovate te tiin, ITI training-na tura hma lak mek a ni a. Vawiinah hian kan Minister zahawm tak tak pathumte demand kan sawi hi a lawmawm ka ti a, pass ngei turin ka rawn thlawp a ni e. Ka lawm e.

DEPUTY SPEAKER : Member zahawm tak Pu Zodintluanga Ralte ka sawm a, ani hi minute 15 hun kan pe dawn a ni.

PU ZODINTLUANGA RALTE: Pu Dy. Speaker, ka lawm e.

Hei, vawiin nilengin *chakai-farm* kum 5 chhunga an enkawl, hlawhtling ta si lo a sawimawina thu kan ngaithla a ni ringawt mai a. Anmahni tan chuan a awm ve tho e. Minister zahawm tak tak pathum - Er Lalrinawma, Pu Lalchhandama Ralte leh Pu K. Lalrinliana te demand kan han sawiho a ni a, Pu Dy. Speaker, sawiho tur a awm lova. Kan ruling MLA-te *chakai-farm* lama an tui ta viau pawh kha an hriatthiam awm ve ka tihna chhan chu, an demand ka han en a, hmasawna tur pawisa dah a awm lo reng reng mai a. ‘He department-ah hian hmasawna tur sum kan dah’ tih awm sela chuan, phur takin kan sawi tlang tur a ni a. Mahse, vawiin niah hian pass-pui tur engnge maw kan neih le? *Salary and Wages* nimin lamah ka sawi tawh a, kan Minister pakhat pheichuan, ‘hna thawh tir min tum lo em maw ni, tiin file-ah ka ziak’ a ti a ni. Chutiang khawp chu a ni a.

Hei vawiinah official-te nen nilengin kan thu a, kan sawi ve a. Kan pass puitur hi ‘Salary and Wages’ tih a ni mai a. Vawiinah hian hun kan sen loh nan department zawng zawng hi khaikhawm law law ila, nikhatah zo ila, Chief Minister-in pawisa a neih vek lai hi sawi khawm ta ila, a inhmeh zawk awm mang e, ka ti a. Ruling MLA-te pawh khan nidangah chuan, ‘ka bialah chu chu rawn dah rawh’ tih tur a awm lova, *chakai-farm* ah bawkan lut leh thin a, an khawngaih thlak em mai tih kha ka sawi hmasa duh a ni.

Demand No. 7 - Excise & Narcotics-ah hian, a hmasa berin Central YMA-CADS te chungah lawmthu ka sawi a. Anni hian chhun leh zanah thahnem ngai tak leh theihtawp chhuahin Mizoram-a drugs lo lut nasa lutuk ven hna an thawk a, an thawh rah pawh a lang a ni. ‘Heng te hi awm ta lo se kan thalaite engzat nge kan chan ang’ tih hi ka ngaihtuah thin. “Engatinge hengah hian YMA te, NGO te an chet a ngaih?” tih chuan, kan sorkar hian a ngaipawimawh lo tlat a ni. Excise Deptt. hi han ngaihtuah chiang ila, an pachhiat zia leh personnel an neih tlem zia hi a hrechiantu vek kan ni, MLA zawng zawng leh minister-te pawh hi. Kan minister hmasa pawh khan a saw thin a. Hei, Excise minister hmasa kan zingah a awm lova, kan Chief Minister fachuam zingah a awm ve lo a ni chawk ang a, Excise Constable pakhat pawh kha a la thei lova. A thenin kumkhat chhungin ‘sorkar hnathawk 1000 kan la’ an tih laiin, Excise tihchakna tur pakhat pawh kha a la thei lo a ni. Total Prohibition kan han kalpui a, hei pawh hi

‘hlawhchham an tum ta em maw ni aw’ ka ti a, an khap hnu hian a zual zapui ‘vailenhlo’ kan tih ang chi kan ramah hian a hma aiina hluar a; a hrechiantu kan ni, Zoram mipui hi. Hmun tinah a awm a, tunah phei chuan kan hotu lu ber fa te restaurant-ah chuan wine, whisky leh rum duh tawka order theihin zuk awma maw le! Chutiang chuan total prohibition hi ‘a hlawhtling’ kan ti theia maw? A ni lo a ni.

Kan MLA zahawm tak Dr. Pachhunga zawhna - “Zu avanga thi Mizoram-ah, kum 2014 atangin vawiini thleng hian engzat nge awm” tih, khati laia Excise Minister Dr. K. Beichhua chhanna chu - “Excise Department-in zu avanga thi chhinchhiah a nei lo” tih, he House zahawm taka chhanna a ni. Pu Ngunlianchung’a Health Deptt-ah March, 2015 - 2019 thlenga zu vanga thi engzat nge” tih a zawhnaa Health Minister chhanna chu - “Zu avanga thi sawi tur a awm lo” tiin he House hi a hrilh a ni. Chuti lai chuan kan Chief Minister-in “Zu avangin mi 5000 an thi; Police pawh 500 an thi” a ti.

Tukin zingah Pu Lalduhoma, kan group leader zahawm tak chu, “thu diklo i sawi a, ngaihdam dil rawh” kan ti a, kan nuih hluah hluah a ni lawm ni? Kan Chief Minister hian eng ang document atangin nge, khawi data atangin nge a sawi, hei hi? Health Minister-in, ‘Zu avanga thi an awm lo’ a ti a, Excise Minister-in “Zu avanga thi record a awm lo” tih kha House-a a chhanna a ni. Pu Dy. Speaker, tun, kan Eighth Assembly chhunga a chhanna a ni ka sawi hi. Chuti rualin, “kan police te an thi nasa lutuk’ han tih chu, hei hi thu diklo a ni. Thu diklo sawitu hian ngaihdam dil ve se ka ti khawp mai.

Chuti rual chuan, kan ramah drugs a hluar em em a. Nichina ka sawi tawh angin, central YMA te, CSDS ten theihtawp an chhuah a, Excise Force te, Assam Rifles te thlengin; man tur a awm reng mai a ni. Engvangin nge a hluar?’ kan tih chuan, kan ramah hian MNF a sorkar apiangin smuggler te, drugs tawlhute an zalen a ni. Zoramchhana te, Kamrula te an duh duha an khawsa ang hian an khawsa ni mai hian a hriat a ni. PWD lamah pawh Kamrula te, Zoramchhana te chu an duh thalin an che a ni. Chutiangin kan ramah pawh hian drugs tawlhute hi ‘an duh duh hian an che em maw ni’ tih theih turin.

Chumi tichiang em emtu chu - Pu Dy. Speaker, kar hmasa khan hei, kan CLP (Congress MLA) ten Jordan Centre kan zuk tlawh a, a awmte 100% (ti ila) heroin addict anni. A pawh khawp mai. Heng hi ‘total prohibition-in a ken tel nge?’ tih hi zawhna lian tak a ni. Total prohibition a awm a, ‘zu kan tirem dawn’ an ti a, kan Chief Minister ngeiin, ‘Rangvamual leh Phunchawng-a mite chu eizawna ngialnghet, an zu zawrh simna tur kan siam sak ang’ a ti a, kum nga a liam ta vawin niah. An sorkar tawpna budget session-ah hian chhungkaw khat tal sorkarin an eizawna thlak sak a nei em le? Thil hi, a sawi hi chu an sawi thiam a ni; mahse, a tak ram a awm ngai lo thin hi.

Chuvang chuan, Pu Dy. Speaker, Excise & Narcotic Deptt. a kan hmalakna hi, sorkar hian do tak tak sela, a hming maia total prohibition ti lovin, zu leh drugs te zalen

lo sela, ‘a tisualtu man ila’ ti duh se chuan, kan Excise force hi an tichak ngei ngei ang. Chuti nilovin, ‘Zu hi zuar luai luai sela, drugs-te hi tawlh luai luai sela’ tih rilru an neih hi a tichiang em em a ni. Grape-wine license te an han pe a, hmanni lawkah Millennium Center-ah an man sak a, ‘an pe let dawn’ an ti a, pek let aiin ‘um khatah cheng 25/- pek a ngai a ni’ te an han ti a, a buaithlak khawp mai.

Demand No. 29 - Social Welfare-ah hian, nichina ka sawi ang khan Jordan Center, Chief Minister-in “Asia-ah, North East-a ruihlo ngaite enkawlina tha ber tur” a ti a, kan zuk tlawh ve a, cheng vaibelchhe tam tak sen ralna a ni a. Pu Dy Speaker, an hnathawh ka hrilh ang che - A bang rawng an lo hnawih a, tukverh awm zawng zawng kha Aizawl-a mihausa pawhina an ina an hman ngam loh *fenesta* tukverh an lo hmang a, an tukverh zawng zawng chu fenesta-in a khat vek a, ventilation nen. An kawngkhar lah chu a lo sawi em em mai a, an in te chu kan han lut a, damlo lo awmte chuan, “ka pu, fur lai chuan tui hi a far nasa lutuk a, a awm a hreawm” an ti a, building pahnih chu an lo sa thar ve a ni awm e. An seng nasa khawp mai. Asia rama ruihlo enkawlina tha ber tura an siam chu sum siamna-ah an chhuah ringawt a ni.

Demand No. 34 - Vety hi ka han sawi ve leh lawk duh a. Ka bial Lungsen kha ‘vawk hri len tanna’ ti ila kan sawi sual lo ang a, vawk hri a han leng a, an thi tan a, department-ah kan kal a; Vety minister pawhin rang takin a hmunah minrawn enpui a, kan lawm hle a ni. Mahse, khatih lai khan talh an tumin department lamin an phal bawkw si lova, tikhan an haw san a, an thi ta a. Central atanga puihna lo kalah khan department-in ‘hei hi lo talh rawh u’ an tih loh department-in an talh sak loh kha tanpuina an pe loh a ni. Mak em em mai chu - he MNF sorkar-ah hian Pu Dy. Speaker, thei leh thei lo a mimal vawk lo vulh ve tang tang, eizawna atana lo hmang vete tanpuina pe lovin, Lungpuizawl vety farm chuan nuai tam tak tanpuina zuk la a maw le! Miretheite chanai pawh hi sorkarah kan la lut duh a ni; a raptlak khawp mai. Hmangaihna hi an nei lo reng reng a ni.

Vawiinah SEDP kan sawi a, heng tanpuina te hi chhungkaw tinah pawh lo pe ve rawh se; an tam lo. Congress sorkar lai chuan bawng a thi a, vawk a thi a kan Vety minister zahawm tak Pu Nunlianchuanga chuan a theih ang angin chhungkaw tinah tanpuina a pe vek a sin! Vawiinah chuan khang ho khan tanpuina pakhatmah an dawng lo hi (*Hon. Speaker-in Chair a la a*)

Demand No. 41- Sericulture hi kan ramah a tha duh a, sorkar lo kal tawhte (keini pawh kan ni ang a) khan kan ngaihsak tawh lo hi a pawika ti a, ka biala Changpui leh hmun dangah pawh a tha duh em em a, mau leh rua buaipuia vaibelchhe tam tak senga hlawhchham ai chuan, a hlawhtling sa sericulture-ah te hian sorkar hian pawisa hi hmang tam thei se tih hi ka rawn sawi ve duh a ni.

Demand 20 - Education hi tawite ka rawn sawi ve leh ang a. SSA zirtirtute an nih lai khan kum 2011 khan Congress party sorkar khan ₹11,000 atangin ₹25,000-ah an hlawh kha kan tipung a. MNF party sorkarah kum 2022 khan ₹7,250 te, ₹4,750 te, a percentage-a an chhut tawh avangin an tihpunna kha a ni a. Kha laite kha he House zahawm tak information-ah, 'congress sorkara a pung kha chu a lo tam hle a ni' tih kha ka rawn sawi tel duh a. Zirtirtu indaih loh hi chu kan sawi a, awmzia a nei lem tawh lova. Kan bial phei chu 'punishment bial' an ti deuh nge ni, zirtirtu hi min lak chhuah sak reng mai a. Lungchem-ah phei chuan class VIII zirtirtu hi hmanni lawkah an la chhuak a, naupang pawl riat zirtirtu nei lovin tisawn kan awm a. Mi tha takah an rawn chhuak dawn ang nge, 'lehkha thiam tak chuan an chhuak lo mai ang' tih a hlauhawm khawp mai a, zirtirtu nei lo tawpa han awm kha.

Chutih rual chuan, SEDP-a zirtirtu an lak hi a lawmawm ka ti a. A lawmawm rualin, an lak dan hi Pu Speaker, sorkarin Education Department kal tlangin SDEO emaw, DEO emawin 'mithiam zirtirtu tlak an ni' tih certified thlapin la sela ka ti khawp mai. Tuna an lak danah hi chuan block president leh unit president ten, 'hei hi lo la rawh se' tia indah mai mai a ni a. Hmannia Health Department hnuaiia staff nurse leh Lab. Assistant tam tham tak kal pah mai maia an lak ang hi chu kan ram tan a him lo a ni. Zirtirtu an lak hi kan lawm; mahse an lak dan hi chu dan dik takin ni thei se. SEDP hi MNF sum bil a ni lova, Mizoram pawisa, 'public money a ni' tih hre rengin zirtirtu lakte hi ni thei hram sela tih ka rawn sawi duh a ni.

Demand No. 17, kan Supply Minister hi ka sawi sak ve loh chuan nakinah min hau ang tih ka hlau a. Tawitein, a vanneih zia hi lawmthu ka han sawi duh a.

Congress sorkar laiin Bairabi-ah rel *broad-gauge*, kan Minister zahawm tak Pu John Rotluangliana khan March Ni 21, 2016 khan a hawng a. Hemi hnu hian vanneihthlak takin rel kawng lian khan buhfaite awlsam takin a rawn lalut a, tui-lian fur hnuaiiah pawh harsa lo takin buhfaite a rawn la lut a. A vannei ka ti a, vawiin ni thlengin buhfai harsa lo taka kan awm thei te hi. Kum 2017 khan Prime Minister Modi khan '*Year of Petroleum*' a rawn puang a, gas harsatna phuhruk nan RK Nagar-ah megabottling plan Tripura-ah pawh 2017 lungphum a phum nghal a. Hei hi 2020-ah zawh a ni a, 2021 kumtirah hawn a ni. 60,000 metric ton per annum a ni a, ni khata gas bur 17,000 fill up thei tur a ni. Tripura consumers 7,40,000 an mamawh 50% Assam atanga an lak thin kha an la ta lova. Mizoram hi kan vannei ta em em a ni. Tripura bottling plant awm azarah kan Minister zahawm takin vawiina gas harsa lo taka min rawn kalpui hi a chungah hian lawmthu ka rawn sawi ve duh hrim hrim a ni e. Pu Speaker, ka lawm e.

SPEAKER : Tunge han sawi leh ang le? Awle, Pu Lalduhoma, Member zahawm tak ka sawm e.

PU LALDUHOMA : Pu Speaker, ka lawm e.

Vawiina kan Minister zahawm tak pathumte hian an chan department theuh development atana hman tur thahnemngai takin pawisa an dil dawn em aw ka ti a. Mahse, chu lamah chuan thahnem an lo ngai lo hle mai a. ‘Hlawh khawp min pek chuan kan lung a awi e’ an ti a ang khawp mai a. Hlawh atan School Education-ah hian 75% a rawn dil a, AH & Vety-in 87%, Fisheries-in 90%; “10% hi a tawk e; thil dangah” a ti a ni awm e. Sericulture-ah 94% hi hlawhah kan hman ang a, “6% hian eng-eng emaw kan lo ti ve ang e” tihna a ni. Excise-ah 95% hlawhah a kal dawn a, “5% te hi ruihhlo do nan leh ngawlvei enkawl nan chuan a tawk e” tihna ang a ni leh ta a. Heng department te hi mipui-nawlpuite eizawna nena inzawm, an sum lakluh (per capita income) tipung theitu tur leh kan state sum lakluh GSDP tipung theitu department pawimawh tak takte vek anni. A beidawnthlak hle mai a; hlawh turah a kal ral deuh vek dawn tihna a ni.

Hetiang hi kan nih avangin, niminah pawh khan kan GSDP hi ‘-9 a ni’ tih ka sawi tawh kha. Vawiin hian kan awmna chhuat zawl hi GSDP lo ni ta ang se la, a sang zawng chho tur kan ni. Tunah erawh chuan hemi hnuaia step 9-na kan thleng tawh a, ‘0’ pawh kan phak tawh lo. Chuti khawp dinhmunah chuan kan ding a ni. Kan budget thar atang pheh hi chuan chu aia thuk chu min panpui dawnin a lang tlat a ni. Hei hi a paw em em mai a, ‘chhengkaw tin hi millionaire kan ni thei’ tih te min zirtir a, mahse a inhlat hle a ni, vawiina kan thil tih nen hi chuan. Chu chu ka han sawi hmasa duh phawt a.

Tin, Excise-ah minister thar kan nei a; ka thutpui thin a ni a, ka khua pawh a tihar deuh a. Ka lawmpui a. Chutih rual chuan, ‘a fimkhur a ngai awm mange aw’ ka ti a. Excise minister hi an tlo lo em mai a, Pu PP Thawla te pawh kha an han ban lawp mai a, hmanni lawkah pakhat kha an han len leh lawp bawk a. Ani hi eng chena rei tak daih ve ang maw.

He department hian hnathawhna tur (hlawh bakah) cheng 5 chauh an nei mai tur hi a khawngaihthlak ka ti a. *Zu & Drug* hluar zia kan sawi a, addict enkawl na lah Asia rama a tha ber neih tum kan ni bawk si a, kan sum ruahman dan leh mipui laka kan thusawi inpersan lutuk thin lai hi a hahthlak in ka hria a. Mahse, kan House leader zahawm tak hian chhiarkawp thar hi a chaw k a, ‘hetiang chawh tur a ni lo e’ kan tih pawhin a tilui tlat zel a, ‘a lo tha phian awm mang e, kan CM chhiarkawp hi’ ka ti ta a.

Hei, leibat te pawh, RBI chuan ‘India rama leiba tam ber in ni e’ min ti ngawih ngawih a. Kan House Leader chuan, “India rama leiba nei tlem ber *pahnihna* kan ni” a la ti tlat mai a; a cheng zat khan a chhiar a, ‘a tha angreng mang e aw’ ka ti a. Heti hian ti ta ila - India ramah hian drugs ngawlvei tlem ber kan ni thei dawn a, Aids vei tlem ber kan ni ang a, cancer vei tlem ber kan lo ni thei dawn hlauh mai a, kan CM chhiarkawp kan hman hi chuan; ‘a engthawl thlak ang reng mang e aw’ te ka ti a. Tin,

leibat te pawh ‘chuti lutukin kan engto lo e’ kha a ti then mai a, nimin khan. Tiang khan hahdam taka awm te pawh zir ve ila a tha ang e.

Social Welfare-ah hian ka han pakai ang a. Nikum ai hian an budget hi 60% ngawtin a tlahniam ta a, hlawh tur lah hi nuai 500 ngawt maiin a tlahniam ta bawk a. Social Welfare Deptt. hi a tlabal tual tual a, thawktu an tlem tual tual a, an indaih lo tih kan hria a. Tar-pension te pawh dik tak chuan helaiah thawktu an awm mumal loh avangin central pawm theih turin thil an ruahman har lutuk a, kan *senior citizen* ten kum khat dawn lai an dawn theih loh phah kha a ni a. Chuvang chuan, hlawh te pawh hi a lo hniam a nih pawhin, ‘awm’ tihna chin ka nei a. Mahse, nuai 500 em ema a han hniam tur hi nakinah Supplementary Demand-ah tam tak an rawn dil leh ngei ngei ang; lo chhinchhiah rawh u. Hetiang hi kan *Revenue Surplus* neih duh luat avanga revenue expenditure tihlem tumna, tlang bumna, lan mawi tumna, ‘budget lem’ a ni a. Supplementary-ah an rawn ti leh teuh ang a, hetiang hi department tam takin an ching a ni tunah pawh hian. Chutiang chu kan sim thei lo hi a paw ka ti a.

Tin, Vety-ah hian ka han kai zawr ang a. Vawksa te, arsa-ah te hian lo intodelh thei dawn ta ila, Vai-ram lam emaw, hmundang atangin emaw tualchhunga kan tharchhuahte market tibuai thei tur lakah hian invenhimna kan neih a ngai a, a lak luh kan khap theih dan te mumal tak kan neih a hun tain ka hria a. Helaiah hian “sorkarin engtinng e hmalak a tum, kan ramchhunga intodelh kan tum tak tak dawn anih chuan?” tih lai kha nakin wind-up naah min rawn chhangfiah thei se ka duh a.

School Education-ah kan lut ang a. Hei, Mara Autonomous District Council hi education-ah hian kan hrek nasat pawl a ni a. Politic-ah nasa takin kan sawisa hlim hlawl a, tihian, ‘a hnam hrek hian kan hrek em aw?’ tih mai tur hian. Siaha-ah sawn Higher Secondary School a awm a, regular teacher pahnih transfer sak anni a. Tunah Principal leh Vice Principal pawh an nei lova. Tin, Saikao ‘Serkawr’ kan tih thinah khan regular teacher pakhatmah tunah sawn an awm lo bawk a, Zawngling leh Phura-ah te pakhat theuh chauh an awm a. A dang pahnih chauh awmna tam tak a awmna te, hun a hek a ka sawi lo mai ang. Chutiang chu a ni a. Sawlai kan Mara unauhte hi education-ah leh zel hi chuan i hrek zui lo teh ang u a; ‘pek belh theih dan kawng Minister hian ngaihtuah hram teh se’ tiin kan sawisak duh a ni.

Tin, mahni bialah han pakai ila. Serchhip Diet atangin Science teacher 2 leh Mathematics zirtirtu 1 min sawn sak a, tunah hian kan nei miah lova. Science chu Principal in ‘latu an awm loh ngawt ai chuan’ a ti a, harsa chung chungin a zirtir a. Tunah hian kan mathematics zirtirtu chu MA (History) a ni a, chu chuan mathematics a zirtir a ni, tunah sawn; zirtirtu an awm tlat lo. Serchhip bial hi MNF Party-in kumin inthlan tura candidate a puan hmasak berna kha a ni a; ‘an candidate hi an pui duh vak lo zawk em maw ni’ te ka ti a, han duhsak deuh awm kan nihna lai a awm a. Ka zar ni lovin, midang zar te tal kha han zo se ka duh khawp mai.

Tichuan, session hmasaah kan Chief Minister-in *assurance* min pe tawh a. Vawiinah hian heng subject pawimawh - mathematics leh science-ah zirtirtu nei miah lova kan awm hi chu thil serious tak niin ka hria a ni. Tin, Neihloh primary school-ah kan Headmistress chu Pi R. Lalmuanpuii a ni a; a hming ka han lam dawt tawh mai teh ang. Tichuan, nikum February Ni 25-ah khan joining report a rawn pe a, chu bak chu a hmel kan hmu miah tawh lova, Lunglei SDEO Office-ah a thawk char char a ni. Chuvang chuan, a tak hmuh a tur awm si lova, thai chhe mai rawh u; Headmaster nei lo-ah min siam rawh u. Paper-a headmaster nei si, a taka nei si lo nih hi kan duh lo. Heng te hi chu a ni lo lutuk a ni. Chuvang chuan, hei hi a dang min pe thei lo anih pawhin ‘nei lo list-ah min dah zawk mai rawh u,’ tih kha ka han sawi duh a ni. Tin, school tam tak science kit leh equipment nei lo an awm a, practical ti thei lo kan school zingah hian an tam a nia. Heng te hian zawhna thuhmun an chhan ve vek a ngai a ni. Khatiang tan kha chuan exam pass that a har em em mai dawn a, heng te pawh hi ngaihtuah that a ngai hlein ka hria a.

Tin, kan sawi fo tawh angin NABARD-ah a pung awmin, a bain pawisa kan puk a, school repair nan leh sak that nan tam tak kan hmang a. Hmanni lawkah pawh kan sawi a; dik tawk tak niawm khan kan han sawi hram hram tak na a; a dik tawk lo a ni, he thil kalpui dan hi chu Pu Speaker. School thenkhat chuan *Inspection Notes* an nei a, a chhah khawp mai a. Ka nei teuh tawh mai a ni, a thlalak te nen. Chung inspection note-ah chuan hetiang te hi a in ziak a ni – “cheng nuai 10 mana sak turah khan contractor-in cheng nuai 4 in an thawh tir,” tih te a inziak a. A thenah chuan, cheng nuai 10 estimate-ah khan, “MNF Block in staff te nuai 5-in a thawh tir,” tih te inspection note ah zuk awm a maw le! A nihin a ni lo reng reng a. Heng an hralh chhawn zel an hralh chhawn zela, a tawpa thawktute hian DPR a awm tih pawh an hre lova, a drawing pawh an hmu lova, an rin thawh ta mai mai a. Tichuan inspection-ah, measurement book-ah rawn tihdik leh an tum ta a, a buaithlak khawp mai a. Tichuan, a DPR nen a inmil lo pui, entirnan: kawtzawl an lo siam that ve te, building ni miah lo te kha building angin measurement book-ah an ziak lut a ni. Kan mit ngeiin kan hmu a ni a, heng hi dawt vek, phuah chhawpa kal a ni ta a, a pawh hle a.

Tin, East Tuipui bialah chuan an MLA zahawmtak hian thahnem a ngai a, DPR an hmu si lova, sak that lo palh an hlau a nih ka ring a, District Project Co-ordinator hnenah, ‘a sak dan tur hrilh mai teh’ a ti a, a niin school sak dan tur kha ziakin a hrilh ta hlawm a ni. DPR hranpa alo siam ve a nih ber chu, khati te kha kan ni ta nuai mai a ni. Tin, inspection note-ah hian la zawh loh hi a tam em em a, an sa tha dawn nge, dawn lo pawh hriat loh a ni a, ‘hengah hian thil fel lo a awm a ni’ tih hi chu tlang-hriat a ni a, ‘Inquiry din ang u, in hmai fai nan’ kan ti a, Pu Speaker, an ngam tlat si lova, tihian ngaihthalo takin Zoram mipui hi kan awm ta zel dawn tihna nih hi.

Tichuan, kan education hrim hrim hi han en ila - kan building te a chhe em em a, zunin, ekin mumal pawh awm lova, chutiang boruak hniam tak karah chuan kan fate

lekhka an zir mek a, zirtirtu an indaih lo em em a. Hmanni ah kan Minister-in “vacancy awm zat 4000 vel lai a tling tawhin ka hria” a ti a ni. Chutiang avang chuan sorkar school-ah mi lut an tlem tual tual a, private school enrollment a pung tual tual a; a lerah kan thuai a, competition exam-ah tlin tir kan tum a. A bul thum atanga khatia zirna in chhe lutuk atanga lo seiliente hi engtin nge maw competition examah hian an tlin theih ang le? A ngaihna a awmlo a lawm. Heti chung chung a A- grade kan han kai thei te, competition-ah kan han tling thei te, mi tha tak tak kan han chher chhuak thei te hi chu a mak zawk a. Kan dinhmun atang hian zirna tha, naupang tha, mihring tha han produce thei dinhmunah hian kan ding rih lo hrim hrim tih hi a chiang a ni.

Tin, kan syllabus te pawh hi siam that a tha ka ti; moral subject te hi i zirtir teh ang. Mithi-lumena awm dan tur te, thlanlahi nikhuaa awm dan tur te, hnatan nia awm dan tur te, corruption thleng hian inzirtir a ngai tawh. Awm dan mawi te, naupangte pawh aia upa zah dan tur te, heng zawng zawng hi subject hrana zirtir ve hi a tul tawhin ka hria a.

Tin, work experience te pawh hi thiam tak tak rawh se, pot-a mahni eikhawp hmarcha han thar mai te hi thiam rawh se. Chutiang chuan, general deuhin - electric chhia han siam mai te, tui pipe chhia han siam mai te leh skill development lampang te pawh kha a general hi chu kan tih tir a ngai a, entrepreneurship lam hawi zawnga syllabus kan kalpui a thain ka hria a. ‘Eng ang naupang nge Zoram hian a mamawh’ tia chumi lam hawi zawng chuan, chumi tin zawn chuan kan syllabus kan siam a tulin ka hria.

LESDE-ah kan lut ang a. A hmasa berin kan YMA te chungah lawmthu ka sawi duh a, nasa takin mi ten eizawna skill an neihna turin an thawk a ni tih kan hria a. Tin, a hmasa a kan sawi duh chu - nakin ah hemi a changtu minister hian NABARD sum atanga school sakna tur kan sum hmuh atang khan ‘cess engzat nge lo lut; engtik nia lo lut nge’ tih minrawn hrilh thei se ka duh khawp mai. Eng ang chiahin nge NABARD sum atang hian cess hi a luh? (Pu Speaker, ava reilo awm ve le.)

ITI kan neih hi kum 67-a upa a ni tawh a, chutah chuan NSQF angin kan kal a, amaherawhchu hetah hian kan ramin a mamawh em em surveyor te hi, ‘hemi NSQF ang hi an ni lo’ tih hi sawi a awmin ka hria a, pawh hlein ka hria. Tin, an level-puiah hian polytechnic-ah chauh an in admit zui thei a, zirna school pangai leh college-ah hian an in admit thei lova, hei hi a tha lo hlein ka hria a. Khatiangah khan lo in admit thei ve se chuan an equivalent standard-ah khan thiamna nei anni a, inhlawhfa chawp leh an thiamna hmang pawh khan an inchawm thei maiin a rinawm a. Tin, stipend an dawng lova, course fee hi sorkar tum tur ni awm tak, an mahniin an tum bawk a, PMKVY atang hian 100% funding kan dawng bawk si a. Tin, skill training hi thuang thum - ITI ah te, directorate ah te leh welfare board ah te kalpui hi a fuh lo viauin ka hria a, hei hi hmun khatah kaltir theih dan awm sela a tha ka ti khawp mai.

Hna lak danah hianin .. (Pu Speaker, a lak lawh khawp mai) hei, advertisement a han chhuak a; MSCTE-ina ‘*recognized certificate* nei chauhin dil theih a ni ang’ tih hi a ni tlat ta mai a ni. Hemi aia sang BCA te, MCA te an lo pass a, IGFAI atang te, NELIT atang te, hmun dang dang atangin; chungte chu an zirtirtute zawk anni a, an ni aia thiam sang zawk an ni a. Mahse MSCTE ina certificate a pekte annih loh avangin a thiam zawk khan an dil thei tlat lova. He *Dan* kan nei tlat te hi a fuh lo ka ti a, ennawn a thain ka hria. Tin, ‘Tracer Study’ an tih placement hi, ‘ITI chhuakte hian placement engzat nge an hmuh’ tih te pawh hi record fel tak an neih a tulin ka hria a. Private Placement Agencies te tunah kan nei tawh a; hna thawk turin Mizoram pawnah an thawh chhuak a nih chuan, “Ni 7 chhungin an phone number leh engkim, an mahni chhawrtute nen an furnish tur a ni” a tih kha, kan *Dan* hian. Hengte hi kan keng kawh em? ‘Inbumna te a tam viau’ tih hi kan hria a, a pawh hle a ni.

Pakhat chauh, Pu Speaker, kan sawi leh zawk ang chu point khat chauh khawngaih, kan budget session tawpna tur a ni tawh si a? (**Speaker:** Wawiin chu inkhawngaih te pawh a tul ve e a.) Ni e, ti raw.

Hei gas kan hnianghnarnaah hian keimahni hi kan han infak chak deuh thin a, ‘a ni lem lo’ tih hi kan sawi duh a. Borkhola bottling plant khuan Mizoram, Agartala leh Manipur leh Barack valley a chawm a ni. Tunah hian, nikhatah darkar 16 an *run* a, tichuan, cylinder 51,200 an refill thei a, darkar khatah cylinder 3,200 an refill thei a, chu chu truck 158 phur khawp a ni. Chuta tanga truck 25 phur lek zuk dil chhuah hi a har lo; min supply hneh em em; tupawh sawrkar ila kan hniang hnar tawh ang. Amaherawhchu kawngah te buaina a lo awm thei a, ‘kan ram chungah bottling plant i nei teh ang’ kan tih hi chu a dik kan ti a, kan thlawp tho. Tin, Ngopa-retailer tur tender chhuahnaah khan MNF Group-president recommendation kha a ngai tlat mai a; hei, a copy pawh ka nei a, hetiang em em te hi chuan ti lo sela; ‘in zilh deuh teh u a’ ka han ti duh a ni.

Tin, buhfai godown thar hmun tur Sairang velah zawn a ni a. Hetiangah hian hmingchhiat palh hi a awl viau mai a, kan Minister hi lo fimkhur viau turin ka chah duh a. Tin, “ZIDCO-a buhfai supply tu hi tunge?” ka ti a, “kan hriatpui lo” tiin min chhang a. ZIDCO hi Commerce & Industries hnuai a awm a ni a, amaherawhchu buhfai an supply tlat bawk si a, Supply Minister hnuai a an awmtho turah ka ngai a. A supplier - Abu Mazumdar te nena chaw an eikhawm te pawh kha kan lo hmu a, an inkawmngaih hmel viau mai a. Hotunuin thingpui a han sem zar zar te pawh kha a hmuhnawm hranpa khawp mai. Supplier an zawn dan te pawh hi min han hrih chiang deuh teh se; “tender awm lovin duh duh an la mai em ni?” tih te pawh kha kan hrechiang duh khawp mai.

A tawp nan tak tak, Pu Speaker. *Chakai-farm* hi ka han sawi ve lawk. Khu, dil pathum a awm a, dil pakhatatah chiah chakai ala awm a, dil hnihah broccoli chin a ni

tawh a. Kan inenchhin a, 'kan fail' tih hi pawm tlang ila. 'Horticulture Department hi pe tawh mai ang u; kan hlawk zawk ang' tih kha ka han sawi duh a ni e. Ka lawm e.

SPEAKER : Awle, tunah chuan Minister zahawm tak Er. Lalrinawma, kan sawihona te windup turin kan sawm ang a. sawifiah ngai a tih te rawn sawifiahin, a demand te House-ah pass rawn dil nghal se.

ER. LALRINAWMA, MINISTER: Pu Speaker, ka lawm e.

Member zahawm takte'n wawiinah thahnemngai takin ka demand te min sawi sak a, 'ka lawm hle a ni' tih kha a hmasain ka sawi duh a. Tin, kei ngei pawh helai hmuna budget pharh theia ka ding hi bial mipuite, Pathian leh kan party president, kan Chief Minister chungah te lawmthu ka sawi a ni.

Kan han sawi thliah thliah a, sawi tur a tam ang a. Amaherawhchu, a vaia kan sawi chuan a rei duh viauin ka ring a. Member zahawm takte an thusawi kha a mal te-tea kan react chuan kan tlaivar thei mai dawn a. Chuvang chuan, a tlangpui deuha tih kan tum ang a.

A hmasa berah chuan - Sericulture hi, Pu Speaker, ka ngaihtuahnaah chuan, *rophumruk* ang deuh niin ka hria a, Sericulture hi. Ka han belchiang a, amahah potential lo tam zia hi ka ngaihtuah a. Chutih karah chuan nichina member zahawm takte sawi ang khan, 'keimahni hian kan buan na tawk lo em maw ni chu aw' a tih theih a. Ka ngaihtuah thin a, kawng hrang hrangin hma kan la a, agriculture leh horticulture-ah te; a market-ah hian kan buai duh khawp mai a. Amaherawhchu, Sericulture hi chu wawiin thleng hian silk hralhna chungchangah hian buaina a la awm lo reng reng a, a market-ah hian duh khawp hi kan la inpe thei lo zawk a ni a.

India ram zau zawk hi han thlir ila, India ram mipui zawng zawng 48% hi Pu Speaker, hmeichhia anni a, chung ho chu million 586 vel an ni a, India ramah. 80-90% te chu sari kaih chi-ah ngai tai la, an tam dan tur hi turu tak a ni. Chung ho zawng zawng chuan an mamawh dawn tihna a ni a. Tin, silk mai piahlamah a sorkar ang zawng pawhin khawvelah China hian silk-ah hian sorkarna a la hi a ni tawp mai a, India pawh hian kumtin metric ton sang chuan a la lut ziah a ni. Sorkar laipui pawhin kan hre vek a, India leh China inkar chu, chutih lai kara mahni khingpui te va dawr hausak reng mai kha chu a har vein ka ring a. Chuvang chuan, Ministry of Textile pawh hian Silk Board kaltlang hian pangang khawi tur hian min duh em em a ni tih hi ka sawi duh a.

Kan survey lehkhabu-in a sawi dan pheih chuan, kan ram, India ram chhung-Northeast-a potential nei tha ber chu Mizoram kan ni mai awm mang e; 'chumi zinga mi chu kan ni e' a ti hial a ni. A chhan chu, *mugha* chaw - 'theihmu' kan tih ho ang zawng zawng kha a tha duh em em vek mai a, a climate-in a lo zir bawk si a, global

warming lo thleng zelah hian. Chutiang karah chuan keini Mizoram hian pangang-khawina hmun tha kan nei a ni.

Amaherawhchu, mak ve angreng deuh mai chu - *pangang khawi* hi a chang chuan kan han chawl leh rih te hian ka hria a. Hmanniah pawh kan department lama mithiamte pawh, ‘lo inzir chiang teh u’ kan ti a. Chuta an sawi chu - a then khan an lo tawp san ve leh thin a, an tawp dan tlangpui kha chu, a chi leh a chaw-ah a ni a. A chi hi a bik takin mugha lamah hian kan la harsa a, Assam te kan la han ring lawp lawp a. Keini lam hian siamchhuah te kan han tum ve bawk a, hma kan han la chho a ni a. Tin, a chaw chungchangah hian a hmun turte kan nei tam tawk lo pawh a ni thei a, amaherawhchu, heng te pawh hi ngaihtuahna kan sen zau a thain ka hria.

Hei, Forest Minister zahawm tak ka bulah hian a thu a, anni te nen pawh hian inbia ila a thain ka hria a. Anni lam hian plantation an bei ngat ngat mai a, Sericulture lama mamawh, ‘thing’ lampang kha lo phun ta se; department pahnih plantation-a tangrual khan nasa takin a chaw lamah khan min lo pui ang a, chu chuan Mizoram-a kan pangang khawitute a pui ang tih kha a rinawm a ni. Chutiang chuan thawhhona tha kan neih zelna tur pawh kan ngaihtuah a thain ka hria.

Tin, a pumpui thuah sericulture lama hma kan la sawn loh dan hi ka han sawi ve hrim hrim ang a. Mizoram pumah hian chhungkaw 4546 vel tunah hian pangang khawi lama inhnamnawih kan awm a. Mizoram-ah thingtlang khua 830 awma 211 vel chauh mai pangang khawi mi an awm a, Mizoram mipui zawng zawnga 5% pawh kan inhnamnawih pha lo a ni a. Chutih lai chuan amaha eizawna a awm theih dan tur te, a hlutna leh a tangkaina tur laia hi mipui kan inhrilh hriat a pawimawh a ni.

A dawtah chuan – budget demand-a *salary & wages*-ah hian nikum aiin kuminah nuai 30 velin BE-ah hian kan dah hnem zawk a. A chhan chu - RE kha chu House-in a pawm chiah loh avangin, a BE zelin kan rawn sawi a ni tih kha min lo hriat sak ula. Pension leh eng emaw staff lam kan lo tlem deuh vang te pawh a ni turah kan ngai a, *wages*-ah hian cheng 8,75,000/-in kan pung ve hret a. Hei hi chu kan hlawh pangngai, annual increment lo awm tur vangah ka ngai a. Medical-ah hian cheng nuai 43,17,15,000/-in kan han pung a, heng hi chu kan leiba leh kan medical bill inrulhna kha a ni a. *Other Charges* hi kan nei ngai lova, kumin chu kan han nei a, *Other Charges*-ah hian RE-ah nuai 6 min allot a, a chhan chu - Sericulture lama hmalaknate kan lo neih chhoh avangin, chutiang lam han buaipuina tur a ni tih kha ka sawi duh a.

Ka sawi leh duh pakhat chu - ‘sorkar hnathawk hlawah kan hmang tam’ kan ti a, a lehlam zawnga ngaihtuah chuan, sorkar hnathawkte hi mipui tana thawk anni tih hi kan theihngihl emaw ni chu aw tih hi ka ngaihtuah a. Nitina an rawn chhuahna zawng zawng hi ‘mipui tan an rawn vak chhuak a ni; mipui tan office an rawn kai a ni’ tih kha chu kan hriat hi a thain ka hria. Chutiang ni lova, anmahni lama hlawh kan lo dah tam

deuh avanga kan budget chhe ta luaa kan ngai lai hi, kan member-te pawhin ngaihtuahna seng zau ila. Kan lo dah tam deuh a nih pawhin, mipui leh keimahni tan thawk tho an ni” tih erawh chu kan thinlungah awm reng se.

Keimahni hmalakna hrim hrim hi - CEE Samagra 2021-2022-ah hian Siaha-ah hma lak a ni a, tunah sawn mugha a nih avangin plantation te buaipui mek a ni a. A kal tluan plantation te a lo puitling chho ang a, mugha silk, khawvela tha ber ang chi kan thar chhoh theih mai kan inbeisei a ni. Heng a plantation tipuitling tur hian kum 2-3 te a lo ngai a, a la tih hleih theihloh a ni. A plantation lamah kan la buai mek a nih chu. Chumi piah lamah SEDP hnuaiah hian district tina chhungkaw 300 theuh te chu ₹25,000/-in bul kan han tanpui baw a. A theih ang angin sorkar chuan mipuite dawm-kan tumin ke kan pen chho a ni tih kha vawiinah hian ka sawi duh a ni.

Tin, CEE Samagra-II hnuaiah hian chhungkaw 300 cover turin Champhai, Khawzawl leh Saitual-ah te kalpui tumin hmalak chhoh mek a ni baw a. Chu mai piah lamah he project hi autonomous district council area lam - MADDC, LADC leh CADDC te tan kan siam mek baw a, anni lam han dawm kanna tur hian kan kalpui mek a ni.

Tin, hei, ‘Seri-tourism’ kan ti a, chutiang te chuan ruahmanna te kan han siam a, tunah hian kan buaipui chho mek a, awmze neia kalpuiin, planning board lampangah te pawh kan submit chho a ni. Tin, DRDO te, Mizoram University te leh IIT Guwahati te nen tangrualin, a buhchium hi sipai lampang eitur atan ‘tih dan a awm em’ tiin ruahmanna kan han siam chho baw a, a theih ang angin kan kalpui a.

Member 5 vel chauh khan Sericulture kha an sawi a; vawiinah memberte hnena ka ngen duh chu – Sericulture hi ram mipuiaah kan sawi thiam a, kan inzirtir a, ram economy siamna tur atan ‘hmanraw tangkai leh tha a ni’ tih kha kan inhrilh hriat a pawimawh tak zet a ni tih kha vawiinah hian ka sawi duh a ni. Tichuan, Sericulture bikah hian han react vak tur kha a awm lova, kan thahnemngaih thu leh duh anga kan buaipui nasat loh thu kha a ni tlangpui a. Chuvangin, Sericulture bikah chuan kha kha ka sawi theih ni se.

A dawt lehah chuan - Vety hi ka han sawi ang a. Vety Department hi ka han luhchilh ve a, department hlun leh upa tak mai a lo ni a, ka va kal hi vannei ka inti a. Department officer leh staff-te an lo fel em em mai a, theihpatawp an chhuah a, kan hunte a reilo na chu, an theih ang tawkin mi an back up-in, mi an thawhpui a, an chungah hian vawiinah pawh lawmthu ka sawi a. Keini hi thil kan hre lutuk lova, tun thlakhat chhung lekah budget kan rawn pharh a ni a, chutiang karah chuan ruahmanna te theih ang angin min han siampui zung zung a, kan vei zawngte; ‘Vety Department hi a lo ngialnghet thain, belhchian a lo dawl em em mai a ni’ tih kha ka sawi duh a. A *budget head* hrim hrim hi budget demand kan sawi a nih avanagin, kan demand hi ka han sawi hrim hrim ang a, memberte lo hriat atan –

Financial year, 2022-2023 budget aini 2023-2024 budget-ah hian cheng nuai ₹440-in a pung a ni. *Salary head*-ah hian cheng nuai ₹540 dah a ni a, kumthar 2023-2024-ah cheng nuai ₹5,323.64 dah a ni thung a; kum thara a hniamna hi cheng nuai ₹74 a ni. A chhanah hian, ‘sorkar hnathawk pension leh thihna avanga chawl tawh an awm nual vang a ni’ tih a ni a. *Wages*-ah hian 2022-2023 BE-ah cheng nuai ₹428/- dah a ni a, kumtharah hian cheng ₹441,67,000/- dah a ni. Kum thar budget punna hi nuai ₹13 a ni a, a pun chhan hi, hlawh-pung vang a ni. *Medical treatment* lamah hian financial year hmasaah khan ₹89,15,000/- dah a ni a, tun tumah hian cheng nuai ₹68/- dah a ni. Medical treatment hi staff atanga chhut a nih avangin cheng ₹2,30,000/-in kumthar budget hi a tlem ta zawk a, chu chu keimahni lamah pension leh thihna neuh neuhte a lo awm vang a ni. Tin, CSS hi budget awmlah laiin kum 2023-2024-ah hian cheng nuai ₹610 dah a ni a, department dangin CSS an implement a nih erawh chuan, kum 2022-2023-ah budget allocation cheng ₹259,68,000/- a nih laiin, kumin budget estimate erawh chu cheng ₹7,66,10,000/- leh singkhat a ni, a inthlahna hi ₹5,16,42,000/- a ni. Amaherawhchu, kan hriat theuh angin budget hi *token provision* mai a ni a, estimate-ah a tel lova, CSS fund hmuh belh beisei a ni tih kha ka han report ve zawr zawr a ni.

An hnathawh dan tlangpui ka han sawi thwak thwak ang a. Kan hriat angin Vety Deptt. hna ber chu – ‘*Mizoram-ah sa thianghlim leh hrisel kan ei theih nan*’ tih kha a laimu ber a ni a. ‘Engatinge ran hrisel chu a pawimawh?’ kan tih chuan, natna kan kai zawng zawng 61% vel bawr hi ran atanga kan kai a ni, an ti a ni mithiamte chuan. Tunhnai kum 20 chhunga ran natna an hmuh 75% chu mihring leh ran inkaichhawn theih deuh vek a lo nih avangin, ran hrisel a pawimawh em em a lo ni a, chu chu Vety Deptt. Pawh hian ‘kan tum ber a ni’ tih ka sawi duh a. Chutiang chuan hmalakna hrang hrang Social Clinic Development Programme hnuaiyah theih tawpin pilot project-te kalpui a ni.

Nichina pilot project ‘nuai 3’ kan tih kha, vawiin lamah hian account te lo check se la, a lut vek tawhin ka hria a, kan han buaipui char char a; chu chu kan memberte pawhin min lo hriatsak sela. Chutiang chuan kel leh ar-ah te theih tawpin tan kan la a, hma zawi zawiin kan sawn zel a ni. Chubakah heng district thar - Hnahthial, Khawzawl leh Saitual-ah te hian office thar hawn tumin hma kan la mek bawk a ni tih ka han report bawk a ni.

Tin, RIDF hnuaiyah hian hmasawna hrang hrang kan thawk a, tunah kan thawk mek bawk a, chutiang chuan vawiinah hian fund tam tak kan hmu a. Hmun hrang hrangah Vety quarter-te sak that mek a ni bawk a ni. Tin, VFA quarter leh Veterinary Dispensary building-te Zoram hmun hrang hrangah kan buaipui a, ₹1,480 lakhs zet helamah hian ruahmanna kan nei a ni.

Chubakah chuan, Article 275 atang hian hmun eng emaw zatah hna kan thawk bawk a. RAHC building kan sa bawk a, a rem dan danin kan buaipui a. Tin, Mampui farm kan chei tha bawk a, kan buaipui mek a ni.

Tin, North Eastern Council hnuaiyah tunah hian sial vulh pun lamah hmalak mek a ni a, Lungkawlh-ah hmalak chhoh mek a ni. Tin, SASCI hnuaiyah hian animal feed go-down sak kan tum bawk a ni. Tin, ‘Nucleus Board-Semen Station’ kan ti mai a, vawk chi dahkhawmna a ni mai ang chu, awmze nei leh tha zawka kalpui a nih theih nan theih tawpin hma kan la a ni.

Tin, African Swine Fever lo leng kha a rapthlak khawp mai a, nasa takin keini Vety lam pawh min nghawng a. Tin, Covid avang khan kan tuar khawp mai a, tunah hian bawng 2000 vel awm thin kha, Pu Speaker, 900 vel chauh kan nei tawh niin kan hria a, a pawl kan ti khawp mai. Hengte hi ‘engtingge kan tih ang’ tiin hmannah pawh kan thukhawm a, ‘kan society tuamdah leh dan a awm em?’ tih te pawh kan rilruah a awm a ni. Khang vawk hri leng avang khan vawk 46,208 kan hloh a, kan chhinchhiah dan chuan. Chubakah, kai mai thei dinhmuna ding 24,162 talh an ni bawk a, ‘kan suat’ a ni ber ang chu. Chutiang chuan hriin min han nuai leh thin a, a buaithlak hle a ni.

Kan sorkar leh Finance Minister chungah lawmthu ka sawi mawlh mawlh duh a. Central atangin 50:50 turin khang *vawk-culled* neitute hnena zangnadawmna kha dil a ni a, ₹584.97 lakhs khulam atangin kan hmu a, state sorkarin khati zat bawk khan min dolet a, chhungkaw 2,488-te hnenah zangnadawmna kan hlan thei a, kan lawm hle mai. Kan mangannaah theih tawpin sorkarin, a bik takin Finance Minister-in min hriatsak avangin lawmthu ka sawi mawlh mawlh a ni. State dangah pawh a he ran hri hi a leng ve tho na a, a ti hmasa ber kan ni a, hei hian kan Vety Deptt. ngelngheh zia leh taimak zia a tilang a ni.

Sawi loh theih loh bawk chu - vawkpui tha chi central sorkar-in tihpun a tum a, man to takin min leisak a. Hun kal tawhah khan, ‘Mizoram-ah hian a pui chhuah ila, chuta atang chuan North East state dangah i tipung teh ang’ tiin keini hi nodal-ah min han hmang a. Nodal-a kan han tang thei ringawt pawh kha thil ropui tak a ni a, chu chuan theih tawp kan chhuah zia a tilang a, kan department te an chhuanawm hle a ni tih kha ka sawi duh bawk a.

Nichina member ten an sawi ang khan, Mobile Veterinary Unit chungchangah pawh vawinah hian block 26-ah dahchhuah a ni a, chutah chuan doctor pakhat, VFA pakhat leh driver dah a ni a. A motor kha changkang tak mai a ni a, chu chuan block hrang hrangah kan intirchhuak a, block 1-2 ah erawh chuan a motor tlema a lo chiangkuan loh deuh avangin Selesih-ah a la awm a, a mihringte chu an thleng chho tawh a. Chawngte lam pawh Ni 11.2.2023 khan a thleng thla tawh a ni tih ka sawi duh bawk a ni. Hei hian Vety doctor an indaih lohna tam tak min chhawk turah ka ngai a, a

chhan chu ama RD Block huam chhunga veng hran hranah heath call-centre kan nei a, a number chu 1962 a ni. Chu number-ah chuan kan zuk dial ang a, anni khan ruahmanna lo siamin chumi block unit chu hrilhin chutiang chuan a kal zung zung tawh mai dawn a ni. Hei hian kan ran vulh kawngah thingtlang lamah nasa taka min puih ka ring a, vawkte chhul lak thlengin kha motor-ah khan a tih theih vek dawn a ni.

Memberte khan hnathawktu indaih lo; ‘ran doctor kan nei lo’ kan lo ti a nih pawhin tunah chuan a hmunah min thut chilh chiah loh pawhin darkar khat leh a chanve hnu velah emaw chuan lo thleng thei turin ruahmanna a awm a ni. Chu chuan vawiina Vety doctor emaw, he mi chungchang a kan harsatna emaw te chu min chhawk theih kan beisei a ni. Hei thil hi India ramah a ti hmasa ber, a hmu hmasa ber kan ni leh bawh a ni.

Tin, heng bakah hian Animal Welfare Board, keini department chan lampang hi kan chikim ang reng khawp a, pangang atangin sebaung ah kan chho a, a changin naute hriselna atangin pitar-putarah kan chho leh bawh a, ‘Duichuani’ an tih atangin zu tha ber thleng mai kan buaipui a, Poshan-chaw tha atangin a ei chi loh damdawi thlengin kan buaipui bawh a; kan chan hi chu all-round a ngai khawp mai. Chuvangin, rilru hrang hrang put a ngai a ni. A changin naupang deuha awm a ngai a, a changin puitling deuhah; LGBT thleng mai hian kan chan a ni a. Chuvang chuan, ka lo sawi sei deuh a nih pawhin min lo hrethiam dawn nia.

Chutiang chuan Vety-ah pawh helaiah nu leh naute dinhmun kan ngaihtuah lain Animal Welfare Board lama uite thlavang hauh thlengin kan hna a ni leh bawh a, khawi emaw laia ui sa zuarte pawh kha keini mitah chuan a hnawh tan ringawt mai a. Tin, chu mai piah lamah ar insual tir thleng khan hnawh kan ti em em tawh mai a ni. Chuvang chuan, kan hma hi a zau si a. Hmanni kan committee pawhin, “eng pawh ni se, Animal

Welfare Board chungchanga a hma lo la tur leh kan dan neih tea hma lo la tur officer-in-charge siam turin dil ang u” te kan han ti a. Kha pawh kha file a rawn kal thuai ang tih kha kan beisei a ni. Chutiang chuan Animal Welfare Board pawhin theih ang angin kan ranvulh, a bik takin ‘ui’ hi; bawng te hi chu an lo ti lutuk lo pawh a ni thei a. Amaherawhchu, bawng te pawh hi *Dan* ang chuan tawng-pawng talh mai kha a lo theihloh a, kan talh hmain hahdam taka dah tur kha a lo ni a. Kan naupan lain a ki ah tlangsam kan tar a, kan lo chaih hah hnep mai te kha chu ka ngaihtuah let thin a, tuna kan dinhmun nen chuan a lo inang ta hle mai.

Tin, hei, khawvel changkang zelah ran enkawlina damdawi-In private te pawhin an lo siam thliah thluah tawh a, chutiang dan te pawh chu India ramah hian a nei hmasa ber kan ni leh a. *The Mizoram Licensing and Regulation of Private Veterinary Hospitals and Clinics Act, 2021* hi keini hian hmanni lawk khan a rules kha he House zahawm takah khan ka rawn lay nghe nghe anih kha. Hengah te pawh hian kaihhraina mumal

a awm loh chuan, heng hospital leh clinic centre te kan dinna kawngah khan felfai taka chet a nih loh chuan tiin ngaihtuahna zau zawk nen ruahmanna kan siam a ni.

Tin, chu mai piah lamah Kissan-Credit Card te hi sawi ka chak deuh a. Heng te pawh hi DVO district-ah loan puk kan buaipui sak a, mi 6225 in ran vulh chungchangah loan an hmu tawh a, vawk loan te pawh a ni ang chu. Tin, chu mai piah lamah NLM hnuaiah hian vawk leh kel vulhna central scheme lian kan nei bawk a, member zahawm tak takte pawhin khatiang ti awm chi kan hria a nih kha chuan office lamah ngaihven ni se, felfai taka lo buaipuitu tur kan dah a. Chutiang chuan ‘ruahmanna felfai tak kan siam a ni’ tih kha wawiinah hian ka han report nghal a ni.

Tin, ‘Veterinary Healthcare Institution’ kan ti a, a hnuaiah hian Polyclinic Hospital pakhat, District Veterinary Hospital 10 leh Veterinary Dispensary 69 kan nei a. Rural Animal Health Centre hi 67 Mizoram pumah kan nei bawk a ni.

Tin, ran talhna hmun ‘Animal Slaughter House’ kan neih te pawh hi, Mualpui lam te pawh kha kan han sawi a, a kawng te pawh kan buaipui khawp mai a. Amaherawh chu hmun thenkhata kan siam te chu hman anni lova, hei hian ngaihtuahna a ti tamin kan hria a. Serchhip te pawh ani ang a. Hmanniah pawh meeting te kan han nei a, chutah chuan kan officer-te an khuaah te kalin VC te nen pawh an harsatna te sawi hovin, eng nge an hman loh chhan te zawhfiah a ni a. Chutiang chuan Slaughter House hrang hrangte report te lak khawm a ni a. Lunglei lam te pawhin tunah hian an hmang chuang lo a ani tih te pawh kan hria a, LMC te kan thlan zawh chuan rei lo te ah loh theih loha hman a ngaih ka ring a. Chutiang chuan khang hman theihna dan tur te pawh kha ruahmanna leh ngaihtuahna kan seng chho mek a ni.

Tin, Ar-awpkeuna kha Mampui leh Lungpuizawl-ah kan nei a, a theih ang angin kan han ti a. Amaherawhchu, eng lai pawha tih chu a lo harsa ve a, tangkai taka hman chhoh hi kan tum a ni. Tin, Mampui hatchery pawh tunah hian chei that tum a ni a, pawisa pawh eng emaw zat dah a ni.

Nichin khan member zahawm tak khan khaw thlang lamah phalna loa vawk lak luh kha a rawn sawi a. Kha kha kan buaipui a, kei ngei pawh zanah min rawn phone a, ‘vawk an la lut a ni a’ an rawn ti a, a video te min rawn thawn a. Kan buaipui char char a, khu lama kan DVO te nen pawh kan in phone a. Kan Director te pawhin theih tawpa hma lain, Dy. Commissioner, Mamit District-ah January Ni 27 khan lehkha te an theh lut a. Chutiang chuan a theih ang angin a lo lut hi dan kan tum a. Amaherawhchu, in dan sen te a lo harsa a, miin tum ren-rawna an tih chuan, a awng lai lai te pawh a lo awm thei a. Amaherawhchu, keini chuan helaia vawk vulhtute harsatna sutkianna turin ngaihtuahna kan seng zel a ni tih hi wawiinah ka sawi duh a ni.

Nichin khan, ‘budget 8% in a sang e’ tih te kha memberte’n an rawn sawi a. Kha kha RE nena min khaikhin sakna kha a ni a, keini chuan BE leh BE zel kha kan khaikhin a. Amaherawhchu, RE anga in rawn khaikhin chuan, kha kha a ni mai a. Tin, Farkawn, Vaphai leh Khawbung a VFA dah chungchang te pawh kha ngaihtuahna kan seng a. Amaherawhchu, an ran population te ngaihtuaha siam rem turin ngaihtuahna sen a ni. Tunah chuan MVU te a awm tawh a, kha khan harsatna chu sukiang turah kan ngai ni.

Tin, vawk suatna te compensate anih loh chhan kha - department te indaih tawh lohna avangin duh angin a suat vak theih loh a, khatihlai khan Local Council ten an suat tam tak a awm bawk a ni. Chu chu VFA leh kan department-ah rawn report te kha chu kan lo dil sak mai a. Khatiang khan, khalaia rawn report-te kha chu kan tihsak a ni tih kha ka han sawi duh a nih chu.

Tin, Tualcheng, Murlen leh Rabung vela sial-vulhna hungna tur barbed-wire tak kha a awm lova, amaherawhchu, research centre atangin barbed-wire bakah rangva leh thil dangte pawh kha ngaihtuah sak anni tih kha ka sawi duh bawk a ni. Tin, Mualpui-Slaughter House chungchang kha ngaihtuahna sen chhoh mek zel a ni bawk e.

Excise Deptt. budget hi, Pu Speaker, a pumpui thuah BE ah hian nuai 40 in kan budget a rawn pung a, *Salary Head*-ah hian nuai 47, *Wages* ah cheng 98,000, *Medical treatment*-ah nuai 7.9 lakh-in a hma kan pha lo thung a. Chutiang chu kan dinhmun a ni a.

Excise Deptt. hi, Pu Speaker, Pathianin mihringte min siam dan hi a lo inang lo khawp mai a; a then chu taksa thunun thei em em, ‘hei hi ka taksa tan a tha lo a ni’ tia nghei mai thei kan awm a. A then erawh chu, ‘ka ngeih lo a ni’ tih hriat reng pawha ei tum tlat kan awm ve bawk a, kan chak zo lova. Khatianga ei-in tur an ngeih si loh, thil thalo lak bo nghal kha Excise Deptt. hnathawh a ni a. Damdawi te pawh kan ngeih loh chu kan hre em em a, chulai karah ei kan tum tlat mai bawk a, chutiingin Zu pawh taksain a ngeih lo tih kan hre reng mai a, mi chak lo ten ei-in kha kan chak tlat mai bawk si a, ‘khangte kha kan lak bo sak theih chuan an lo zia deuh ang a’ tih kha kan thu laimu chu a ni deuh ber a, Pu Speaker. Chutiang hna chu kan han thawk a ni a. Lak-luh tang tang tum awm bawk, la man loh lamah kha chuan kan buai hlei thei lova. Ka rilruah chuan, “kan man-sa te hi man lo ta ila, chhungkaw engzatnge lungngaihna khurpuiah lut ang aw?” tih hi kan tehna pakhat chu a ni a.

Kan naute an hah ve em em mai a, a fel pawh kan felfai ve tawh khawp a, tunhma te ngaihtuah chuan. Tawng mawilo ni lo sela, kan hmel te hi a tha tawh a nia, kan Excise Department hmel hi. Kan fel-fai thiau mai a, ‘theihtawp kan chhuah a ni’ tih kha ka han sawi duh a. Tin, hun hmasa lamah Constable eng emaw lak a ni a, theihpatawpin an thawk bawk a, chutiang chuanin chhun zanin kan bei ve tak meuh meuh a ni tih kha sawi duh a.

Tin, organize business-ah khan ka han sawi duh lai chu - nichin khan member zahawm tak takte khan, “YMA te an duty a, chutiang khatiangan” te kha an ti a, mak an ti deuh hlek a. Hei, *Allocation of Business Rules* No. 6 ah hian, “Cooperation or coalition with NGO on Excise and the Narcotic Policy” tih hi a lo inziak kuau mai a, ‘anni nena hian thawk ho awm ber kan ni’ tih tih kha vawiinah hian ka sawi duh a ni. Chuvang chuan, Social Welfare chan lam mah nise han sawi kawp kha a rem avangin, ‘*Ruihhlo Do Pawl Committee* pawh kan ding rup mai a ni’ tih kha vawiinah hian ka sawi duh a ni. Tunah hian kan Chief Minister zahawm tak kaihhraina hnuaiah District Level Committee kan din a, tichuan Village Level Committee pawh kan din bawk a, vawiinah hian theih tawpin Excise te chuan a lak bo hna kan thawk a, kan thawk seng lo a ni. Chulai karah chuan ‘kan ban, kan tha, tihchak kha a ngai a ni’ tih kha kan hre ve a, chuvang chuan heng Ruihhlo Do Committee hian ‘theih tawpa hma a lak chuan, kan zia ang’ tih a rin theih a. Kan Finance Minister zahawm takin cheng vaibelchhe 3 min pe a, kan committee thuai ang a, hei hian Zoram pumah nasa zawka he ruihhlo do kawngah sorkarin chet lak a tum a ni. Chu chu House kaltlangin ka han report a. Zoram pum hmun hrang hrangah hei hi min lo support a, vawiinah hian kan ramah hian Damdawi-Ruihhlo kan do hi a ngai takzet zet tawh a.

Hei hi ka sawi pawlh lo thei lova, *Mizoram Social Defence* Jubilee board, keimahni Social Welfare hnuaiah survey-in a tihchhuah a ni a, ‘*Drug & Children in Mizoram*’ tih hi a ni a. Hei hi han chhiar ringawt pawh hian tan lak a ngaih tawh zia leh min luh thuk tawh zia a lang a. Chuvangin, vawiinniah hian ‘muang thei kan ni tawh lo a ni’ tih ka sawi duh a. Zoram mipui zawng zawngte pawhin chutiangan kan hmuh pawhin, Excise service an lo kal nghak lova hmalak nghal kha ‘hei chu ka mawhphurhna a ni’ ti a, kan inchhung min luh chilh ve lo anih pawhin, ‘engtik niah emaw chuan min larawn luh chilh ve thei a ni’ tih hriah theih tawpa tan la turin Zoram mipui te ka sawm a ni.

Chutih rual rual erawh chuan drug cartel te an chak tawh a, lehlamah sum leh pai te kan harsa a, a inthlahrunawm viau lain, Pathianin hun tha te min pe leh turah ka ngai a, ‘motor tha zawk te pawh kan mamawh hle a ni’ tih ka han sawi duh bawk a. Chubakah, hei office te pawh, kan member te sawi ang khan, heng - Lawngtlai, Mamitah te leh Aizawl District-ah pawh office kan la nei lova, hengte pawh hi kan mamawh khawp mai a, ‘kan pu pawh hmu ila’ kan ti a. Kan Chief Minister zahawm tak pawh hian ‘minrawn takin’ tiin ruahmanna a insiam mawlh mawlh a ni tih vawiina House hi ka hrilh duh a ni.

Tin, Grape-wine chungchangah hian, sorkarin kuthnathawktute dinhmun hriain ngaihtuahna te arawn seng a ni tih kha min lo hriat sak turin ka duh a ni. Chumi piah lamah a zau zawka rawtna – ‘lakhuih thei te, dragon fruit te pawh hi a tha lawm ni’ tih te a awm a. Engpawh ni sela, grape-wine hi nasa takin khilalah hna an lo thawh tawh avangin sorkarin a chingtute dinhmun ngaihtuahin ruahmanna arawn siam a ni tih kha ka sawi duh a ni.

Tin, ralthuam leh hmanrua changkang zawk te pawh hi kan mamawh tawlh tawlh dawnin ka hria a. A chhan chu - kan hmalam hun thlirnaah hian hnam upa zawk te kaldan atanga teh chhuah hi a pawimawhin ka hria a. Tunhma bawlhhlawh paiha eizawn te hi thil ni thei hian kan ngai lova, tunah chuan bawlhhlawh paihin hi mi tam takin eizawn nan kan hmanawh tawh a. ‘Sub-Contractor’ kan ti a, private insa sub-contractor te hi hmanah chuan kan hre ngai lova, tunah chuan a lar ta em em mai a. Khatiang zel khan ‘slam area’ kan tih te pawh hi khawvel thang hian a lo hring chhuak hi a lo ni a. Hnam upa zawk kal tawh atanga kan teh chuan nakin lawkah hi chuan drugs-cartel hlauhawm tak tak te pawh ‘a awm lovang’ tih pawh a sawi thei tawh lova. Chuvang chuan, vawiinah chung hun thlira kan inbuatsaih hi a tul hle a ni. Vawiinah theipatawp kan chhuah chuan, ‘kan hmalam hunk an ti eng thei dawn a ni’ tih kha ka sawi duh a ni.

Keimahniah 2010 vel atang khan ‘Governor Award-Lawmman la te kan la awm ve ngar ngar a ni’ tih te pawh kha ka report tel ni ta se. Chu chu Excise lamah ka sawi thei ni ta se.

Social Welfare Deptt. hi a len deuh avangin bifurcate a ni a, Women & Child Welfare te nen tih kawp a ni a. A hnathawh a zau a, hmun thenkhatah building lian pui pui an sa a, a lehlamah chuan wheel chair te pawh kan sem leh lawp lawp bawk a, hna kha a inang hleih thei lova. Hmun thenkhatah nau chaw kan buaipui a, college lam kan han buaipui leh bawk a, khatiang khan hna hrang hrang kan thawk a ni.

Social Welfare Department hnuaiah hian Home - Rehabilitation centre 6 kan nei a, training centre 4, leh vocational training centre hi district 5 - Siaha, Serchhip, Kolasib, Champhai etc ah te kan nei bawk a, seat 245 a awm a, khatiang kha ruahmanna kan kalpui ve a ni. Tin, training centre bakah hian disability, pension, handicapped student stipend, uneducated unemployed allowance te, economic rehabilitation to handicapped person te, chi hrang hrang kha Social Welfare hnuaiah hian kan buaipui a. Tin, a pawimawh em em mai chu - State Braille Press, Tribal Art Centre tur tunah hian kan inbuatsaih chhho mek bawk a ni.

Social Welfare-ah hian committee leh commission hi a tam khawp a, a zau a, ‘department ropui leh ril tak a lo nih hi a’ ka ti a. Mihring nun a fawmkem a, nau an pian atanga an tar thleng maiin an hringnun zawng zawng kha chherchhuah kan tum a ni a. Kha kan chher sa te kha, entirman: inkhel tur an chhuak a, motor-ah an kal a, hringnun bulthut kha ‘Social Welfare ber hi a lo ni’ tih hi a chiangin ka hria a. Chuvang chuan, a department pawh hi kan tilena, kan tichak hian ‘ram hmasawna bulthut a lo ni mai awm mang e’ tih, ka koa a lo tlak tak hnu hian ka hmuchhuak vein ka hria. Tun hmaa department pakhat ve maia ka ngaih thin kha ka bih chian hnu chuan, ‘department ropui tak, hringnun zawng zawng inbilh-luhna hmun a lo ni’ tih hi tih kha ka ngaihndan thar a ni.

Tin, kan hnathawh, a bik takin tribal welfare-ah hian SIPDA, ‘Scheme for Implementation of Person with Disability’ kan ti a, kan ti mai a. MAJA atanga disability te dinhmun chawikanna scheme kha a ni mai a. Khawpui hrang hrangah wheel chair te, lift te kan siam a, tikhan kan buaipui nasa em em a ni. Chutiang chuan hna hrang hrang kan thawk a ni.

Tin, hei ‘Unique disable identity card’ kan ti a, ID te kan han siam sak bawk a, khang ID te kha a tangkai em em mai a, chutiang chuan anmahni ina quota an neih ang zawng zawng te kha ID hmang khan a tih theih a ni. Nichina member zahawm tak ten wheel-chair chungchang an sawi kha, kha scheme kha *Ministry of Social Justice & Empowerment* khan a kalphung a rawn tidanglam a, a hmaa kan tih thin kha kan ti tawh lova, ‘Firms & Society; Charity Trust’ tih bawr velah khan a pe ta a. Tunah hianin Mizoram-ah chuan National Institute for Locomotor Disabilities Centre in mawhphurhna a kalpui mek a ni, SCERT office-ah sawn. Chutah chuan kei pawhin ka buaipui thin a. Adhaar Card te a ngai a, khatiang Voter ID te, document te kha; khulalah kan thlen chuan min lo hrilhfiah thei zel a ni.

A lehlamah chuan, pian tira tanga *disabled* anih kha chuan, a ki pawh a dang a. Amaherawhchu mi a upat hnuah stroke-in a na a, a tlu a, a ke ruh a titliak a; khatiang kal theilo te kha a buaithlak em em mai a, MLA fund han pek lawp lawp chang te pawh a awm thin a, mihring nun tikimtu a ni bawk si a, a pawimawh hle a ni.

Tin, NSAP kha kan buai khawp a, zep thu pawh a awm lova, thla 18 kan ba a kan officer-te pawh an tang em em a. ‘IFMIS’ kan ti a, kan hre vekin ka ring a, chutah chuan a hmaa *khawngaih mark*-a lo inpe thin kha khawl chuan a hrethiam tawh si lova, kan buai e mem ta vek mai a ni, a data upload danah khan. Tin, NSAP hi a zau khawp a, Sangarasora heta a lo kal a, Pangkhua atangin khutah Bairabi zawng zawnga mi upate kha a huam vek mai a. Chumai bakah hmeithaite, pianphunga rual banlote ‘national family benefit scheme’ kan tih mai, chhungkaw pa ber eizawngtu boral te kha a huam si a, hrehawm kan ti khawp mai. Theih tawp kan chhuah a, Delhi-ah pawh vawihnih kan intir a. A pawisa kha min release theilo pawh a ni lova, a kalkawngah kan buai a ni ber mai a, a rawn luh dan tur laiah khan a. A tawpa tawpah chuan Pathian khawngaihna leh kan naute thawhrimna zarah nimin khan min rawn sanction thei ta a, cheng vaibelchhe ₹10,66,90,000/- min rawn sanction ta a, hei hi tunah hian pekchhuah tumin kan inbuatsaih chho mek a ni tih kha he House-ah hian ka rawn report a ni.

Tin, training centre hrang hrang kan neih hi a tam tham a, Jordan Centre te pawh a ni a. Jordan Centre pawh theih tawp kan chhuah a, a building hlui repair tur DPR-ah pawh siamrem tur khan. A maherawhchu kawngkhar erawh kha chu a inhmeh lo deuh pawh a ni mahna, kha erawh kha chu a kal apiangin an rawn sawi a, keini pawhin kan la zu en ve turah ngai ila. Engpawh nise, covid in min tibuai a, kan tum leh hmahlir te

nasa taka a sut-buai a, chuti chungin kan kalpui mek zel a ni tih kha vawiinah kan sawi duh a.

Tichuan, Social Welfare-a kan budget kha han report ve hrim hrim ta ila. Kan budget *Head of Account*, 2022-2023 salary head-ah hian nuai ₹17,66,10,000-in a pung a, hei hi bifurcation avanga post create thar leh fillup avang te, ICDS hnuaiia regular employee te hlawh tur dah avang te in a pung a ni. Tin, Khawzawl, Hnahthial leh Saitual district office enkawl na atan te, RD Block thar Kawrtethawveng leh Tlabung CDPO dinthar tur te, CSS hnuaiia thawktu tur hlawh dah belh avang te a ni bawk. Tin, OE-ah hian 2022-2023 aiin cheng nuai 258-in a pung a, hei hi a chhan chu - CSS budget provision-ah hian *Office Expenses* hnuaiia CSS budget provision a pung a, 2022-2023 chhungin guideline thar siamin leh tih changtlun niin *Shaksham Anganwadi* leh POSHAN 2.0 – Mission Vatsalya leh Mission Shakti te scheme component te rawn tih san a ni a, chumi avang chuan budget allocation tihsan a ni.

Tin, *Supply & Materials* ah hian CSS-budget provision hi cheng nuai 1,064-a tihsan a ni bawk a. He budget head hi supplementary nutrition programme - Aganwadi nutrition sem thin te leina ber pawisa a ni a. Kum 2023-2024 financial year ending dawnah Govt. of India fund lokal se, next financial year-a hman ngai lo tura SNP beneficiaries ten an dawn theihna tura dah belh a ni tih kha member-te ka han hrilh hria a ni.

Tin, *GIA Salary*-ah hian cheng nuai 8,71,19,000-in a pung a, budget provision tihpun hi ‘ministry atanga scheme a rawn tuaihnum vek’ kan tih tawh ang khan, scheme hrang hrang *Shaksham Anganwadi* leh POSHAN 2.0 – *Mission Vatsalya* leh child-protection service *Mission Shakti* hnuaiia thawktute an pun tak avangin *GIA Salary* hi a pung a ni. *Non-salary GIA* budget estimate 2022-2023 ah hian cheng nuai 3,09,68,000 in a tlahniam a. Tin, 2022-2023 BE ah hian EMRS enkawl na tur sum dah a ni a, EMRS te hi Ministry of Tribal Affairs-in instruction a chhuah angin, society a enkawl tawh angin 2023-2024 BE-ah hian telh a ni ta lova, hemi avang hian *GIA Non-Salary* hi a tlem phah tih kha ka han report ni bawk sela.

Tin, *Major Works* ah hian kum hmasa aiin cheng nuai 2,900/-in a tlem a, kum hmasa lam EMRS-a cheng nuai 2,900/- dah anih laiin kumin kumtharah hian society kuta a awm tak avangin, dah a ni ta lova, churang chuan a tlem a ni.

Khang bakah khan bifurcation *Women & Child* kan tih avang khan directorate pahnihin kan awm a. Chutah chuan ‘Integrated Child Development’ tih thina kha, ‘Shaksham Anganwadi’ tiin an rawn thlak ta a. Mizoram pumah hian Anganwadi-helper mi 2244, RD Block 26 ah kan awm a ni. ICDS hnuaiia *Anganwadi* hi naupang thanglian zel tur enkawl na a ni a, churangin heng hi hlamchhiah theih a ni lova. Sorkar pawhin

theih tawp a chhuah a, naupang an kum aia zangte, ‘sawngnawi’ kan tih ang chi te zawng zawng tihchak kha a huam vek a ni.

Tin, *Anganwadi* hi a pawimawh a, thingtlangah a tangkai zualna hre tho mah ila, central lamin min pek belh theih tawh lova. Vawiina memberte sawi pawh kha han tih vak ngaihna a awm lo a ni; a awm sa kan siamrem a nih ngawt loh chuan.

Tin, POSHAN Abhiyan te hi chaw tha - nutrition lam ve thung a ni a. Kan sawi kang khan - naupangin chaw tha an ei theihnan sorkarin theih ang angin hma a la a. Tin, Anganwadi hmunah huan siam te, toilet siam te khatiang khan thil chi hrang hrangah hma an la a ni. Tin, heng kan scheme ‘Ni-100 inhlawhna’ kan tih mai te nen pawh hian convergent te pawh kan nei thin bawk a. Tichuan, heng centre hi hmun 6-7 lai ah kan sa tawh a ni.

Tin, PMJVK-ah hian ruahmanna kan siam a, heng - Skill Development Centre a tan te, CDPO office fencing a tan te, Bal Bhavan - ICDS Complex hmun a tan te pawh hian PMJVK-ah pawh rawtna kan thlen ve bawk a ni.

Tin, ‘Mission Vatsalya’ tih hi, ‘Integrated Child Protection Service’ tih kha an thin a; *Mizoram Juvenile Justice Rules, 2003* tlawhchhana tih a ni. Tichuan, hei hian *adoption* te pawh a huam vek a, ‘naulak’ tih te pawh hi fimkhur a ngai a, tunlai khawvel ah. Mihring chi kan in hre lova, kan sorkar hnuaiah felfai taka heng nau ‘adoption’ kan tih te pawh hemi hnuaia kal a ni. Tin, heti lama hmalakna langsar zualah chuan - Observation Home hi district 8-a sakna tur sum hmuh a ni a, hmalak mek a ni a. Tin, Chung ho zawng zawng zingah chuan video conferencing practice leh online naupangten kan tih theih nan computer set pek vek anni bawk.

Visant Shakti - Women Empowerment hi, sorkar hian hmeichhiate, ‘Women and Child’ tih takah an thlavang a hauh nasa em em a, chutiang chuan mi baihvai, pan tur chuang nei lo te tan *One-stop Centre* te a siam a, hetah hian ni 5 leh zan 5 awm phal a ni a. Tin, khang tharumthawhna tawk te tan khan *helpline* te pawh a siam zel a, *Toll Free* number hi 181 a ni a, darkar 24 chhungin a biak theih a ni. Tin, naupang bik tan 1098 ah a biak theih bawk a ni. Hmeichhiate hi sorkar laipui hian a humhalh nasa a, keini Mizo zingah pawh hmeichhia han fiam mai mai te pawh hotea case neih theihna a ni tih kha ka sawi duh bawk a. Fiamthua ngaihmelh ringawt pawh ‘sual a tling ang a’ tih theih hial khawpin hmeichhiate hi ven anni.

Tin thil pakhat ‘*Beti Bachao, Beti Padhao*’ tih hi ‘save girl-child, educate girl-child’ tihna a ni a, hmeichhe naupang tlem lutuk sorkar laipuiin a veina atanga rawn siam chhuah a ni a. Hengah hian hmeichhe-naupiangte nasa taka an thlavang hauh te, ‘nau tihtlak’ ti mai ang, hmeichhe naupiang tur dan kha a duh lo ber a ni tih kha ka sawi duh a ni. Chuvangin, naupai lai hmeichhia a nih avanga tihtlak te, tihhlum te, hmeichhe

naupangte lehkha zirtirna kawnga nasa zawka an tel ve theihna tura hmalakna te, nau neihna Damdawi-In tihpun te, khatiang khan chi hrang hrangin ruahmanna an siam a ni.

Tin, PMMBY, ‘Pradhan Mantri Matru Bandhana Yojana’ tih hi, nu nau nei cheng 5000/- a tanpuina ang chi kha a ni a, heng te pawh hi nasa taka kalpui a ni a. Serchhip District phei chu a zawnin lawmman te pawh an lo la tawh a ni. Hetianga *Naupai Lawmman* hi mi 36,207 in an dawng tawh a ni.

Tichuan ‘Shakti Sadan’ an ti a, hmeichhe harsa leh khatiang lutuk te enkawlina kha a ni ber a. Chutiang chuan hmechhia ten mahni in pan tur te an neih lova chawlhna tur siam te kha a ni a. Heta pawimawh deuh mai pakhat chu – a scheme pakhat zawk *Ujjawala* – ‘Scheme for prevention of trafficking’ tih a ni a, chutah chuan hmeichhia anmahni ‘rukbo’ ti mai ang, ‘an hnawhchhuah’ te pawh a ni ang chu, khatiang zawnga harsatna tawh te tana ruahmanna a ni a, Maumual-ah khuan In pawh an nei a ni. Tichuan, ‘Creche’ tih hi chu kan hriat a rinawm a, *Nau-awmna school* a ni.

Awle, Women & Children Law hi ka han sawi ve hrim hrim ang a. *Protection of Women and Children from Domestic Violence Act, 2005*, hi hmeichhia chungga hleihlenna laka venhimna a ni a, heng te pawh hi tuna hna kan thawh tlangpuite zinga tel a ni a.

Tin, ‘*Sexual Harassment of Women at Workplace*’, hmeichhiain a hnathawhna hmuna mipat-hmeichhiatna chungchanga harsatna a tawhna laka venna a ni a. Women & Child hnuaiah hian hmeichhiate dinhmun him taka an awm theihna atan te, an hnathawhna hmuna tha taka an awm theihna tura tan te tiin sorkarin ruahmanna a siam a ni tih kha ka sawi duh bawh a ni.

Memberte zawhna tlema zawng chhang bawh ila. Pu BD Chakma khan, ‘*Other Charges* tih kha sawifiah ni se’ a rawn ti a. Nichina kan sawi ang khan, 2022 – 23-a 1932-in a pung a. Ministry of Child Development, 2025 scheme hrang hrang Siksha Marwardi Bushan te, Mission Shiksham leh Mission Shakti te rawn siam tharin, guidance thar te a rawn duang a, thawktute a rawn tipung thar a. Chuvang chuan, *Other Charges* hnuaia sum kan dah hi a pung a ni.

Tin, Angawadi chungchanga member zahawm tak Pu Chhuana zawhna kha, Angawadi centre tih that hi Ministry of Child Development lama dil thin a ni a, a la hlawhtling hleithei rih lo a ni. Mission Veng-ah hian Angawadi pathum, Kawlthei Huan-ah a awm bawh a, Anganwadi chauh awmna chu - ‘Model Veng a ni’ tih kha ka chhanna ni se.

Tikhan, wind-up chu ka duh tawh phawt ang a, Pu Speaker. Kan official te an awm a, thil pawimawh an sawi zawng zawngte an lo chhinchhiah vek a. Sawi mah ila kan sawi zo seng dawng lova, chuvang chuan, ka duhtawh mai ang a. Member zahawm tak tena an sawi kha keini pawhin theih ang angin kan lo enzui ang a, kan lo zir chiang ang a. Tin, kan official te pawhin an lo chhinchhiah a ni tih kha hre tlang ila.

Tichuan, wawiinah sawina hun tha tak kan nei a, ka lawm hle mai a. Tichuan, Pu Speaker, House zahawm tak hian min pass pui turin ka rawn ngen e. –

Demand No.	Purpose	Amount (in ₹)
7	Excise & Narcotics	49,65,81,000.00
20	Social Welfare	1,75,25,12,000.00
34	Animal Husbandry & Veterinary	69,11,70,000
41	Sericulture	17,35,79,000.00
TOTAL		3,11,38,42,000.00

SPEAKER : Awle, tunah chuan Minister zahawm tak Er. Lalrinawma'n a Demand te –

Demand No.	Purpose	Amount (in ₹)
7	Excise & Narcotics	49,65,81,000.00
20	Social Welfare	1,75,25,12,000.00
34	Animal Husbandry & Veterinary	69,11,70,000
41	Sericulture	17,35,79,000.00
TOTAL		3,11,38,42,000.00

te hi House pass a rawn dil a. Pass remtiin, 'Remti' ti rawh u le. Remti lo kan awm chuan 'Remti lo' ti ula. (*Memberte'n an remti a....*)

Awle, Minister zahawm tak Er. Lalrinawma Demand, a department enkawlte hman tur a vaiin 3,11,38,42,000/- chu House in lungrual takin a passed a ni. (**Er. Lalrinawma, Minister:** Pu Speaker, ka lawm e.)

Tunah chuan Minister zahawm tak Pu Lalchhandama Ralte kan sawihona te wind-up turin ka sawm ang a. Sawifiah ngai a tih te sawifiahin, a demand te House-ah pass rawn dil nghal se la; ka sawm e.

PU LALCHHANDAMA RALTE, MINISTER: Pu Speaker, ka lawm e.

Hei, wawiinah tun term chhunga budget session hnunung ber kan neihah memberte'n demand zalen takin, rilru zau takin kan han sawiho a. Memberte'n ka department pathum enkawlte min han sawipui danah te ngaihthlak a nuam tlangin,

thahnem min ngaihpaina te ka hmuhin lawmawm ka ti a, a hmasain lawmthu ka sawi a. A tawi thei angin wid-up te pawh ka han tum ang a. Tuna kan han sawi ho tam tak kha mimal te tea han inchhan kha a rem vek lo ang a, eng emaw clarify tur tih lai bik erawh kha chu sawi chhuah ka han tum ang a.

Tin, vawiina demand kan han sawihonaah khan member 25 kan participate a, chung atang chuan member 6 ten Demand No. 18 - P&S Department kha min sawipui a. Kan sawihona tlangpui atanga han lak pawh khan a lawmawm lam niin ka hria a.

P&S Department hi kan hriat angin sorkar department kan neih zingah pawimawh tak si, langsar vut lo, ‘*a kila lung tangkai*’ kan tih ang kha a ni a. Amaherawh chu, thawktute kan indaih tawk lova, harsatna tam tak kan nei a. Thawktu kan neih mek thenkhat an lo thi then ve a, pension te kan nei zel a, chuti chung chuan an hna hi a hautak em em thin a, hun bichilh tak, hun tawi takah tun kan budget session angah te, kan budget bu hrang hrang leh pawimawh zawng zawngte tlaivar dawn dawnin min han buaipui a. Tin, election te a lo thleng a, election material pawimawh zawng zawngte an khawih a lo tul a, govt. gazette te leh thil pawimawh bik, confidential zawng zawng khawihtu an ni. Chungah chuan duhsak an phu ang hian kan duhsak zo lo hi a pawh khawpin ka hria.

Technology han thang zelah hian an theih ang tawkin hna han thawk thin mahse, sorkar kal tawh hun eng emaw chinah khan khawl lian leh khawl thate kan han lei ve a, amaherawhchu khawvel hi technology a thang chak em em a, khawl tha kan neih, a hma pawha north-east a tha bera ngaihte pawh kha tun hunah hi chuan a lo *out-dated* ve leh zel tawh a, digital printing machine te pawh hi kan mamawh tawh khawp mai a. *black & white* leh colur tea han chhutna, rang zawka kan mamawh engkim kan purpose serve thei ang chite hi mamawh a ni tawh a. Khawlte te hi nei nual tho mah i la, a then chu UT lai khawl kan la chhawm te, state kan nih hnuah pawh hun hmasa lama kan leite kha la inhung khap khup a, hengte pawh hi modern technology hmanga kan thum that a tul hle mai.

Tin, chulovah chuan Printing & Stationery hian inkaihhraina mumal tak kan neih chu - he Assembly in a pass, ‘*Guidelines on Execution of Printing Works, 2008*’ kan nei a, chu chuan sorkar department zawng zawngte min phuar a, print tur material kan neih print chungchangah te, hemi piah lamah hian eng eng emaw thil Printing & Stationery dawr ngei ngai te, printing & stationery department ina kan tih sak theilo a nih pawhin, a department atanga phalna lak ngai a ni a. Chungah chuan Printing & Stationery hnuaiyah hian approved firm eng emaw zat in register kan nei a, chu chu keini hian kan outsource thin a, chung thil kan outsource reng reng hian 2% hi royalty ah kan lak avangin govt. revenue ah hian a lut thei thin a ni. Eng emaw chen covid avang leh thildang avangin kan han inhrethiam thui chho a, hetih lai hian department tam takte hian Printing & Stationery Deptt. dawr chiah lova print tur kan neihte a remchang danga

kalpuite pawh kan awm leh deuh hlek a, tlemin keini lampangte pawh tan kan han la leh zual ang a. Finance department lam te pawh Printing & Stationery ina a remtihna/phalna tello kha chu bill a pass thei lova, chungah te pawh chuan hma lak chhunzawm te pawh kan tum a ni. Heng ka han han tihna chhan hi - sorkarin a khawih tu turte, a tithei awmte *Dan* a siamna hnuaiah a din a, chung an tih tur angte kan inzah sak hi a thain ka hria a.

Tin, keini hi ‘printing’ tih piah lamah hian ‘stationery’ tih kan ni tel ang hian stationery-ah pawh sorkar department pawhin man man zawk, tlawm zawk, awmze nei zawka sorkar sum sen tlemna tur a awm zawk theihna tur atan stationery thil tam tak kan pechhuak a, kan outlet-ah hian mipui tan pawha dawr theihin kan han insiam thin a, chutiang chuan approved rate mumal tak neiin keini hian kan kalpui a ni. Amaherawhchu mipuite pawh, sorkar department dangte pawh a ni ang chu, an dukhawp hi tunlai hunah hian pek hleihtheih loh hi kan nei ta zauh zauh mai hi a chhan a awm a, *inflation* - thil man sang chho chak lutukah hian keini department chuan meeting ina a approve rate ang thlapa kal chho a ni a, approved rate kan siam a, engkim kan tih hnua hian thil man sang avang hian department-in kan lak tur leh, kan outlet atanga pek chhuah tura kan pek lehna turah khan supplier pawh kan hmu hleitheih tawh lo a ni. Chutiang khawp chuan pawn lam dawr a ngaih changa kan hriatthiam leh kan han phal sakte pawh a awm zeuh zeuh tawh a. Chungte chu kan khawvel thang zelah paper te leh thildang stationery item man han sang chho avanga awm a ni a. Hengah pawh hian department ina a hriatthiamna/remtihnaa hengte pawh hi kan lei zel hi a tul khawp mai. Sorkarin stationery thilte lakna tur atana stationery te pawh a siam kan nih avangin, helai hi kan inhriatthiam a, thawhhona tha zawk kan neih a tul khawp mai a. Tunhnaiah kan han enchiang a, sorkar department zingah pawh min dawr chiah lova min han kal kan deuh eng emaw zat kan nei a, reiloteah department hrang hrangah lehkha pawh kan rawn tichhuak leh nghal dawn a ni.

A dawt lehah chuan - revenue target hi cheng nuai 214.74 pek kan ni a, tuna kan lan danah hi chuan kan revenue target hi hun dangah chuan kan khum thin a, tun hun bikah hi chuan kan phak lo mai awm mang e tih theih a ni. A chhan pawh covid avangin nikum chhung zawng zawng khan printing work ang chite leh thildang kan dawr ang hote pawh kan hawng hleitheih lova, chungte avang chuan theihpatawp chhuaha kan han ti chung pawhin kan revenue kan han la pha lo deuh hlek a. Tun February leh March thlate hi han kal chho ta se ‘kan tlin hram ang em aw’ tiin dingdihlipin kan thlir a ni.

Chutih karah chuan sorkar department min dawrtu awm chhunte pawh hian a print na man ba hi min la pe chak lo ve leh chhawng a. Khang zawng zawngah khan keini hi target neia awm kan nih avangin, kan target achieve tur chuan department hrang hrang ten kan department-a an ba neihte min han pe chak deuh ta ula, department kan nihna anga kan mawhphurhna, sorkar revenue kan pek turte pawh pek tlin ngei tumin theihtawpin kan thawk a. Thawktu kan neih ang chhun chhunte an taima a, an inpe a,

an hnaah an dedicate em em a, pawn lam deparment dang anga han in pho-chhuahna chance a awm lova, hnathawk miah miah chi an ni a, an fakawm hle a ni.

Member zawhna han neih deuh leh han react ngai pakhat a awm a. Pu Speaker, i remtihna - Member zahawm tak Dr. BD Chakma khan “suspense ah 100 lakh kan dah kha, engnge ni suspense kha, a awmzia min han hrilhfiah thei se” a rawn ti a. Keimahni term ah chuan ‘suspense’ awmzia chu, kan budget-a stationery item leina tur bik sum dah hran kha a ni a. Chung chu kan han lei a, outlet-ah retail price-in department dang tena an lei tur kan dah hranna kha keini department tawngah chuan, ‘suspense’ kan ti a ni.

Pu Speaker, Demand No. 28 - Labour, Employment, Skill Development & Entrepreneurship Department hi Member zahawm tak tak 13 ten min sawipui a. ‘React nise’, tia han phut deuh te pawh an awm a, chu chu nakinah a remchan leh kan sawi ang a. ‘LESDE’ ti tein an sawi a, kan department thahnem ngai taka min han sawipui lai khan lawmawm tih tak tak ka neih rualin, ka ngaihtuahnaa lokal leh ka rilrua lang lian ber chu – “He department hi Mizoram sorkar hnuai department awm zawng zawng zingah, department thang duang ber, hmahlir eng ber, nakin lawkah he ram tan pawha kan rohlu tur a ni” tih hi he House-ah hian ka sawi duh a. LESDE department hi a scope a tha em em a, a bik takin kan thalaite tan hian he department hi, nakin lawkah chuan vawiina kan *major department* te zingah sawi tel lovin, *minor department* angah ngai deuh mah ila, kum reilote hnuah hian *major department* tak tak a ni dawn a ni. He department-a thawk turte emaw, he department atang department danga dah turte pawh hian ‘an la inchuh luh luh dawn’ tih ka sawi duh a. Tunah chuan Directorate pawhin hun hmasa lamah chuan building a nei thin a, eng emaw avangin chhuahsan a ngai a. Mi in luahin Directorate kan thu a, building 3-4 kan luah kawp a, kan la zahawm tawklo pawh a ni mai thei. Chuvangin, kan Chief Minister zahawm tak hnenah hian kan department hian kan dil a, “Secretariat-ah ram ram thatak min pek theih chuan keini department chuan sorkar tibuai miah lovin kan department building kan sa thei ang” kan ti a. Chutiang chuan kan Chief Minister hian Secretariat hmunah khuan hmun tha tak min allot a. Tunah hian kan department-in thil hrang hrang kan lakkhawm leh nichina kan sawi thenkhat Workers Welfare Board atanga cess-ah, khan administrative cost-a Dan-in a phut chhung atanga kan tihtheih te kha kan sumin kan ti khawm a. Tunah hian administrative building tha tak kan sa mek a, April thla vel khian kan luah thei mai kan beisei a. Kan hawn hunah meuh chuan Mizoram Directorate building zingah pawh a tha deuh ber nih tir kan tum a, ‘Mizoram mipuite barakhaih kan tum’ tih ka sawi duh a ni.

A dawt leha ka sawi leh duh chu - kan department hi kan sawi ang khan labour & employment te, skill development and entrepreneurship te, department angin nasa takin kan kalpui a ni a. Chumi piah lamah chuan Mizoram Youth Commission leh SEDP

Board-a manpower development board-ah hian nodal department kan ni bawk a, chungte atang chuan he department scope zau zia pawh kan hmuh theih ka ring a ni.

A bik takin *Labour Wing* hi sawi ta ila, India ramah hian Labour Law 44 a awm a, chung zinga 18 chu Mizoram hian kan hmang ve mek a ni. Chumi piah lamah chuan ‘2nd National Commission on Labour’ chuan ‘labour dan hrang hrang inkaihhraina 29 te lakhawmin 4 ah siam ni se,’ a ti a. Chutiang chuan keini pawh kan department hian theih tawpin kan inbuatsaih a, kan siam a, ‘*The Mizoram Code on Wages Rules, 2021*’ kan siam peih tawh a ni. Tin, ‘*The Mizoram Court on Social Security Rules, 2022*’ chu hmanni khan Cabinet-in min pass sak a, House-ah kan lay tawh bawk a. A bak dang 2 pawh hi rei lote-ah Cabinet-ah pharha, House-ah lay theih tura buatsaih mek a ni. Chutiang te chuan ruahmanna kan nei a ni.

Tin, Labour Wing hnuaiyah hian “*Mizoram Building and Others Construction Workers Welfare Board*” a awm a. Hei hi kuthnathawktute hamthatna - building and others construction workers te kum khata ni 90 tal, chutiang kaihhnawiha hnathawkte in-register theihna tur bik a ni a. Chutah chuan tunah hian register member 65,079 kan nei mek a. Chungah chuan hamthatna - ‘Children Educational System’ kan tih te, ‘maternity benefit’ kan tih te, ‘old-aged pension’ kan tih te, ‘marriage support’ kan tih te leh thil tamtak he scheme hian kuthnathawktute ham thatna tur hi a pe a. Covid-19 harsatna kan tawh lai pawh khan he scheme hnuaiyah hian mi tamtak tanpuina kan pe a, kan member 2685 te tanpuina kan pe a, mithi 3 leh medical case – hospital leh pawn lama awm mi 2682 hnenah treatment kan pe a ni. Tin, mithi hi cheng nuai 3-in kan ral thei a ni tih te ka sawi duh bawk a ni.

Tin, Labour cess kan lakkhawm atang hian Covid-19 chhung khan Mizoram mipui zawng zawng buhfai a thlawna ei turte kan pe a. Kan membrete hna thawk theilo an nih avang khan ₹3,000/- theuh pein, Covid leh a kaihhnawih-ah khan vaibelchhe ₹23 dawn mipuite tan kan hmang a ni. Chutiang tak chuan he construction work hrang hrangte atanga 1% lakkhawm atanga kan sum tling khawm hi ‘kan hmang tangkai hle’ tih ka sawi tel duh a. He kum kal lai mek tun January thla thleng hian *labour cess* ₹26,23,96,148/- kan collect tawh tih ka sawi tel duh bawk a ni.

Kan member ten harsatna kan neih kan sawi chu ‘MLA-LAD fund’ kan tih MLA fund atang kan hna thawh tam tak hi hmun tam takah labour cess lo demand avangin hnathawhah harsatna kan nei thin a. Chumi chungchangah chuan GPC in a rel a, All-Party kalkhawmin MLA fund bik hi chu, kan hman dan zawng zawngte mipuite hnena lang tlanga ti kan nih avangin, he labour cess hi chu ‘exempt ni rawh se’, tih GPC in a pass ang khan, keini department pawhin lehkhah kan lo hmu a. Nimin khan MLA-LAD fund bika labour cess awlna tur order kan chhuah a, district zawng zawngah kan thawh darh tawh a ni.

A dawt leha chuan ESI - *Employment State Insurance Act, 1948* hnuaiiah hian private firm hrang hrang - dawr te, school te, hospital te, hotel leh restaurant mi 10 chin chhawrte tan hian in register theih a ni a. Tunah hian, insured person mi 1732 kan nei tawh a. Chu chu Establishment, 94 atangin an rawn in-register a ni. Hengte hian ham thatna tam tak medical-ah te a keng a. Tin, ESI a in-register te tan hian anmahni enkawlina tur bikah pawh dispensary te pawh kan siam a, heta hnathawktu leh chhungte chu a thlawnin inentir te, damdawi ina a thlawna a awm theihna te, investigation ngai zawng zawng heng - thisen leh zun test te, ultra-sound te, endoscopy te, CT Scan te, MRI thlengin a thlawna tih theih vek a ni. Hospital thlunzawmpui bik te pawh kan nei a ni.

Heng kawngah hian, a bik takin ka han sawi uar duh chu, establishment hrang hrang - dawr lian te, sikul a ni emaw, hospital emaw neite hian an hnuaiia thawktute hamthatna tura hi rawn zawm hram hram turin kan duh a, chu chu uar takin ka han sawi leh bawh a ni.

Tin, pawimawh em em, mipui zawng zawngina kan hriat atana kan duh chu ‘*e-Shram*’ hi a ni. Chu chu *Unorganized Worker Social Security Act, 2018* hnuaiia hei hi kan Prime Minister in nikum hmasa August Ni 26, 2021-a a rawn hawn tawh kha a ni a. Tunah hian mi tupawh mahni kut-kea eizawng, mahni kut-kea eizawng kum 16 atanga kum 59 inkar te a inziah-luh theih a. Tun hunah hian Mizoram-ah mi 58230 an inziak lut tawh a. Chungte chuan card hrang hrang leh eng eng emaw a tul tur ang chi kha CSC kaltlanga an inziah-luhna atangin vanduaithlak takin chung eizawngna hrang hrang nei te an lo boral palh pawha an *death benefit* cheng nuai 2 te; tin, an thawhnaah an lo inhliam palha kut-tualleichhama an lo awma hnathawh hlei thei lo an nih pawha cheng nuai khata tanpui theihna tur ang chi scheme te a awm a. Heng hi Mizo mipui ten kan hriat tam deuh deuh a tul hle a, he House-ah pawh hian thahnemngai takin chu chu ka sawi a ni.

Tin, chu lo lehah chuan PM-SYM leh NPS – ‘Pradhan Mantri Shram Yogi Maandhan’ kan ti a. National Pension Scheme nen hei hi unorganized workers te tana an pension scheme tura siam a ni a. Kum 18 - 49 inkar te CSC (Common Service Centre) kaltlanga inziah luh tur a ni. Chungte chuan kum 60 an tlinin pension an la ve thei a, thla tin cheng ₹3,000/- pek theih anni. He scheme pawimawhna hi Mizo mipui ten kan hriata, a tam zawk kan inziah luh theihna tur hian Central YMA te nen ‘awareness campaign ti ang’ tiin thawh dunna te kan siam a. Anni te nen tang tlangin Aizawl hmun hrang hrang leh Lunglei, Champhai leh Kolasib-ah te awareness campaign, mipuite’n he scheme tha tak hi an zawm theihna turin zirtirna kan pe ve mek a ni.

Tin, zirlai hna zawng mek te tana pawimawh em em mai ‘EMPACT portal’ kan ti a. Hei hi hmanni lawk January Ni 31 khan kan hawng a, Employment Exchange-ah online a in-register theih a ni ta a. Employment Exchange-ah kal kher lovin online a

registration an tih khan, Mizoram sorkar hnuaiia advertisement chhuah zawng zawng ang te. national level-a advertisement, job opportunity awm zawng zawng kha anmahni phone-ah pek theih nghal zel a ni dawn a. Hei hi a tangkai em em a, hmasawna tha tak a ni tih pawh kha kan sawi tel leh duh bawka a ni.

Tin, kan sawi tawh angin kan Wing pawimawh tak mai *Skill Development & Entrepreneurship* bika hi tlemte han sawi ta ila. Member thenkhat pawh khan thahnemngai takin kan sawi a. CTS - *Craftsmen Training Scheme* hnuaiia hian ITI pathumte - Aizawl, Lunglei, Siaha te kan hriat tlan angin kan enkawl a. Hengah hian trade 23-ah zirlai thahnem tak kan enkawl mek a ni. Chumi piah lamah chuan member thenkhatte khan thahnemngaih thu-ah khan, “ITI te pawh hi tihpun ve a tha tawh lawm ni; a ngai reng pathum chauh te hi chu ..” kan han ti a. Kan information atan – Champhai, Serchhip leh Kolasib District (Thingdawl) ah te ITI awmna turin building kan sa a, kan la zo lo deuh hlek a. Tin, West Phaileng-ah khuan hun hmasa lama sak tawh, amaherawhchu function lo kan han chei-hnum a. Tun financial year thar-ah hian Mamit District bik khu, ‘district hnufual’ an nih avangin ngaih pawimawh hmasakah kan nei a. Chutah chuan, trade pathum-pali emaw bul tanna turin a chhehvel mipui tena an chhawr tangkai theih awmte han ruahmanin bul kan tan dawn a ni.

Tin, ‘STRIVE’ kan ti a, *Skill Strengthening for Industrial Value Enhancement* a ni a, chumi hnuaiia chuan ITI tihchangtlunna tur hrang hrang - Member thahnemngaitte khan ‘kan ITI building te pawh a hlui tawh lutuk a, cheithat te, quarter te, hostel te pawh a tha tawh lova’ an tih kha, sorkar pawhin hria a. Manpower Development Board te nen pawh kan han tlawh a, department hotute nen pawh kan sawi hova. Chutah chuan tunah hian ITI tihchangtlunna tur hian NESID nen tang tlangin NEC-ah project crore ₹32 vel DPR siamin kan thehltut a. Beisei takin tunah hian kan ITI tihchangtlunna tur atan pawh hian ruahmanna kan siam mek a, House-ah kan member te sawichhuah kan chhan pahin chu chu ka han sawi bawka a ni.

Tin, he scheme hnuaiia hian kan ITI piah lamah kan entrepreneur te tihhmasawna tur leh cho-phur turin programme hrang hrang kan siam a. Kan programme thenkhat chu member zahawm tak takte pawhin min ngaihhlutpuiin, a hmunah ngei in lo kal thu te pawh in sawi kha. Khang zingah khan ‘Pum Innovative Fair’ pawh hi kum 2 kan siam tawh a. Chu *Pum Innovative Fair*-ah chuan Mizopa kut themthiam, mahni kutkawiha eizawng thinte promote-na turte, ITI zirchhuak ten an start-up, bul an tanna tura thiltih phochhuahna tur kha kan siam a. Chutah chuan trade chi 2 - electrical trade leh non-electrical trade in kan then a, chung hmang chuan inelna te kan siam a, a lawman te pawh kan siamtha khawp mai a; pakhatna - ₹1 lakh, pahnihna - ₹50,000 leh Pathumna - ₹30,000 kan pe a ni.

Tin, programme dang deuh, ‘*Kawtchhuah Start-up Programme*’ kan ti a, hei hi chu ITI zirchhuak te, keimahni bik chhungkuaah kan han ti deuh hlek a, ITI pass-out te

tan kan han ti a. Chungte chuan an zirlai an han zir atanga practical-a anmahni chhawmdawl theihna tur atan, bul an tanna tur *start-up programme* kha a ni a. Chungah chuan ITI training chhuakte an rawn inel a, an thil siamte, an thiam-thilte an rawn theh khawm a, an sawi fiah bawk a; endiktu thiam tak tak panel hrang hrangin an han thlir a; chungte chu nikum, kum tawpah a tha zual thlan chhuah 21 khan ₹50,000/- theuh an start-up, bul an tanna tur kan pe a ni. Kan Dy. Chief Minister hian min rawn hmuhpui a, ani pawh a tui khawp mai a; Mizo thalai hetiang taka them thiam kan han nei te a hmuh hian, ani pawhin min tuihui hle a ni.

Tin, hmeichhia leh pianphunga rual ban lo zawk te tan an thiam thil han theh khawma, an mahni promote leh an nun tihhlina turin kumin krismas dawn hnaiah pawh khan *Winter Wonderland & Christmas Fair* te pawh kan buatsaih a, mipuiin min hlutsak viau a ni.

Tin, Pu Speaker, *Pradhan Mantri Kaushal Vikas Yojana* – PMKVY chungchang hi tlem han sawi leh ka duh a, wawiiinah pawh khan member thenkhatte khan an rawn sawi a. Hemi hnuaiah hian Mizo thalaite zingah eizawnaa ngelnghet an neih theihna tur atan te kawng hrang hranga *short-term training course* pekna a ni a. Hetah hian keimahni department hnuaiah leh central pawh TP 42 - Training Provider tunah hian kan nei mek a. Tin, accredited training centre 77 kan nei a, chungah chuan short-course training Mizo thalai tam takte tan *job role* 25 kan pe a ni. Chungah chuan certificate te pawh an pe thei a, hmun hrang hrang - Mizoram chhungah a ni emaw, India ram chhungah a ni emaw, abroad emaw ah pawh eizawnaa tura an thawh theihna turin, an certificate kha pawm a ni a, chutiang chuan kan kalpui a, job-placement pawh 6668, hemi atang hian neih a ni tawh a ni.

Tin, hei hi kan thawh that em avangin 24th World Education Summit, Hyderabad-ah nikum September thla bawra neihah khan PMKVY 2.0 - India ram state zawng zawngte zingah a bawhzui tha berte zingah, a bik takin *Govt. Sector Initiative in Skill Development* lawmman pakhatna Mizoram-in kan dawng a, hei pawh hi a chhuanawm em em a ni. Ka sawi tawh ang khan, he department hi a te emaw kan ti maithei a, a scope a tha a, a thawktu awm chhunte activity a tha em em a ni tih kha kan sawi tel leh hram bawk a ni.

Tin, *Skill Acquisition and Knowledge Awareness for Livelihood Promotion* (SANKALP) kan nei a, ‘SANKALP’ tih hnuaiah hian district level-ah te, State level-ah te committee kan siam a, District Committee kan DC hoa an neihah chuan college leh school-ah te skill development lam awareness an nei a, nasa takin Zoram pum tuamin kan bei a ni. Tin, chumi piah lamah chuan entrepreneur tha, an district a titha, mahni kut-kawiha eizawnaa ti tha, district tin te rawn thlang turin kan ti a, chung mi 11 te chu nikum khan heng kan programme kan sawi tak, kan han neih ‘Kawtchhuah Programme’ kan hman rual khan, a tawpah anni hi chawimawinate kan pe a. Mizo entrepreneur tha

tak tak mi hriat hlawh siloh chawimawina sorkarin kan han nei a. Pawisa fai tam tak pe theilo mah ila, ₹20,000 bakah trophy, certificate leh citation mawi tak te kan pe a, anmahni pawh an phur hle tih kha kan sawi duh a ni.

Tin, chumi piah lamah chuan kan khaw-hawi pawh kan han tizau a, world level thlengin ngaihtuahna kan seng a. World-Skill competition-ah Mizo-thalai talent nei tha tak tak te hi an dah-chhuah theihna turin ‘kawng i zawng ang’ kan ti a. Chumi kal kawng atan chuan North East level te, regional level te, national level-ah te kan tel tir ve tan a, nikumah khan. Chutah chuan mi 15 chuan regional level te pawh an han paltlang a, medal tha tak tak an la a, national level ah chuan mi pahnihin gold leh bronze medal te kan han la a ni. World Skill Competition, 2024 nakuma awm turah hian Mizo-thalai te hi dahchhuah tir ve ngei tumin theihtawpin hma kan la a, a hlawhtlin ngei kan beisei a ni.

Tin Member thenkhat ten an sawiah khan, India leh Japan sorkarin thawh-dunna thuthlung, MoC - memorandum of Co-operation, January 2021-a an siam kal tlangin National Skill Development Council hnuaiah *National Skill Development Council International* bul tumin India leh Japan ten mi skill neite inthawn tawn turin thuthlung an siam a, chutah chuan a vawikhatna atan ‘India tangin nurse 50, Japan-ah rawn thawh rawh u’ an ti a, central leh Japan sorkar indawrna atangin a nih chu - chutah chuan National Skill Development Council lam atangin state hrang hrangah hriattirna an rawn chhuah a, state hrang hrang atangin heta tel tur nurse training chhuak nula-tlangval rual an interview suau suau a, abik takin mongoloid lam kan nih vang te leh Japan lama han che atan pawh min duhsak vang te pawh a ni thei a, North East-a mongoloid dangte nen pawha kan inel chung hian, kan department performance a tha khawp mai a, India sorkarin a vawikhatna atan mi 50 a thawh turah Mizo nula-tlangval 20 kan kal dawn a ni. A ropui khawp mai. Tunah hian Delhi an thleng thla vek tawh a, Japanese tawng zirin tunah hian an ei-in, chenna leh engkim sorkar laipuiin tum sak vek tawhin tunah hian reilo teah Japan lamah thawh chhoh turin ruahhman mek a ni.

Tin, *nodal* kan tanna pahnih tawite han sawi leh lawk ka duh a. ‘Manpower Development Board’ kan tihah khna SEDP board pakhat kan nei a, chu mite hmalakna pakhat chuan *Madhavi Foundation* te nena tangkawpin B Sc. (Hospitality & Management) zirna kan kalpui a, mi 12 Mizo nula leh tlangval e Grand Plaza - five-star hotelah tunah hian an zir a, an thawk nghal a, hlawh an la nghal a ni. Kum 2 course a ni a, hemi an thawh zawh hnu hian placement chu awm tur Chiang Saah ngaih a ni. Chutiang chuan Mizo thalaite hmakhua atan hma nasa takin kan la a. Kan board Vice-Chairman pawhin a sawi tawh ang khan, Taiwan Embassy te nen pawh kan inbia a, Mizo-thalaite eng emaw zat ‘mandarin zirtir ila, khawchhak lamah eizawna, kan ngaihsan em emte zingah an neih theihna turin i han kalpui teh ang’ kan ti a. Amaherawhchu, eng emaw harsatna avangin helai hi a la sukuk a Ttheihtawpin hmalak zel kan tum a ni

Tin, Mizoram Youth Commission hi ‘nodal department’ kan nihna anga sawi tam ngai lovin - MYC hmalakna te Mizo mipuite’n kan hria a. Kan chhawr tangkai a, ‘thalaite-inpui’ a nihna angin, inpui nih pawh an tlin khawp mai. Kan MYC chairman leh a thawhpui staff te an fakawm em em a, an hnathawh tam tak tv leh chanchinbu-ah te kan hmu a, ka sawi thui lovang a.

Infrastructure lama kan kalpuinaa tlem ka sawi duh chu - MYC office tha tak mai a hranpain Secretariat-ah khuan nuai 300 chuang zetin kan sa fel tawh a, kan luah tawh a. Tin, Youth Centre hi Aizawl, Lunglei leh Serchhip-ah sak a ni a. Aizawlah Youth Centre - nuai 500, Lunglei Youth Centre - nuai 400 leh Serchhip - nuai 300 in kan sa a. Aizawl leh Lunglei te hawn anni tawh a, Serchhip hi rei vak lovah hawn theih kan inbeisei a ni.

Tin, Mizo ten kan tlakchham leh khawi-kipah pawh kan sawi ‘*Central Service-ah kan tlem*’ kan tih hi, kan Chief Minister-in min tuipuinain ‘Super IAS-40’ tiin programme kan siam a. Sorkarin sum leh pai tam tak min pe a. Chung hmang chuan tunah hian Mizo thalai 40 rual Delhi-a institution tha tak takah kan dah a. Sorkarin kan chawm tawp a, an zirna material tur te, an hostel leh fee zawng zawng sorkarin kan tum a; engzat percent nge rawn hlawhtling ang chu kan hre lo. Amaherawhchu, kan sorkar hian mipuite rualawhna phuhruk turin sum harsatna karah kan Chief Minister-in heng min pe te hi a lawmawm em em a ni.

Tin, tun hnai UPSC (Main) result lo chhuakah KC Zalena leh Betty Lalrinfeli te vanneihthlak takin an han inziak tling a. Anni pahnih hi tun MCS batch hnuhnung bera pakhatna leh pahnihna te kha anni a. A ni pahnih pawh hi Delhi-ah an kal thlakna airfare te, khulai an zuk awma *mock-interview* an tihna tur zawng zawng, institution tha ah an training-na tur zawng zawngte, an awm chung a an ei-in leh an chenna tur zawng zawng pawh hi kan department MYC kaltlang hian kan tum sak dawn a ni. Chutiang chuan he department hian hma nasa takin kan la tih kha ka sawi tel ni sela.

Tin, Member thenkhat te thusawi han react ngai tlemte awmah chuan, Serchhip bialtu zahawm tak Pu Lalduhoma’n – skill training chhawng thum velin ITI Directorate-ah kalpui a ni a, Workers Welfare Board-in a kalpui bawk a, ‘hengte hi a lakkhawm theih lawm ni’ tih a rawn sawi kha, hei hi hriat chian tawk loh vang a ni thei a. ITI hi chuan long term-skill training course kum khat te, kum hnih te a kalpui tlangpui a. Chutih lai chuan directorate-ah chuan nichina kan sawi, kan training provider te, keimahni hnuai a miten an kalpui a, chungte chu short course a kan kalpui a ni a. Tin, a chhawng khat leh kan kalpui kha chu - Workers Welfare Board in skill development training kan pek hi chu - anmahni, khata registered te tan chauh, anmahni emaw an fate tan emaw a nih avangin, midang tel ve theihna a nih lova, chuvangin chhawng thum angin lang mahse, khulai kha ‘thil hranpa vak a ni lo e’ tih kha ka sawi duh a ni.

Pu Speaker, a Bupui ber, Demand No. 20 - School Education Department-ah hian ka han lut leh ang a. Reiloh kan han tum pawh hian a department hi a lian si a, tawi thei ang berin kan ti ang a. Vawiina member sawitu zawng zawng zinga 25 te khan min sawipui vek a, min tuipui hle a, ka lawm khawp mai.

House-ah hun hmasaah khan appeal ka pe a, kan MLA fund te nen theih ang angin he department hi, ‘hawh u, kan ram, kan hnam siam nan i thawkho ang u’ ka ti a. MLA zawng zawngte kan tangrual a. Kan ram education siamthatna kawnga kan thawhhonaah lawmawm ka ti a, lawmthu ka sawi a. Mimal ang pawhin a bik taka kalna te pawh kan awm; in zavaia chungah lawmthu ka sawi a.

Kan hriat angin he department hi Mizoram sorkar hnuaiyah department lian ber a ni a. Directorate pahnih - School Education leh SCERT bakah hian Samagra Shiksha - Mizoram pum huap te, MBSE te, Mizo Language Development Board te a enkawl tel avangin, a scope hi a zau viau a ni.

Ngaih pawimawh ka han neih len em em chu - zirna, thiamna kan pek dawn hian kan rilrua lian tak, he sorkarin a ngaih pawimawh em em chu - zirilaibu kan siam te leh thil dang kan tih chhohah hian, kan zirilaite’n hnam thinlung, ‘Mizo Nationalism’ thinlung an put theihna tur hian ruahmanna thui tak kan kalpui a. Chung atan chuan, pakhatna ah chuan - kumin kal mek session thar April thla a tan turah khan school zawng zawngte’n urhsun takin hnam hla, “*Ro min relsak ang che*” tih hla hi ‘sak thin ni rawh se’ kan ti a ni. Engvang nge? Kan naupang lo thangliante hian kan hnam hla an thinlungah lo thanglian se, he ram, he hnam leh kan Pathian tan an in devote theihna tur atan kan ti tel a ni.

Chuti chuan, zirilaibu hrang hrang kan han siam bawh a. Pawl 6, 7, 8 te zir turah ‘*Zonun*’ tiin additional subject-ah kan pe a. Hei hian Mizo hnam leh Mizo thiltih ngaihsan theihna tur, an thanlen chhohna turah Mizo thinlung an put theihna turin leh ‘he hnam hi, hnam ropui a ni’ tih an neih theihna turin tuh tel kan tum a ni.

Tin, chubakah chuan naupangte te, a bikin NEP 2020-in a a rawn ngaih pawimawh *early childhood* a tana pre-school, ‘anganwadi’ kan tih, pawl khat an kal hma pawhin Zirtirhbu te, (upa deuh chu in lung a leng deuh maithei a) Number bute kan siam thar leh a, chung chu tunah hian ruahmanna thar kan siamin, kan han zirtir a, kan kalpui chho mek tih kha ka sawi duh a. Tin, pawl khat - school tak tak an lo kal hun pawha school nuam an tih theihna turin naupangte hi thla 3 chhung bik chu *Play Best School* - preparatory module te kan siam a, naupangin school nuam ti taka an kal theihna turin ruahmanna pawh kan siam a ni.

Tin, *quality education* a awm theihna tur atan zirtirtu training pek kan ngai pawimawh em em a, ‘Six months-certificate course in English language’ tih te, ‘Six

months-certificate course-in early childhood-care’ tih te, ‘guidance and counselling’ tih te, leadership chungchang te leh healthcare te kan zirtir a, ‘kan bei nasa hle’ tih kha ka sawi tel duh bawk a ni. Tin, *quality education* a awm theihna turin theihtawpin hma kan la a, hmalakna tam tak kan neih zingah school ‘standard authority’ kan neih theihna tur atan kan school hrang hrangte quality, sorkar school a ni emaw, private school a ni emaw, quality tha a neih theihna tur atan ruahmanna kan siam a. Mizoram School Standard Authority *yard stick* te kan duang a, chu chu Mizoram Board of School Education-in bul tanin scale an siam a. Chung ruahmanna hnuaiah chuan *standard regulations* te kan duang a, mumal taka kan school te hi kalpui chhoh a nih theihna turin tunah hian ruahmanna kan siam a, a final stage pawh kan thleng tep tawh a ni.

Kan zirlaibu te pawh hi national level-ah a standard maintain turin theih ang tawkin kan update zel tih kha ka sawi duh a. Kan MBSE syllabus te hi a lo hniam bike maw kan lo ti ang e, national standard CBSE te nen level khat a ni tih hi kan hriat a tha a, uar takin kan sawi tel duh a ni. Tunlai hun mila zirlaiten an mamawh awlsam zawk a an hmuh theihna turin MBSE chuan online portal te a siam a, integrated digital payment te tiin, engkim kal kher lo a MBSE dawr theihna tur atan pawh online portal te kan siam a ni. Tin, zirlai mitdel ni lo, khaw hmu fiah lo/low vision te tanah hian large print, hawrawp lian a lehkhabu an chhiar a, an tih tur te pawh kan siam a, chutiang chuan kan kalpui bawk a ni. *Quality education* tehfung pakhat atan exam kalphung, ‘scheme of examination’ mumal zawk a kal theihna turin nasa takin ruahmanna kan siam a. Higher-thinking skill naupangten an zirna atanga mahni in hriatthiamna, ngaihndan leh thuthlukna an neih an pho chhuah theihna turin, exam zawhna question te pawh chutiang ang tur atan chuan duan ni se kan ti a, hei hi tun kum thar kal tur 2023-2024 atanga hman tan kan tum a ni. Tin mitdel te tan zirlaibu a thlawn a an hman theih turin *Braille* text book te kan print a, kumin 2023-2024-ah hian hman tan a ni dawn a ni.

NEP-2020 hian a phut - skill development leh education hi kal kawp tura min tih angin theih ang tawkin kan kal kawp chho a, kan inruahman chho mek a, a bik takin naupangte atanga kan kalpui chhoh turin programme hrang hrangte duan a ni a, a guideline atan ‘Nun-kawng Sialna Bu’ kan ti a, hei hi guideline siamna tur kan pe a, hemi hman hian tunah chuan kan routine siam tur pawh kum khatah school pakhatin ni 10 tal chu, ‘10 days-Bagless Day’ an ti a, ni 10 tal kha school bag keng lova an zirna piam lamah anmahni hmuh phak turah an nun kaihruaitu tur zirtirna tha pek emaw, kut them thiam thil emaw, thil hrang hrang an zira, an tuia, anmahni skill develop theihna tur atan siam a ni a, chumi kaihhraina tur bu pawh chu kan siam peih thlap tawh a ni. Tin, ‘Vocational Education’ bik pawh high school level-a school 35-ah subject hrang hrangah vocational teacher te pein kan kalpui tan mek tawh a ni.

Vawiin kan sawi tam takah khan kan school building sak thar mek kan neih te, repair kan neihte-ah lawmthu sawina te pawh kan dawng a, chutih rual chuan mahni bial chhungah la tih belh ngai ngawih ngawih tam tak a awm thu te kan sawi hlawm a,

a dik khawp mai. Khaw khatah school 4-5 te a awm a, Mizoram khua a tam bawk si a, kan cover hi a la zim em em a ni. Kan ti ve viau emaw kan tih hian 10% pawh kan cover tawk tawk ang em aw, tuna hemi chhunga building construction kan tih te, repair kan tih te pawh hi. Hma chhawp a la tam khawp mai a, scheme hrang hrang atangin tih chhoh zel te kan tum ang a. NABARD atang tea theih ang tawpa kan tih piah lamah hian a bik takin khawpuia kan bialtu MLA-ten in sawi kha, khawpui hi a bik takin in khawngaih thlak khawp mai. NABARD hmang chuan thingtlangah kan theih tawkin kan kal thei a, khawpui hi NABARD hian a huam thei si lova. Khawpuia hman tur project te kan han zawng thin a, kan duh ang kan la hmu hlei thei lova, eng emaw hrang hrangte ruahmanna kan siam a; engtik niah emaw chuan luh fuh theih hun te pawh kan neih theih kan beisei a ni.

Tin, school-quality education a awm theihna turin school building tha piah lamah khan school administration tha kan neih a ngai a, Principal te, Headmaster - high school atanga primary thlengin tun kum kal chho mekah hian mi 560 chuang promotion pek te, LDE exam te, hun danga kal hlei theilo kha kan sorkar hotute min remtihpuina te avangin kan kal chho zawt zawt a, promotion pawh chak taka kan kal thei te hi lawmawm kan ti a ni.

Vawiinah khan kan member thenkhatte khan zirtirtu kan lak hrang hrang te kan han sawi a, sawitu hrang hrangina figure an sawite kha a inang lo deuh hlek a aA tlangpui kan hriat theih nan Pu Speaker, tun kan term 2019-2023 chhung hian primary school teacher nghet 94 kan la a, middle school teacher nghet 58, a vaiin regular 152 kan fill up tawh a. Tin, muster roll teacher te chu – primary - 817, middle school - 63, a vaiin – 880; CSS-Samagra Siksha hnuaia lak primary school zirtirtu - 107, middle school (UPS) - 130, high school - 159, higher secondary school - 208 leh hindi teacher -826; a vaiin CSS hnuaiah hian ziritrtu 1430 kan la tawh a. Heng kan lak hrang hrang 2462 kan lakah hian mimal ang tak pawhin ka lawm em em chu - advertisement chhuahin kan la a, khawi kil atang mah hian ‘zirtirtu lak a fair lo’ tih tawngkam hi vawiin thleng hian kan dawng lova, ka lawm em em a ni. Tin, SEDP teacher 701 kan la tel a, khang nen chuan 3163 zirtirtu kan la tawh a ni. SEDP chu a khaw mite hnenah an lak turin kan ti a, ‘eng regulation hmangin nge in tih; eng dan nge intlawhchhan; advertisement chhuah a awm em?’ tihte pawh a awm a. Stop-gap arrangement atan grant-in-aid system-in school hnenah kan pe a, a khawtlanga school management committee-te emaw, an VC-te emaw lo inrawnin. “A khaw mi, a qualify thei ang ber kan duh; mahse a awm ngang lo a nih chuan khawtlangin in pawm pawh lo la mai rawh u” kan ti ringawt a. Chutiang chuan, SEDP-teacher te hi stop-gap arrangement-in kan la a ni tih ka sawi tel bawk a ni.

Pu Speaker, hmeichhe zirlai, a bik takin tleirawlte, an school kalnaah hmeichhe thil laklawh an neih fo thin avangin, sorkar school 946-ah ‘Sanitary pad-vending machine and incinerator’ kan dah thar bawk tih ka sawi duh bawk a ni.

Tin, NEP-2020 hian “sports leh education hi thlunzawm a tul tawh a ni, kan ram kal zel turah kan naupangte hian sports nen hian thlunzawm a ngai a ni” a ti a, Cricket Association of Mizoram nen kan tangruah a, bul tan nan Aizawl khawpui-a school 10 atangin naupang 500 thlangchhuakin cricket training theih ang tawkin kan pe a, anniin training equipment hrang hrang min tum bawk a, keiniin naupang kan tum bawk a. Chumi piahlahmah chuan sports discipline hrang hrang - Mizoram Football Association, Mizoram Boxing Association, Mizoram Weight Lifting Association, Mizoram Badminton Association leh Mizoram Hockey Association-te nen MoU kan signed a, anni hian centre hrang hrang 40-a zirlaite hnenah coaching an pe a, coach an rawn tum a, keiniin coach hlawh kan pe thung a. Chutiang chuan naupangte hian an school kal hun remchangah school-te nen insiamremin an kal chhoh zelna turah eizawna tling an neih theihna tur atan hetah hian training mumal takin kan pe tel a ni.

Pu Speaker ka rei tawh lo ang a. Mizoram mipuite pawhin hetiang taka kan sorkarin zirna kan kalpuinaah hian min ring tawk niin a hriat theih a. Chief Minister, education ngaipawimawh tak mai kan nei a, Education lamin kan ngaih pawimawh kan thlente sum harsatna karah pawh theih tawpa min tanpuiin, min chhanchhuak thin a, kan lawm em em a ni. Chungte avang chuan kan enrollment pawh a pung chho viau a ni tih kan hre tlang a.

Tin, he kum 5 chung hian enrollment tlem lutuk avang sorkar school khar ngai leh, eng emaw harsatna avangin ‘ila khawm mai ang’ tih te kan nei ta meuh lova, a tir lama lo innghawng kal laklawh awmte tih loh chu. Vawiinah chuan ‘classroom-ah kan leng tawh lo, sak belh kan ngai; thutthleng kan duh belh’ tih te kan nei ta a. Mipuiin kan education-ah rinna an nghat telh telh leh neitu thinlung an pu telh telh hmuh hi a lawmawm takzet a ni. Vawiinah pawh kan ngaihtlak tawh ang khan, Education Deptt. peng pakhat, MBSE hmalakna a ropui em em a, COVID-19 hnuaiah offline exam, India ram state dang zawng zawngah khawi board mahin an conduct theih loh laiin Mizoram hian 2020-2021, 2021-2022, COVID hluar laiin offline exam kan nei thei a, result pawh kan duh hun rauhmanna angah chat kan chhuah thei a, India ramah a tithei awmchhun kan ni.

Chuchang a ni lo, *bilingual textbook* pawh India ramah a siam hmasa pawl kan ni mai awm mang e aw ka ti a. Mizo tawng leh English, kan mu tan subject - Science leh Mathematics-a kan harsatnaah keimahni tawnga zir theihna kan tih vangte pawh hi a ni mai thei, state lian zawka kan ngaih Chhatisgarh atang pawhin kan performance an hmu a, kan MBSE kalphung te zir thamah ngaia an rawn zir hial te pawh kha *achievement* ropui takah ka ngai a ni.

Niminpiah lawkah kan sawi tawh a, kan Chief Minister remtihpuina leh duhsaknaa SAMAGRA thawktu mi 5000 chuang zet an hlawh tihpun te, an puala SMS mumal zawk leh tul atana hman tur crore 91.25 kan budget-a pek kan ni te hi, sorkar

kum 50 kan kal chhunga a vawikhatna atan education hian *bung thar* kan kai avangin ka mention duh hrim hrim baw k a.

Kar hmasa Ni 17.2.2023-a kan Opposition Group leader pakhat zawhnaah “Hlawh ba in nei a; chuti, khati” a tihah khan, “E khai, January thla hlawh hi kan batna chhan chu - an hlawh pung chhut fuh tawk loh vang a ni a, February thla hlawh nen hian kar leh chhungin kan pe nghal ang; a pek tur pawh kan nei vek e” kan tih kha, nimin lam atang khan SAMAGRA hlawh 80% zet chu chu an account-ah a lut chur chur tawh a, February thla tawp nan pawh kar khat zet a la awm chung hian, February thla hlawh pawh kan pe der tawh a ni. Chuti khawp chuan he sorkar hian zirtirtute, weaker section harsatna tawk mekte hi ‘a duhsak hle a ni’ tih ka sawi duh a ni.

Tin, Pu Speaker, chhinchhiah tlak em em chu - kan unau raltlan, Myanmar politics avangin eng emaw zat an lo chhuk thla a, chung naupang 6000 chuang chu zirna mumal tak kan lo pe a, zirna pek satliah ni lovin uniform, textbook leh midday meal pawh kan pe vek a, an lawm em em a, kan inunauna atan pawh hei hian a ti tha zual a. Chuchang a ni lova, Bangladesh politics a lo buai ve leh a, kan unaute tunah hian an rawn tlan chho ve leh mek a, heng hote hi hun a laklawh deuh avangin sorkar academin session thar April-ah hian a la cham awm chhunte hi chu zirna mumal leh Mizoram khua leh tui ang thlapin an dawn tur ang hi pek vek kan tum tih ka sawi duh baw k a ni.

Mizoram sorkar hnuaia school hrang hrang - Primary atanga Higher Secondary School-te chu *common uniform* kan siam a, anmahni pawl hrang hrang aiawh duhthlannain academic session thar April atang hian kan ha tan dawn a ni.

Tin, School Education Deptt. restructure turin tunah hian thei tawpin hma kan la a. A lian tawh a, a enkawl a tam a, scheme a tam avangin DP&AR-ah tunah hian kan vawm lut tawh a, min exam sak mek a. Min tihhlawhtlinsak ngei pawh kan beisei a ni. Chutih rual chuan harsatna lian tak pakhat kan neih chu - teacher education DIET lamah hian a ni a. Thawktu kan indaih tawk loh avang leh kan thawktute service-ah harsatna neite an awm a, kan hlawhte pawh eng emaw zat DIET-ah hian la pek loh kan neih piahlahmah, mi 67 an dinhmun harsa zual te chu *para-academic* staff-ah an awm a. Sorkar nen SMS hmangin an lawmman te kan pe hram hram a. En zui bik ngai, he lai tak hi kan nihna a nih avangin, kan Finance Minister leh Chief Minister pawh vawiinah hian ka han ngen tel duh chu – ‘lian deuh hleka ngaihtuahna siam sak ngai kan nei a ni’ tih kha ka han sawi duh a ni.

Pu Speaker, vawiinah hian kan MLA zawng zawng deuhthaw ina an sawi leh TV lama lo thlirtuten ka sawi hlan an nghahhlelh em em tur chu - School Upgradation chungchang hi a ni. Kan sorkar tirh atang khan kan hotute hian an vei a. 2008, MNF sorkar hun hnuhnung a sikul dinhmun harsa tak tak te kan upgrade te kha, kan hmaa sorkar te khan eng emaw harsatna te an nei te pawh a ni maithei e, engmah han

chhonzawmna awm lo khan an kal chho ta a. Chung te avang chuan sorkar thar kan han neih khan beiseina nen min thlir a. Kan Chief Minister pawhin a ngai pawimawh a a ho pawhin kan sawi thin a. Ruahmanna kan han siam tan laiin vanduaithlak takin COVID hri leng avangin kan heti zo ta a. Tun hunah pawh Council of Ministers kan thut khawm te, MLA te nen kan thut khawm te pawh hian sawi tam ber zingah a tang a; kan Chief Minister nen pawh kan sawi dun fo tawh a. Eng pawh ni se, “he sorkar kum tharah hian ruahmanna han siam chin phawt u la, pawisa, a vai kan theiloh pawhin, sorkarin kan ngai pawimawh a ni si a; a bul tan nan tlema zawng tal chu kal tir dan a awm thei lo maw” tiin leh, ‘rawtna te pawh han siam chhin teh u’ min han ti a. Chung atan chuan lian tham lo mah se, Finance Department-ah he mi a kan mamawh tur department-in kan chhut chu kan vawm lut fel tawh a. Chu chu Kan Pu hian a *khawnpui* lam atangin nge, kan budget pawn lam atang hian special-in min pek a ngai dawn a. Member zawng zawng te bakah hmun tinah kan ngaih pawimawh a nih avangin, keini lam atang chuan hei hi kan nghakhlel khawp mai a. Khawtlang *Ni-100 Inhlawhna* atang tein an chhawr a, rethei te tein sum an thawh khawm a. Dinmun laklawh tak takte hi chhanchhuah an ngai khawp mai a. Helaia awm member zawng zawngte pawhin kan theih ang tawk chu kan chhuah a, kan hotute’n hei hi uluk takin an thlir dawn a ni.

Tin, Mizoram Independent School Association, ‘Private School’ kan tih te hi Mizoram zirna atan hian an role a sang em em a. Kan thawh hona pawh a tha hle a, kawng hrang hrangin ‘kan intawiawm tha’ tih he House-ah hian ka sawi duh a. Kohhran hian sikul tam tak a nei a. Kohhran te nen hian School education Department te hi kan kal ho tha a. Deficit Mission School bakah kohhran mal anga school an neihte pawh kan theih ang tawka thawh hona tha neiin helaiah hian kan kal rual tlang a ni.

Pu Speaker, kan village council te, local council te, NGO ten ngenna, House kal tlang leh public meeting hmun hrang hranga kan sawi fo tawh, zirna hi neitu thinlung pu tura kan inngenna angin, a neitu thinlung kan pu telh telh a. Kan ram education thatna tur atan hian nasa takin hna kan thawk hlawm a, hma kan la hlawm hi a ropui ka ti a. Chungte avang chuan vawiinah hian kan ram education pawhin bung thar a kai mek a ni.

Tin, Mizo language Development Board pawh kha vawiina kan ngaihthlak tawh ang khan, Ni 6.2.2023 khan office bul tan a ni a. AIS Transit Building-II, Secretariat-ah khuan building nuam tak, room pawh tha tak kan siam a. Reiloteah Chairman te, Secretary te leh thawktu dang te lak theih mai pawh kan inbeisei a. Mizo tawng humhalh te, tihhausak te, ti changlung te, Zo-hnahtlak zawng zawng min phuarkhawmtu tur *kan tawng* siamna tur hi kan Chief Minister ngaih pawimawh em em a nih avangin, chak takin kan kalpui a ni tih hi ka han sawi duh a ni.

Kan member te sawi kha han react leh viau dawn chuan, hun a tlem si a, min hrethiam mai se. “Han react ngei rawh” han ti te pawh kha an awm chiah loh avangin

Pu Speaker, ka duh tawk mai ang a. Vawiinah hian member zawng zawngte he House-ah thahnemngai taka Mizoram Education thatna tur atana in rawtna te leh min thawhpuinaah te kan lawm a, Mizoram mipuite pawh in zavaia chungah lawmthu kan sawi a ni.

Pu Speaker, heng ka Demand te: -

Demand No.	Purpose	Amount (in ₹)
18	Printing & Stationery	12,86,60,000.00
20	Labour, Employment, Skill Development & Entrepreneurship	31,93,07,000.00
28	School Education Department	15,63,31,66,000.00
TOTAL		16,08,11,33,000.00

he House zahawm tak hian min pass pui turin ka rawn ngen e.

SPEAKER : Aw le, tunah chuan Minister zahawm tak Pu Lalchhandama Ralte-in heng a Demand-te –

Demand No.	Purpose	Amount (in ₹)
18	Printing & Stationery	12,86,60,000.00
20	Labour, Employment, Skill Development & Entrepreneurship	31,93,07,000.00
28	School Education Department	15,63,31,66,000.00
TOTAL		16,08,11,33,000.00

House-ah pass a rawn dil a. Rem ti apiangin ‘rem ti’ ti rawh u le. (*House in a remti a..*)

Aw le, Minister zahawm tak Pu Lalchhandama Ralte hna chanpual Demand No. 18, 20 leh 28; a vaia belh khawm 16,08,11,33,000.00 chu House-in lungrual takin a pass ta a ni. (**Pu Lalchhandama Ralte, Minister:** Pu Speaker, ka lawm e.)

Tunah Minister zahawm tak Pu K. Lalrinliana, kan sawihona te rawn wind up turin ka sawm ve leh ang a. Sawifiah ngai a tih te rawn sawi fiah nghala, a demand te House-ah pass rawn dil nghal turin ka sawm e.

PU K. LALRINLIANA, MINISTER : Pu Speaker, ka lawm e.

Ka Demand - No. 35 Fisheries hi Member zahawm tak tak 14 ten tui takin min sawipui a, ka lawm hle a. Ei leh ina kan intodelh nana sangha leh luidung-nungchate pawimawhzia sawitu kan tam ber a, min tui puina avangin lawmawm ka ti a. Tin, Central Sponsored Scheme - PMMY scheme hnuia sangha dil-tanpuina mi eng emaw zatina

an dawn avanga lawmthu sawina te kan hre baw k a, lawmawm ka ti a. Tin, *Chakai Farm* hi thenkhatin ‘a hlawhchham’ ti tein an sawi a, member thenkhat, ‘hei hi chu *pilot project-demonstration farm* anga kalpui a ni a’ ti te kan awm baw k a, a lawmawm takzet zetin ka hria a.

Fisheries Department hi kan rama intodelhna kawng pawimawh tak pakhat a ni tih kan Chief Minister hian a hrechiang em em mai a. Department-a thawktute hi kan tam lova, an hlawh te pawh officer rau rauah hian ‘level-pui pha lo’ kan tih ang chi te pawh an lo awm a ni. Chutiangah chuan Assistant Director/DFDO mi 9 lai mai pay level-10 a awm kha level-10A ah upgrade a ni. Tin, Extension Officer mi 11 te pay level-8 atangin 10 ah upgrade a ni baw k a, chutiang chuan thawktu dang te pawh direct recruitment - MPSC kal tlangin DFDO pawh pahnih lai lak a ni a, UDC te pawh a nghet a lak an awm a, Demonstration 10 lai lak a ni baw k. Kan Chief Minister-in luidung-sangha leh nungcha tea kan intodelh theihna tura thawktu kan tam theihna tur min ngaihtuah sak a, a lawmawm kan ti a, hmasawna pawh tun aia nasaa kan neih chho zel beiseina sang tak kan nei a ni.

Tin, kan hriat angin Covid hri leng karah DFDO district tinah kan nei a, an bial hi a zau em em a, bial vilna tur motor nei lovin an awm a ni. Dil kalkawng te a chhengche hle a, ke a kal ngai tam tak awm chung pawhin theihtawp chhuahin field staff te pawh an thawk thin a. Tin, sangha khawitute mamawh a chi sem tur SEDP atangin kan Finance Minister, kan Chief Minister-in sangha khawitute’n sangha chi subsidy rate-a an leina tur kum tin min pe a. Kan sangha khawitute pawhin subsidy-a an lei hi tha kan ti a, sangha khawitu – fish farmers te pawh hian tha zawkin an hre baw k a. Dil nei tak tak lo te pawhin a thlawna an lo dawn an tihral tia tihral leh mai mai te pawh a awm thin avangin, subsidy-a hetia an lei hian tih tak tak duhna, khawi puitlin ngei duhna an neih zia an tilang a ni. Chtiang chuan kan sangha khawite pawh a pun phah hlein kan hria a, kan lawm takzet a ni.

Tin, luidung sangha humhalh kawnga *Mizoram Fisheries Act* leh *Rules* te kan han neih chhoah hian, lui dunga nungchate humhalh kawngah hian tangkai zawk leh awmze nei zawka kalpui a pawimawh kan ti a, a rem mai loh nan a fuan hun laia humhalh te, a chereu loh nana man phalna hun siam sak te, *Dan* hnuaiia man phalna hun siam sak leh te pawh a tul kan ti a. A chhan chu - kan ei tur atana vulh len leh humhalh a nih avangin man phal hunbi te pawh siam sak tul kan ti a. Tin, hmanraw tha lo/phal loh hmanga sangha man - tur hrai leh bomb hmanga lo man te hrem/man theihna *Dan* kan nei a. Central YMA humhalhna Dan hmangin thuthlung kan siam a, hmun hrang hranga kan YMA Branch/member ten min tuipei em em a. Fisheries Department hi staff indaihlo hle chung pawhin YMA te min thawhpuiinaah te kan lawm hle a, kan lui dung leh a chhunga cheng sangha te pawh humhalhin a lo awm tan ta a ni. Chutih karah chuan a duham deuhte chuan tura an lo hrai thawm tun kum kal taah te pawh khan hriat tur a la awm a, a pawi kan ti em em a.

Tin, heng lui dung humhalh kawnga YMA Branch titha te pawh tun kuma Central YMA General Conference neihah pawh 'lawmman te pe ila' kan ti a, a dawng thei tur te pawh Central YMA leh Fisheries Department te nena la thlan tura tih a ni. Chutiang chuan sangha dil atanga kan man te, lui dung atanga kan man te man man zawka kan hralh theihna turin, a dahthatna *Cold Storage* neihna tur corner hrang hrang leh central scheme atang te pawhin kan nei a, tunah hian hmun hrang hranga bun turin kan kalpui mek a ni.

Tin, sangha-chi ah hian kan intodelh lo em em mai thin a, ramdang atangin sangha-chi an rawn supply thin a ni. Chu chu tunah hian keimahni thar-chhuah ngei sangha-chi te pawh sem theih dan kawng te dap ila tiin, sangha-chi siamna tur 'hatchery' 18 lai siam mek a ni. Tunah hian tipuitling - Mizopa enkawl ngei 9 lai hi kan nei tawh a, a baka chu la tihpuitlinloh te leh a pamtul/hlawhtling lo pakhat kan nei bawh a ni. Tin, hatchery atanga a note sin te te khawi lenna tur 'rearing ponds' te eng emaw zat kan siam a, mi 800 chuang laite hnenah tanpuina kan pe tawh a. Fisheries hian kan rama ei leh bar kan intodelh theihna tur pakhat (Sa-ah pawh mihring tana tha leh hrisel protein min pe theitu) a nih avangin, theihtawpin tan kan la a. Sangha dil thar siamna tur neite hnenah siam turin tanpuina te pawh kan pe a, hectare 235 laia zau hmun hrang hrang - hectare khat a zau te, hectare hnih a zau te, hectare khat nei tling lo te pawh pek anni a. Tin, 'Fisherman House' hi kan sorkar tirh lam mi 120 hnenah pek a ni bawh.

Tin, ice plant te, cold storage te pawh hmun hrang hrangah kan pe a ni. Tin lui dunga sangha chengkawl te kaikuang etc. a eizawng tutein an lo nunnawm vena tur livelihood and nutritional support ah hian mi 6232 lai hnenah cheng 3000/- theuhin tanpuina Central sorkar atangin kan dil a, kan hmu a. Thenkhat chuan len lei nan te leh thil dang dangah an hmang a, a tangkai hle a ni.

Sangha khawi chi ornamental fisheries unit eng emaw zat siamna tur kan pe tawh a, hlawhtling takin an kalpui mek a ni. A hmun ngeiah ka tlawh tawh a, miten an sitting room-ah te sangha an lo khawi a, hmuhdawmin rilru tihlim a ni.

Tin, 'paddy-cum-pisciculture' kan ti a, leiletah buh an ching a, buh thar hun hma pawha sanghate ei a lo tlin theihna tur atana khawina tur, hectare 120 lai a zau-ah mi 629 te hnenah tanpuina pek anni tawh a ni. Tin 'Marketing Kios' kan ti a, sangha thianghlim zawka zawrh a nih theihna tur atan Champhai, Khawzawl, Mamit leh Kolasib ah te kan han ti chhin a, thianghlim takin sangha pawh an zawrh theih phah a, lawmawm kan ti a.

Tin, Recreational Centre atan tanpuina hmun hnihah kan pe chhin a. Tuivawl biala Tinghmun-ah khian dil zau tha deuh an nei a, thengthaw nuam tak siam a ni a, mite pawhin an tlawh a, hmuhdawm an ti a. Tin, Kolasib - Bangla Lui-ah dah bawh ila tiin tunah hian hmalak mek a ni. Tin, RKVY atang te pawhin fish farmer te tan 90:10%

state-central share system in tanpuina mi eng emaw zat hnenah pek a ni bawk a ni. Chutah chuan refrigerated trucks te pawh kan lei a, a tangkai hle a ni. Tin, mini-ice plant pawh Champhai leh hmun dangah pek a ni bawk a ni.

Social Welfare Department hnuai hian Article 275 kaltlangin mi eng emaw zat tanpuina pek anni bawk a ni. Fisheries Department hian nasa takin sanghaa kan intodelh theihna turin hma kan la a, hlawhtling pawh kan inti chho hle a. Reiloteah chuan intodelh theih te pawh kan inbeisei a ni. Tunah tak hi chuan Fisheries-ah hian kum 2021-2022 chhunga Mizoram-a sangha kan thar chhuah hi quintal 45,750.5 velin kan chhut a. agent ho Aizawl leh Lunglei atanga kan lak hi quintal 30,000 bawr vel anga chhut a ni a, chhut loh hi tam tak kan nei a. Quintal 60,000 chuang vel hi ram pawn atangin lalutah kan inngai a. Kan tharchhuah Atanga sum hmuh kan inchhut ve danah chuan, kan thar chhuah hi 36% bawr vel kan phuhru ve niin kan in hria a ni. Chuvang chuan, farmers ten tan kan lak chuan eng emaw chenah intodelhna kan neih chho mai ang tih hi kan ring a ni.

A lar ber 'chakai chanchin' hi sawi lawk ka duh a, ka lo theihngilh dawn a. a sawitu kha kan tam ber bawk si a. Chakai khawi thei leh theih loh enchhinna tur atan hian *Planning Programme Implementation Department* Mizoram State Department atangin cheng nuai 57 kan hmu a ni. 'Nuai ₹500' ang tein social media-ah khan an rawn tilang a, cheng nuaih 57 a ni. Chu chu departmental work-a thawh tur a nih avangin 10% cut leh a ni a, chumi hnuah chuan estimate tlem han siam that leh a nih avangin a tlem leh hret a, a pahniha cut hnuah chuan kan thawhna tur tak tak pawisa kan neih zawng chu ₹52,97,000 a ni. Hemi atang hian nuai ₹39 kan hmang tawh a ni. ₹13,9,700 hi tunah hian DFDO Office bank account-ah dah a ni. Hemi ah hian 'cemented pond' kan tih hi pathum siam a ni a, pakhatah chakai kan dah chhin tawh a. Kha *cemented pond* chhungah khan lei te, lung te kan dah a, chutah chuan chakai kan dah te khan kua an hreuh a, an awmna tura tih a ni. Tunah hian cemented pond pakhatah chakai kan dah a, nikumah te khan kan DFDO Kolasib leh staff ten an zuk endiknaah pawh no an nei thei tawh a, an dam khawchhuak ni te pawhin an hre tawh a. Chakai hi hetiang zawnga han khawi a, tui leh note te neia an awm theih hi chuan 'a tha dawn mang e aw' tihna rilru pawh kan nei a ni.

Tin, dil sa lutuk tur venna huhliap zarna tur te kan ngaihtuah a, mau in a rel siam a ni a, 'len han zar sak te pawh a tha e' kan ti a. A hmunhma khu a lum a, amaherawhchu, mau ni lovin thirin a rel siam ila, kan ti a, kan pawisa bang te pawh hian siam leh tum a ni a. Cemented Pond pathum zinga pahnih-ah chakai dak a nih loh chhan chu - ICAR Scientist te bakah Central Inland Fisheries Research Institute te pawh Kolkata atangin an lokal a, tuna kan chakai enkawl na hmun Dum Lui bakah lui luang pangngaia chakai humhalha eizawngtu Sialsuk leh Samlukhai a mite pawh an endik a, chakai sample te pawh an la a. An thil hmuhchhuah atangin Mizoram tana tangkai tur leh chakai enkawl dan turte pawh eng emaw chen chu ruahmanna an siam tawh niin kan hria.

Tin, tuna kan chakai khawi mek ‘Aikam’ kan tih ho hi a scientific name chuan ‘bridge’ an ti a. Tin, Aikam hi chihnihin then a ni a, a pakhat leh chu ‘m-phalcidigity’ an ti bawk a ni. Hetiang ang chi chakai khawi hi India ramah hian an la ti ngai miah lova, a vawikhatna a ni a, zir uluk pawh a ngai khawp mai a. Kan ram chakai a ni a, khawi-pun kan duh a. Keini mizofate 80% hian chakai kan ei a, kan mamawh a, chakai thianghlim khawi ei hi kan mamawh a, chuang chuan hengte hi tih takzetin kan tih a ngai a. Scientist lokal Dr. DP Depnath leh Dr. CS Das te pawh an phur hle ni pawhin a lang a. An hmalaknaah pawh hei aia nasa lehzuah emaw, a man tlawm zawka family oriented ang chite pawha pek theih dan tur an rawn ngaihtuah chhuak thei turah beiseina sang tak kan nei a ni.

Chutiang chuan, tunah hian chakai khawi chungchangah hian hma kan la a, sangha leh kaikuang te pawh hi tunhmain Fisheries Deptt. hian a lo ti chhin nasa tawh a, hlawhchhamna tam zawkah a ni. Thlawhna hmangin kaikuang note te pawh a lo lak theih a, sum tam tak sen ral a lo ni tawh thin a. Amaherawhchu kaikuang note hi a survive hlei thei lova. Tuifinriat kaikuang lian tak tak ang hi fresh water nena a lo in mix hian, fresh water-ah alo luang lut a, zawi zawiin tui puia awmte kha an chho tial tial a, fresh water-ah te pawh hian an lo survive ve thei a. Tiang khan an lokal zel a, Tlawng-ah te pawh hian an awm tawh a ni. Kaikuang lian kutzungpui tiat-tiat te pawh Tlawng Lui-ah man tur an awm fo a ni. Chutiang te chu zirchian a tul dawn ni te pawhin a lang a, ngaihtuahna kan hmang a ni. Kan intodelh theihna tur atan hian chakai a ni emaw, ulawng emaw te pawh hi kan duh em em a, bazar-ah hralh a kal a. Dil nei mi ka ni a, sangha kan man hian ulawng tam tak kan man tel thin a, heng uchang te, usai te pawh hi buh hrik eitu anni a, a tha kan tih rual rualin eng emaw chen lo ei then te pawh hi a inthlahrunawm loh ni te pawhin a lang a. Bazar-ah te pawh hian zuarin sangha nen dah dun ila, ulawng hi an thlang duh khawp mai a. Chutiang chi neih dan tur te, luidung nungcha chi hrang hrangte kan humhalh a, intodelh nana kan hman theihna atan a pawimawh hlein ka hria.

Pu Speaker, Demand No. 19 – LAD ah hian zawhna kan chhang nual tawh a, kan hre tlang viauin ka hria a. Member zahawm tak ten react tura min duh VC Draft Bill chungchang kha - Tuna kan VC Dan hmanlai hi *District Council Act, 1953* kha a la ni a, hei hi kan Chief Minister pawhin a ngaipawimawh a, committee te dina PRI system anga draft chhin kan ti a, kan han draft chhin a. Mahse, ‘cabinet-in kan zo lo deuh ang; in rawn zau deuh pawh a tha ang’ a tih hnuah a thar hlakin VC Draft Bill, 2023 kan han duang leh a, cabinet-ah kan han pu lut leh a; ‘Party hrang hrangte nena la sawi hoa, la inrawn tlan te pawh a tha ang e’ an ti leh a, chu chu tun Assembly session-ah hian putluh hman kan tum a, kan pulut hman ta hrih lova. La inrawn khawm tur te pawh a la ni dawn a, department consultative committee te nen pawha la sawi hova, party hrang hrangte nena chiang leh zuala la inrawn te pawh a la ngai dawn a ni. VC ten rorelna tha an neiha, mipuite him zawka an awm theihna tur atan hian kan ngaihtuahna kan hmang nasa hlawmin ka hria a. Member 13 laiin thahnemngai takin kan sawi a, VC thar eng emaw zat kan neih piahlamah VC House te pawh eng emaw zat kan sak tharah leh

repair-ah lawmthu sawina te kan dawng a, a lawmawm takzet a ni. Tin, computer kan la mamawh zia te leh thildang mamawh sawi te pawh kha kan hria e.

Tin, Pu Lawmawma Tochwawng-in Lungpuizawl chungchang a sawi kha, a zawhnaah pawh kan sawi tawh a; hei pawh hi department-te nen ngaihtuahna kan la hmang turah ngai ta ila.

Tichuan, Food, Civil Supplies & Consumer Affairs-ah member zahawm tak tak 23 laiin min sawipui a, a tlangpui thuin buhfai te, gas te, ei leh in supply leh kalkawng dinhmunah lawmthu kan sawi tlangpui a, a changtu nihna angin a zahthlak lek lek zawkin ka hria a, ka lawm takzet zet a. Pu Lawmawma Tochwawng, Lunglei bialtuin a rawn sawi ang khan, 'Pathian malsawmna a ni' a tih kha a dik tak tak a ni. Buhfai load leh unload titu labour te, truck drivers te, truck owners te, carrying contractors te leh FCS & CA Deptt. staff te kan tanrualna rah a ni. Nuar awm lovin tun hun hi kan thleng thei a ni a, thahnemngai takin kan thawk tlang a. Chuvang chuan vawiin ni hi kan thleng thei a ni. Hetah hian, hnathawktute zawng zawng vawiin niah hian fakloh theihloh anniin ka hria a. Thawktute zawng zawngah, a department pawnlam a tanga thawktu dang zawng zawngte chungah pawh lawmthu ka sawi duh a.

A bik takin Covid len lai, kan harsat laia FCI tak ngial pawhin a labour an neih loh lai khan Bairabi, ka bial chhungah thil load leh unload-a labours association an awm a, chungte pawh chu vawiin niah hian fak loh theih loh anni. Kan mangang a, kan tah-awh a, an niin theihtawp chhuahin rail-wagon 42 lo thleng a load leh unload kha a ti ngailo tan chuan buaithlak tham a ni. Chutiangah pawh chuan Pathian malsawmna kan dawng a, an niin theihtawpin tan an la a, Zoram mipuiin ei nghei lovin kan awm theih phah a.

Gas te pawh kan han hnianghnar chho a, hmanni zawhnaah khan ka sawi tawh a. Gas kha kan sorkar hnu thla 4-5 ah pawh khan kan la harsa a ni a. Department-ah 'engnge kan harsat chhan' tiin kan Committee hmasaber-ah pawh ka zawt a, an niin an sawinaah chuan, 'Borkhola ah khuan gas bottling plant a awm a, chutah chuan kan zuk sawi thin a, min rawn pe leh mai thin a, a rei tual tual a, harsatna kan tawk leh thin,' an ti a. Chuta ka sawi-ah chuan, 'Borkhola hi ka be dawn lo reng reng; IOC te hian min supply hneh lo a nih chuan company dang pawhin min supply turin central ah kan dil tur a ni,' tiin rilru kan siam a. Chutiang chuan central-ah kan dil a, gas supply ah pawh hian kan hnianghnar a. Khatih laia Union Minister khan assurance min pe a, 'nitin trip 20 kan kham ang' kan ti a. Union Minister chuan, 'truck trip 15 in dawng a, truck trip 20 kan kham ang' in ti a; nitin trip 23 ka pe ang che u, a State Minister i lo tel baw a,' min ti hial a. Chutiang anga hlawhtlinna nei chho kan ni a, kan lawm em em a ni. Hemi hlawhtlinna hi thenkhat hi chuan han sawi hnawm deuh te pawh kan tum a ni maithei. Nichin khan Group Leader zahawm tak Pu Zodintluanga Ralte khan a rawn sawi a, lawmthu a sawi pah khan 'in vanneihna a ni' a ti a. Ni e, kan vannei kan ti a, Pathian min hruainaah kan vannei em em a ni.

Chutih rual chuan metre-gauge rail lo kal thina kha broad-gauge a upgrade turin MNF kan sorkar hmasak khan North-East Zonal Railways Users Consultative Committee member-ah min ruat a. Kan Chief Minister in, “Nang, i bialah rail a lo thleng a, he committee ah hian awm rawh” min ti a, min awmtir a. Committee kan kal dawn te hian Bairabi - Guwahati rail 1st class ticket hi min rawn thawn thin a, committee kohna lehkha rualin; a nuihzatthlak thin a. Khatih lai khan metre gauge rail chauh kha a lo la kal a. Committee-a kan kal hmasak berin agenda min ken tir a, khatih laia kan Minister zahawm tak Pu Rinchhana, Transport Minister nen (a boral tawh a, a ngaihawm hle a) kan Chief Minister-in agenda 5 min ken tir a ni. Chu kan agenda-ah chuan, ‘metre gauge hi broad gauge-in min tihsak rawh u’ kan ti a ni. Tin, “Bairabi railway platform hi upgrade te min tihsak rawh u” tih te, “Lunglei-ah Ccomputer hmanga rail ticket lakna min tihsak rawh u’ tih te, tin, ‘Bairabi atanga Sairang inkar rail kawng survey chhunzawm ni leh rawh se’ tih te pawh kan agenda-ah a tel a ni. Chutiang chuan kan thlen a, kan agenda kha a ho an han ti khawp a, Guwahati-a kan committee-ah Pu RK Thanga, IRS, kha khatih lai khan transport lama nodal officer a ni a, IRS a lo ni bawk a, a mikhual lo hle a. Pu Hrangtawna, tuna railway consultant-a kan neih hi khu laia a la thawh lai a ni a. Thahnem min ngaihpui em em a, kan pathum chuan meeting te kan nei a, meeting-a chaun kan sawi dan turte kan rel a Kkhatiang khan agenda kan han pulut a, kan agenda kha min passed sak vek a ni. Kan agenda kha keiniin lian kan tih viau lai khan, anni ngaihah chuan a tam tham lova. ‘Metre gauge hi broad gauge-ah upgrade sak rawh u’ tih te kha chu lian tham kan ti a, kan state tan kha chuan.

Assam State Silchar-in an dil chu, ‘rail pahnih chauh a lo kal a, pali lo kal tawh rawh se’ tih te kha a ni a, kan inthlau khawp mai. Chutiang hunlaia hemi broad gauge hi kan agenda putluh lo kalchho zel, kan MP leh midang te pawhin an nawrchhoh zel lo hlawhtling ta a ni. Sorkar hmasa Congress sorkar laiin a hawna te pawh kha neih a ni a, chu chu FCI hian buhfai phurh nan hian a hmang tangkai em em a ni. Tunthleng pawhin kan vanneih phah a, Pathian-in remruatna Zoram min hmangaihna kan zavaia chungah a lang a ni.

Gas chungchangah waviin ni-a awlsamna kan lo neih tak ruala sawi belh ka duh chu - Bottling Plant kan neiha khu nikhatah trip 7 te pe-chhuak thei chauh a ni thin a, a chang chuan trip 5 te a pe-chhuak a. Tin, a lo rei tawh a, vessel /bullet tanky hi a lo hlui tawh a, a chhunglemah tuiek a tla hlek hlek thei a, a pan tawh a; ‘kang mei lakah te pawh a him lo ang e; hei hi chu i titawp teh ang u’ an ti a, ‘chuti a nih chuan a lian law lawin min tihsak rawh u’ tiin kan ngen a. Kan Chief Minister-in hmunhma leina tur min ngaihtuah sak a, a bul lawah hectare 2 a zau ram kan lei ta a, IOCL hnenah kan pe a, tunah hian a hnathawh an tan chho dawn a, engkim an peih chho ni te pawn kan hria a. Chu chuan a pekchhuah theih turah chuan, hetiang zawng hian sawi ta ila - nitin cylinder 7000 pechhuak thei tura ngaih a ni a, tunah hian nitin cylinder 7000 leh tlem hmu ang ziah kan ni kan tih tawh kha. Hei hian eng emaw chen kan harsatna hi, ‘kan ramchhunga stock theih heti zat kan neih chuan, min chhawk ngei ang’ tih pawh hi kan ring a ni.

Tin, petrol leh diesel pawh hemi rail-fed, 'oil depot' kan tih ah hian rail lut thei tura kan han tih a ni a. A tir chuan 'Bairabi-ah khuan ti mai ila, zawl zau an duh si a' kan ti a. rail wagon 42 hi 'full rack' an ti a, chung hnuk-luh theihna tur leh stock neihna tur, chutah kan stock te truck-in a phurh chhuahlehna tur ram zau kha an duh dan a ni a, 'a lo berah a thui zawng km 1, a zau zawng meter 60' tih kha a ni a, kan han zawng kan han zawng a, Sihhmui-ah te duhthusam hmu lovin kan inhria a, 'Bairabi-ah a theih ang a' kan ti a, vawi tam tak kan en a ni; kan Chief Minister pawhin vawi eng emaw zat min hmuhpui a, company leh railway engineer lam te pawhin min enpui a ni. Amaherawhchu, railway lama engineer-te khan, 'rail lu a rawn luha, wagon rawn hnuklut turin duhthu a sam lo; rail kawng awmdan te, Bairabi-a terminal building awm te nena han en hian duhthu a sam lo e' an ti a. Sihhmui lam terminal building han pelh hretah khuan ram awm thei tur niin an hria a, chu chu kan han en leh a, vawi tam tak endik a ni tawh a. An last report ah chuan, 'a tih theih ang e' an ti a. Mahse, a full-rack nilovin half-rack a ni thung ang a, wagon 21 ang vel hnuk lut thei tur ang a ni a. Chu chu 'kan ram tan a tha tho e' tiin ngaihtuahna kan hmang a ni.

Tin, Hindustan Petroleum Ltd. te pawhin oil depot tur hi ngaihtuahna an hmang mek a, a ram te pawh kan Revenue Deptt. changtu, kan Minister Pu Ruatkima hnenah pawh 'a ram min lo ngaihtuah sak teh u' tiin tunah hian hma an la mek a. Heng te hi kan tihpuitlin theih chuan, kan ram hian harsatna kan tawhna thin tam takte kan paltlang ka ring a. Dik tak chuan, Covid len laiin ramri a buai a, Burma lam a lo buai leh a, harsatna namen-lo kan tawh a ni. Burma ram buai hma Assam ina min han dan chep, Assam luhlul tawh lutuk central-ah BJP sorkar, Assam-ah BJP sorkar karah khan kan Chief Minister-in theihtawpin ramri dan ti tawp turin a han ngen a, an luhlul tlat a, central-ah an zuk hrilh a, an ti hleithei lova. Zankhat chu khatih lai khan kan Chief Minister hian zanlai dar 12:45 a ni; ka phone a lo ri a, ka harh zawk a, ka la muhil nghet chiah lova, 'i la mu lo maw,' a rawn ti a, 'la mu chiah lo,' ka ti a. 'Engnge pawimawh, sir?' ka ti a. 'Hetiang dan chep kan nih reng chuan Rinte, kawng dang a awm tawh lo; gas kan neih dan te, buhfai kan neih dan te thla hnih khat a ni emaw, kar khat a ni emaw oil kan nghei a ni mai si a, tun hi kan dinhmun a ni tawh a; thenawm ramri kan neih hi kan hriat ve a ngai a ni,' a ti a. 'Burma atangin buhfai, petrol leh oil lak dan lo ngaihtuah rawh; Bangladesh atangin gas lak dan lo ngaihtuah rawh. Chu pa chu i contact ang a, a phone no. chu hei hi a ni; engkim a tihdan tur min rawn hrilh vek a' a ti a. Chuta tang chuan tihdan tur kan ngaihtuah ta a, Mizofed through-in tuna kan MLA zahawm tak Tuirial bialtu Pu Dawngtea hi Mizofed Chairman a nih lai a ni a; 'Pu Dawngte, hei kan hotupa-in hetiang hian a ti si a, nangni agent-ah in tan leh phawt chu a ngai dawn a nih hi. International border dan lovin kan cross a ngai a ni; kan tih a ngai a ni. Hotupa in tih a ngai a ni a tih chuan kan tih a ngai' ka ti a. Pu Dawngtea nen kan vir vat vat a, chu chu, (House-a sawi hi a pawh em ka hre lova,) diesel trip khat leh petrol trip khat kan la lut a, gas pawh a lakluh dan kan ngaihtuah bawh a. MLA zahawm tak Pu Thiamsanga biala mi hman tangkai em emte pawh kan nei a ni. Chutiang chuan kan la lut a, kan lak luh trip khat kha Champhai-ah kan hralh a, trip khat chu Mizofed petrol pump-ah kan hralh a; a hralh pawh kan hralh zo hman lova, central beng a thleng a, Assam sorkar chu

tihlawmin a awm ta a. Chutiang chuan, min dan chepna khulai gate-ah pawh, chhuahin kan awm ta a ni; khaw thim dawn tan tirh vel a nih kha, kan la hriain ka ring.

Henga ka ngaihtuahnaa lo kal thin chu - Ka lungte pawh hi a tichhe thin a; 'Pathian leh kan ram tan' tiin kan ramah Assam Chief Minister, Pu Chaliha'n Mizoram district council mipuite tama kan awm pawh pawh a tih loh avangin 'independent i sual mai ang u, heti ringawt hi chu' tiin MNF party khan independent a sual a, kan hre vek a ni. Chumi hnuah Assam sorkar bawkin min dang chep lehin, 'bawkhupin chibai min buk rawh se' ti niawm fahranin. Amaerawhchu independent pawh sual ngam kan hruaitute, kan hotupain eng pawh huamin 'chu chu ti rawh' a ti a, kan ti mai a; chu chuan vawiin thleng hian kan problem kha a solve chho ta a ni. Pathian-in tun thlengin sorkar turin min ruat a ni a, hei hi 'Pathian remruat a ni' tih hi a chiangin ka hria a, vawiin hian sawiloh theih loh niin ka hria a, ka han sawi a ni.

Food, Civil Supplies & Consumer Affairs department hnuaiiah hian hmalakna sawi tur tam tak a awm a. Gas home delivery te pawh zawhna a awm a kan chhang tawh a, tunah hian kan kalpui mek a ni. Home delivery te hi mipui hian kan ngaihpawimawh a ngai khawp mai; kan ngaih pawimawh chuan kan distributor te pawh hi an fel, mipui tan thahnem an ngai; local council te, YMA te pawhin thahnem an ngai vek; hei hi kan tan awlsamna tur a ni. Gas supply-a kan hnianghnarna tur a nih piah lamah kangmei laka kan himna tur a ni. Gas home delivery kan tih chuan kan hmet zeuh ang a, a lo kal mai dawn a ni. Inzirtirna pawh tam tak kan dawng tawh a, a tihdan a zawh reng theih bawh a. Chutiang chuan, home delivery hi kan tih chuan, delivery boy ten gas an rawn keng ang a, a buk a dik leh dikloh spring balance kengin an rawn ti ang a, 'a buk a dik ngei e' kan ti chuan kan la ang a, regulator te min fit sak ang a, regulator leh gas stove inkara pipe line te a him em tih thlengin min check sak dawn a ni. Tichuan, gas pawh khawl teuh teuh a ngai lo ang a, gas bur 5-10 neih chuan kangmei, in kang a lo awm chuan a puah zawh hma chu thelh pawh kan ngam thin lo a ni. Chu chu vawiina gas *home-delivery* kan ngaihpawimawhna chhan pawh hi a ni. Tin, gas kan hnianghnar a, gas kan hman tam chuan, kan ramngaw, thing leh mau kan tuah thinte a lo tlem ang a, ram ngaw pawh kan siam belh thei dawn a ni. Hei hi khawvel pum ngaihtuahna a nih bakah India ram sorkar ngaihtuahna pawh a, kan state ngaihtuahna pawh a ni.

Hei, kan budget vaibelchhe 400 leh tih bawr vel a ni a, supply department-ah hian vaibelchhe 200 leh tih bawr vel a lo ni a. Mahse, kan budget atang hian hmuh let lehna hi tam tak kan nei a ni. Sale proceed atang te hian pawisa hi kan hmu kir ve leh a, State transport subsidy atang pawhin kan hmu kir a, midday meal carrying charge atang pawh hian subsidy kan hmuh te pawh a awm a, wheat-base nutrition atang pawh hian subsidy kan hmu thin bawh. Kan budget atang hian pawisa tam tak kan hman angin lang mahse, hmuh let leh tam tak kan nei ve a ni. Heng kawngah hian thawktute rinawmlohna chu tam tak a awm thei ang a, rinawm sen loh chang pawh a awm thei ang. Tunah hi chuan a tlangpui thuin central sorkar remruatnain FCI kudam atangin state kudam-ah, state kudam atangin kudam hrang hranga a kaldan zawng zawng hi

nitin kan hmu thei vek tawh a, kan hre thei vek tawh a. Retailer-in a lakchhuah atangin a semchhuah thlengin e-post machine atangin engkim a chhuichhuah theih a ni. A lo chhiat thilah erawh chuan thudang ni se, tih lohah chuan bo thlau a tlem ve hle tan tawh a, heng kawngah pawh hian kan lawm em em a ni.

Tin, *Transformation of Fair-price Shop* chungchangah hian kan fair-price shop te hi tih changtlun a ngai a, India ramah hian fair-price shop association liantak a awm a, central sorkarah demand tam tak pawh an nei a. Keiniah pawh kan fair-price shop te, kan retailer-te hian hlawkna nei se tha kan ti a, theih tawpin kan ngaihtuahpui a ni. Tuna free ration - AAY, PHH kan pek lai mek pawh hi card *eng* leh card *hring* ration an phurhna man hi a vaiin kan pe phawt ang a, central sorkarin 75% min pek let leh tur a ni dawn a, ‘retailer-te hamthatna tur hi theih tawpin kan ngaihtuah pui zel a ni’ tih ka sawilang tel ni se.

Nichinah zawhna a awm a; Zuangtui MuannaVeng kudam hi Sairang-ah sawn tum a ni a, a ram pawh kan ngaihtuah mek a. Reilo teah leifel a nih ka ring a, Direct Purchase Advisory Board ngaihtuah turin tunah hian chhawp luh tawh a ni. Department-in chu chu a leifel chuan, a sakna tur engkim kan Chief Minister-in sum leh pai min pe fel tawh a, sak turin PWD lamin engkim estimate pawh siamin an kalpui chho mek a ni. Member zahawm takte sawi ang khan, Tanhril atanga Zuangtui phurh man kha a lo save tawh dawn a ni. Tuna FCI kudam hi quintal nuai khat dawng thei tura ngaih a ni a, a bul hnai velah khuan ram pawh kan beisei hlawn a, kan hmuh theih chuan a carrying bill pawh hi tlawm tein kan kalpui thei ang a, sum tam tak kan save turah kan ngai a ni.

Pu Speaker, kudam sak hi kan sawi tam ber pawl anih avangin ka han sawi lawk ang a. Grant-in-aid in central atangin kudam 10 sakna tur kan hmu a, kan sa zova, kan luah tawh a; kudam 21 lai NABARD loan pukin kan sa a, kan luah kim tawh a ni. Tin, kudam 23 sakna tur *tentative approval* bakah *administrative approval* kan nei leh tawh a. Zawi zawiin a rawn kal chho leh ang a, nakum lama kudam dang 12 sakna tur pawh min dahsak tawh a ni. Pathian zarah kan sorkar chho leh a ang a, kan sa chho deuh char char dawn a ni.

Tin, Legal Metrology Department hi staff tlemte mah ni ila, kan indaihlo em em a. 2019-2020 ah khan Inspector 5 kan la a, a then chuan hna tha zawk an hmu a, an bansan leh a tunah hian pathum lak theihna tur min pe a, lak kan tum mek a. UDC te pawh min pe leh a kan lawm hle a ni. Working Standard Laboratory hi Tlabung, Chawngte leh Hnahthial-ah kan nei mek a. Tin, Working Standard Laboratory leh Secondary Working Standard Laboratory hi MINECO-ah kan sa a, kan sa zo thawkhat tawh a. Hei hi office leh laboratory building atan hman tumin kan inpuahchah mek a ni. Tin, Saitual leh Khawzawl-ah pawh tunah hian kan sa a, kan sa zo tep tawh a, 90% bawr te chu sak zawh tawha ngaih a ni. Chutiang chuan building kan han nei chho ang a, district tinah a thawktute pawh kan han indaih deuh ang a. Sumdawng ten an thil zawrh, company ten an pack MRP rate chungchang te leh a expire hun endik te, petrol pawlh

dal a nih leh nih loh te, khatiang ang zawng zawng bukna endiktu tur ang chi te pawh hi kan indaih deuh sawt turah kan ngai a.

Chutiang chuan rod size chungchang thleng pawhin heng endikah hian an hmanhlel em em a, case tam tak chinfel te pawh nei tawhin, sum leh paite pawh khanga thil diklo titute pawh eng emaw zah chawitir anni tawh a. Tichuan, tun 2019-2022 chhung hian petrol leh diesel phur tank lorry 8720 endik a ni tawh a ni. Tin, gas cylinder phurtu truck 3978 lai endik a ni tawh a, buk-tinglo phur hi truck 70 man a ni tawh a ni. Tin, cement, iron rod zuartu dawr 326 endik niin, a dik loa zuarte eng emaw zat man niin, pawisa chawitir leh hrem te an lo ni tawh a. Chutiang chuan mipuiin a nih dan tur ang taka dawr bungrua te an chanvo ang an chan theihna turin hmalakna kan nei a ni.

Pu Speaker, kha kha ka department chan pathumte atanga ka sawi theih ni se. Kan department lam chuan, 'kha kha i sawi lova' min ti nak nakin ka ring a, an hnathawhah sawi tur leh chhuan tur tam tak a awm a ni. Amaherawhchu, dar 10 a lo ni dawn tawh a, darkar chanve chhungin ka zo ang ka ti a, a lo ni hauh lo mai a; minute 50 lai mai ka lo sawi tawh a. Ka lo sawi tui deuh aniang e; min hriatthiamna ka ngen a.

Tichuan Pu Speaker, heng ka department chan demand te House zahawm tak hian min pass pui turin karawn ngen a ni e. –

Demand No.	Purpose	Amount (in ₹)
17	Food Civil Supplies & Consumer Affairs	2,70,20,65,000.00
19	Local Administration	1,82,04,87,000.00
35	Fisheries	10,55,59,000.00
TOTAL		4,62,81,11,000.00

Ka lawm e.

SPEAKER : Aw le; tunah chuan kan Minister zahawm tak Pu K. Lalrinliana demand-te –

Demand No.	Purpose	Amount (in ₹)
17	Food Civil Supplies & Consumer Affairs	2,70,20,65,000.00
19	Local Administration	1,82,04,87,000.00
35	Fisheries	10,55,59,000.00
TOTAL		4,62,81,11,000.00

House-ah pass turin arawn dil a. Remti apiangin, 'remti' ti rawh ule. (**Memberte:** Remti) Remtilo kan awm em? Kan awm chuan, 'remtilo' ti ula. (*Rem tilo an awm lova*)

Awle, Minister zahawm tak Pu K. Lalrinliana chan department-te Demand –

Demand No.	Purpose	Amount (in ₹)
17	Food Civil Supplies & Consumer Affairs	2,70,20,65,000.00
19	Local Administration	1,82,04,87,000.00
35	Fisheries	10,55,59,000.00
TOTAL		4,62,81,11,000.00

House-in lungrual takin a *pass* ta a ni. (**Pu K. Lalrinliana, Minister:** Pu Speaker, ka lawm e.)

Awle, kan chawlh hmain, legislature party hrang hrang ten ziakin kan chawlh dan tur an rawn ziaik a; kan tlai ta sa sa I rel lawk teh ang u.

Member zahawm tak Legislature Party Leader Pu Zodintluanga te, Pu Lalduhoma leh kan Secretary ruling ho atangin Dr. L. Thangmawia ten hming an rawn sign a. Naktuk leh Ni 27 leh 28-ah hian tlai 6:30 thleng discussion nei ila, chutah chuan chawl ta ila, chaw pangngai ei ta ila an ti a; a dik ve chiah mai a. Tunah hian kei phei chu engmah ka ei lo a ni. Nichina mi kha ka ei thei ve tlat lova, a rum lutuk a, a mawm si a, ka ril chu a tam khawp a ni. Mahse ram tan kan thawk law law a.

Tichuan, heti hian ka sawi duh a - Vawiin khan member 25-in in sawi a ni. Ka hriat ve theih chinah chuan sawi tam ber tum a la ni. Ruling lam hian an sawi ve vak vak ngailo tlangpui a, mahse member te zalenna a ni.

Tunah chuan, tv te a lo awm tawh a, in khel vek tawh mai si a ti raw u; tlang deuhin ka sawi ang. Tichuan, ka sawi leh duh chu - minute 10 kan inpe a, in pel deuh vek a ni. Member zahawm tak Dr BD Chakma leh Pu Lalchhuanthanga chauhin in pel lova, Pu Nihar, nag pawhin i pel, minute hnihin; tin, Pu Dawngtea'n minute khatin a pel a, Pu C. Lalmuanpuia'n minute khatin a pel bawk a ni. Tichuan, pel lovin minute hnih la awmah warning pe ta ila, a dik tak hmang ta ila, dar 5 ah kan chawl var var thei; kan thawl zaih, tah chuan, kan group leader pahnihte minute 5 ve ve pek belhin. Chu chu tha kan ti em? Strict deuhin kan ham tawh ang, a timing a hi. A tha kan ti em? Minute in pelh avanga in tlin leh tlin lohna a kaww dawn lo reng reng. Khatianga in tih chuan, kei leh Dy. Speaker hi kan tla tawp dawn a nia, kan sawi ve reng reng si lova.

Tichuan, strict deuhin hun hmang ta ila, naktuk atang chuan dar 5 ah chawl ila, 5:30 PM ah lut leh ta ila, eitur erawh chu 'tuhnai tak kan siam tawh ang' kan ti a. Tha kan ti mai em? Legislature party leader te khan tha in ti em? Anni khan dar 6 :30 PM-a chawlh an rawn ti a. Dar 6 :30 PM a chawlh, dinner pangngai ei a tha kan ti tlang a. Hei hian, 'ei tur order timing a khawih avangin i hnenah kan rawn thlen a, hei hi min tihsak theih chuan' an ti a; dar 5:00 PM ah kan zo thei a ni. Hun dik taka kan hmana, laklawh palhin sentence pangaia chawlh hma deuh a nih pawhin, dar 5:00 PM a chawl

turin kan hman ang; chu chu tha kan ti em? (*Memberte'n tha an ti a*) Anih leh tichuan ti ang aw.

Awle vawiina kan tih tur chu kan lo zo leh ta a, kan chawl ang a. Naktuk, February Ni 23, 2023 (Chawhma dar 10:30) ah kan thukhawm leh dawn nia.

Sitting is adjourned. (**10:04 PM**)